



SANCTISSIMI D. N. PII PP. IX.

# EPISTOLA ENCYCLICA

DATA

DIE VIII. DECEMBRIS MDCCCLXIV.

AD OMNES CATHOLICOS ANTISTITES

UNACUM

SYLLABO PRÆCIPUORUM ETATIS NOSTRÆ ERRORUM

ET

ACTIS PONTIFICIS

EX QUIBUS EXCERPTUS EST SYLLABUS.

ACCEDIT

## APPENDIX

ANTIQUIORA ET NOVISSIMA DOCUMENTA CONTINEANS QUÆ AD EPISTOLAM  
ENCYCLICAM ET SYLLABUM REFERUNTUR.

H&SS  
A  
6063

RATISBONÆ, MDCCCLXV.

SUMPTIBUS, CHARTIS ET TYPIS FRIDERICI PUSTET,  
S. SEDIS APOSTOL. TYPOGRAPHI.

desselben Verlegers für den Privatgebrauch des  
hochw. Clerus aller Länder.

(Ausser den unten speciell bezeichneten Einbänden „wird auf Verlangen auch jede andere beliebige Einbände-  
gattung stets prompt und billig von mir besorgt und  
sind in solchen Fällen mir die dafür zu leistenden mög-  
lichen Preise genau anzugeben. Die eigens für diese  
Ausgaben gepressten, in reichem gothischen Style aus-  
gearbeiteten Lederdecken und Beschläge nebst Schlies-  
sen stehen auch apart zu Diensten.)

**Breviarium Romanum** etc. Cum additamentis novissimis. In Quarto. 4 vol. Cum Approbatione Congregationis S. Rituum.

		fl. kr.	Thlr. ngr.
Ausgabe	I. Roth- und Schwarzdruck	22 30	— 14 —
"	II. Dasselbe mit 4 herrlich. Farbendrucktiteln	30	— — 18 —
"	III. Dasselbe mit 4 herrlich. Farbendrucktiteln u. den gross. Vignett. der Haupt- feste colorirt	65	— — 38 —
"	IV. Dasselbe mit 4 herrlich. Farbendruckt. u. sämmtl. Vignett., Initial. &c., col.	90	— — 52 —

Einbände, die apart berechnet werden:

Nro. 1	in schwarz. glatt. Leder m.	roth. Schnitt n.	12 24	7 5
" 2	" "	" Goldschnitt n.	14 24	8 10
" 3	" ehaenirte Schaflederdecke mit Relief- pressung und Goldschnitt	"	18 40	11 —
" 4	" rothe Safianderdecke mit Reliefpressung und Goldschnitt	"	21 36	13 —

Zu sämtl. Einbänd. wird eine schützende Enveloppe beigegeb.

**Proprien** hiezu, in 4 Theile getheilt, roth und schwarz:

	fl.	kr.	Thlr.	ngr.		fl.	kr.	Thlr.	ngr.
Chile	—	30	—	10	Portugal und	—	—	—	—
England	1	48	—	10	Brasilien	3	—	2	—
Irland	1	12	—	22½	Spanien	3	50	—	2
Lima	—	50	—	10	Trient	1	12	—	22½
Mexico	2	12	—	10	Ungarn	2	24	—	10
Polen, Schwe-	—	—	—	—	Franziskaner	4	48	—	20
den, Russland	3	—	—	2	Jesuiten	2	24	—	10

Unsere Ausgabe bietet reelle Vorzüge, welche ihr ganz allein eigen sind. a) In liturgischer Beziehung: „Den vollständigen Abdruck aller Psalmen bei sämmtlichen, in den Nocturnen mit eigenen Antiphonen versehenen Officien; genaue Tonangabe bei allen Psalmen, sowie unverkürzte Aufnahme aller Responsorien nach den Lectionen, dergleichen aller Capitel und Orationen; die stets in loco vorgenommene vollständige Einschaltung aller Commemorationen mit ihren Antiphonen, Verskeln und Orationen; den consequent durchgeführten Wiederabdruck aller Hymnen, sowohl bei Matutin und Landes als bei den Vespern, sowie das Einrücken der Capitel und Responsoria brevia bei den Horen eine gewiss überall willkommene Beigabe in der am Schlusse jeden Bandes angefügten Preparatio ad Missam et Gratiarum actio post Missam, wie solche in dieser reichhaltigen Weise bestimmt in keiner Brevier-Ausgabe sich findet etc.“ b) In technischer Beziehung: „Eine auch für schwache Augen gut leserliche, grössere Schrift in vorzüglichem Schwarz- und Rothdruck, auf starkem, satinirtem und nicht zu weissem Papiere mit würdigen Bildern, Vignetten und Initialen; Praktische Abgränzung der Absätze und hervorragende Rubrikschriften, wodurch namentlich beim Chorgebete möglichen Versehen vorgebeugt wird; neue Zeilenanfänge bei allen Antiphonen, Verskeln und Responsorien etc. etc.“

## Livres Liturgiques illustrés

du même éditeur pour l'usage privé du  
clergé de tous les pays.

(Nous aurons toujours en magasin ou  
ferons exécuter sur commande tous les  
genres de reliure usités pour les livres  
liturgiques. De plus, nous pourrons tou-  
jours offrir au public, pour nos éditions,  
une reliure spéciale avec des dessins  
mis en harmonie avec le style de la  
publication elle-même.)

No. I. Rouge et noir, texte encadré, 71 têtes de page et 146 initial. et vignet. gravées 50 Frs.

No. II. Le même avec 4 magnifiques frontispic. en couleurs 70 „

No. III. Le même avec 4 frontispices, et les têtes de page avec leurs initiales etc., enluminées à la main, net 150 „

No. IV. Le même avec 4 frontispices, les têtes de page et toutes les vignettes et initial. à sujets etc., enluminées à la main, net 200 „

**Supplémens, en rouge et noir, divisés en 4 parties :**

	<i>Frs. net.</i>		<i>Frs. net.</i>
Angleterre	4,00	Lina	1,00
Bois le-Duc	3,00	Mexique	4,50
Breda sous presse		Pologne, Suède,	
Chili	1,00	Russie	6,00
Espagne	7,50	Portugal, Brésil, etc.	10,00
Hartem	3,00	Ruremonde	2,00
Hongrie	5,00	Société de Jésus	5,00
blonde	3,00	Utrecht	3,00

**Officium novum Immaculatae Concept.**  
en 4 part. 1,00 net

Les Psaumes des Offices qui ont des Antiennes propres, ainsi que les Commémoraisons avec leurs Antiennes, leurs Versets et leurs Oraisons, les Hymnes des Laudes et Vêpres, et les R. br. des petites Heures y sont intégralement et toujours répétés. L'intonation des Psaumes est exactement indiquée; tous les Répons des Leçons sont en entier, de même que les Capitules et les Oraisons. Chaque volume se termine par la préparation à la messe et l'action de grâce après la messe. Les caractères sont parfaitement appropriés à l'usage du livre, et les blancs et interlignes sont partout ménagés avec une économie qui jette dans les pages toute la clarté possible. Les Antiennes, Versets et leurs Répons commencent toujours avec la ligne. Enfin il n'y a pas jusqu'au système de la pagination adopté qui n'offre un avantage réel etc.

SANCTISSIMI D. N. PII PP. IX.

# EPISTOLA ENCYCLICA

DATA

DIE VIII. DECEMBRIS MDCCCLXIV. <sup>11</sup>

AD OMNES CATHOLICOS ANTISTITES

UNACUM

SYLLABO PRÆCIPUORUM ÆTATIS NOSTRÆ ERRORUM

ET

ACTIS PONTIFICIS

EX QUIBUS EXCERPTUS EST SYLLABUS.

ACCEDIT

## APPENDIX

ANTIQUIORA ET NOVISSIMA DOCUMENTA CONTINENS QUÆ AD EPISTOLAM  
ENCYCLICAM ET SYLLABUM REFERUNTUR.

25833893  
4# 31 1865  
RATISBONÆ, MDCCCLXV.

SUMPTIBUS, CHARTIS ET TYPIS FRIDERICI PUSTET, #  
S. SEDIS APOSTOL. TYPOGRAPHI.

***Royal Ontario Museum of Mineralogy***

FROM THE LIBRARY OF  
THE LATE DR. OTTO HAHN  
PRESENTED BY HIS SON  
PAUL HAHN ESQ., OF TORONTO

654864

19. 3. 57



## Editores Romani Lectori.

Postquam in lucem editus est Syllabus propositionum, quas Ss. D. N. Pius PP. IX. in plerisque Pontificatus sui Actis, ceu praecipua aetatis nostrae errorum capita notaverat; nonnullis visum est operae pretium futurum, si una cum Syllabo illa ipsa documenta coniungerentur, et veluti unum corpus in vulgus prodirent. Raros enim totam illam tum Litterarum encyclicarum, tum Allocutionum multitudinem, in quibus Syllabi propositiones reprobantur, possidere credibile est: et tamen eas conferre omnino oportet, siqui verum sensum, in quo illae sententiae pontificia auctoritate perstringuntur, elicere velint.

Accedit etiam, quod ingens quaedam commotio perditorum hominum hanc sollemnem promulgationem subsecuta est: quippe quamvis et alias iidem errores proscripti fuissent, haec tamen uno ictu unoque tempore iacta in universos pontificia censura, mirum in modum ipsorum animos pupugit. Quapropter, cum reluctari adversus exploratam veritatem difficillimum sit, obscurare autem veritatem facillimum; hoc consuetum causae suae remedium poposcerunt, supremi Pontificis sententias pervertere, eiusque auctoritatem et magisterium in invidiam adducere. Quod iniquissimum pugnandi artificium per se satis opportunum simpliciorum animis captandis, eludetur sane, si pontificiae declarationes nativa se luce iis in primis se prodent, qui alios veritatem edocere officio suo tenentur.

Haec itaque animo nostro reputantes, tam facile opus, gratissimum bonis omnibus, necessarium vero aut valde utile iis qui curant animarum salutem, non esse ommittendum arbitrati sumus. Evulgamus igitur Syllabum editum die octava mensis Decembris, unaque cum illo Acta omnia pontificia, in quibus recensitae propositiones merito exploduntur. Qua in re, ut lectorum utilitati melius per nos consultum foret, unicuique propositioni subiecta est allegatio documenti pontificii, ad quod refertur, et paginae numerus in qua documentum initium sumit. Acta vero, quae subsequuntur, ordine ipso temporum, quo lata sunt, recensentur.

---

## Editor Ratisbonensis Lectori.

Editioni Romanae Actorum, ex quibus excerptus est Syllabus praecipuorum nostrae aetatis errorum, deerat Epistola Encyclica Ss. D. N. Pii IX. d. d. 8. Decembris 1864, in qua viginti alii aetatis nostrae errores recensentur et proscribuntur; deerat epistola Emi. Cardinalis Jacobi Antonelli ad omnes catholicos Antistites, qua Syllabi istius conficiendi ratio exhibetur. Has ergo Editioni nostrae Ratisbonensi praefigere voluimus.

Adiecimus alia Acta, Allocutiones videlicet et Litteras Apostolicas, quae licet in Syllabo non citentur, tamen errores in eodem notatos apertissime etiam arguunt, damnant, catholicam veritatem errori oppositam adstruunt et defendunt, atque idcirco ad pleniorum Actorum cognitionem opportuna vel necessaria videbantur. Quae additamenta ut primo obtutu cuique appareant, asteriscis signavimus.

In Appendice vero Epistolam Encyclicam qua b. m. Gregorius XVI. catholicos Antistites initio Pontificatus sui salutavit, quaeque in Encyclicis Litteris d. d. 8. Decembris 1864 bis allegata simile prorsus cum iisdem argumentum prosequitur, aliaque documenta retulimus, quae sive ad illam Epistolam spectant, sive ad philosophicos praesertim aetatis huius errores clarius dignoscendos conducunt.

Addimus Epistolas Apostolicas, quae Ecclesiae iura in Bavariae Regno nuperrime in discrimen adducta vindicant, variasque propositiones in Syllabo notatas iterum perstringunt.

Concludimus referentes novissimae Pontificiae Allocutionis verba, quibus catholici Antistites summopere laudantur, quod invicto animo suum cum Pontifice consensum in publicanda, exponenda et vindicanda Epistola Encyclica d. d. 8. Decembris 1864 egregie manifestaverint.

Pluribus tandem accuratisque Indicibus et Summariis libri usum promptiorem reddere studuimus.

---

**Venerabilibus Fratribus Patriarchis, Prælatibus, Archiepiscopis,  
et Episcopis universis**

**Gratiam et Communionem Apostolicæ Sedis habentibus.**

## **PIUS PP. IX.**

**Venerabiles Fratres, Salutem et Apostolicam Benedictionem.**

**Q**uanta cura ac pastorali vigilantia Romani Pontifices Prædecessores Nostri exsequentes demandatum sibi ab ipso Christo Domino in persona Beatissimi Petri Apostolorum Principis officium, munusque pascendi agnos et oves, nunquam intermiserint universum Dominicum gregem sedulo enutrire verbis fidei, ac salutari doctrina imbueri, eumque ab venenatis pascuis arcere, omnibus quidem ac Vobis præsertim compertum, exploratumque est, Venerabiles Fratres. Et sane iidem Decessores Nostri augustæ catholicæ religionis, veritatis ac justitiæ assertores et vindices, de animarum salute maxime solliciti, nihil potius unquam habuere, quam sapientissimis suis Litteris et Constitutionibus retere et damnare omnes hæreses et errores, qui Divinæ Fidei nostræ, catholicæ Ecclesiæ doctrinæ, morum honestati, ac sempiternæ hominum salutis adversi, graves frequenter excitant tempestates, et christianam civilemque rempublicam miserandum in modum funestarunt. Quocirca iidem Decessores Nostri Apostolica fortitudine continenter obstiterunt nefariis iniquorum hominum molitionibus, qui despumantes tamquam fluctus feri maris confusiones suas, ac libertatem promittentes, cum servi sint corruptionis, fallacibus suis opinionibus et perniciosissimis scriptis catholicæ religionis civilisque societatis fundamenta convellere, omnemque virtutem ac justitiam de medio tollere, omniumque animos mentesque depravare, et incautos, imperitamque præsertim juventutem a recta morum disciplina avertere, eamque miserabiliter corrumpere, in erroris laqueos inducere, ac tandem ab Ecclesiæ catholicæ sinu avellere conati sunt.

Jam vero, uti Vobis, Venerabiles Fratres, apprime notum est, Nos vix dum arcano divinæ providentiæ consilio nullis certe Nostri meritis ad hanc Petri Cathedram evecti fuimus, cum videremus summo animi Nostri dolore horribilem sane procellam tot pravis opinionibus excitatam, et gravissima ac nunquam satis lugenda damna, quæ in christianum populum ex tot erroribus redundant, pro Apostolici Nostri ministerii officio illustra Prædecessorum Nostrorum vestigia sectantes Nostram extulimus vocem, ac pluribus in vulgus editis encyclicis Epistolis, et Allocutionibus in Consistorio habitis, aliisque Apostolicis Litteris præcipuos tristissimæ nostræ ætatis errores damnavimus, eximiamque

vestram episcopalem vigilantiam excitavimus, et universos catholicae Ecclesiae Nobis carissimos filios etiam atque etiam monuimus et exhortati sumus, ut tam dirae contagia pestis omnino horrerent et devitarent. Ac praesertim Nostra prima Encyclica Epistola die 9. Novembris anno 1846 Vobis scripta, binisque Allocutionibus, quarum altera die 9. Decembris anno 1854, altera vero 9. Junii anno 1862 in Consistorio a Nobis habita fuit, monstrosa opinionum portenta damnavimus, quae hac potissimum aetate cum maximo animarum damno, et civilis ipsius societatis detrimento dominantur, quaeque non solum catholicae Ecclesiae, ejusque salutari doctrinae ac venerandis juribus, verum etiam sempiternae naturali legi a Deo in omnium cordibus insculptae, rectaeque rationi maxime adversantur, et ex quibus alii prope omnes originem habent errores.

Etsi autem haud omiserimus potissimos hujusmodi errores saepe proscribere et reprobare, tamen catholicae Ecclesiae causa, animarumque salus Nobis divinitus commissa, atque ipsius humanae societatis bonum omnino postulant, ut iterum pastorem vestram sollicitudinem excitemus ad alias pravas profligandas opiniones, quae ex eisdem erroribus, veluti ex fontibus erumpunt. Quae falsae ac perversae opiniones eo magis detestandae sunt, quod eo potissimum spectant, ut impediatur et amoveatur salutaris illa vis, quam catholica Ecclesia ex divini sui Auctoris institutione et mandato libere exercere debet usque ad consummationem saeculi, non minus erga singulos homines, quam erga nationes, populos, summosque eorum Principes, utque de medio tollatur mutua illa inter Sacerdotium et Imperium consiliorum societas et concordia, quae rei cum sacrae tum civili fausta semper exitit ac salutaris<sup>1)</sup>.

Etenim probe noscitis, Venerabiles Fratres, hoc tempore non paucos reperiri, qui civili consortio impium absurdumque *naturalismi*, uti vocant, principium applicantes audent docere, „optimam societatis publicae rationem, civilemque progressum omnino requirere, ut humana societas constituatur et gubernetur, nullo habito ad religionem respectu, ac si ea non existeret, vel saltem nullo facto veram inter falsasque religiones discrimine.“ Atque contra sacrarum Litterarum, Ecclesiae, sanctorumque Patrum doctrinam, asserere non dubitant, „optimam esse conditionem societatis, in qua Imperio non agnoscitur officium coercendi sancitis poenis violatores catholicae religionis, nisi quatenus pax publica postulet.“

Ex qua omnino falsa socialis regiminis idea haud timent erroneam illam fovere opinionem, catholicae Ecclesiae, animarumque saluti maxime exitialem, a rec. mem. Gregorio XVI. Praedecessore Nostro *deliramentum* appellatam<sup>2)</sup>, nimirum „libertatem conscientiae et cultuum esse proprium cujuscumque hominis jus, quod lege proclamari et asseri debet in omni recte constituta societate; et jus civibus inesse ad omnimodam libertatem nulla vel ecclesiastica vel civili auctoritate coarctandam, quo suos conceptus quoscumque sive voce, sive typis, sive alia ratione palam publiceque manifestare, ac declarare valeant.“ Dum vero

<sup>1)</sup> Gregor. XVI. Epist. encycl. *Mirari*. 15. Aug. 1832.

<sup>2)</sup> Eadem encycl. *Mirari*.

id temere affirmant, haud cogitant et considerant, quod *libertatem perditionis* <sup>1)</sup> praedicant, et quod „si humanis persuasionibus semper „disceptare sit liberum, nunquam deesse poterunt, qui veritati audeant „resultare, et de humanae sapientiae loquacitate confidere, cum hanc „nocentissimam vanitatem quantum debeat fides et sapientia christiana „vitare, ex ipsa Domini nostri Jesu Christi institutione cognoscat <sup>2)</sup>“.

Et quoniam ubi a civili societate fuit amota religio, ac repudiata divinae revelationis doctrina et auctoritas, vel ipsa germana justitiae humanique juris notio tenebris obscuratur et amittitur, atque in verae justitiae legitimique juris locum materialis substituitur vis, inde liquet cur nonnulli, certissimis sanae rationis principiis penitus neglectis posthabitisque, audeant conclamare, „voluntatem populi, publica, quam dicunt, opinione vel alia ratione manifestatam, constituere supremam legem ab omni divino humanoque jure solutam; et in ordine politico facta consummata, eo ipso quod consummata sunt, vim juris habere.“ Verum ecquis non videt, planeque sentit, hominum societatem, religionis ac verae justitiae vinculis solutam, nullum aliud profecto propositum habere posse, nisi scopum comparandi, cumulandique opes, nullamque aliam in suis actionibus legem sequi, nisi indomitam animi cupiditatem, inserviendi propriis voluptatibus et commodis?

Eapropter hujusmodi homines acerbo sane odio insectantur Religiosas Familias, quamvis de re christiana, civili ac litteraria summo opere meritas, et blaterant, easdem nullam habere legitimam existendi rationem; atque ita haereticorum commentis plaudunt. Nam, ut sapientissime rec. mem. Pius VI. Decessor Noster docebat, „Regularium „abolitio laedit statum publicae professionis consiliorum evangelicorum, „laedit vivendi rationem in Ecclesia commendatam tamquam Apostolicae doctrinae consentaneam, laedit ipsos insignes fundatores, quos „super altaribus veneramur, qui nonnisi a Deo inspirati eas constituerunt „societates <sup>3)</sup>“. Atque etiam impie pronunciant, auferendam esse civibus et Ecclesiae facultatem „qua eleemosynas christianae caritatis causa palam erogare valeant,“ ac de medio tollendam legem „qua certis aliquibus diebus opera servilia propter Dei cultum prohibentur,“ fallacissime praetexentes, commemoratam facultatem et legem optinae publicae oeconomiae principiis obsistere.

Neque contenti amovere religionem a publica societate, volunt religionem ipsam a privatis etiam arcere familiis. Etenim funestissimum *Communismi* et *Socialismi* docentes ac profitentes errorem asserunt, „societatem domesticam seu familiam totam suae existantiae rationem a jure dumtaxat civili mutuari; proindeque ex lege tantum civili dimanare ac pendere jura omnia parentum in filios, cum primis vero jus institutionis, educationisque curandae.“

Quibus impiis opinionibus, machinationibusque in id praecipue intendunt fallacissimi isti homines, ut salutifera catholicae Ecclesiae doctrina ac vis a juventutis institutione et educatione prorsus eliminetur,

<sup>1)</sup> S. Augustin. Epist. 105 al. 166.

<sup>2)</sup> S. Leo Epist. 164 al. 133. §. 2. edit. Ballerin.

<sup>3)</sup> Epist. ad Card. De la Rochefoucault 10. Martii 1791.

ac teneri flexibilesque juvenum animi perniciosis quibusque erroribus, vitiisque misere inficiantur ac depraventur. Siquidem omnes, qui rem tum sacram, tum publicam perturbare, ac rectum societatis ordinem evertere, et jura omnia divina et humana delere sunt conati, omnia nefaria sua consilia, studia et operam in improvidam praesertim juventutem decipiendam ac depravandam, ut supra innuimus, semper contulerunt, omnemque spem in ipsius juventutis corruptela collocarunt. Quocirca nunquam cessant utrumque clerum, ex quo, veluti certissima historiae monumenta splendide testantur, tot magna in christianam, civilem et litterariam rempublicam commoda redundarunt, quibuscumque infandis modis divexare, et edicere, ipsum Clerum, „utpote vero, utilique scientiae et civilitatis progressui inimicum, ab omni juventutis instituendae educandaeque cura et officio esse amovendum.“

At vero alii instaurantes prava ac toties damnata novatorum commenta, insigni impudentia audent, Ecclesiae et hujus Apostolicae Sedis supremam auctoritatem a Christo Domino ei tributam civilis auctoritatis arbitrio subjicere, et omnia ejusdem Ecclesiae et Sedis jura denegare circa ea quae ad exteriorem ordinem pertinent. Namque ipsos minime pudet affirmare, „Ecclesiae leges non obligare in conscientia, nisi cum promulgantur a civili potestate; acta et decreta Romanorum Pontificum ad religionem et Ecclesiam spectantia indigere sanctione et approbatione, vel minimum assensu potestatis civilis; constitutiones Apostolicas<sup>1)</sup>, quibus damnantur clandestinae societates, sive in eis exigatur, sive non exigatur juramentum de secreto servando, earumque asseclae et fautores anathemate mulentur, nullam habere vim in illis orbis regionibus, ubi ejusmodi aggregationes tolerantur a civili gubernio; excommunicationem a Concilio Tridentino et Romanis Pontificibus latam in eos, qui jura possessionesque Ecclesiae invadunt, et usurpant, niti confusione ordinis spiritualis, ordinisque civilis ac politici, ad mundanum dumtaxat bonum prosequendum; Ecclesiam nihil debere decernere, quod obstringere possit fidelium conscientias in ordine ad usum rerum temporalium; Ecclesiae jus non competere violatores legum suarum poenis temporalibus coercendi; conforme esse sacrae theologiae, jurisque publici principiis, bonorum proprietatem, quae ab Ecclesiis, a Familiis religiosis, aliisque locis piis possidentur, civili gubernio asserere et vindicare.“

Neque erubescunt palam publiceque profiteri haereticorum effatum et principium, ex quo tot perversae oriuntur sententiae, atque errores. Dictitant enim, „Ecclesiasticam potestatem non esse jure divino distinctam et independentem a potestate civili, neque ejusmodi distinctionem et independentiam servari posse, quin ab Ecclesia invadantur et usurpentur essentialia jura potestatis civilis.“

Atque silentio praeterire non possumus eorum audaciam, qui sanam non sustinentes doctrinam contendunt, „illis Apostolicae Sedis judiciis et decretis, quorum objectum ad bonum generale Ecclesiae, ejusdem jura ac disciplinam spectare declaratur, dummodo fidei morumque

<sup>1)</sup> Clementis XII. „*In eminenti*.“ Benedicti XIV. „*Providas Romanorum*.“ Pii VII. „*Ecclesiam*.“ Leonis XII. „*Quo graviora*.“

dogmata non attingat, posse assensum et obedientiam detrectari absque peccato, et absque ulla catholicae professionis jactura.<sup>4</sup> Quod quidem quantopere adversetur catholico dogmati plenae potestatis Romano Pontifici ab ipso Christo Domino divinitus collatae, universalem pascendi, regendi et gubernandi Ecclesiam, nemo est qui non clare aperteque videat et intelligat.

In tanta igitur depravatarum opinionum perversitate, Nos Apostolici Nostri officii probe memores, ac de sanctissima nostra religione, de sana doctrina et animarum salute Nobis divinitus commissae, ac de ipsius humanae societatis bono maxime solliciti, Apostolicam Nostram vocem iterum extollere existimavimus. Itaque omnes et singulas pravas opiniones ac doctrinas singillatim hisce Litteris commemoratas auctoritate Nostra Apostolica reprobamus, proscribimus atque damnamus, easque ab omnibus catholicae Ecclesiae filiis, veluti reprobatae, proscriptae atque damnatae omnino haberi volumus et mandamus.

Ac praeter ea, optime scitis, Venerabiles Fratres, hisce temporibus omnis veritatis iustitiaeque osores, et acerrimos nostrae religionis hostes, per pestiferos libros, libellos et ephemerides toto terrarum orbe dispersas populis illudentes, ac malitiose mentientes, alias impias quasque disseminare doctrinas. Neque ignoratis, hac etiam nostra aetate nonnullos reperiri, qui satanae spiritu permoti et incitati eo impietatis devenerunt, ut Dominatorem Dominum nostrum Jesum Christum negare, ejusque Divinitatem scelerata procacitate oppugnare non paveant. Hic vero haud possumus, quin maximis meritisque laudibus Vos efferamus, Venerabiles Fratres, qui episcopalem vestram vocem contra tantam impietatem omni zelo attollere minime omisistis.

Itaque hisce Nostris Litteris Vos iterum amantissime alloquimur, qui in sollicitudinis Nostrae partem vocati, summo Nobis inter maximas Nostras acerbitates solatio, laetitiae et consolationi estis propter egregiam, qua praestatis religionem, pietatem, ac propter mirum illum amorem, fidem et observantiam, qua Nobis et huic Apostolicae Sedi concordissimis animis obstricti gravissimum episcopale vestrum ministerium strenue ac sedulo implere contenditis. Etenim ab eximio vestro pastoralis zelo exspectamus, ut assumentes gladium spiritus, quod est verbum Dei, et confortati in gratia Domini nostri Jesu Christi, velitis ingeminatis studiis quotidie magis prospicere, ut fideles curae vestrae concrediti „abstineant ab herbis noxiis, quas Jesus Christus non colit, „quia non sunt plantatio Patris<sup>1)</sup>.“ Atque eisdem fidelibus inculcare nunquam desinite, omnem veram felicitatem in homines ex augusta nostra religione, ejusque doctrina et exercitio redundare, ac beatum esse populum, cujus Dominus Deus ejus<sup>2)</sup>. Docete, „catholicae Fidei „fundamento regna subsistere<sup>3)</sup>, et nihil tam mortiferum, tam praeceps „ad casum, tam expositum ad omnia pericula, si hoc solum nobis „putantes posse sufficere, quod liberum arbitrium, cum nasceremur, „accepimus, ultra jam a Domino nihil quaeramus, id est, auctoris nostri

<sup>1)</sup> S. Ignatius M. ad Philadelph. 3.

<sup>2)</sup> Psalm. CXLIII.

<sup>3)</sup> S. Caelest. epist. 22. ad Synod. Ephes., apud Const. pag. 1200.

„obliti, ejus potentiam, ut nos ostendamus liberos, abjuremus<sup>1)</sup>.“ Atque etiam ne omittatis docere, „regiam potestatem non ad solum mundi „regimen, sed maxime ad Ecclesiae praesidium esse collatam<sup>2)</sup>, et nihil „esse quod civitatum Principibus et Regibus majori fructui, gloriaeque „esse possit, quam si, ut sapientissimus fortissimusque alter Prae-  
cessor Noster S. Felix Zenoni Imperatori perscribebat, Ecclesiam „catholicam . . . sinant uti legibus suis, nec libertati ejus quemquam „permittant obsistere . . . Certum est enim, hoc rebus suis esse salu-  
tare, ut, cum de causis Dei agatur, juxta ipsius constitutum regiam „voluntatem Sacerdotibus Christi studeant subdere, non praeferre<sup>3)</sup>.“

Sed si semper, Venerabiles Fratres, nunc potissimum in tantis Ecclesiae, civilisque societatis calamitatibus, in tanta adversariorum contra rem catholicam et hanc Apostolicam Sedem conspiratione, tantaque errorum congerie, necesse omnino est, ut adeamus cum fiducia ad thronum gratiae, ut misericordiam consequamur, et gratiam inveniamus in auxilio opportuno. Quocirca omnium fidelium pietatem excitare existimavimus, ut una Nobiscum Vobisque clementissimum luminum et misericordiarum Patrem ferventissimis humillimisque precibus sine intermissione orent et obsecrent, et in plenitudine fidei semper confugiant ad Dominum nostrum Jesum Christum, qui redemit nos Deo in sanguine suo, Ejusque dulcissimum Cor flagrantissimae erga nos caritatis victimam enixe jugiterque exorent, ut amoris sui vinculis omnia ad seipsum trahat, utque omnes homines sanctissimo suo amore inflammati secundum Cor Ejus ambulent digne, Deo per omnia placentes, in omni bono opere fructificantes.

Cum autem sine dubio gratiores sint Deo hominum preces, si animis ab omni labe puris ad ipsum accedant, iccirco caelestes Ecclesiae thesauros dispensationi Nostrae commissos Christifidelibus Apostolica liberalitate reserare censuimus, ut iidem fideles ad veram pietatem vehementius incensi, ac per Poenitentiae Sacramentum a peccatorum maculis expiati, fidentius suas preces ad Deum effundant, ejusque misericordiam et gratiam consequantur.

Hisce igitur Litteris auctoritate Nostra Apostolica omnibus et singulis utriusque sexus catholici orbis fidelibus Plenariam Indulgentiam ad instar Jubilaei concedimus intra unius tantum mensis spatium usque ad totum futurum annum 1865 et non ultra, a Vobis, Venerabiles Fratres, aliisque legitimis locorum Ordinariis statuendum, eodem prorsus modo et forma, qua ab initio supremi Nostri Pontificatus concessimus per Apostolicas Nostras Litteras in forma Brevis die 20. mensis Novembris anno 1846 datas et ad universum episcopalem vestrum Ordinem missas, quarum initium „Arcano Divinae Providentiae consilio“, et cum omnibus eisdem facultatibus, quae per ipsas Litteras a Nobis datae fuerunt. Volumus tamen, ut ea omnia serventur, quae in commemoratis Litteris praescripta sunt, et ea excipiantur, quae excepta esse declaravimus. Atque id concedimus, non obstantibus in contrarium facientibus

<sup>1)</sup> S. Innocent. I. epist. 29. ad Episc. Conc. Carthag., apud Coust. pag. 891.

<sup>2)</sup> S. Leo Epist. 156. al. 125.

<sup>3)</sup> Pius VII. Epist. encycl. *Diu scitis*. 15. Mali 1800.



quibuscumque, etiam speciali et individua mentione ac derogatione dignis. Ut autem omnis dubitatio et difficultas amoveatur, earumdem Litterarum exemplar ad Vos perferri jussimus.

„Rogemus, Venerabiles Fratres, de intimo corde et de tota mente misericordiam Dei, quia et ipse addidit dicens: Misericordiam autem meam non dispergam ab eis. Petamus et accipimus, et si accipiendi mora et tarditas fuerit, quoniam graviter offendimus, pulsemus, quia et pulsanti aperietur, si modo pulsant ostium preces, gemitus et lacrymae nostrae, quibus insistere et immorari oportet, et si sit unanimes oratio . . . unusquisque oret Deum non pro se tantum, sed pro omnibus fratribus, sicut Dominus orare nos docuit <sup>1)</sup>.“ Quo vero facilius Deus Nostris, Vestrisque, et omnium fidelium precibus, votisque annuat, cum omni fiducia deprecatricem apud Eum adhibeamus Immaculatam sanctissimamque Deiparam Virginem Mariam, quae cunctas haereses interemit in universo mundo, quaeque omnium nostrum amantissima Mater „tota suavis est . . . . ac plena misericordiae, . . . . omnibus sese exorabilem, omnibus clementissimam praebet, omnium necessitates amplissimo quodam miseratur affectu <sup>2)</sup>“, atque utpote Regina adstans a dextris Unigeniti Filii sui Domini nostri Jesu Christi in vestitu deaurato, circumamicta varietate, nihil est quod ab Eo impetrare non valeat. Suffragia quoque petamus Beatissimi Petri Apostolorum Principis, et Coapostoli ejus Pauli, omniumque Sanctorum Caelitum, qui facti jam amici Dei pervenerunt ad caelestia regna, et coronati possident palmam, ac de sua immortalitate securi; de nostra sunt salute solliciti.

Denique caelestium omnium donorum copiam Vobis a Deo ex animo adprecantes, singularis Nostrae in Vos caritatis pignus Apostolicam Benedictionem ex intimo corde profectam Vobis ipsis, Venerabiles Fratres, cunctisque Clericis, Laicisque fidelibus curae vestrae commissis peramanter impertimus. .

Datum Romae apud S. Petrum die VIII. Decembris anno 1864, decimo a Dogmatica Definitione Immaculae Conceptionis Deiparae Virginis Mariae. Pontificatus Nostri Anno Decimonono.

## PIUS PP. IX.

<sup>1)</sup> S. Cyprian. Epist. XI.

<sup>2)</sup> S. Bernard. Serm. de duodecim praerogativis B. M. V. ex verbis Apocalyps.

## Epistola

Emin. et Rvdmi D. Cardinalis Jacobi Antonelli a negotiis publicis  
Sanctitatis Suae ad omnes catholicos Antistites.

---

Illme ac Rme Domine.

Sanctissimus Dominus Noster Pius IX. Pontifex Maximus de animarum salute, ac de sana doctrina maxime sollicitus, vel ab ipso sui Pontificatus exordio nunquam destitit suis Epistolis encyclicis, et Allocutionibus in Consistorio habitis, et Apostolicis aliis Litteris in vulgus editis, praecipuos huius praesertim infelicissimae aetatis errores, ac falsas doctrinas proscribere et damnare. Cum autem forte evenire potuerit, ut omnia haec Pontificia Acta ad singulos Ordinarios minime pervenerint, iccirco idem Summus Pontifex voluit, ut eorundem errorum Syllabus ad omnes universi catholici orbis Sacrorum Antistites mittendus conficeretur, quo iidem Antistites prae oculis habere possint omnes errores, ac perniciosas doctrinas, quae ad ipso reprobatae ac proscriptae sunt. Mihi vero in mandatis dedit, ut hunc Syllabum typis editum ad Te, Illme ac Rme Domine, perferendum curarem hac occasione ac tempore, quo idem Pontifex Maximus pro summa sua de catholicae Ecclesiae, ac totius Dominici gregis sibi divinitus commissi incolumitate et bono sollicitudine, aliam Encyclicam Epistolam ad cunctos catholicos Sacrorum Antistites scribendam censuit. Eiusdem igitur Pontificis iussa omni certe alacritate et, uti par est, obsequio efficiens, Tibi, Illme ac Rme Domine, eundem Syllabum his litteris adjunctum mittere propero. Dum vero obsequentissimi mei in Te animi sensus testari et confirmare vehementer gaudeo, fausta omnia et salutaria Tibi a Deo Optimo Maximo ex corde apprecor.

Dominationis Tuae Illmae et Rmae

Romae die 8. Decembris 1864.

Addictissimus Servus J. Card. Antonelli.

---

## S y l l a b u s

complectens praecipuos nostrae aetatis errores qui notantur in Allocutionibus consistorialibus, in encyclicis, aliisque Apostolicis Litteris Sanctissimi Domini nostri Pii Papae IX.

### §. I. Pantheismus, Naturalismus et Rationalismus absolutus.

I. Nullum supremum, sapientissimum, providentissimumque Numen divinum existit ab hac rerum universitate distinctum, et Deus idem est ac rerum natura, et iccirco immutationibus obnoxius; Deusque reapse fit in homine et mundo, atque omnia Deus sunt et ipsissimam Dei habent substantiam; ac una eademque res est Deus cum mundo, et proinde spiritus cum materia, necessitas cum libertate, verum cum falso, bonum cum malo, et iustum cum iniusto.

*Alloc. Maxima quidem. 9. iunii 1862.*

### II. Neganda est omnis Dei actio in homines et mundum.

*Alloc. Maxima quidem. 9. iunii 1862.*

III. Humana ratio, nullo prorsus Dei respectu habito, unicus est veri et falsi, boni et mali arbiter, sibi ipsi est lex et naturalibus suis viribus ad hominum ac populorum bonum curandum sufficit.

*Alloc. Maxima quidem. 9. iunii 1862.*

IV. Omnes religionis veritates ex nativa humanae rationis vi derivant; hinc ratio est princeps norma qua homo cognitionem omnium cuiuscumque generis veritatum assequi possit ac debeat.

*Epist. Encycl. Qui pluribus. 9. novembris 1846.*

*Epist. Encycl. Singulari quidem. 17. martii 1856.*

*Alloc. Maxima quidem. 9. iunii 1862.*

V. Divina revelatio est imperfecta et iccirco subiecta continuo et indefinito progressui qui humanae rationis progressioni respondeat.

*Epist. Encycl. Qui pluribus. 9. novembris 1846.*

*Alloc. Maxima quidem. 9. iunii 1862.*

VI. Christi fides humanae refragatur rationi; divinaque revelatio non solum nihil prodest, verum etiam nocet hominis perfectioni.

*Epist. Encycl. Qui pluribus. 9. novembris 1846.*

*Alloc. Maxima quidem. 9. iunii 1862.*

VII. Prophetiae et miracula in sacris Litteris exposita et narrata sunt poetarum commenta, et christianae fidei mysteria philosophicarum investigationum summa; et utriusque Testamenti libris mythica continentur inventa; ipseque Jesus Christus est mythica fictio.

*Epist. Encycl. Qui pluribus. 9. novembris 1846.*

*Alloc. Maxima quidem. 9. iunii 1862.*

### §. II. Rationalismus moderatus.

VIII. Quam ratio humana ipsi religioni aequiparetur, iccirco theologicae disciplinae perinde ac philosophicae tractandae sunt.

*Alloc. Singulari quadam perfusi. 9. decembris 1854.*

IX. Omnia indiscriminatim dogmata religionis christianae sunt obiectum naturalis scientiae seu philosophiae; et humana ratio histo-

rice tantum exulta potest ex suis naturalibus viribus et principiis ad veram de omnibus etiam reconditoribus dogmatibus scientiam pervenire, modo haec dogmata ipsi rationi tamquam obiectum proposita fuerint.

Episc. ad Archiep. Frising. *Gravissimas*. 11. decembris 1862.

Epist. ad eundem *Tuas libenter*. 21. decembris 1863.

X. Quum aliud sit philosophus, aliud philosophia, ille ius et officium habet se submittendi auctoritati, quam veram ipse probaverit; at philosophia neque potest, neque debet ulli sese submittere auctoritati.

Epist. ad Archiep. Frising. *Gravissimas*. 11. decembris 1862.

Epist. ad eundem *Tuas libenter*. 21. decembris 1863.

XI. Ecclesia non solum non debet in philosophiam unquam animadvertere, verum etiam debet ipsius philosophiae tolerare errores, eique relinquere ut ipsa se corrigat.

Epist. ad Archiep. Frising. *Gravissimas*. 11. decembris 1862.

XII. Apostolicae Sedis, romanarumque Congregationum decreta liberum scientiae progressum impediunt.

Epist. ad Archiep. Frising. *Tuas libenter*. 21. decembris 1863.

XIII. Methodus et principia, quibus antiqui Doctores scholastici Theologiam excoluerunt, temporum nostrorum necessitatibus scientiarumque progressui minime congruunt.

Epist. ad Archiep. Frising. *Tuas libenter*. 21. decembris 1863.

XIV. Philosophia tractanda est, nulla supernaturalis revelationis habita ratione.

Epist. ad Archiep. Frising. *Tuas libenter*. 21. decembris 1863.

**Nota.** Cum rationalismi systemate cohaerent maximam partem errores Antonii Günther, qui damnantur in Epist. ad Card. Archiep. Coloniensem *Eximiam tuam*. 15. iunii 1847, et in Epist. ad Episc. Wratislaviensem *Dolore haud mediocri*. 30. aprilis 1860.

### §. III. Indifferentismus, Latitudinarismus.

XV. Liberum cuique homini est eam amplecti ac profiteri religionem, quam rationis lumine quis ductus veram putaverit.

Litt. Apost. *Multiplikes inter*. 10. iunii 1851.

Alloc. *Maxima quidem*. 9. iunii 1862.

XVI. Homines in cuiusvis religionis cultu viam aeternae salutis reperire, aeternamque salutem assequi possunt.

Epist. Encycl. *Qui pluribus*. 9. novembris 1846.

Alloc. *Ubi primum*. 17. decembris 1847.

Epist. Encycl. *Singulari quidem*. 17. martii 1856.

XVII. Saltem bene sperandum est de aeterna illorum omnium salute, qui in vera Christi Ecclesia nequaquam versantur.

Alloc. *Singulari quadam*. 9. decembris 1854.

Epist. Encycl. *Quanto conficiamur*. 17. augusti 1863.

XVIII. Protestantismus non aliud est quam diversa verae eiusdem christianae religionis forma, in qua aequae ac in Ecclesia catholica Deo placere datum est.

Epist. Encycl. *Noscitis et Nobiscum*. 8. decembris 1819.

### §. IV. Socialismus, Communismus, Societates clandestinae, Societates biblicae, Societates clerico-liberales.

Eiusmodi pestes saepe gravissimisque verborum formulis reprobantur in Epist. encycl. *Qui pluribus*. 9. novemb. 1846; in Alloc. *Quibus*

*quantisque*. 20. april. 1849; in Epist. encycl. *Noscitis et Nobiscum*. 8. decemb. 1849; in Allocut. *Singulari quadam*. 9. decemb. 1854; in Epist. encycl. *Quanto conficiamur moerore*. 10. augusti 1863.

### §. V. Errores de Ecclesia eiusque iuribus.

XIX. Ecclesia non est vera perfectaue societas plane libera, nec pollet suis propriis et constantibus iuribus sibi a divino suo fundatore collatis, sed civilis potestatis est definire quae sint Ecclesiae iura ac limites, intra quos eadem iura exercere queat.

Alloc. *Singulari quadam*. 9. decembris 1854.

Alloc. *Multis gravibusque*. 17. decembris 1860.

Alloc. *Maxima quidem*. 9. iunii 1862.

XX. Ecclesiastica potestas suam auctoritatem exercere non debet absque civilis gubernii venia et assensu.

Alloc. *Meminit unusquisque*. 30. septembris 1861.

XXI. Ecclesia non habet potestatem dogmaticae definiendi, religionem catholicae Ecclesiae esse unice veram religionem.

Litt. Apost. *Multiplies inter*. 10. iunii 1851.

XXII. Obligatio, qua catholici magistri et scriptores omnino adstringuntur, coarctatur in iis tantum, quae ab infallibili Ecclesiae iudicio veluti fidei dogmata ab omnibus credenda proponuntur.

Epist. ad Archiep. Frising. *Tuas libenter*. 21. decembris 1863.

XXIII. Romani Pontifices et Concilia oecumenica a limitibus suae potestatis recesserunt, iura Principum usurparunt, atque etiam in rebus fidei et morum definiendis errarunt.

Litt. Apost. *Multiplies inter*. 10. iunii 1851.

XXIV. Ecclesia vis inferendae potestatem non habet, neque potestatem ullam temporalem directam vel indirectam.

Litt. Apost. *Ad apostolicae*. 22. augusti 1851.

XXV. Praeter potestatem episcopatus inhaerentem, alia est attributa temporalis potestas a civili imperio vel expresse vel tacite concessa, revocanda propterea, cum libuerit, a civili imperio.

Litt. Apost. *Ad apostolicae*. 22. augusti 1851.

XXVI. Ecclesia non habet nativum ac legitimum ius acquirendi ac possidendi.

Alloc. *Nunquam fore*. 15. decembris 1856.

Epist. Encycl. *Incredibili*. 18. septembris 1863.

XXVII. Sacri Ecclesiae ministri Romanusque Pontifex ab omnium rerum temporalium cura ac dominio sunt omnino excludendi.

Alloc. *Maxima quidem*. 9. iunii 1862.

XXVIII. Episcopis, sine Gubernii venia, fas non est vel ipsas apostolicas litteras promulgare.

Alloc. *Nunquam fore*. 15. decembris 1856.

XXIX. Gratiae a Romano Pontifice concessae existimari debent tamquam irritae, nisi per Gubernium fuerint imploratae.

Alloc. *Nunquam fore*. 15. decembris 1856.

XXX. Ecclesiae et personarum ecclesiasticarum immunitas a iure civili ortum habuit.

Litt. Apost. *Multiplies inter*. 10. iunii 1851.

XXXI. Ecclesiasticum forum pro temporalibus clericorum causis sive civilibus sive criminalibus omnino de medio tollendum est, etiam inconsulta et reclamante Apostolica Sede.

Alloc. *Acerbissimum*, 27. septembris 1852.

Alloc. *Nunquam fore*, 15. decembris 1856.

XXXII. Absque ulla naturalis iuris et aequitatis violatione potest abrogari personalis immunitas, qua clerici ab onere subeundae exercendaeque militiae eximuntur; hanc vero abrogationem postulat civilis progressus, maxime in societate ad formam liberioris regiminis constituta.

Epist. ad Episc. Montisregal. *Singularis Nobisque*, 29. septembris 1864.

XXXIII. Non pertinet unice ad ecclesiasticam iurisdictionis potestatem proprio ac nativo iure dirigere theologicarum rerum doctrinam.

Epist. ad Archiep. Frising. *Tuas libenter*, 21. decembris 1863.

XXXIV. Doctrina comparantium Romanum Pontificem Principi libero et agenti in universa Ecclesia, doctrina est quae medio aeo praevaluit.

Litt. Apost. *Ad apostolicas*, 22. augusti 1851.

XXXV. Nihil vetat, alicuius Concilii generalis sententia aut universorum populorum facto, summum Pontificatum ab romano Episcopo atque Urbe ad alium Episcopum aliamque civitatem transferri.

Litt. Apost. *Ad apostolicas*, 22. augusti 1851.

XXXVI. Nationalis concilii definitio nullam aliam admittit disputationem, civilisque administratio rem ad hosce terminos exigere potest.

Litt. Apost. *Ad apostolicas*, 22. augusti 1851.

XXXVII. Institui possunt nationales Ecclesiae ab auctoritate Romani Pontificis subductae, planeque divisae.

Alloc. *Multis gravibusque*, 17. decembris 1860.

Alloc. *Iamdudum cernimus*, 18. martii 1861.

XXXVIII. Divisioni Ecclesiae in orientalem atque occidentalem nimia Romanorum Pontificum arbitria contulerunt.

Litt. Apost. *Ad apostolicas*, 22. augusti 1851.

#### §. VI. Errores de societate civili tum in se, tum in suis ad Ecclesiam relationibus spectata.

XXXIX. Reipublicae status, utpote omnium iurium origo et fons, iure quodam pollet nullis circumscripto limitibus.

Alloc. *Marina quidem*, 9. iunii 1862.

XL. Catholicae Ecclesiae doctrina humanae societatis bono et commodis adversatur.

Epist. Encycl. *Qui pluribus*, 9. novembris 1816.

Alloc. *Quibus quantisque*, 20. aprilis 1819.

XLI. Civili potestati vel ab infidei imperante exercitae competit potestas indirecta negativa in sacra; eidem proinde competit nedium ius quod vocant *exequatur*, sed etiam ius *appellationis*, quam nuncupant, *ab abusu*.

Litt. Apost. *Ad apostolicas*, 22. augusti 1851.

XLII. In conflictu legum utriusque potestatis, ius civile praevalet.

Litt. Apost. *Ad apostolicas*, 22. augusti 1851.

XLIII. Laica potestas auctoritatem habet rescindendi, declarandi ac faciendi irritas solemnes conventiones (vulgo *Concordata*) super usu iurium ad ecclesiasticam immunitatem pertinentium cum Sede Apostolica initas, sine huius consensu, immo et ea reclamante.

Alloc. *In Consistoriali*. 1. novembris 1850.

Alloc. *Multis gravibusque*. 17. decembris 1860.

XLIV. Civilis auctoritas potest se immiscere rebus quae ad religionem, mores et regimen spirituale pertinent. Hinc potest de instructionibus iudicare, quas Ecclesiae pastores ad conscientiarum normam pro suo munere edunt, quin etiam potest de divinorum sacramentorum administratione et dispositionibus ad ea suscipienda necessariis decernere.

Alloc. *In Consistoriali*. 1. novembris 1850.

Alloc. *Maxima quidem*. 9. iunii 1862.

XLV. Totum scholarum publicarum regimen, in quibus iuventus christiana alicuius Reipublicae instituitur, episcopalibus dumtaxat seminariis aliqua ratione exceptis, potest ac debet attribui auctoritati civili, et ita quidem attribui, ut nullum alii cuicumque auctoritati recognoscatur ius immiscendi se in disciplina scholarum, in regimine studiorum, in graduum collatione, in delectu aut approbatione magistrorum.

Alloc. *In Consistoriali*. 1. novembris 1850.

Alloc. *Quibus luctuosissimis*. 5. septembris 1851.

XLVI. Immo in ipsis clericorum seminariis methodus studiorum adhibenda civili auctoritati subiicitur.

Alloc. *Nunquam fore*. 15. decembris 1856.

XLVII. Postulat optima civilis societatis ratio, ut populares scholae, quae patent omnibus cuiusque e populo classis pueris, ac publica universim Instituta, quae litteris severioribusque disciplinis tradendis et educationi iuventutis curandae sunt destinata, eximantur ab omni Ecclesiae auctoritate, moderatrice vi et ingerentia, plenoque civilis ac politicae auctoritatis arbitrio subiiciantur ad imperantium placita et ad communium aetatis opinionum amussim.

Epist. ad Archiep. Friburg. *Quum non sine*. 14. iulii 1864.

XLVIII. Catholicis viris probari potest ea iuventutis instituendae ratio, quae sit a catholica fide et ab Ecclesiae potestate seiuncta, quaeque rerum dumtaxat naturalium scientiam ac terrenae socialis vitae fines tantummodo vel saltem primario spectet.

Epist. ad Archiep. Friburg. *Quum non sine*. 14. iulii 1864.

IL. Civilis auctoritas potest impedire quominus sacrorum Antistites et fideles populi cum Romano Pontifice libere ac mutuo communicent.

Alloc. *Maxima quidem*. 9. iunii 1862.

L. Laica auctoritas habet per se ius praesentandi episcopos, et potest ab illis exigere ut ineant dioecesium procuracionem antequam ipsi canonicam a S. Sede institutionem et apostolicas litteras accipiant.

Alloc. *Nunquam fore*. 15. decembris 1856.

LI. Immo laicum Gubernium habet ius deponendi ab exercitio pastoralis ministerii episcopos, neque tenetur obedire Romano Pontifici in iis quae episcopatum et episcoporum respiciunt institutionem.

Litt. Apost. *Multiplies inter*. 10. iunii 1851.

Alloc. *Acerbissimum*. 27. septembris 1852.

LII. Gubernium potest suo iure immutare aetatem ab Ecclesia praescriptam pro religiosa tam mulierum quam virorum professione, omnibusque religiosis familiis indicere, ut neminem sine suo permissu ad solennia vota nuncupanda admittant.

Alloc. *Nunquam fore*. 15. decembris 1856.

LIII. Abrogandae sunt leges quae ad religiosas familiarum statum tutandum, earumque jura et officia pertinent; immo potest civile gubernium iis omnibus auxilium praestare, qui a suscepto religiosae vitae instituto deficere ac solennia vota frangere velint; pariterque potest, religiosas easdem familias perinde ac collegiatas Ecclesias et beneficia simplicia etiam juris patronatus penitus extinguere, illorumque bona et redditus civilis potestatis administrationi et arbitrio subijcere et vindicare.

Alloc. *Acerbissimum*. 27. septembris 1852.

Alloc. *Probe meminertis*. 22. ianuarii 1855.

Alloc. *Cum saepe*. 26. iulii 1855.

LIV. Reges et Principes non solum ab Ecclesiae jurisdictione eximuntur, verum etiam in quaestionibus jurisdictionis dirimendis superiores sunt Ecclesia.

Litt. Apost. *Multiplies inter*. 10. iunii 1851.

LV. Ecclesia a Statu, Statusque ab Ecclesia sejungendus est.

Alloc. *Acerbissimum*. 27. septembris 1852.

#### §. VII. Errores de Ethica naturali et christiana.

LVI. Morum leges divina haud egent sanctione, minimeque opus est ut humanae leges ad naturae ius conformentur aut obligandi vim a Deo accipiant.

Alloc. *Maxima quidem*. 9. iunii 1862.

LVII. Philosophicarum rerum morumque scientia, itemque civiles leges possunt et debent a divina et ecclesiastica auctoritate declinare.

Alloc. *Maxima quidem*. 9. iunii 1862.

LVIII. Aliae vires non sunt agnoscendae nisi illae quae in materia positae sunt, et omnis morum disciplina honestasque collocari debet in cumulandis et augendis quovis modo divitiis ac in voluptatibus explendis.

Alloc. *Maxima quidem*. 9. iunii 1862.

Epist. Encycl. *Quanto conficiamur*. 10. augusti 1863.

LIX. Jus in materiali facto consistit, et omnia hominum officia sunt nomen inane, et omnia humana facta iuris vim habent.

Alloc. *Maxima quidem*. 9. iunii 1862.

LX. Auctoritas nihil aliud est nisi numeri et materialium virium summa.

Alloc. *Maxima quidem*. 9. iunii 1862.

LXI. Fortunata facti iniustitia nullum iuris sanctitati detrimentum affert.

Alloc. *Jamdudum cernimus*. 18. martii 1861.

LXII. Proclamandum est et observandum principium quod vocant de *non-interventu*.

Alloc. *Novos et ante*. 28. septembris 1860.



**LXIII.** Legitimis principibus obedientiam detrectare, immo et rebellare licet.

Epist. Encycl. *Qui pluribus*. 9. novembris 1846.

Alloc. *Quisque vestrum*. 4. octobris 1847.

Epist. Encycl. *Noscitis et Nobiscum*. 8. decembris 1849.

Litt. Apost. *Cum catholica*. 26. martii 1860.

**LXIV.** Tum cuiusque sanctissimi iuramenti violatio, tum quaelibet scelestae flagitiosaeque actio sempiternae legi repugnans, non solum haud est improbanda, verum etiam omnino licita, summisque laudibus efferenda, quando id pro patriae amore agatur.

Alloc. *Quibus quantisque*. 20. aprilis 1849.

### §. VIII. Errores de matrimonio christiano.

**LXV.** Nulla ratione ferri potest, Christum evexisse matrimonium ad dignitatem sacramenti.

Litt. Apost. *Ad apostolicam*. 22. augusti 1851.

**LXVI.** Matrimonii sacramentum non est nisi quid contractui accessorium ab eoque separabile, ipsumque sacramentum in una tantum nuptiali benedictione situm est.

Litt. Apost. *Ad apostolicam*. 22. augusti 1851.

**LXVII.** Iure naturae matrimonii vinculum non est indissolubile, et in variis casibus divortium proprie dictum auctoritate civili sanciri potest.

Litt. Apost. *Ad apostolicam*. 22. augusti 1851.

Alloc. *Acerbissimum*. 27. septembris 1852.

**LXVIII.** Ecclesia non habet potestatem impedimenta matrimonium dirimentia inducendi, sed ea potestas civili auctoritati competit, a qua impedimenta existentia tollenda sunt.

Litt. Apost. *Multiplies inter*. 10. iunii 1851.

**LXIX.** Ecclesia sequioribus saeculis dirimentia impedimenta inducere coepit, non iure proprio, sed illo iure usa, quod a civili potestate mutuata erat.

Litt. Apost. *Ad apostolicam*. 22. augusti 1851.

**LXX.** Tridentini canones qui anathematis censuram illis inferunt, qui facultatem impedimenta dirimentia inducendi Ecclesiae negare audeant, vel non sunt dogmatici vel de hac mutuata potestate intelligendi sunt.

Litt. Apost. *Ad apostolicam*. 22. augusti 1851.

**LXXI.** Tridentini forma sub infirmitatis poena non obligat, ubi lex civilis aliam formam praestituat, et velit hac nova forma interveniente matrimonium valere.

Litt. Apost. *Ad apostolicam*. 22. augusti 1851.

**LXXII.** Bonifacius VIII. votum castitatis in ordinatione emissum nuptias nullas reddere primus asseruit.

Litt. Apost. *Ad apostolicam*. 22. augusti 1851.

**LXXIII.** Vi contractus mere civilis potest inter christianos constare veri nominis matrimonium; falsumque est, aut contractum matrimonii inter christianos semper esse sacramentum, aut nullum esse contractum, si sacramentum excludatur.

Litt. Apost. *Ad apostolicam*. 22. augusti 1851.

Lettera di S. S. PIO IX. al Re di Sardegna<sup>1)</sup>, 9. settembre 1852.

Alloc. *Acerbissimum*. 27. septembris 1852.

Alloc. *Multis gravibusque*. 17. decembris 1860.

<sup>1)</sup> Litterae S. D. N. Pii IX. ad Regem Sardiniae.

LXXIV. Caussae matrimoniales et sponsalia suapte natura ad forum civile pertinent.

Litt. Apost. *Ad apostolicæ*. 22. augusti 1851.

Alloc. *Acerbissimum*. 27. septembris 1852.

**Nota.** Huc facere possunt duo alii errores de clericorum coelibatu abolendo et de statu matrimonii statui virginitatis anteferendo. Confodiuntur, prior in Epist. encycl. *Qui pluribus*. 9. novembris 1846, posterior in Litteris Apost. *Multiplices inter*. 10. iunii 1851.

#### §. IX. Errores de civili Romani Pontificis principatu.

LXXV. De temporalis regni cum spirituali compatibilitate disputant inter se christianæ et catholicæ Ecclesiæ filii.

Litt. Apost. *Ad apostolicæ*. 22. augusti 1851.

LXXVI. Abrogatio civilis imperii, quo Apostolica Sedes potitur, ad Ecclesiæ libertatem felicitatemque vel maxime conducere.

Alloc. *Quibus quantisque*. 20. aprilis 1849.

**Nota.** Praeter hos errores explicite notatos, alii complures implicite reprobantur, proposita et asserta doctrina, quam catholici omnes firmissime retinere debeant, de civili Romani Pontificis principatu. Eiusmodi doctrina luculenter traditur in Alloc. *Quibus quantisque*. 20. april. 1849; in Alloc. *Si semper antea*. 20. maii 1850; in Litt. apost. *Cum catholica Ecclesia*. 26. mart. 1860; in Alloc. *Novos*. 28. sept. 1860; in Alloc. *Jamdudum*. 18. mart. 1861; in Alloc. *Maxima quidem*. 9. iunii 1862.

#### §. X. Errores qui ad Liberalismum hodiernum referuntur.

LXXVII. Aetate hac nostra non amplius expedit, religionem catholicam haberi tanquam unicam status religionem, ceteris quibuscumque cultibus exclusis.

Alloc. *Nemo vestrum*. 26. iulii 1855.

LXXVIII. Hinc laudabiliter in quibusdam catholici nominis regionibus lege cautum est, ut hominibus illuc immigrantibus liceat publicum proprii cujusque cultus exercitium habere.

Alloc. *Acerbissimum*. 27. septembris 1852.

LXXIX. Enimvero falsum est, civilem cujusque cultus libertatem, itemque plenam potestatem omnibus attributam quaslibet opiniones cogitationesque palam publiceque manifestandi, conducere ad populorum mores animosque facilius corrumpendos ac indifferentismi pestem propagandam.

Alloc. *Nunquam fore*. 15. decembris 1856.

LXXX. Romanus Pontifex potest ac debet cum progressu, cum liberalismo et cum recenti civilitate sese reconciliare et componere.

Alloc. *Jamdudum cernimus*. 18. martii 1861.

**ACTA**

**SS. D. N. PII PP. IX.**

EX QUIBUS EXCERPTUS EST

**SYLLABUS.**

---

— — —

25. 10. 22.

252

## Epistola Encyclica

ad omnes Patriarchas, Primates, Archiepiscopos et Episcopos  
die IX. novembris anni MDCCCLXVI <sup>1)</sup>.

---

Venerabiles Fratres, Salutem et Apostolicam Benedictionem.

Qui pluribus iam abhinc annis una Vobiscum, Venerabiles Fratres, episcopale munus plenum laboris, plenum sollicitudinis pro viribus obire, ac Dominici gregis partem curae Nostrae commissam pascere nitebamur in montibus Israel, in rivis et pascuis uberrimis, ecce ob mortem clarissimi Praedecessoris Nostri Gregorii XVI., cuius certe memoriam, atque illustria et gloriosa facta aureis notis inscripta in Ecclesiae fastis semper admirabitur posteritas, praeter omnem opinionem, cogitationemque Nostram, arcana divinae Providentiae consilio, ad Summum Pontificatum non sine maxima animi Nostri perturbatione ac trepidatione evecti fuimus. Etenim si semper grave admodum et periculosum Apostolici ministerii onus merito est habitum, atque habendum, hisce quidem difficillimis christianae reipublicae temporibus vel maxime formidandum. Itaque infirmitatis Nostrae probe consci, et gravissima supremi Apostolatus officia in tanta praesertim rerum vicissitudine considerantes, tristitia et lacrymis Nos plane tradidissemus, nisi omnem spem poneremus in Deo salutari Nostro, qui numquam derelinquit sperantes in Eo, quique, ut potentiae suae virtutem ostendat, ad suam regendam Ecclesiam infirmiora identidem adhibet, quo magis magisque omnes cognoscant Deum ipsum esse, qui Ecclesiam admirabili sua providentia gubernat, atque tuetur. Illa etiam consolatio Nos vehementer sustentat, quod in animarum salute procuranda Vos socios et adiutores habeamus, Venerabiles Fratres, qui in sollicitudinis Nostrae partem vocati, omni cura et studio ministerium vestrum implere, ac bonum certamen certare contenditis. Hinc ubi primum in sublimi hac Principis Apostolorum Cathedra, licet immerentes, collocati, in persona Beati Petri gravissimum munus ab ipso aeterno Pastorum Principe divinitus tributum accepimus pascendi ac regendi non solum agnos, universum scilicet Christianum populum, verum etiam oves, hoc est Antistites, nihil certe Nobis potius, nihil optabilius fuit, quam ut intimo caritatis affectu Vos omnes alloqueremur. Quamobrem vix dum ex more institutoque Decessorum Nostrorum in Nostra Lateranensi Basilica Summi Pontificatus possessionem suscepimus, nulla interposita mora has ad Vos Litteras damus, ut eximiam vestram excitemus pietatem, quo maiore usque alacritate, vigilantia, contentione custodientes vigilias noctis super gregem curae vestrae commissum, atque episcopali robore et constantia adversus teterrimum humani generis hostem dimicantes, veluti boni milites Christi Iesu, strenue opponatis murum pro Domo Israel.

Neminem vestrum latet, Venerabiles Fratres, hac nostra deploranda aetate acerrimum ac formidolosissimum contra catholicam rem universam bellum ab iis hominibus conflari, qui nefaria inter se societate coniuncti sanam non sustinentes doctrinam, atque a veritate auditum avertentes, omni-gena opinionum portenta et tenebris eruere, eaque totis viribus exaggerare, atque in vulgus prodere et disseminare contendunt. Horrescimus quidem

---

<sup>1)</sup> Huc referuntur Propositiones 4, 5, 6, 7, 16, 40, 63, et nota ad §. VIII.

animo, et acerbissimo dolore conficimur, cum omnia errorum monstra, et varias multiplicesque nocendi artes, insidias, machinationes mente recogitamus, quibus hi veritatis et lucis osores, et peritissimi fraudis artifices omne pietatis, iustitiae, honestatis studium in omnium animis restinguere, mores corrumpere, iura quaecumque divina et humana perturbare, catholicam religionem, civilemque societatem convellere, labefactare, immo, si fieri umquam posset, funditus evertere commoliuntur.

Noscitis enim, Venerabiles Fratres, hos infensissimos christiani nominis hostes, caeco quodam insanientis impietatis impetu misere raptos, eo opinandi temeritate progredi, ut inaudita prorsus audacia *aperientes os suum in blasphemias ad Deum*<sup>1)</sup>, palam publiceque edocere non erubescant, commentitia esse, et hominum inventa sacrosancta nostrae religionis mysteria<sup>2)</sup>, catholicae Ecclesiae doctrinam humanae societatis bono et commodis adversari<sup>3)</sup>, ac vel ipsum Christum et Deum eirurare non extimescant.

Et quo facilius populis illudant, atque incautos praesertim et impios decipiant, et in errores secum abripiant, sibi unis prosperitatis vias notas esse comminiscuntur, sibi philosophorum nomen arrogare non dubitant, perinde quasi philosophia, quae tota in naturae veritate investiganda versatur, ea respuere debeat, quae supremus et clementissimus ipse totius naturae auctor Deus singulari beneficio et misericordia hominibus manifestare est dignatus, ut veram ipsi felicitatem et salutem assequantur. Hinc praepostero sane et fallacissimo argumentandi genere nunquam desinunt humanae rationis vim et excellentiam appellare<sup>4)</sup>, extollere contra sanctissimam Christi fidem, atque audacissime blaterant, eam humanae refragari rationi<sup>5)</sup>. Quo certe nihil dementius, nihil magis impium, nihil contra ipsam rationem magis repugnans fingi, vel excogitari potest. Etsi enim fides sit supra rationem, nulla tamen vera dissensio, nullumque dissidium inter ipsas inveniri umquam potest, cum ambae ab uno eodemque immutabilis aeternaeque veritatis fonte Deo Optimo Maximo oriantur, atque ita sibi mutuam opem ferant, ut recta ratio fidei veritatem demonstret, tueatur, defendat; fides vero rationem ab omnibus erroribus liberet, eamque divinarum rerum cognitione mirifice illustret, confirmet atque perficiat. Neque minori certe fallacia, Venerabiles Fratres, isti divinae revelationis inimici humanum progressum summis laudibus efferentes, in catholicam religionem temerario plane, ac sacrilego ausu illum inducere vellent<sup>6)</sup>, perinde ac si ipsa religio non Dei, sed hominum opus esset, aut philosophicum aliquid inventum, quod humanis modis perfici queat. In istos tam misere delirantes percommode quidem cadit, quod Tertullianus sui temporis philosophis merito exprobrabat, *qui Stoicum, et Platonicum, et Dialecticum Christianissimum protulerunt*<sup>7)</sup>. Et sane cum sanctissima nostra religio non ab humana ratione fuerit inventa, sed a Deo hominibus clementissime patefacta, tum quisque vel facile intelligit, religionem ipsam ex eiusdem Dei loquentis auctoritate omnem suam vim acquirere, neque ab humana ratione deduci, aut perfici umquam posse. Humana quidem ratio, ne in tanti momenti negotio decipiat et erret, divinae revelationis factum diligenter inquirat oportet, ut certo sibi constet Deum esse loquutum ac Eidem, quemadmodum sapientissime docet Apostolus, rationabile obsequium exhibeat<sup>8)</sup>. Quis enim ignorat vel ignorare potest, omnem Deo loquenti fidem esse habendam, nihilque rationi ipsi magis consentaneum esse, quam iis acquiescere, firmiterque adhaerere, quae a Deo, qui nec falli nec fallere potest, revelata esse constiterint?

Sed quam multa, quam mira, quam splendida praesto sunt argumenta, quibus humana ratio luculentissime evinci omnino debet, divinam esse Christi religionem, et omne dogmatum nostrorum principium radicem desuper ex *raclorum Domino accepisse*<sup>9)</sup>, ac propterea nihil fide nostra certius, nihil securius, nihil sanctius exstare, et quod firmiteribus innitatur principiis.

<sup>1)</sup> Apocalyps. XIII. 6.

<sup>3)</sup> *Huc ref. prop.* 40.

<sup>5)</sup> " " " 6.

<sup>7)</sup> Tertull. de Praescript. cap. VIII.

<sup>9)</sup> S. Joann. Chrysost. Homil. I. in Isai.

<sup>2)</sup> *Huc refertur prop.* 7.

<sup>4)</sup> " " " 4.

<sup>6)</sup> " " " 5.

<sup>8)</sup> Ad Rom. XIII. 1.

Haec scilicet fides vitae magistra, salutis index, vitiorum omnium expultrix, ac virtutum foecunda parens et altrix, divini sui auctoris et consummatoris Christi Iesu nativitate, vita, morte, resurrectione, sapientia, prodigiis, vaticinationibus confirmata, supernae doctrinae luce undique refulgens, ac caelestium divitiarum ditata thesauris, tot Prophetarum praedictionibus, tot miraculorum splendore, tot Martyrum constantia, tot Sanctorum gloria vel maxime clara et insignis salutare proferens Christi leges, ac maiores in dies ex crudelissimis ipsis persecutionibus vires acquirens, universum orbem terra marique, a solis ortu usque ad occasum, uno Crucis vexillo pervasit, atque idolorum profligata fallacia, errorum depulsa caligine, triumphatisque cuiusque generis hostibus omnes populos, gentes, nationes utcumque immanitate barbaras, ac indole, moribus, legibus, institutis diversas divinae cognitionis lumine illustravit, atque suavissimo ipsius Christi iugo subiecit, annuntians omnibus pacem, annuntians bona. Quae certe omnia tanto divinae sapientiae, ac potentiae fulgore undique collucunt, ut cuiusque mens et cogitatio vel facile intelligat, christianam fidem Dei opus esse. Itaque humana ratio ex splendidissimis hisce, aequae ac firmissimis argumentis clare aperteque cognoscens Deum eisdem fidei auctorem existere, ulterius progredi nequit, sed quavis difficultate ac dubitatione penitus abiecta, atque remota, omne eidem fidei obsequium praebeat oportet, cum pro certo habeat a Deo traditum esse quidquid fides ipsa hominibus credendum, et agendum proponit.

Atque hinc plane apparet in quanto errore illi etiam versentur, qui ratione abutentes, ac Dei eloquia tamquam humanum opus existimantes, proprio arbitrio illa explicare, interpretari temere audent, cum Deus ipse vivam constituerit auctoritatem, quae verum legitimumque caelestis suae revelationis sensum doceret, constabiliret, omnesque controversias in rebus fidei, et morum *infallibili* iudicio dirimeret, ne fideles circumferantur omni vento doctrinae in nequitia hominum ad circumventionem erroris. Quae quidem viva, et *infallibilis* auctoritas in ea tantum viget Ecclesia, quae a Christo Domino supra Petrum totius Ecclesiae Caput, Principem et Pastorem, cuius fidem numquam defecturam promisit, aedificata suos legitimos semper habet Pontifices sine intermissione ab ipso Petro ducentes originem in eius Cathedra collocatos, et eiusdem etiam doctrinae, dignitatis, honoris ac potestatis haeredes et vindices. Et quoniam ubi Petrus, ibi Ecclesia<sup>1)</sup>, ac Petrus per Romanum Pontificem loquitur<sup>2)</sup>, et semper in suis successoribus vivit, et iudicium exercet<sup>3)</sup>, ac praestat quaerentibus fidei veritatem<sup>4)</sup>, idcirco divina eloquia eo plane sensu sunt accipienda, quem tenuit ac tenet haec Romana Beatissimi Petri Cathedra, quae omnium Ecclesiarum mater et magistra<sup>5)</sup> fidem a Christo Domino traditam, integram inviolatamque semper servavit, eamque fideles edocuit, omnibus ostendens salutis semitam, et incorruptae veritatis doctrinam. Haec siquidem principalis Ecclesia, unde unitas Sacerdotalis exorta<sup>6)</sup>, haec pietatis metropolis, in qua est integra christianae religionis ac perfecta soliditas<sup>7)</sup>, in qua semper Apostolicae Cathedrae viguit Principatus<sup>8)</sup>, ad quam propter potiorem principalitatem necesse est omnem convenire Ecclesiam, hoc est qui sunt undique fideles<sup>9)</sup>, cum qua quicumque non colligit, spargit<sup>10)</sup>. Nos igitur, qui inscrutabili Dei iudicio in hac veritatis Cathedra collocati sumus, egregiam vestram pietatem vehementer in Domino excitamus, Venerabiles Fratres, ut omni sollicitudine et studio fideles curae vestrae concreditos assidue monere, exhortari conitamina, ut hisce principiis firmiter adhaerentes numquam se ab iis decipi, et in errorem induci patiantur, qui abominabiles facti in studiis suis humani progressus obtentu fidem destruere, eamque rationi impie subiicere ac Dei eloquia in-

<sup>1)</sup> S. Ambros. in Psal. XL.

<sup>2)</sup> Concil. Chalced. Act. 2.

<sup>3)</sup> Synod. Ephes. Act. 3.

<sup>4)</sup> S. Petr. Chrysol. Epist. ad Eutyech.

<sup>5)</sup> Concil. Trid. Sess. VII. de Baptism.

<sup>6)</sup> S. Cyprian. Epist. 55. ad Cornel. Pontif.

<sup>7)</sup> Litter. Synod. Joan. Constantinop. ad Hormisdam Pontif.; et Sozom. Hister

Lib. III. cap. 8.

<sup>8)</sup> S. August. Epist. 162.

<sup>9)</sup> S. Irenaeus Lib. III. contra haereses cap. 3.

<sup>10)</sup> S. Hieronym. Epist. ad Damas. Pontif.

vertere contendunt, summamque Deo ipsi iniuriam inferre non reformidant, qui caelesti sua religione hominum bono atque saluti clementissime consulere est dignatus.

Iam vero probe noscitis, Venerabiles Fratres, alia errorum monstra et fra des, quibus huius saeculi filii catholicam religionem, et divinam Ecclesiae auctoritatem, eiusque leges acerrime oppugnare, et tum sacrae, tum civilis potestatis iura conculcare conantur. Huc spectant nefariae molitiones contra hanc Romanam Beatissimi Petri Cathedram, in qua Christus posuit inexpugnabile Ecclesiae suae fundamentum. Huc clandestinae illae sectae e tenebris ad rei tum sacrae, tum publicae exitium et vastitatem emersae, atque a Romanis Pontificibus Decessoribus Nostris iterato anathemate damnatae suis Apostolicis Litteris ), quas Nos Apostolicae Nostrae potestatis plenitudine confirmamus, et diligentissime servari mandamus ). Hoc volunt vaferrimae Biblicae Societates, quae veterem haeticorum artem renovantes, divinarum Scripturarum libros contra sanctissimae Ecclesiae regulas vulgaribus quibusque linguis translatos, ac perversis saepe explicationibus interpretatos, maximo exemplarium numero, ingentique expensa omnibus cuiusque generis hominibus etiam rudioribus gratuito impertiri, obtrudere non cessant, ut divina traditione, Patrum doctrina, et catholicae Ecclesiae auctoritate reiecta, omnes eloquia Domini privato suo iudicio interpretentur, eorumque sensum pervertant, atque ita in maximos elabantur errores. Quas Societates suorum Decessorum exempla aemulans recol. mem. Gregorius XVI., in cuius locum meritis licet imparibus suffecti sumus, suis Apostolicis Litteris reprobavit <sup>1)</sup>, et Nos pariter damnatas esse volumus.

Huc spectat horrendum, ac vel ipsi naturali rationis lumini maxime repugnans de cuiuslibet religionis indifferentia systema, quo isti veteratores, omni virtutis et vitii, veritatis et erroris, honestatis et turpitudinis sublato discrimine, homines in cuiusvis religionis cultu aeternam salutem assequi posse comminiscuntur <sup>2)</sup>, perinde ac si ulla umquam esse posset participatio iustitiae cum iniquitate, aut societas lucis ad tenebras, et conventio Christi ad Belial.

Huc spectat foedissima contra sacrum clericorum caelibatum conspiratio <sup>3)</sup>, quae a nonnullis etiam, pro dolor! ecclesiasticis viris fovetur, qui propriae dignitatis misere obliti, se voluptatum blanditiis et illecebris vinci et deliniri patiuntur, quae perversa in philosophicis praesertim disciplinis docendi ratio, quae improvidam iuventutem miserandum in modum decipit, corrumpit, eique fel draconis in calice Babylonis propinat; huc infanda, ac vel ipsi naturali iuri maxime adversa de *Communismo*, uti vocant, doctrina <sup>4)</sup>, qua semel admissa, omnium iura, res, proprietates, ac vel ipsa humana societas funditus everterentur; huc tenebrosissimae eorum insidiae, qui in vestitu ovium, cum intus sint lupi capaces, mentita ac fraudulenta purioris pietatis, et severioris virtutis, ac disciplinae specie humiliter irrepunt, blande capiunt, molliter ligant, latenter occidunt, hominesque ab omni religionis cultu absterrent, et dominicas oves mactant atque diserpunt. Huc denique, ut cetera, quae Vobis apprimae nota ac perspecta sunt, omittamus, deterrima tot undique volantium, et peccare docentium voluminum ac libellorum contagio, qui apte compositi, ac fallaciae et artificii pleni, immanibusque sumptibus per omnia loca in christianae plebis interitum dissipati, pestiferas doctrinas ubique disseminant, incautorum potissimum mentes, animosque depravant, et maxima religioni inferunt detrimenta. Ex hac undique serpentium errorum colluvie, atque effrenata cogitandi, loquendi, scribendique licentia mores in deterius prolapsi, sanctissima Christi spreta religio, divini cultus improbata maiestas, huius Apostolicae Sedis divexata potestas, Ecclesiae oppugnata atque in turpem servitutem redacta auctoritas, Episcoporum

<sup>1)</sup> Clemens XII. Const. *In eminenti*, Bened. XIV. Const. *Providas*, Pius VII. Const. *Ecclesiam a Jesu Christo*, Leo XII. Const. *Quo graviora*.

<sup>2)</sup> *Huc ref.* §. IV. Syll.

<sup>3)</sup> Gregor. XVI. in Litteris Encyclicis ad omnes Episcopos, quarum initium: *Inter praecipuas machinationes* <sup>4)</sup> *Huc ref. prop. 16.*

<sup>5)</sup> *Huc ref.* nota ad §. VIII. Syll. <sup>6)</sup> *Huc ref.* §. IV. Syll.



iura conculcata, matrimonii sanctitas violata, cuiusque potestatis regimen labefactatum, ac tot alia tum christianae, tum civilis reipublicae damna, quae communibus lacrymis una Vobiscum flere cogimur, Venerabiles Fratres <sup>1)</sup>).

In tanta igitur religionis, rerum ac temporum vicissitudine de universi Dominici gregis salute Nobis divinitus commissa vehementer solliciti, pro Apostolici Nostri ministerii officio nihil certe inausum, nihilque intentatum relinquemus, quo cunctae christianae familiae bono totis viribus consulamus. Verum praeclaram quoque vestram pietatem, virtutem, prudentiam summopere in Domino excitamus, Venerabiles Fratres, ut caelesti ope freti una Nobiscum Dei, Eiusque Sanctae Ecclesiae causam pro loco, quem tenetis, pro dignitate, qua insigniti estis, impavide defendatis. Vobis acriter pugnandum esse intelligitis, cum minime ignoretis quibus quantisque intemerata Christi Iesu Spousa vulneribus afficiatur, quatuorque acerrimorum hostium impetu divexetur. Atque in primis optime noscitis, vestri muneris esse catholicam fidem episcopali robore tueri, defendere, ac summa cura vigilare, ut grex Vobis commissus in ea stabilis et immotus persistat, *quam nisi quis e integram, involutamque servaverit, absque dubio in aeternum peribit* <sup>2)</sup>). In hanc igitur fidem tuendam, atque servandam pro pastoralis vestra sollicitudine diligenter incumbite, neque umquam desinite omnes in ea instruere, confirmare nutantes, contradicentes arguere, infirmos in fide corroborare, nihil umquam omnino dissimulantes ac ferentes, quod eiusdem fidei puritatem vel minimum violare posse videatur. Neque minori animi firmitate in omnibus fovete unionem cum Catholica Ecclesia, extra quam nulla est salus, et obedientiam erga hanc Petri Cathedram, cui tamquam firmissimo fundamento tota sanctissimae nostrae religionis moles innititur. Pari vero constantia sanctissimas Ecclesiae leges custodiendas curate, quibus profecto virtus, religio, pietas summopere vigent et florent. Cum autem *magna sit pietas prodere latebras impiorum, et ipsum in eis, cui serviunt, diabolum debellare* <sup>3)</sup>), illud obsecrantes monemus, ut omni ope et opera multiformes inimicorum hominum insidias, fallacias, errores, fraudes, machinationes fidei populo detegere, eumque a pestiferis libris diligenter avertere, atque assidue exhortari velitis, ut impiorum sectas, et societates fugiens tamquam a facie colubri, ea omnia studiosissime devitet, quae fidei, religionis, morumque integritati adversantur. Qua de re numquam omnino sit, ut cessetis praedicare Evangelium, quo christiana plebs magis in dies sanctissimis christianae legis praeceptionibus erudita crescat in scientia Dei, declinet a malo, et faciat bonum, atque ambulet in viis Domini. Et quoniam nostis Vos pro Christo legatione fungi, qui se miem et humilem corde est professus, quique non venit vocare iustos, sed peccatores, relinquens nobis exemplum, ut sequamur vestigia eius; quos in mandatis Domini delinquentes, atque a veritatis et iustitiae semita aberrantes inveneritis, haud omittite eos in spiritu lenitatis et mansuetudinis paternis monitis, et consiliis corripere atque arguere, obsecrare, increpare in omni bonitate, patientia et doctrina, cum *saepe plus erga corrigendos agat benevolentia, quam austeritas plus exhortatio, quam comminatio plus caritas, quam potestas* <sup>4)</sup>). Illud etiam totis viribus praestare contendite, Venerabiles Fratres, ut fideles caritatem sectentur, pacem inquirant, et quae caritatis et pacis sunt, sedulo exequantur, quo cunctis dissensionibus, inimiciis, aemulationibus, simultatibus penitus extinctis, omnes se mutua caritate diligant, atque in eodem sensu, in eadem sententia perfecti sint, et idem unanimes sentiant, idem dicant, idem sapiant in Christo Iesu Domino Nostro. Debitam erga Principes, et potestates obedientiam ac subiectionem christiano populo inculcare satagite, edocentes iuxta Apostoli monitum <sup>5)</sup> non esse potestatem nisi a Deo, eosque Dei ordinationi resistere, adeoque sibi damnationem acquirere, qui potestati resistunt; atque idcirco praeceptum potestati ipsi obediendi a nemine umquam citra piaculum posse violari, nisi forte aliquid imperetur, quod Dei et Ecclesiae legibus adversetur <sup>6)</sup>).

<sup>1)</sup> *Huc ref. prop. 79.*

<sup>2)</sup> *Ex Symbolo Quicumque.*

<sup>3)</sup> *S. Leo Serm. VIII. cap. 4.*

<sup>4)</sup> *Concil. Trident. Sess. XIII. cap. 1. de Reformat.*

<sup>5)</sup> *Ad Roman. XII. 1. 2.*

<sup>6)</sup> *Huc ref. prop. 63.*

Verum cum nihil sit, quod alios magis ad pietatem, et Dei cultum assidue instruat, quam eorum vita et exemplum, qui se divino ministerio dedicarunt<sup>1)</sup>, et cuiusmodi sunt Sacerdotes, eiusmodi plerumque esse soleat et populus, pro vestra singulari sapientia perspicitis, Venerabiles Fratres. summa cura et studio Vobis esse elaborandum, ut in Clero morum gravitas, vitae integritas, sanctitas, atque doctrina eluceat, et ecclesiastica disciplina ex Sanctorum Canonum praescripto diligentissime servetur, et ubi collapsa fuerit, in pristinum splendorem restituatur. Quapropter, veluti praeclare scitis, Vobis summopere cavendum, ne cuiquam, iuxta Apostoli praeceptum, cito manus imponatis, sed eos tantum sacris initiis ordinibus, ac sanctis tractandis admoveatis mysteriis, qui accurate exquisiteque explorati, ac virtutum omnium ornatu, et sapientiae laude spectati, vestris dioecesibus usui et ornamento esse possint, atque ab iis omnibus declinant, quae Clericis vetita, et attendentes lectioni, exhortationi, doctrinae, *exemplum sint fidelium in verbo, in conversatione, in caritate, in fide, in castitate*<sup>2)</sup>, cunctisque afferant venerationem, et populum ad christianae religionis institutionem fingant, excitent, atque inflamment. *Melius enim profecto est, ut sapientissime monet immortalis memoriae Benedictus XIV. Decessor Noster, pauciores habere ministros, sed probos, sed idoneos, atque utiles, quam plures qui in aedificationem Corporis Christi, quod est Ecclesia, nequidquam sint valituri*<sup>3)</sup>. Neque vero ignoratis, maiori diligentia Vobis in illorum praecipue mores, et scientiam esse inquirendum, quibus animarum cura et regimen committitur, ut ipsi tamquam fideles multiformis gratiae Dei dispensatores plebem sibi conceditam sacramentorum administratione, divini verbi praedicatione ac bonorum operum exemplo continenter pascere, iuvare, eamque ad omnia religionis instituta, ac documenta informare, atque ad salutis semitam perducere studeant. Intelligitis nimirum Parochis officii sui ignaris, vel negligentibus, continuo et populorum mores prolabi, et christianam laxari disciplinam, et religionis cultum exsolvi, atque convelli, ac vitia omnia et corruptelas in Ecclesiam facile invehi. Ne autem Dei sermo, qui vivus, et efficax, et penetrabilior omni gladio incipit<sup>4)</sup>, ad animarum salutem est institutus, ministrorum vitio infructuosus evadat, eiusdem divini verbi praeconiis inculcare, praecipere numquam desinite, Venerabiles Fratres, ut gravissimum sui muneris officium animo reputantes, evangelicum ministerium non in persuasibilibus humanae sapientiae verbis, non in profano inanibus et ambitiosae eloquentiae apparatu et lenocinio, sed in ostensione spiritus et virtutis religiosissime exercent, ut recte tractantes verbum veritatis, et non semetipsos, sed Christum Crucifixum praedicantes, sanctissimae nostrae religionis dogmata, praecepta iuxta catholicae Ecclesiae et Patrum doctrinam gravi ac splendido orationis genere populis clare aperteque annuncient, peculiarium singulorum officia accurate explicant, omnesque a flagitiis deterreant, ad pietatem inflamment, quo fideles Dei verbo salubriter imbuti atque reflecti vitia omnia declinent, virtutes sectentur, atque ita aeternas poenas evadere et caelestem gloriam consequi valeant. Universos ecclesiasticos viros pro pastoralis vestra sollicitudine et prudentia assidue monete, excitate, ut serio cogitantes ministerium, quod acceperunt in Domino, omnes proprii muneris partes diligentissime impleant, domus Dei decorem summopere diligant, atque intimo pietatis sensu sine intermissione instent obsecrationibus et precibus, et Canonicas horas ex Ecclesiae praecepto persolvant, quo et divina sibi auxilia ad gravissima officii sui munera obeunda impetrare, et Deum christiano populo placatum ac propitium reddere possint.

Cum autem, Venerabiles Fratres, vestram sapientiam minime fugiat, idoneos Ecclesiae ministros nonnisi ex optime institutis clericis fieri posse, magnamque vim in recta horum institutione ad reliquum vitae cursum inesse, pergite omnes episcopalis vestri zeli nervos in id potissimum intendere, ut adolescentes clerici vel a teneris annis tum ad pietatem solidamque virtutem, tum ad litteras severioresque disciplinas, praesertim sacras, rite informentur.

<sup>1)</sup> Concil. Trident. Sess. XXII. cap. 1. de Reformat.

<sup>2)</sup> Ad Timoth. IV. 12.

<sup>3)</sup> Bened. XIV. in Epist. Encycl. ad omnes Episcopos, cuius initium: *Ubi primum*.

<sup>4)</sup> Ad Hebr. V. 12.

Quare Vobis nihil antiquius, nihil potius esse debet, quam omni opera, sollertia, industria clericorum Seminaria ex Tridentinorum Patrum praescripto<sup>1)</sup> instituere, si nondum existunt, atque instituta, si opus fuerit, amplificare, eaque optimis moderatoribus, et magistris instruere, ac intensissimo studio continenter advigilare, ut inibi iuniores clerici in timore Domini, et ecclesiastica disciplina sancte, religioseque educantur, et sacris potissimum scientiis iuxta catholicam doctrinam ab omni prorsus cuiusque erroris periculo alienis, et Ecclesiae traditionibus, et sanctorum Patrum scriptis, sacrisque caeremoniis, ritibus sedulo, ac penitus excolantur, quo habere possitis navos atque industrios operarios, qui ecclesiastico spiritu praediti, ac studiis recte instituti valeant in tempore dominicum agrum diligenter excolere, ac strenue proeliari proelia Domini. Porro cum Vobis compertum sit, ad ecclesiastici ordinis dignitatem et sanctimoniam retinendam et conservandam pium spiritualium exercitiorum institutum vel maxime conducere, pro episcopali vestro zelo tam salutare opus urgere, omnesque in sortem Domini vocatos monere, hortari ne intermittatis, ut saepe in opportunum aliquem locum iisdem peragendis exercitiis secedant, quo, exterioribus curis sepositis, ac vehementiori studio aeternarum divinarumque rerum meditationi vacantes, et contractas de mundano pulvere sordes detergere, et ecclesiasticum spiritum renovare possint, atque exspoliantes veterem hominem cum actibus suis, novum induant, qui creatus est in iustitia et sanctitate. Neque Vos pigeat, si in Cleri institutione et disciplina paulo diutius immorati sumus. Etenim minime ignoratis, multos existere, qui errorum varietatem, inconstantiam, mutabilitatemque pertaesii, ac sanctissimam nostram religionem profitendi necessitatem sentientes, ad ipsius religionis doctrinam, praecepta, instituta eo facilius, Deo bene iuvante, amplectenda, colenda adducuntur, quo maiori Clerum pietatis, integritatis, sapientiae laude, ac virtutum omnium exemplo et splendore ceteris antecellere conspexerint.

Ceterum, Fratres Carissimi, non dubitamus, quin Vos omnes ardenti erga Deum et homines caritate incensi, summo in Ecclesiam amore inflammati, angelicis pene virtutibus instructi, episcopali fortitudine, prudentia muniti, uno eodemque sanctae voluntatis desiderio animati, Apostolorum vestigia sectantes, et Christum Iesum Pastorum omnium exemplar, pro quo legatione fungimini, imitantes, quemadmodum decet Episcopos, concordissimis studiis, facti forma gregis ex animo, sanctitatis vestrae splendore clerum populumque fidelem illuminantes, atque induti viscera misericordiae, et condolentes iis, qui ignorant et errant, devias ac pereuntes oves evangelici Pastoris exemplo amanter quaerere, persequi, ac paterno affectu vestris humeris imponere, ad ovile reducere, ac nullis neque curis, neque consiliis, neque laboribus parcere unquam velitis, quo omnia pastoralis muneris officia religiosissime obire, ac omnes dilectas Nobis oves pretiosissimo Christi Sanguine redemptas, et curae vestrae commissas a rapacium luporum rabie, impetu, insidiis defendere, easque ab venenatis pascuis arcere, ad salutaria propellere, et qua opere, qua verbo, qua exemplo ad aeternae salutis portum deducere valeatis. In maiori igitur Dei et Ecclesiae gloria procuranda viriliter agite, Venerabiles Fratres, et omni alacritate, sollicitudine, vigilantia in hoc simul elaborate, ut omnibus erroribus penitus depulsis, vitiisque radicibus evulsis, fides, religio, pietas, virtus maiora in dies ubique incrementa suscipiant, cunctique fideles abiicientes opera tenebrarum, sicut filii lucis ambulant digne Deo per omnia placentes, et in omni opere bono fructificantes. Atque inter maximas angustias, difficultates, pericula, quae a gravissimo episcopali vestro ministerio hisce praesertim temporibus abesse non possunt, nolite unquam terri, sed confortamini in Domino, et in potentia virtutis Eius, *qui nos in congressione nominis sui constitutos desuper spectans, volentes comprobat, adiuvat dimicantes, vincentes coronat*<sup>2)</sup>. Cum autem Nobis nihil gratius, nihil iucundius, nihil optabilius quam Vos omnes, quos diligimus in visceribus Christi Jesu, omni affectu, consilio, opera iuvare, atque una Vobiscum in Dei gloriam et catholicam fidem tuendam, propagandam toto pectore incumbere, et animas salvas facere, pro quibus vitam

<sup>1)</sup> Concil. Trid. Sess. XXIII. cap. 18. de Reform.

<sup>2)</sup> S. Cyprian. Epist. 77. ad Nemesianum et ceteros Martyres.

ipsam, si opus fuerit, profundere parati sumus, venite, Fratres, obtestamur, et obsecramus, venite magno animo, magnaque fiducia ad hanc Beatissimi Apostolorum Principis Sedem, Catholicae unitatis centrum, atque Episcopatus apicem, unde ipse Episcopatus, ac tota eiusdem nominis auctoritas emersit, venite ad Nos quotiescunque Nostrae, et eiusdem Sedis auctoritatis ope, auxilio, praesidio Vos indigere noveritis.

In eam porro spem erigimur fore, ut Carissimi in Christo Filii Nostri Viri Principes, pro eorum pietate et religione in memoriam revocantes, *regiam potestatem sibi non solum ad mundi regimen, sed maxime ad Ecclesiae praesidium esse collatam*<sup>1)</sup>, et Nos cum *Ecclesiae causam, tum eorum regni agere, et saluti, ut provinciarum suarum quieto iure potiantur*<sup>2)</sup>, communibus nostris votis, consiliis, studiis sua ope et auctoritate faveant, atque ipsius Ecclesiae libertatem incolumitatemque defendant, ut et *Christi dextera eorum defendatur imperium*<sup>3)</sup>.

Quae omnia ut prospere, feliciterque ex sententia succedant, adeamus cum fiducia, Venerabiles Fratres, ad thronum gratiae, atque unanimes in humilitate cordis nostri Patrem misericordiarum et Deum totius consolationis enixis precibus sine intermissione obsecremus, ut per merita Unigeniti Filii sui infirmitatem nostram omnium caelestium charismatum copia cumulare dignetur, atque omnipotenti sua virtute expugnet impugnantes nos, et ubique augeat fidem, pietatem, devotionem, pacem, quo Ecclesia sua sancta, omnibus adversitatibus et erroribus penitus sublati, optatissima tranquillitate fruatur, ac fiat unum ovile et unus pastor. Ut autem clementissimus Dominus facilius inclinet aurem suam in preces nostras et nostris annuat votis, deprecatricem apud Ipsum semper adhibeamus sanctissimam Dei Genitricem Immaculatam Virginem Mariam, quae nostrum omnium dulcissima mater, mediatrix, advocata et spes fidelissima ac maxima fiducia est, cuius patrocinio nihil apud Deum validius, nihil praesentius. Invocemus quoque Apostolorum Principem, cui Christus ipse tradidit claves regni caelorum, quemque Ecclesiae suae petram constituit, adversus quam portae inferi praevalere nunquam poterunt et Coapostolum eius Paulum, atque omnes Sanctos caelites, qui iam coronati possident palmam, ut desideratam divinae propitiationis abundantiam universo christiano populo impetrent.

Denique caelestium omnium munerum auspicem, et potissimae Nostrae in Vos caritatis testem. accipite Apostolicam Benedictionem, quam ex intimo corde deprecptam Vobis ipsis, Venerabiles Fratres, et omnibus Clericis, Laicisque Fidelibus curae vestrae concreditis, amantissime impertimur.

Datum Romae apud Sanctam Mariam Maiorem, die IX. Novembris anno MDCCCLXVI., Pontificatus Nostri anno primo.

## Allocutio

habita in consistorio secreto die IV. octobris anni MDCCCXLVII<sup>4)</sup>.

### Venerabiles Fratres.

Quisque vestrum, Venerabiles Fratres, optime noscit quibus quantisque divinae nostrae religionis documentis, monumentisque Hierosolyma urbs, et universa Palaestinae regio mirandum in modum undique refulgeant, *ubi et visui et tactui se tota ingerunt humanae sacramenta salutis*<sup>1)</sup>. Siquidem ibi Unigenitus Dei Filius Christus Jesus Dominus noster propter nimiam, qua nos dilexit, caritatem obumbrata Divinitatis suae maiestate servilem formam indutus et in similitudinem hominum factus, ex intacta Davidica Virgine nasci, vitamque suam agere, ac magna miracula operari est dignatus, tribuens peccatoribus misericordiam, aegris salutem, errantibus veritatem,

<sup>1)</sup> S. Leo Epist. 156. alias 125. ad Leonem Augustum.

<sup>2)</sup> S. Leo Epist. 43. alias 34. ad Theodosium Augustum.

<sup>3)</sup> Idem ibid.

<sup>4)</sup> *Ilic ref. prop* 63.

<sup>5)</sup> S. Leo Epist. ad Juvenal. Episc. Hierosolymit.

caecis lucem, mortuis vitam. Ibi ad universum humanum genus a peccati iugo et daemonis captivitate vindicandum saevissimam passionem, acerbissimamque crucis mortem sustinuit confusione contempta, ac post triduum *devictae mortis spoliis onustus* ) divina sua potentia resurrexit; ibi quadraginta dierum spatio saepius apprensus discipulis suis, ac loquens de regno Dei, postquam illos in fide et caritate roboravit, eisque praecepit, ut euntes in mundum universum praedicarent evangelium omni creaturae, ac docerent servare omnia quaecumque ipsis mandaverat, magnis revelatis mysteriis, magnisque confirmatis sacramentis, in conspectu sanctae multitudinis, triumphans et captivam ducens captivitatem, super omnes caelos ad dexteram Dei Patris consessurus adscendit. Ibi ad Apostolos suos illuminandos, corroborandos, atque ad renovandam terrae faciem, veteresque tenebras abigendas, misso sancto Paraclito Spiritu, voluit, ut Apostoli ab Hierosolyma ipsa urbe evangelicae praedicationis opus ordirentur, antequam in omnem dispergerent orbem. Quae cum ita sint, merito atque optimo iure christiani populi sancta illius regionis loca omni pietatis, religionis et venerationis affectu semper sunt prosequuti. Postquam vero tristissimis rerum ac temporum vicibus regiones illae et christianorum Imperatorum dominatione abreptae fuere, Romani Pontifices Decessores Nostri, et catholici Principes vehementer optantes gravissimis fidelium necessitatibus occurrere, eosque ab iniustissima et crudelissima, qua premebantur, servitute vindicare, variis temporibus nihil intentatum reliquerunt, ut loca ipsa ab infidelium eriperent potestate. Hinc Hierosolymitana Ecclesia, cui ab Innocentio III. Praedecessore Nostro in Concilio Lateranensi quarto Patriarchalis dignitas fuit confirmata, summo semper in honore habita peculiarem Romanorum Pontificum curam et sollicitudinem sibi comparavit. Qui quidem Romani Pontifices etiam postquam sacra eadem loca ab infidelibus iterum occupata fuere, immo et cum vix ulla de illis recuperandis spes affulgeret, Latinos Patriarchas Hierosolymitanos renuntiare et constituere haudquaquam intermiserunt, licet eos a residendi obligatione solvere, quamdiu loca ipsa ab infidelibus detinerentur, ac spirituali illorum fidelium bono alia ratione pro viribus consulere debuerint.

Nos certe de illa Dominici gregis parte vel maxime solliciti, ac summa erga ipsas regiones pietate affecti, vel ab ipso Nostri Pontificatus exordio nihil antiquius habuimus, quam ut Latini Ritus Patriarcha Hierosolymae iterum in sua sede posset consistere. Cum autem, Deo bene iuvante, difficultates omnes, prout summopere optabamus, penitus sublatas esse conspexerimus, nihilque nunc temporis obstat, quominus ipse Patriarcha Ecclesiae suae curam praesens agere valeat, nullam moram interponendam duximus, ut huiusmodi res pro maiore Dei gloria atque illorum fidelium utilitate ad optatum exitum adduceretur. Quamobrem tanti momenti negotium iuxta prudentem Nostrae Congregationis de Propaganda Fide sententiam absolvendum curavimus, atque Apostolicas Litteras die decimo kalendas proximi mensis Augusti huius anni annulo Piscatoris obsignatas dedimus, quibus totius rei rationem explicavimus. Et quoniam Venerabilis Frater Daulus Augustus Foscolo, qui Latino Hierosolymitano Patriarchatu potiebatur, se illo abdicavit, et Nos eiusmodi abdicatione accepta atque approbata, ipsum Venerabilem Fratrem a vinculo, quo Hierosolymitanae Ecclesiae obstringebatur, solvimus, ideoque ad novi Patriarchae electionem procedere existimavimus. Itaque commemoratae Congregationis suffragio in Latinum Patriarcham Hierosolymitanum eligere constituimus dilectum Filium Presbyterum Josephum Valgera, qui singulari integritate, pietate, doctrina, prudentia, ac rerum gerendarum dexteritate spectatus, et huic Petri Cathedrae ex animo addictus, ac Missionarii munere in Syria, Mesopotamia et Perside egregie perfunctus, gravia rei catholicae negotia sibi commissa sedulo scienterque conficienda curavit. Quapropter in eam spem erigimur fore, ut ipse praeclaris hisce dotibus praeditus, easdem caelesti ope fretus ad Patriarchatus locum deferat, atque ad catholicam praesertim religionis incrementum et concrediti sibi populi utilitatem maiori alacritate et studio exhibere, atque exercere contendat. Haec sunt, Venerabiles Fratres, quae Vobis communi-

\*) S. Ansel. Serm. 52. de Paschat.

canda censuimus, dum pro certo habemus, Vos una nobiscum assiduas fervidasque Deo Optimo Maximo preces cum gratiarum actione esse oblaturus, quo communibus nostris votis clementissime annuens, divina sua gratia efficere velit, ut in illis regionibus, ubi *quilibet christianus habitans ad Evangelii cognoscendam virtutem non solum paginarum eloquiis, sed ipsorum locorum testimoniis eruditur*<sup>1)</sup>, catholica fides maiora in dies incrementa suscipiat, ac prospere feliciterque vigeat et floreat.

Atque hic, Venerabiles Fratres, clare aperteque declaramus, tum in hac re, tum in aliis quibusque Nostras omnes curas, cogitationes, studia ab omni prorsus cuiuslibet humanae politicae ratione vel maxime aliena eo spectare, ut sanctissima Christi religio, et doctrina ubique terrarum cunctis populis magis magisque affulgeat. Etsi enim exoptemus, ut Viri Principes, quibus a Domino data est potestas, avertentes aures suas a fraudulentis et perniciosis consiliis, et custodientes iustitiae legem, ac secundum Dei voluntatem ambulantes, Eiusque sanctae Ecclesiae iura, et libertatem tuentes, pro eorum religione, ac benignitate suorum populorum felicitatem prosperitatemque procurare non desistant, tamen vehementer dolemus in diversis locis nonnullos et populo existere, qui Nostro nomine temere abutentes, et gravissimam Personae Nostrae, ac Supremae Dignitati iniuriam inferentes, debitam erga Principes subiectionem denegare, et contra illos turbas, praevariosque motus concitare audent<sup>2)</sup>. Quod certe a Nostris consiliis adeo abhorrere constat, ut in Nostris Encyclicis Litteris ad omnes Venerabiles Fratres Episcopos, die nona mensis Novembris superiori anno datis, haud omiserimus inculcare debitam erga Principes, et Potestates obedientiam, a qua iuxta christianae legis praeceptum, nemo citra piaculum deflectere umquam potest, praeterquam scilicet ubi forte aliquid iubeatur, quod Dei, et Ecclesiae legibus adversetur<sup>3)</sup>.

Quid Vobis videtur?

Auctoritate Omnipotentis Dei, Sanctorum Apostolorum Petri et Pauli, ac Nostra, Dilectum Filium Presbyterum Josephum Valerga ad Patriarchatum Latinum Hierosolymitanum evehimus, eumque in illius Ecclesiae Patriarcham et Pastorem praeficimus, prout in decreto et schedula consistorialiabus exprimitur.

In nomine Patris †, et Filii †, et Spiritus Sancti †, Amen.

## Allocutio

habita in consistorio secreto die XVII. decembris anni MDCCCXLVII<sup>4)</sup>.

Venerabiles Fratres.

Ubi primum nullis certe Nostris meritis, sed inscrutabili Dei iudicio in hac Principis Apostolorum Cathedra collocati catholicae Ecclesiae gubernacula tractanda suscepimus, Apostolicae Nostrae sollicitudinis curas in Hispaniam convertimus, quemadmodum optime noscitis, Venerabiles Fratres. Hinc intimo Nostri cordis dolore considerantes gravissima damna, quibus ob tristes rerum vicissitudines magna illa et inclyta Dominici gregis portio premebatur, divitem in misericordia Deum assiduis enixisque precibus humiliter obsecrare numquam destitimus, ut afflictis illis Ecclesiis opem afferre, easque a misero, in quo versabantur, statu revocare dignaretur. Atque pro Apostolici Nostri ministerii debito, et singulari paternae caritatis affectu, quo illustrem illam nationem prosequimur, nihil certe Nobis potius fuit, quam ut sanctissimae nostrae Religionis negotia ibi componere studeamus. Cum autem felices recordationis Gregorius XVI. Praedecessor Noster incepisset suis instruere Pastoribus nonnullas illius Regni Dioeceses in dissitis transmarinis regionibus sitas, in id peculiare Nostras curas intendimus, ut aliis pluribus ipsius Regni vacantibus Ecclesiis in continenti etiam positus novos valeremus dare Antistites eo munere dignos, atque ita per-

<sup>1)</sup> S. Leo, ibidem.

<sup>2)</sup> Supra, pag. 19, 23.

<sup>3)</sup> Huc ref. prop. 63.

<sup>4)</sup> Huc ref. prop. 16.

ficere quod idem Decessor Noster morte praeventus absolvēre minime potuerat. Quamobrem Venerabilem Fratrem Ioannem Archiepiscopum Thesalonicensem virum integritate, doctrina, prudentia, ac rerum gerendarum peritia praestantem cum Nostris ad Carissimam in Christo Filiam Nostram Mariam Elisabeth Reginam Catholicam Litteris, atque opportunis facultatibus et instructionibus in Hispaniam misimus, ut quidquid ad sanandas inibi contritiones Israel, atque ad catholicae religionis bonum promovendum conducere, omni studio curaret; atque inter alia efficeret ut viduatas illic Ecclesias idoneis Pastoribus concrederemus. Itaque, clementissimo misericordiarum Patre votis studiisque Nostris opitulante, evenit, ut summa animi Nostri consolatione nonnullos, veluti nostis, in illis regionibus Antistites iam constituere potuerimus, atque in praesentia multas alias Hispaniarum Cathedralis et Metropolitanas Ecclesias diu vacantes canonico suorum Pastorum regimini et procuracioni tradere, atque ita divini Nominis gloriae, catholicae Religionis bono, ac spirituali illarum dilectarum ovium salutis consulere valeamus. Quod quidem futurum confidimus, cum ex relatione commemorati Venerabilis Fratris Delegati Nostri, atque ex actis maturo examine ab ipso confectis agnoverimus, viros ipsis Dioecesium regendis ac moderandis destinatos eas habere dotes, quae ad pastorale munus rite utiliterque obeundum requiruntur. In eam autem spem erigimur fore, ut quamprimum aliarum illius Regni Ecclesiarum viduitati prospicere possimus, utque rebus iam nunc in meliorem conditionem vergentibus, et favente etiam Catholica Maiestate Sua in aliis porro atque aliis religionis negotiis, in quae idem Venerabilis Frater Delegatus Noster studiosissime incumbit, vota et consilia Nostra felicem dante Domino exitum assequantur.

Alia etiam longe amplissima sub alio magno Principe regio est<sup>1)</sup>, in qua Catholicae Religionis res diuturnis gravioribusque calamitatibus afflictae ipsum recolendae memoriae Decessorem Nostrum multos per annos sollicitum habuerant, et praecipuas Nostras curas sibi pariter vindicarunt. Equidem optavissimus hoc ipso die Vos certiores facere de bono exitu, quem aliqua ex parte Nostras ipsas curas habuisse confidebamus. Non defuere autem quidam ephemeridum scriptores, qui id ipsum feliciter evenisse affirmarint. Nos tamen nihil adhuc annuntiare Vobis possumus, nisi firmam spem, qua sustentamur fore, ut omnipotens et misericors Deus propitius respiciat super Ecclesiae suae filios tantis inibi tribulationibus conflictatos, et sollicitudini benedicat, qua statum catholicae Religionis in meliorem illic conditionem adducere connititur.

Nunc porro Vobiscum communicamus, Venerabiles Fratres, summam admirationem, qua intime affecti fuimus, ubi scriptum, a quodam viro ecclesiastica Dignitate insignito elucubratum, typisque editum, ad Nos pervenit. Namque idem vir in huiusmodi scripto de quibusdam loquens doctrinis, quas Ecclesiarum regionis suae traditiones appellat<sup>2)</sup>, et quibus huius Apostolicae Sedis iura coarctare intenditur, haud erubuit asserere, traditiones ipsas a Nobis in pretio haberi. Absit enimvero, Venerabiles Fratres, ut mens aut cogitatio Nobis umquam fuerit vel minimum declinare a Maiorum institutis, aut abstinere ab huius Sanctae Sedis auctoritate sarta tecta conservanda, atque tuenda. Habemus equidem in pretio peculiare traditiones, sed eas tantum, quae a Catholica Ecclesiae sensu non discrepant; praesertim vero illas reveremur ac firmissime tuemur, quae cum aliarum Ecclesiarum traditione, atque in primis cum hac sancta Romana Ecclesia plane congruant, ad quam, ut S. Irenaei verbis utamur, *propter potiorem principalitatem necesse est omnem convenire Ecclesiam, hoc est eos, qui sunt undique fideles, in qua semper ab his, qui sunt undique, conservata est ea, quae est ab Apostolis traditio*<sup>3)</sup>.

At aliud insuper est, quod animum Nostrum vehementer angit et urget. Ignotum certe Vobis non est, Venerabiles Fratres, multos hostium Catholicae veritatis in id praesertim nostris temporibus conatus suos intendere, ut monstruosa quaeque opinionum portenta aequiparare doctrinae

<sup>1)</sup> De Russia et Polonia sermo est. *N. edit.*

<sup>2)</sup> De libertatibus quas vocant gallicanis agi videtur. Quo ref. §§. V. et VI. Syll. *N. ed.*

<sup>3)</sup> S. Iren. contra haereses. Lib. III. cap. 3.

Christi, aut cum ea commiscere vellent, atque ita impium illud de cuiuslibet religionis *indifferentia* systema magis magisque propagare commoliuntur. Novissime autem, horrendum dictu! inventi aliqui sunt qui eam nomini, et Apostolicae dignitati Nostrae contumeliam imposuerunt, ut Nos veluti participes stultitiae suae, et memorati nequissimi systematis fautores traducere non dubitarint. Hi nimirum ex consiliis, a Religione Catholicae sanctitate haud certe alienis, quae in negotiis quibusdam ad civilem pontificiae Ditionis procuracionem spectantibus benigne ineunda duximus publicae commoditati et prosperitati ampliandae, atque ex vana nonnullis eiusdem Ditionis hominibus initio ipso Pontificatus Nostri clementer impertita, conicere voluerunt, Nos ita benevole sentire de quocumque hominum genere, ut nedum Ecclesiae filios, sed ceteros etiam, utut a Catholica unitate alieni permaneant, esse pariter in salutis via, atque ad aeternam vitam pervenire posse arbitremur<sup>1)</sup>. Desunt Nobis prae horrore verba ad novam hanc contra Nos, et tam atrocem iniuriam detestandam. Amamus equidem intimo cordis affectu homines universos, non aliter tamen quam in caritate Dei et Domini nostri Iesu Christi, qui venit quaerere et salvum facere quod perierat, qui pro omnibus mortuus est, qui omnes homines vult salvos fieri, et ad agnitionem veritatis venire; qui misit proinde discipulos suos in mundum universum praedicare evangelium omni creaturae, denuntians eos, qui crediderint et baptizati fuerint, salvos fore, qui vero non crediderint, condemnatum iri. Veniant igitur qui salvi fieri volunt, ad columnam et firmamentum veritatis, quod Ecclesia est, veniant scilicet ad veram Christi Ecclesiam, quae in suis Episcopis summoque omnium capite Romano Pontifice successionem habet Apostolicae auctoritatis nullo tempore interruptam, quae nihil umquam potius habuit quam ut praedicaret, atque omni ope custodiret ac tueretur doctrinam ex Christi mandato ab Apostolis annunciatam; quae inde ab Apostolorum aetate in mediis omne genus difficultatibus crevit, et per totum orbem miraculorum splendore inelyta, Martyrum sanguine amplificata, Confessorum et Virginum nobilitata virtutibus, Patrum testimoniis scriptisque sapientissimis corroborata viguit, vigeatque in cunctis terrae plagis, et perfecta fidei, sacramentorum, sacrique regiminis unitate refulget. Nos qui, licet indigni, praesidemus in suprema hac Petri Apostoli Cathedra, in qua Christus Dominus eiusdem Ecclesiae suae fundamentum posuit, nullis nullo unquam tempore curis laboribusque abstinerebimus, ut per ipsius Christi gratiam eos qui ignorant, et errant, ad unicam hanc veritatis et salutis viam adducamus. Meminerint autem quicumque ex adverso sunt, transiturum quidem coelum et terram, sed nihil praeterire umquam posse ex verbis Christi, neque in doctrina commutari, quam a Christo Ecclesia Catholica custodiendam, tuendam, et praedicandam accepit.

Post haec haud possumus, quin Vobis, Venerabiles Fratres, loquamur de doloris acerbitate, qua confecti fuimus, proptereaquod paucis ante diebus in hac alma Urbe Nostra catholicae Religionis arce et centro nonnulli paucissimi illi quidem homines prope delirantes reperiri potuerint, qui vel ipsum humanitatis sensum abiicientes, cum maximo aliorum ipsius Urbis civium fremitu et indignatione, minime exhorruerunt palam publiceque triumphare in luctuosissimo intestino bello nuper inter Helvetios excitato. Quod fatale sane bellum Nos intimo corde ingemiscimus, tum ob effusum illius nationis sanguinem, fraternamque caedem, et atroces, diuturnas, funestasque discordias, odia, dissidia, quae ex civilibus potissimum bellis in populos redundare solent, tum ob detrimenta, quae inde catholicae rei obvenisse accepimus, et obventura adhuc timeamus, tum denique ob deploranda sacrilegia in primo conflictu commissa, quae commemorare animus refugit.

Ceterum dum haec lamentamur, humillimas Deo totius consolationis agimus gratias, qui in multitudine misericordiae suae non desinit Nos consolari in omni tribulatione Nostra. Etenim inter tantas angustias non leve certe Nobis solatium afferunt et prosperi sacrarum Missionum eventus, et strenui evangelicorum Ministrorum labores, qui apostolico zelo incensi, gravissima quaecumque pericula atque discrimina invictae despicientes, in remotissimis regionibus populos ab errorum tenebris, morumque feritate ad

<sup>1)</sup> *Huc ref. §. III. Syll., praesertim prop. 16.*



catholicae veritatis lumen, omnemque virtutis et humanitatis cultum traducere, ac pro Dei gloria et animarum salute fortiter pugnare non desinunt; et pientissima ac plane eximia catholicorum populorum studia, qui Nostris desideriis mirifice obsecundantes non levia afflictas pauperum Hibernorum genti subsidia praebere haud intermiserunt, quique tum largitionibus ad Nos etiam missis, tum assiduis ad Deum precibus omnem opem conferre non cessant, ut sanctissima Christi fides atque doctrina longe lateque ubique gentium, ubique terrarum felici faustoque progressu magis magisque propagetur. Quae praeclara opera, omni certe laudum praeconio digna, dum peculiari gratissimi animi Nostri testificatione prosequimur, a clementissimo bonorum omnium largitore Deo humiliter poscimus, ut fidelibus suis uberem pro illis retribuatur in aeternitate mercedem.

Habetis, Venerabiles Fratres, quae Vobis hodierno die significanda iudicavimus. Cum autem hanc Nostram Allocutionem in publicum emittere censuerimus, hac occasione sermonem Nostrum ad alios quoque Venerabiles Fratres, universi catholici Orbis Patriarchas, Archiepiscopos, Episcopos, toto cordis affectu convertimus, eosque omnes et singulos obsecramus, atque hortamur in Domino, ut stabili inter se concordia et caritate coniuncti, atque arctissimo fidei et observantiae vinculo Nobis et huic Petri Cathedrae obstricti, perfecti sint in eodem sensu et in eadem sententia, atque humanis quibusque sepositis rationibus, et solum Deum ob oculos habentes, Eiusque auxilium iugibus, fervidisque precibus implorantes, nihil vigilantiae, nihil laboribus unquam praetermittant, ut episcopali fortitudine, constantia, prudentia praeliantur praelia Domini, et maiori usque alacritate dilectas oves eorum curae commissas ab venenatis pascuis avertant, ad salutaria propellant, easque nunquam patiantur decipi doctrinis variis et peregrinis, sed strenue a rapacium luporum insidiis et impetu defendant, itemque errantes in omni bonitate, patientia, et doctrina ad veritatis et iustitiae semitam reducere contendant, ut et illi divina auxiliante gratia occurrant in unitatem fidei, et agnitionem Filii Dei, atque ita fiant nobiscum unum ovile et unus pastor.

## Allocutio

habita Caietae in consistorio secreto die XX. aprilis anni MDCCCXLIX<sup>1)</sup>.

### Venerabiles Fratres.

Quibus, quantisque malorum procellis summo cum animi Nostri dolore Pontificia Nostra ditio, omnisque fere Italia miserandum in modum iactetur ac perturbetur, nemo certe ignorat, Venerabiles Fratres. Atque utinam homines tristissimis hisce rerum vicibus edocti aliquando intelligant, nihil ipsis perniciosius esse posse, quam a veritatis, iustitiae, honestatis et religionis semitis deflectere, ac nequissimis impiorum consiliis acquiescere, eorumque insidiis, fraudibus et erroribus decipi atque irretiri! Equidem universus terrarum orbis probe nescit, atque testatur, quae quantaque fuerit paterni atque amantissimi animi Nostri cura et sollicitudo in vera solidaque Pontificiae Nostrae ditionis populorum utilitate, tranquillitate, prosperitate procuranda, et quis tantae Nostrae indulgentiae et amoris fructus extiterit. Quibus quidem verbis callidissimos tantorum malorum artifices dumtaxat damnamus, quin ullam maximae populorum parti culpam tribuere velimus. Verumtamen deplorare cogimur, multos etiam e populo ita misere fuisse deceptos, ut aures suas a Nostris vocibus ac monitis avertentes, illas fallacibus quorundam magistrorum doctrinis prae buerint, qui relinquentes *iter rectum*, et *per vias tenebrosas* ambulantes<sup>2)</sup>, eo unice spectabant, ut imperitorum praesertim animos mentesque magnificis falsisque promissis in fraudem et in errorem inducerent, ac plane compellerent. Omnes profecto norunt, quibus laudum praeconiis fuerit ubique concelebrata memoranda illa et amplissima venia a Nobis ad familiarum pacem, tranquillitatem, felicitatemque procurandam concessa. Ac neminem latet, plures ea venia donatos non

<sup>1)</sup> *Huc referuntur Propositiones* 40, 64, 76. <sup>2)</sup> Prov. II. 13.

solum suam mentem vel minimum haud immutasse, quemadmodum sperabamus, verum etiam eorum consiliis et molitionibus acrius in dies insistentes nihil umquam inausum, nihilque intentatum reliquisse, ut civilem Romani Pontificis Principatum, eiusque regimen, uti iamdiu machinabantur, labefacerent et funditus everterent, ac simul acerrimum sanctissimae nostrae religioni bellum inferrent. Ut autem id facilius consequi possent, nihil antiquius habuere, quam multitudines in primis convocare, inflammare, easque assiduis magnisque motibus agitare, quos vel Nostrarum concessionum praetextu continenter fovere et in dies augere summopere studebant. Hinc concessiones in ipso Nostri Pontificatus initio a Nobis ultro ac libenter datae non solum optatos fructus haud emittere, sed ne radices quidem agere unquam potuere, cum peritissimi fraudum architecti iisdem concessionibus ad novas concitandas agitationes abuterentur. Atque in hoc vestro consensu, Venerabiles Fratres, facta ipsa vel leviter attingere, ac raptim commemorare ea sane mente censuimus, ut omnes bonae voluntatis homines clare aperteque cognoscant, quid Dei et humani generis hostes velint, quid optent, quidque ipsis in animo semper fixum destinatumque sit.

Pro singulari Nostro in subditos affectu dolebamus, ac vehementer angebamur, Venerabiles Fratres, cum assiduos illos populares motus tum publicae tranquillitati et ordini, tum privatae familiarum quieti ac paci tantopere adversos videremus, nec perferre poteramus crebras illas pecuniarias collectas, quae variis nominibus non sine levi civium incommodo et dispendio postulabantur. Itaque mense Aprili anno 1847 per publicum Edictum Nostri Cardinalis a publicis negotiis omnes monere haud omisimus, ut ab eiusmodi popularibus conventibus et largitionibus sese abstinerent, atque ad propria pertractanda negotia animum mentemque denuo converterent, omnemque in Nobis fiduciam collocarent, ac pro certo haberent, paternas Nostras curas cogitationesque ad publica commoda comparanda unice esse conversas, quemadmodum iam pluribus ac luculentissimis argumentis ostenderamus. Verum salutaria haec Nostra monita, quibus tantos populares motus compescere et populos ipsos ad quietis et tranquillitatis studia revocare nitebamur, pravis quorundam hominum desideriis et machinationibus vehementer adversabantur. Itaque indefessi agitationum auctores, qui iam alteri ordinationi iussu Nostro ab eodem Cardinali ad rectam utilemque populi educationem promovendam editae obstiterant, vix dum monita illa Nostra noverunt, haud destitere contra ipsa ubique inclamare et acriori usque studio incautas multitudines commovere, eisque callidissime insinuare ac persuadere, ne illi tranquillitati a Nobis tantopere exoptatae se umquam dare vellent, cum insidiosum in ea lateret consilium, ut populi quodammodo indormirent, atque ita in posterum duro servitutis iugo facilius opprimi possent. Atque ex eo tempore plurima scripta typis quoque edita, atque acerbissimis quibusque contumeliis, conviciis, minisque plenissima ad Nos missa fuere, quae oblivione sempiterna obruimus, flammisque tradidimus. Ut autem inimici homines fidem aliquam facerent falsis periculis, quae in populum impendere clamitabant, haud reformidarunt mentitae cuiusdam coniurationis, ab ipsis apposite excogitatae, rumorem ac metum in vulgus spargere, ac turpissimo mendacio vociferari, eiusmodi coniurationem initam esse ad urbem Romam civili bello, caedibus ac funeribus funestandam, ut novis institutionibus penitus sublatis atque deletis, pristina gubernandi forma iterum revivisceret. Sed huius falsissimae coniurationis praetextu inimici homines eo spectabant, ut populi contemptum, invidiam, furorem contra quosdam lectissimos quoque viros virtute, religione praestantes et ecclesiastica etiam dignitate insignes, nefarie commoverent atque excitarent. Probe nostis, in hoc rerum aestu civicam militiam fuisse propositam, ac tanta celeritate collectam, ut rectae illius institutioni et disciplinae consuli minime potuerit.

Ubi primum ad publicae administrationis prosperitatem magis magisque procurandam opportunum fore censuimus Status Consultationem instituere, inimici homines occasionem exinde statim arripuerunt, ut nova Gubernio vulnera imponerent ac simul efficerent, ut huiusmodi institutio, quae publicis populorum rationibus magnae utilitati esse poterat, in damnum ac perniciem cederet. Et quoniam eorum opinio impune iam invaluerat, ea institutione et Pontificii regiminis indolem ac naturam immutari, et Nostram auctori-

tatem Consultorum iudicio subiici, idcirco eo ipso die, quo illa Status Consultatio inaugurata fuit, haud omisimus turbulentos quosdam homines, qui Consultores comitabantur, gravibus severisque verbis serio monere, eisquæ verum huius institutionis finem clare aperteque manifestare. Verum perturbatores numquam desinebant, deceptam populi partem maiore usque impetu sollicitare, et quo facilius asseclarum numerum habere et augere possent, tum in Pontificia Nostra ditione, tum apud externas quoque gentes insigni prorsus impudentia atque audacia evulgabant, eorum opinionibus et consiliis Nos plane assentire. Memineritis, Venerabiles Fratres, quibus verbis in Nostra Consistoriali Allocutione, die 4. mensis Octobris anno 1847 ad Vos habita, universos populos serio commonere et exhortari haud omiserimus, ut ab eiusmodi veteratorum fraude studiosissime caverent. Interim vero pervicaces insidiarum et agitationum auctores, ut turbas metusque continenter alerent et excitarent, mense Ianuario superioris anni incautorum animos inani externi belli rumore territabant, atque in vulgus spargebant, bellum idem internis conspirationibus et malitiosa Gubernantium inertia foveri ac sustentatum iri. Nos ad tranquillandos animos, et insidiantium fallacias refellendas nulla quidem interposita mora die 10. Februarii ipsius anni voces eiusmodi omnino falsas et absurdas esse declaravimus illis Nostris verbis, quæ omnes probe cognoscunt. Atque in eo tempore carissimis Nostris subditis, quod nunc Deo bene iuvante eveniet, prænuntiavimus, futurum scilicet, ut innumerabiles filii ad communis omnium fidelium Patris domum, ad Ecclesiae nempe Statum propugnandum convolarent, si arctissima illa grati animi vincula, quibus Italiae Principes, populique intime inter se obstringi debebant, dissoluta fuissent, ac populi ipsi suorum Principum sapientiam, eorumque iurium sanctitatem vereri, ac totis viribus tueri et defendere neglexissent.

Etsi vero Nostra illa verba nuper commemorata tranquillitatem brevi quidem temporis spatio iis omnibus attulere, quorum voluntas continuæ adversabatur perturbationi, nihil tamen valere apud infensissimos Ecclesiae et humanae societatis hostes, qui novas iam turbas, novos tumultus concitaverant. Siquidem calumniis insistentes, quæ ab ipsis, eorumve similibus contra Religiosos Viros divino ministerio addictos, et bene de Ecclesia meritos disseminatae fuerant, populares iras omni impetu adversus illos excitaverunt atque inflammaverunt. Neque ignoratis, Venerabiles Fratres, nihil valuisse Nostra verba ad populum die 10. Martii superioris anni habita, quibus Religiosam illam familiam ab exilio et dispersione eripere magnopere studebamus.

Cum inter hæc notissimæ illæ rerum publicarum conversiones in Italia et Europa evenirent, Nos iterum Apostolicam Nostram attollentes vocem die 30. Martii eiusdem anni haud omisimus universos populos etiam atque etiam monere, hortari, ut et catholicae Ecclesiae libertatem vereri, et civilis societatis ordinem tegere, et omnium iura tueri, et sanctissimæ nostræ Religionis praecepta exequi, et in primis christianam in omnes caritatem exercere omnino studerent, quandoquidem si hæc ipsi agere neglexissent, pro certo haberent, quod Deus ostenderet, se populorum dominatorem esse.

Iam vero quisque vestrum plane noscit quomodo in Italiam Constitutionarii regiminis forma fuerit invecta, et quomodo Statutum a Nobis die 14. Martii superioris anni Nostris Subditis concessum in lucem prodierit. Cum autem implacabiles publicæ tranquillitatis et ordinis hostes nihil antiquius haberent, quam omnia contra Pontificium Gubernium conari, et populum assiduís motibus, suspicionibus exagitare, tum qua scriptis in lucem editis, qua Circulis, qua Societatibus, et aliis quibusque artibus nunquam intermittebant Gubernium atrociter calumniari, eique inertiae, doli et fraudis notam inurere, licet Gubernium ipsum omni cura et studio in id incumberet, ut Statutum tantopere exoptatum maiore, qua fieri posset, vulgaretur celeritate. Atque hic universo terrarum orbi manifestare volumus, eo ipso tempore homines illos in suo constantes proposito subvertendi Pontificiam ditionem totamque Italiam, Nobis proposuisse non iam Constitutionis, sed Reipublicae proclamationem, veluti unicum tum Nostræ, tum Ecclesiae Status incolumitatis refugium atque praesidium. Subit adhuc nocturna illa

hora, et versantur Nobis ante oculos quidam homines, qui a fraudum architectis misere illusi ac decepti illorum ea in re causam agere, atque eandem Reipublicae proclamationem Nobis proponere non dubitabant. Quod quidem, praeter innumera alia et gravissima argumenta, magis magisque demonstrat, novarum institutionum petitiones et progressum, ab huiusmodi hominibus tantopere praedicatum, eo unice spectare, ut assidue foveantur agitationes, ut omnia iustitiae, virtutis, honestatis, religionis principia usquequaque penitus tollantur, atque horrendum et luctuosissimum, ac vel ipsi naturali rationi et iuri maxime adversum *Socialismi*, vel etiam *Communismi*, uti appellant, systema cum maximo totius humanae societatis detrimento et exitio quaquaversus inducatur, propagetur, ac longe lateque dominetur <sup>1)</sup>.

Sed quamvis haec teterrima conspiratio, vel potius haec diuturna conspirationum series clara esset et manifesta, tamen, Deo sic permittente, multis illorum fuit ignota, quibus communis tranquillitas tot sane de causis cordi summpere esse debebat. Atque etsi indefessi turbarum moderatores gravissimam de se suspicionem darent, tamen non defuere quidam bonae voluntatis homines, qui amicam illis manum praebuere, ea forsitan spe freti fore, ut eos ad moderationis et iustitiae semitam reducere possent.

Interim belli clamor per universam Italiam extemplo pervasit, quo Pontificiae Nostrae ditionis subditorum pars commota atque abrepta ad arma convolvit, ac Nostrae voluntati obsistens eiusdem Pontificiae ditionis fines praetergredi voluit. Nostis, Venerabiles Fratres, quomodo debitas tum Summi Pontificis, tum Supremi Principis partes obeuntes iniustus illorum desideriis obstiterimus, qui Nos ad illud bellum gerendum pertrahere volebant, quique postulabant, ut inexpertam iuventutem subitario modo collectam, ac militaris artis peritia et disciplina numquam excultam, et idoneis ductoribus bellicisque subsidiis destitutam, ad pugnam, id est ad certam caedem compelleremus. Atque id a Nobis expetebatur, qui licet immerentes inscrutabili Divinae providentiae consilio ad Apostolicae Dignitatis fastigium erecti, ac vicariam Christi Iesu hic in terris operam gerentes, a Deo, qui est auctor pacis et amator caritatis, missionem accepimus, ut omnes populos, gentes, nationes pari paterni amoris studio prosequentes, omnium saluti totis viribus consulamus, et non iam ut homines ad clades mortemque impellamus. Quod si quicumque Princeps nomen iustus de causis bellum aggredi numquam potest, equis tam consilii et rationis experts umquam erit, qui plane non videat, catholicum orbem merito atque optimo iure longe maiorem iustitiam, gravioresque causas a Romano Pontifice requirere, si Pontificem ipsum alicui bellum indicare et inferre conspiciat? Quainobrem Nostra Allocutione, die 29. Aprilis superiori anno ad Vos habita, palam publiceque declaravimus, Nos ab illo bello omnino esse alienos. Atque eodem tempore insidiosissimum profecto munus tum voce, tum scripto Nobis oblatum, ac non solum Personae Nostrae vel maxime iniuriosum, verum etiam Italiae perniciosissimum repudiavimus, reiecimus, ut scilicet Italicae cuiusdam Reipublicae regimini praesidere vellemus <sup>2)</sup>. Equidem singulari Dei miseratione gravissimum loquendi, monendi, hortandique munus a Deo ipso Nobis impositum implendum curavimus, atque adeo confidimus, Nobis illud Isaiae impropere non posse <sup>3)</sup>: *Vae mihi quia taci.* Utinam vero paternis Nostris vocibus, monitis, hortationibus suas Nobis filii praebuissent aures!

Memineritis, Venerabiles Fratres, qui clamores, quique tumultus a turbulentissimae factionis hominibus excitati fuere post Allocutionem a Nobis nunc commemoratam, et quomodo civile Ministerium Nobis fuerit

<sup>1)</sup> *Huc ref.* §. IV. *Syll*

<sup>2)</sup> Inter alia haec digna sunt quae notentur Pontificis verba in hac Allocutione pronuntiata: „Nec Nobis temperari possumus, quin lamentemur in Consessu hoc vestro funestissimam illam consuetudinem, nostris temporibus praecipue grassantem, exitiale omne genus libellos in lucem edendi, quibus aut sanctissimae nostrae Religionis, morumque honestati teterrimum bellum inferitur, aut civiles perturbationes ac discordiae inflammantur, aut Ecclesiae bona impetuntur, et sacratiora quaeque illius jura oppugnantur, aut optimi quique viri falsis criminationibus lacerantur.“ *Quo ref. prop.* 79. *N. Edit.*

<sup>3)</sup> *Is.* VI. 5.

impositum, Nostris quidem consiliis, ac principiis, et Apostolicae Sedis iuribus summopere adversum. Nos quidem iam inde infelicem Italici belli exitum futurum animo prospeximus, dum unus ex illis Ministris asserere non dubitabat, bellum idem, Nobis licet invitis ac reluctantibus, et absque Pontificia benedictione, esse duraturum. Qui quidem Minister gravissimam Apostolicae Sedi inferens iniuriam haud extimuit proponere, civilem Romani Pontificis Principatum a spirituali eiusdem potestate omnino esse separandum <sup>1)</sup>. Atque idem ipse haud multo post ea de Nobis palam asserere non dubitavit, quibus Summum Pontificem ab humani generis consortio eiiceret quodammodo et dissociaret. Justus et misericors Dominus voluit Nos humiliare sub potenti manu Eius, cum permiserit, ut plures per menses veritas ex una parte, mendacium ex altera acerrimo inter se dimicarent certamine, cui attulit finem novi Ministerii electio, quod postea alteri locum cessit, in quo ingenii laus cum peculiari tum publici ordinis tutandi, tum legum observandarum studio erat coniuncta.

Verum effraenata pravarum cupiditatum licentia et audacia in dies caput altius extollens longe grassabatur, ac Dei hominumque hostes diuturna ac saeva dominandi, diripiendi, ac destruendi siti incensi nihil iam aliud optabant, quam iura quaeque divina et humana subvertere, ut eorum desideria possent explere. Hinc machinationes iamdiu comparatae palam publiceque emicuerunt, et viae humano sanguine respersae, et sacrilegia numquam satis deploranda commissa, et inaudita prorsus violentia in Nostris ipsis Quirinalis Aedibus infando ausu Nobis illata. Quocirca tantis oppressi angustis, cum ne dum Principis, sed ne Pontificis quidem partes libere obire possemus, non sine maxima animi Nostri amaritudine a Sede Nostra discedere debuimus. Quae luctuosissima facta in publicis Nostris protestationibus enarrata hoc loco iterum recensere praeterimus, ne funesta illorum recordatione communis noster recrudescat dolor. Ubi vero seditiosi homines Nostras illas noverunt protestationes, maiore furentes audacia, et omnia omnibus minitantes nulli neque fraudis, neque doli, neque violentiae generi pepercerunt, ut bonis omnibus iam pavore prostratis maiorem usque terrorem iniicerent. Ac postquam novam illam Gubernii formam, ab ipsis *Giunta di Stato* appellatam, invexere, ac penitus sustulerunt duo Consilia a Nobis instituta, totis viribus allaborarunt, ut novum cogeretur Consilium, quod *Constituentis Romanae* nomine nuncupare voluerunt. Refugit quidem animus, ac dicere reformidat quibus quantisque fraudibus ipsi usi fuerint, ut eiusmodi rem ad exitum perducerent. Hic vero haud possumus, quin meritis maiori Pontificiae ditionis Magistratuum parti laudes tribuamus, qui proprii honoris et officii memores munere se abdicare maluerunt, quam ullo modo manum operi admove, quo eorum Princeps et amantissimus Pater legitimo suo civili Principatu spoliabatur. Illud tandem Consilium fuit coactum, et quidam Romanus Advocatus vel in ipso suae primae orationis exordio ad congregatos habitae, omnibus clare aperteque declaravit, quid ipse cunctique alii sui socii horribilis agitationis auctores sentirent, quid vellent, et quo spectarent. *Lex*, ut ille inquebat, *moralis progressus est imperiosa et inexorabilis*, ac simul addebat, sibi, ceterisque iamdiu in animo fixum esse, temporale Apostolicae Sedis dominium ac regimen funditus evertere, licet modis omnibus eorum desideria a Nobis fuisset obsecundatum. Quam declarationem in hoc vestro consensu commemorare volumus, ut omnes intelligant, pravam huiusmodi voluntatem non coniectura, aut suspicione aliqua a Nobis turbaram auctoribus fuisse attributam, sed eam universo terrarum orbi palam publiceque ab illis ipsis manifestatam, quos vel ipse pudor ab eadem proferenda declaratione revocare debuisset. Non liberiores igitur institutiones, non utiliore administrationis procurationem, non providas cuiusque generis ordinationes huiusmodi homines cupiebant, sed civilem Apostolicae Sedis principatum, potestatemque impetere, convellere, ac destruere omnino volebant <sup>2)</sup>. Ac eiusmodi consilium, quantum in ipsis fuit, ad exitum deduxerunt illo *Romanae*, uti vocant, *Constituentis* decreto die 9. Februarii huius anni edito, quo nescimus, an maiori iniustitia contra iura Romanae

<sup>1)</sup> *Huc ref. prop. 27, et Nota ad §. IX. Syll.*

<sup>2)</sup> " " " 80.

Ecclesiae, adiunctamque illis Apostolici obeundi muneris libertatem<sup>1)</sup>, vel maiori subditorum Pontificiae ditionis damno et calamitate, Romanos Pontifices a temporali Gubernio tum iure tum facto decidisse declararunt.

Non levi quidem moerore ob tam tristia facta confecti fuimus, Venerabiles Fratres, atque illud in primis vel maxime dolemus, quod Urbs Roma Catholicae veritatis et unitatis centrum, virtutis ac sanctitatis magistra, per impiorum ad eam quotidie confluentium hominum operam, omnibus gentibus, populis, nationibus tantorum malorum auctrix appareat. Verumtamen in tanto animi Nostri dolore pergratum Nobis est posse affirmare, longe maximam tum Romani Populi, tum aliorum Pontificiae nostrae ditionis populorum partem Nobis, et Apostolicae Sedi constanter addictam a nefariis illis machinationibus abhoruisse, licet tot tristium eventuum spectatrix extiterit. Summae quoque consolationi Nobis fuit Episcoporum, et Cleri Pontificiae Nostrae ditionis sollicitudo, qui in mediis periculis, et omne genus difficultatibus ministerii et officii sui partes obire non destiterunt, ut populos ipsos qua voce, qua exemplo a motibus illis, nefariisque factionis consiliis averterent.

Nos certe in tanto rerum certamine atque discrimine nihil intentatum reliquimus, ut publicae tranquillitati et ordini consuleremus. Multo enim tempore antequam tristissima illa Novembris facta evenirent, omni studio curavimus, ut Helvetiorum copiae, Apostolicae Sedis servitio addictae, atque in Nostris Provinciis degentes, in Urbem deducerentur, quae tamen res contra Nostram voluntatem ad exitum minime fuit perducta eorum opera, qui mense Maio Ministrorum munere fungebantur. Neque id solum, verum etiam ante illud tempus, nec non et postea, tum publico praesertim Romae ordini tuendo, tum inimicorum hominum audaciae comprimendae curas Nostras convertimus ad alia militum praesidia comparanda, quae, Deo ita permittente, ob rerum ac temporum vicissitudines Nobis defuere. Tandem post ipsa luctuosissima Novembris facta haud omisimus Nostris litteris, die quinta Januarii datis, omnibus indigenis Nostris militibus etiam atque etiam inculcare, ut religionis et militaris honoris memores iuratum suo Principi fidem custodirent, ac sedulam impenderent operam, quo ubique tum publica tranquillitas, tum debita erga legitimum Gubernium obedientia ac devotio servaretur. Neque id tantum, verum etiam Helvetiorum copias Romam petere iussimus, quae huic Nostrae voluntati haudquaquam obsequatae sunt, cum praesertim supremus illarum Ductor in hac re haud recte atque honorifice se gesserit.

Atque interim factionis moderatores maiore in dies audacia et impetu opus urgentes, tum Nostram Personam, tum alios qui Nostro adhaerent lateri, horrendi cuiusque generis calumniis et contumeliis lacerare non intermittebant; ac vel ipsis Sacrosancti Evangelii verbis et sententiis nefarie abuti non dubitabant, ut in vestimentis ovium, cum intrinsecus sint lupi rapaces, imperitam multitudinem ad prava quaeque eorum consilia et molimina pertraherent, atque incautorum mentes falsis doctrinis imbuerent. Subditi vero tempora i Apostolicae Sedis ditioni, et Nobis immobili fide addicti, merito atque optimo iure a Nobis exposcebant, ut eos a tot gravissimis, quibus undique premebantur, angustiis, periculis, calamitatibus et iacturis eriperemus. Et quoniam nonnulli ex ipsis reperiuntur qui Nos veluti causam (innocuam licet) tantarum perturbationum suspiciunt, iccirco isti animadvertant velimus, Nos quidem ut primum ad supremam Apostolicam Sedem evecti fuimus, paternas Nostras curas et consilia, quemadmodum supra declaravimus, eo certe intendisse, ut Pontificiae Nostrae ditionis populos omni studio in meliorem conditionem adduceremus<sup>2)</sup>, sed inimicorum ac turbulentorum hominum opera factum esse, ut consilia illa Nostra in irritum cederent, contra vero factiosis ipsis, Deo permittente, contigisse, ut ad exitum perducere possent quae a longo ante tempore moliri ac tentare omnibus quibusque malitiae artibus nunquam destiterant. Itaque id ipsum, quod iam alias ediximus, hic iterum repetimus, in tam gravi scilicet ac luctuosa tempestate, qua universus fere terrarum orbis tantopere iactatur, Dei manum esse agnoscendam, Eiusque vocem audiendam, qui cuiusmodi flagellis hominum peccata et iniquitates punire solet, ut ipsi ad iustitiae semitas redire festinent. Hanc igitur

<sup>1)</sup> *Huc ref. prop. 76.*

<sup>2)</sup> *Huc ref. prop. 80.*

vocem audiant qui erraverunt a veritate, et derelinquentes vias suas convertantur ad Dominum; audiant etiam illi, qui in hoc tristissimo rerum statu magis de privatis propriis commodis, quam de Ecclesiae bono, et rei catholicae prosperitate solliciti sunt, ac meminerint nihil prodesse homini si *mundum univesum lucretur, animae re o suae detrimentum patiatur*; audiant et pii Ecclesiae filii, ac praestolantes in patientia salutare Dei, et maiore usque studio emundantes conscientias suas ab omni inquinamento peccati, miserationes Domini implorare, Eique magis magisque placere, ac iugiter famulari contendant.

Atque inter haec Nostra ardentissima desideria hand possumus eos non monere speciatim et redarguere, qui decreto illi, quo Romanus Pontifex omni civilis sui imperii honore ac dignitate est spoliatus, plaudunt, ac decretum idem ad ipsius Ecclesiae libertatem felicitatemque procurandam vel maxime conducere asserunt<sup>1)</sup>. Hic autem palam publicque profitemur, nulla Nos dominantii cupiditate, nullo temporalis Principatus desiderio haec loqui, quandoquidem Nostra indoles et ingenium a quavis dominatione profecto est alienum. Verumtamen officii nostri ratio postulat, ut in civili Apostolicae Sedis Principatu tuendo iura possessionesque Sanctae Romanae Ecclesiae, atque eiusdem Sedis libertatem, quae cum totius Ecclesiae libertate et utilitate est coniuncta, totis viribus defendamus. Et quidem homines, qui commemorato plaudentes decreto tam falsa et absurda affirmant, vel ignorant, vel ignorare simulant, singulari prorsus Divinae providentiae consilio factum esse, ut Romano Imperio in plura regna, variasque ditiones diviso, Romanus Pontifex cui a Christo Domino totius Ecclesiae regimen et cura fuit commissa, civilem Principatum hac sane de causa haberet, ut ad ipsam Ecclesiam regendam, eiusque unitatem tuendam plena illa potiretur libertate, quae ad supremi Apostolici ministerii munus obeundum requiritur. Namque omnibus compertum est, fideles populos, gentes, regna nunquam plenam fiduciam et observantiam esse praestitura Romano Pontifici, si illum alicuius Principis, vel Gubernii dominio subiectum, ac minime liberum esse conspicerent. Si quidem fideles populi, et regna vehementer suspicari, ac vereri nunquam desinerent, ne Pontifex idem sua acta ad illius Principis, vel Gubernii, in cuius ditione versaretur, voluntatem conformaret, atque iccirco actis illis hoc praetextu saepius refragari non dubitarent. Et quidem dicant vel ipsi hostes civilis Principatus Apostolicae Sedis, qui nunc Romae dominantur, quam fiduciam et observantiam ipsi essent excepturi hortationes, monita, mandata, constitutiones Summi Pontificis, cum illum cuiusvis Principis, aut Gubernii imperio subditum esse cognoscerent, praesertim vero si cui subesset Principi, inter quem et Romanam ditionem diuturnum aliquod ageretur bellum<sup>2)</sup>?

Interea nemo non videt quibus quantisque vulneribus in ipsis Pontificiae ditionis regionibus immaculata Christi sponsa nunc afficiatur, quibus vinculis, qua turpissima servitute magis magisque opprimatur, quantisque angustiis visibile illius Caput obruatur. Equis enim ignorat, Nobis communicationem cum Urbe Roma, illiusque Nobis carissimo Clero, et universo Pontificiae ditionis Episcopatu, ceterisque fidelibus ita esse praepeditam, ut ne epistolas quidem, de ecclesiis icis licet ac spiritualibus negotiis agentes, vel mittere, vel accipere libere possimus? Quis nescit, Urbem Romam principem catholicae Ecclesiae Sedem in praesentia, proh dolor! silvam frementium bestiarum esse factam, cum ea omnium nationum hominibus redundet, qui vel apostatae, vel haeretici, vel *Communismi*, uti dicunt, aut *Socialismi* magistri, ac summo contra catholicam veritatem odio animati tum voce, tum scriptis, tum aliis quibusque modis omnigenos pestiferos errores docere, disseminare, omniumque mentes et animos pervertere conantur, ut in Urbe ipsa, si fieri umquam posset, catholicae religionis sanctitas et irreformabilis fidei regula depraveretur<sup>3)</sup>? Cui iam notum, auditumque non est, in Pontificia ditione Ecclesiae bona, redditus, possessiones ausu temerario et sacrilego occupatas, augustissima templa suis ornamentis nudata, religiosa Coenobia in profanos usus conversa, Virgines Deo sacras vexatas, lectissimos,

<sup>1)</sup> *Huc ref. prop.* 76.

<sup>2)</sup> „ „ „ 40.

<sup>3)</sup> *Huc ref. nota ad §. IX. Syll.*

atque integerrimos Ecclesiasticos, Religiososque viros crudeliter insectatos in vincula coniectos, et occisos, sacros clarissimos Antistites vel ipsa Cardinalitatis dignitate insignes a propriis gregibus dire avulsos, et in carcerem abreptos? Atque haec tanta facinora contra Ecclesiam, eiusque iura, et libertatem admittuntur tum in Pontificiae ditionis locis, tum alibi, ubi homines illi, vel eorum similes dominantur, eo scilicet tempore, quo iidem ipsi libertatem ubique proclamant, ac sibi in votis esse confingunt, ut suprema Summi Pontificis potestas, a quovis prorsus vinculo expedita, omni libertate fruatur.

Jam porro neminem latet, in qua tristissima ac deploranda conditione carissimi Nostri versentur subditi eorundem hominum opera, qui tanta adversus Ecclesiam flagitia committunt. Publicum enim aerarium dissipatum, exhaustum, commercium intermissum ac pene extinctum, ingentes pecuniae summae optimatibus viris aliisque impositae, privatorum bona ab illis, qui se populorum rectores et effraenatarum cohortium ductores appellant, direpta, bonorum omnium tremefacta libertas, eorumque tranquillitas in summum discrimen adducta, ac vita ipsa sicarii pugioni subiecta, et alia maxima et gravissima mala ac damna, quibus continenter cives tantopere affliguntur atque terrentur. Haec scilicet sunt illius prosperitatis initia, quam Summi Pontificatus osoros Pontificiae ditionis populis annunciant atque promittunt<sup>1)</sup>.

In magno igitur et incredibili dolore, quo ob tantas tum Ecclesiae, tum Pontificiae Nostrae ditionis populorum calamitates intime excruciamur, probe noscentes officii Nostri rationem omnino postulare, ut ad calamitates ipsas amovendas ac propulsandas omnia conaremur, iam inde a die quarta Decembris proximi superioris anni omnium Principum, et Nationum opem, auxiliumque implorare, et exposcere haud omisimus. Nec Nobis temperare non possumus, quin Vobiscum, Venerabiles Fratres, nunc communicemus singularem illam consolationem, qua affecti fuimus, cum iidem Principes, et populi, etiam illi qui catholicae unitatis vinculo Nobis minime sunt coniuncti, propensissimam eorum erga Nos voluntatem luculentis sane modis testari ac declarare studuerint. Quod quidem dum acerbissimum animi Nostri dolorem mirifice lenit atque solatur, magis magisque demonstrat quomodo Deus Ecclesiae suae Sanctae semper propitius adsistat. Atque in eam spem erigimur fore, ut omnes intelligant, gravissima illa mala, quibus in hac tanta temporum asperitate populi, ac regna vexantur, ex sanctissimae nostrae religionis contemptu suam duxisse originem, nec aliunde solatium ac remedium habere posse, quam ex divina Christi doctrina, Eiusque Sanctae Ecclesiae, quae virtutum omnium foecunda parens et alitrix, atque expultrix vitiorum, dum homines ad omnem veritatem ac iustitiam instituit, eosque mutua caritate constringit, publico civilis societatis bono, et ordini mirandum in modum consulit ac prospicit<sup>2)</sup>.

Postquam vero omnium Principum opem imploravimus, ab Austria, quae Pontificiae Nostrae ditioni ad Septentrionem finitima est, auxilium eo sane libentius efflagitavimus, quod ipsa non solum temporali Apostolicae Sedis dominio tuendo egregiam suam semper operam navaverit, verum etiam quod nunc ea profecto spes affulgeat fore, ut ab illo Imperio iuxta ardentissima Nostra desideria, iustissimasque Nostras postulationes notissima quaedam eliminentur principia, ab Apostolica Sede perpetuo improbata, ac propterea inibi Ecclesia in suam restituatur libertatem cum maximo illorum fidelium bono atque utilitate. Quod quidem dum non mediocri animi Nostri consolatione significamus, plane non dubitamus, quin id Vobis non leve afferat gaudium.

Idem auxilium a Gallica Natione expostulavimus, quam singularem paterni animi Nostri benevolentia et affectu prosequimur, cum illius Nationis Clerus, Populusque fidelis omnibus quibusque filialis devotionis et observantiae significationibus Nostras calamitates at angustias lenire ac solari studuerit.

Hispaniae quoque opem invocavimus, quae de Nostris angustiiis vehementer anxia atque sollicita alias catholicas Nationes primum excitavit, ut

<sup>1)</sup> *Huc ref. prop.* 40. 80.

<sup>2)</sup> *Huc ref. prop.* 40.



filiali quodam foedere inter se inito communem fidelium Patrem ac Supremum Ecclesiae Pastorem in propriam Sedem reducere contenderent.

Hanc denique opem ab utriusque Siciliae Regno efflagitavimus, in quo hospitamur apud illius Regem, qui in veram solidamque suorum populorum felicitatem promovendam totis viribus incumbens tanta religione ac pietate refulget, ut suis ipsis populis exemplo esse possit. Etsi vero nullis verbis exprimere possimus, quanta cura et studio idem Princeps eximiam suam filialem in Nos devotionem omnium officiorum genere, et egregiis factis assidue testari, et confirmare laetatur, tamen praeclara ejusdem Principis in Nos merita nulla umquam delebit oblivio. Neque taciti ullo modo praeterire possumus pietatis, amoris et obsequii significationes, quibus ejusdem Regni Clerus, et Populus Nos prosequi numquam desistit, ex quo Regnum ipsum attigimus.

Quamobrem in eam spem erigimur fore, ut, Deo bene iuvante, catholicae illae gentes Ecclesiae, eiusque Summi Pontificis communis omnium fidelium Patris causam prae oculis habentes, ad civilem Apostolicae Sedis Principatum vindicandum, ad pacem et tranquillitatem subditis Nostri restituendam quamprimum accurrere properent, ac futurum confidimus, ut sanctissimae nostrae religionis, et civilis societatis hostes ab urbe Roma, totoque Ecclesiae Statu amoveantur. Atque ubi ubi contigerit, omni certe vigilantia, studio, contentione a Nobis erit curandum, ut illi omnes errores, et gravissima propulsentur scandala, quae cum bonis omnibus tam vehementer dolere debuimus. Atque in primis vel maxime allaborandum, ut hominum mentes ac voluntates impiorum fallacis, insidiis et fraudibus miserandum in modum deceptae collustrentur sempiternae veritatis lumine, quo homines ipsi funestissimos errorum et vitiorum fructus agnoscant, atque ad virtutis, iustitiae et religionis semitas amplectendas excitentur et inflammentur. Optime enim noscitis, Venerabiles Fratres, horrenda illa et omni-gena opinionum monstra, quae ex abyssi puteo ad exitium et vastitatem emersa longe iam lateque cum maximo religionis, civilisque societatis detrimento invaluerunt, ac debacchantur. Quas perversas pestiferasque doctrinas inimici homines seu voce, seu scriptis, seu publicis spectaculis in vulgus disseminare numquam intermittunt, ut effraenata cuiusque impietatis, cupiditatis, libidinis licentia magis in dies augeatur et propagetur<sup>1)</sup>. Hinc porro illae omnes calamitates, exitia et luctus, quibus humanum genus, ac universus fere terrarum orbis tantopere est funestatus et funestatur. Neque ignoratis cuiusmodi bellum contra sanctissimam nostram religionem in ipsa quoque Italia nunc geratur, quibusque fraudibus et machinationibus terribimini ipsius religionis et civilis societatis hostes imperitorum praesertim animos a fidei sanctitate, sanaque doctrina avertere, eosque aestuantibus incredulitatis fluctibus demergere atque ad gravissima quaeque peragenda facinora compellere conentur. Atque ut facilius eorum consilia ad exitum perducere, et horribiles cuiusque seditionis et perturbationis motus excitare ac fovere possint, haereticorum hominum vestigiis inhaerentes, suprema Ecclesiae auctoritate omnino despecta, plane non dubitant Sacrarum Scripturarum verba, testimonia, sententias privato proprio, pravoque sensu invocare, interpretari, invertere, detorquere; ac per summam impietatem sanctissimo Christi nomine nefarie abuti non reformidant. Neque eos pudet patriam publicaeque asserere, tum cuiusque sanctissimi iuramenti violationem, tum quamlibet scelestam, flagitiosamque actionem sempiternae ipsi naturae legi repugnantem, non solum haud esse improbandam, verum etiam omnino licitam, sumisque laudibus efferendam, quando id pro patriae amore, ut ipsi dicunt, agatur<sup>2)</sup>. Quo impio ac praepostero argumentandi genere ab eiusmodi hominibus omnis prorsus honestas, virtus, iustitia penitus tollitur, atque nefanda ipsius latronis et sicarii agendi ratio per inauditam impudentiam defenditur et commendatur.

Ad ceteras innumeras fraudes, quibus catholicae Ecclesiae inimici continentur utuntur, ut incautos praesertim et imperitos ab ipsius Ecclesiae sinu avellant et abripiant, acerrimae etiam, ac turpissimae accedunt calumniae, quas in Personam Nostram intendere et committere non erubescunt. Nos

<sup>1)</sup> *Huc ref. prop. 79.*

<sup>2)</sup> *Huc ref. prop. 64.*

quidem nullis licet Nostris meritis Illius hic in terris vicariam gerentes operam, *qui cum maledicere in non maledicebat, cum pateretur non comminabatur*. acerbissima quaeque convicia in omni patientia, ac silentio perferre, et pro persequentibus, et calumniantibus Nos orare numquam omisimus. Verum cum debitores simus sapientibus, et insipientibus, omniumque saluti consulere debeamus, haud possumus, quin ad praecavendam praesertim infirmorum offensionem, in hoc vestro Consessu a Nobis reiciamus falsissimam illam et omnium terrerrimam calumniam, quae contra Personam humilitatis Nostrae per recenti-simas quasdam ephemeridas est evulgata. Etsi vero incredibili horrore affecti fuimus ubi illud commentum legimus, quo inimici homines Nobis, et Apostolicae Sedi grave vulnus inferre commoliuntur, tamen nullo modo vereri possumus, ne eiusmodi turpissima mendacia vel leviter offendere queant supremam illam veritatis Cathedram, et Nos, qui nullo meritorum suffragio in ea collocati sumus. Et quidem singulari Dei misericordia divinis illis nostri Redemptoris verbis uti possumus: *Ego patam loquutus sum mundo . . . et in occulto loquutus sum nunc*. Atque hic, Venerabiles Fratres, opportunum ducimus ea ipsa iterum dicere et inculcare, quae in Nostra praesertim Allocutione ad Vos die 17. Decembris anno 1847 habita declaravimus<sup>1)</sup>, inimicos scilicet homines, quo facilius veram germanamque catholicae religionis doctrinam corrumpere, aliosque decipere, et in errorem inducere queant, omnia comminisci, omnia moliri, omnia conari, ut vel ipsa Apostolica Sedes eorum stultitiae particeps et faultrix quodammodo appareat. Nemini autem ignotum est, quae tenebrosissimae, acque ac perniciosissimae societates, et sectae a fabricatoribus mendacii, et perversorum dogmatum cultoribus fuerint variis temporibus coactae, et institutae, ac variis nominibus appellatae, quo eorum deliramenta, systemata, molimina in aliorum animos tutius instillarent, incantorum corda corrumpere, ac latissimam quibusque sceleribus impune patrandis viam munirent. Quas abominabiles perditionis sectas, non solum animarum saluti, verum etiam civilis societatis bono et tranquillitati vel maxime infestas, atque a Romanis Pontificibus Decessoribus Nostris damnatas, Nos ipsi iugiter detestati sumus, ac Nostris Encyclicis Litteris die 9. Novembris anno 1846 ad universos Ecclesiae Antistites datis condemnavimus, et nunc pariter suprema Nostra Apostolica auctoritate iterum damnamus, prohibemus, atque proscribimus<sup>2)</sup>.

At hac Nostra Allocutione haud sane volumus vel omnes errores enumerare, quibus populi misere decepti ad tantas impelluntur ruinas, vel singulas percensere machinationes, quibus inimici homines et catholicae religionis perniciem moliri, et arcem Sion usquequaque impetere, et invadere contendunt. Quae haecenus dolenter commemoravimus, satis superque ostendunt, ex perversis grassantibus doctrinis, atque ex iustitiae et religionis contemptu eas oriri calamitates et exitia, quibus nationes et gentes tantopere iactantur. Ut igitur tanta amoveantur damna, nullis neque curis, neque consiliis, neque laboribus, neque vigiliis est parcendum, quo tot perversis doctrinis radicitus evulsis, omnes intelligant, veram solidamque felicitatem virtutis, iustitiae, ac religionis exercitio inniti. Itaque et Nobis, et Vobis, atque aliis Venerabilibus Fratribus totius Catholici orbis Episcopis summa cura, studio, contentione in primis est allaborandum, ut fideles populi ab venenati pascuis amoti, atque ad salutaria deducti, ac magis in dies enutriti verbis fidei, et insidiantium hominum fraudes et fallacias agnoscant, devitent, ac plane intelligentes, timorem Domini bonorum omnium esse fontem, et peccata atque iniquitates provocare Dei flagella, student declinare a malo, et facere bonum. Quocirca inter tantas angustias non levi certe laetitia perfundimur, cum noscamus quanta animi firmitate et constantia Venerabiles Fratres catholici orbis Antistites Nobis, et Petri Cathedrae firmiter addicti una cum obsequente sibi Clero ad Ecclesiae causam tuendam, eiusque libertatem propugnandam strenue conantur, et qua Sacerdotali cura et studio omnem impendant operam, quo et bonos magis magisque in bonitate confirmant, et errantes ad iustitiae semitas reducant, et perversas religionis hostes tum voce, tum scriptis redarguant atque refellant. Dum autem has

<sup>1)</sup> *Supra, pag. 28, 30.*

<sup>2)</sup> *Huc ref. Nota ad §. IV. Syll.*

meritas debitasque laudes ipsis Venerabilibus Fratribus tribuere laetamur, eisdem animos addimus, ut divino auxilio freti pergant alacriori usque zelo ministerium suum implere, ac praeliari praelia Domini, et exaltare vocem in sapientia et fortitudine ad sanandas contritiones Israel. Iuxta haec non desinant adire cum fiducia ad thronum gratiae, ac publicis, privatisque precibus insistere, et fidelibus populis sedulo inculcare, ut omnes ubique poenitentiam agant, quo misericordiam a Deo consequantur, et gratiam inveniant in auxilio opportuno. Nec vero intermittant viros ingenio, sanaque doctrina praestantes hortari, ut ipsi quoque sub eorum et Apostolicae Sedis ductu populorum mentes illustrare, et serpentium errorum tenebras dissipare studeant.

Hic etiam carissimos in Christo Filios Nostros Populorum Principes et Rectores obtestamur in Domino, atque ab ipsis exposcimus ut serio ac sedulo considerantes quae et quanta damna ex tot errorum ac vitiorum colluvie in civilem societatem redundent, omni cura, studio, consilio in id potissimum incumbere velint, ut virtus, iustitia, religio ubique dominantur, ac maiora in dies incrementa suscipiant. Atque universi populi, gentes, nationes, earumque Moderatores assidue ac diligenter cogitent et meditentur, omnia bona in iustitiae exercitio consistere, omnia vero mala ex iniquitate prodire. Siquidem *iustitia elevat gentem, iniquitas autem facit populos peccatum*<sup>1)</sup>.

Antequam autem dicendi finem faciamus, haud possumus, quin gratissimi animi Nostri sensus illis omnibus carissimis atque amantissimis filiis palam publice testimonium, qui de Nostriis calamitatibus vehementer solliciti singulari prorsus erga Nos pietatis affectu suas Nobis oblationes mittere voluerunt. Etsi vero piaae huiusmodi largitiones non leve Nobis afferant solatium, tamen fateri debemus, paternum cor Nostrum non mediocri angustia, cum summo opere timeamus, ne in tristissima hac rerum publicarum conditione iidem carissimi filii suae in Nos caritati nimium indulgentes largitiones ipsas proprio etiam incommodo ac detrimento facere velint.

Denique, Venerabiles Fratres, Nos quidem investigabilibus sapientiae Dei consiliis, quibus gloriam suam operatur, plane acquiescentes, dum in humilitate cordis Nostri maxime Deo agimus gratias, quod Nos dignos habuerit pro nomine Jesu contumeliam pati, et aliqua ex parte conformes fieri imagini Passionis Eius, parati sumus in omni fide, spe, patientia et mansuetudine acerbissimos quosque labores, aerumnas perferre, atque ipsam animam Nostram pro Ecclesia ponere, si per Nostrum sanguinem ipsius Ecclesiae calamitatibus consulere possemus. Interim vero, Venerabiles Fratres, ne intermittamus dies noctesque assiduis fervidisque precibus divitem in misericordia Deum humiliter orare et obsecrare, ut per merita Unigeniti Filii sui omnipotenti sua dextera Ecclesiam suam sanctam a tantis, quibus iactatur, procellis eripiat, utque divinae suae gratiae lumine omnium errantium mentes illastret, et in multitudine misericordiae suae omnium praevaricantium corda expugnet, quo cunctis ubique erroribus depulsis cunctisque amotis adversitatibus, omnes veritatis et iustitiae lucem adspiciant, agnoscant, atque occurrant in unitatem fidei, et agnitionis Domini nostri Jesu Christi. Atque ab Ipso, qui facit pacem in sublimibus, quique est pax nostra, suppliciter etiam exposcere numquam desinamus, ut malis omnibus, quibus christiana respublica vexatur, penitus avulsis, optatissimam ubique pacem, et tranquillitatem facere velit. Ut vero facilius annuat Deus precibus nostris, suffragatores apud Eum adhibeamus, atque in primis Sanctissimam Immaculatam Virginem Mariam, quae Dei mater et nostra, quaeque mater misericordiae, quod quaerit invenit, et frustrari non potest. Suffragia quoque imploremus Beati Petri Apostolorum Principis, et Coepostoli eius Pauli, omniumque Sanctorum caelitum, qui iam facti amici Dei cum ipso regnant in caelis, ut elementissimus Dominus, eorum intervenientibus meritis ac precibus, fidem populum ab iracundiae suae terroribus liberet, semperque protegat, ac divinae suae propitiationis abundantia laetificet.

<sup>1)</sup> Prov. XIV. 34.

## Epistola Encyclica

ad Archiepiscopos et Episcopos Italiae die VIII. decembris anni  
MDCCCXLIX <sup>1)</sup>.

**Venerabiles Fratres, Salutem et Apostolicam Benedictionem.**

Nostis et Nobiscum una conspiciatis, Venerabiles Fratres, quanta nuper perversitate invaluerint perditum quidam veritatis, iustitiae et honestatis cuiusque inimici, qui sive per fraudem, omnisque generis insidias, sive palam et tamquam fluctus feri maris despumantes confusiones suas, effraenatam cogitandi, loquendi et impia quaeque audendi licentiam quaquaversus diffundere contendunt inter fideles Italiae populos, et catholicam Religionem in Italia ipsa labefactare, ac, si fieri unquam posset, funditus evertere commoliuntur. Apparuit tota diabolici eorum consilii ratio tum aliis nonnullis in locis, tum in alma praesertim Urbe, Supremi Pontificatus Nostri Sede, in qua, Nobis abire inde coactis, liberius, paucis licet mensibus, debacchati sunt; ubi divinis humanisque rebus nefario ausu commiscendis, eo tandem illorum furor pervenit, ut spectatissimi Urbani Cleri, et Praesulum sacra inibi iussu Nostro impavide curantium, turbata opera et auctoritate despecta, vel ipsi interdum miseri aegroti cum morte colluctantes, cunctis destituti religionis subsidiis, animam inter procacis alicuius meretricis illecebras emittere cogeantur.

Jam vero etsi deinceps Romana eadem Urbs, et aliae Pontificiae ditionis provinciae, Deo miserante, per Catholicarum Nationum arma civili Nostro regimini restitutae fuerint, ac bellorum tumultus in aliis pariter regionibus Italiae cessaverit, non destitere tamen nec sane desistunt improbi illi Dei hominumque hostes a nefando suo opere, si minus per apertam vim, aliis certe fraudulentis nec semper occultis modis urgendo. Verum infirmitati Nostrae supremam totius Dominici gregis curam in tanta temporum difficultate sustinenti, et pecuniaribus huiusmodi Ecclesiarum Italiae periculis vehementer afflictis, non levis inter aerumnas consolatio est ex pastoralis Vestri studio, Venerabiles Fratres, cuius multa Nobis documenta, et in medio praeteritae tempestatis turbine non defuerant, et nova in dies clarioraque obveniunt. Ipsa autem rei gravitas urget Nos, ut pro debito apostolici officii Fraternalibus Vestris, in Nostrae sollicitudinis partem vocatis, acriores sermone atque hortationibus Nostris addamus stimulos ad praelianda constanter una Nobiscum praelia Domini, atque ad ea omnia concordibus animis providenda ac praestanda, quibus, Deo benedicente, et damna reparentur quaecumque Religioni sanctissimae per Italiam illata iam sint, et imminetia in posterum pericula propulsentur.

Inter multiplices fraudes, quibus praedicti Ecclesiae hostes uti consueverunt ad Italorum animos a Fide catholica abalienandos, asserere etiam, et quaquaversus clamitare non erubescunt, catholicam Religionem Italiae Gentis gloriae, magnitudini et prosperitati adversari<sup>2)</sup> ac propterea opus esse, ut illius loco Protestantium placita et conventicula inducantur, constituentur et propagentur, quo Italia pristinum veterum temporum, scilicet ethnicorum, splendorem iterum acquirere possit. In quo sane illorum commento haud facile quis existimaverit, num detestanda magis et vesanae impietatis malitia, vel impudentia mentientis improbitatis.

Etenim spirituale emolumentum, ut de potestate tenebrarum in Dei lumen translatis et iustificati gratia Christi haeredes simus secundum spem vitae aeternae, hoc scilicet animarum emolumentum, a catholicae Religionis sanctitate dimanans, eius profecto est pretii, ut quaecumque huius mundi gloria et faustitas in comparatione illius plane in nihilum esset computanda. „Quid enim prodest homini si mundum universum lucretur, animae vero „suae detrimentum patitur? aut quam dabit homo commutationem pro „anima sua?“. At vero tantum porro abest, ut temporalia illa detrimenta Italorum Genti ob verae Fidei professionem acciderint, ut immo Religionis

<sup>1)</sup> Huc referuntur Syllabi Propositiones 18, 63.

<sup>2)</sup> Huc ref. prop. 40.

<sup>3)</sup> Matthaei XVI. 26.

catholicae in acceptis referre illa debeat si Romano labante Imperio non in eam conditionem deciderit, in quam Assyrii et Chaldaei, Medi, Persaeque et Macedones Populi, multos antea dominati per annos, commutata deinceps temporum vice, dilapsi fuerant. Etenim nemo prudens ignorat, per sanctissimam Christi Religionem effectum esse, ut Italia non solum a tot ac tantis, quibus obrueretur, errorum tenebris fuerit erepta, verum etiam ut inter antiqui illius Imperii ruinas, et barbarorum tota Europa grassantium incursionibus, ad eam nihilominus gloriam et magnitudinem prae caeteris totius mundi nationibus se provecum conspiceret, ut per sacram Petri cathedram singulari Dei beneficio in ipsam collocatam latius atque solidius praesideret religione divina, quam praefuerat olim dominatione terrena.

Atque ex ipso hoc Apostolicae habendae Sedis singulari privilegio, et ex Religione catholica firmiores exinde in Italiae Populis radices obtinente alia porro permulta, eademque insignia beneficia profecta sunt. Siquidem sanctissima Christi Religio verae sapientiae magistra, humanitatis vindex, ac virtutum omnium foecunda parens, avertit quidem Italos ab infelicis illius gloriae splendore, quam illorum maiores in perpetuo bellorum tumultu, in externorum oppressione, atque in longe maximo hominum numero, ex eo quod vigeat iure belli, ad durissimam captivitatem redigendo posuerant, sed una simul Italos ipsos Catholicae veritatis luce collustratos ad sectandam iustitiam et misericordiam, atque adeo ad praeclara etiam pietatis in Deum, et beneficentiae erga homines aemulanda opera excitavit. Hinc in praecipuis Italiae urbibus admirari est sacra templa, et alia Christianorum temporum monumenta, haudquaquam per cruentos labores hominum sub captivitate gementium, sed ingenuo vivificae caritatis studio confecta, et pia cuiusque generis instituta, quae sive ad Religionis exercitia, sive ad educationem iuventutis, et litteras, artes, disciplinas rite excolendas, sive ad miserorum aegritudines et indigentias sublevandas comparata sunt. Haec igitur divina Religio, in qua tot quidem nominibus Italiae salus, felicitas et gloria continetur, haec scilicet Religio illa est, quam ab Italiae populis reiiciendam inclinant? Lacrymas cohibere non possumus, Venerabiles Fratres, dum conspicimus aliquos nunc Italos reperiri, improbos adeo, misereque illudos, ut pravis impiorum hominum plaudentes doctrinis in tantam Italiae perniciem conspirare cum ipsis non reformident.

Sed vero ignotum vobis non est, Venerabiles Fratres, praecipuos illos huius scelestissimae machinationis architectos eo tandem spectare, ut populos omni perversarum doctrinarum vento agitados, ad subversionem impellant totius ordinis humanarum rerum, atque ad nefaria novi *Socialismi* et *Communismi* systemata traducant<sup>1)</sup>. Norunt autem et longo multorum saeculorum experimento comprobatum vident, nullam sibi consensionem sperari posse cum Ecclesia catholica, quae scilicet in custodiendo divinae revelationis deposito nihil unquam detrahi patitur propositis Fidei veritatibus, nihil illis per nova hominum commenta admisceri. Idecirco consilium inierunt de Italis populis traducendis ad Protestantium placita et conventicula; in quibus ut illos decipiant, non aliud esse dictitant, quam diversam verae eiusdem christianae Religionis formam, in qua, aequae ac in Ecclesia catholica, Deo placere datum sit<sup>2)</sup>. Interea minime ignorant, profuturum summopere impiae suae causae principium illud, quod in Protestantium placitis praecipuum est, de Sacris scilicet Scripturis privato uniuscuiusque iudicio intelligendis. Exinde enim facilius sibi fore confidunt, ut primo quidem Sacris ipsis Litteris perperam interpretatis abutantur ad errores suos, quasi Dei nomine, diffundendos; subinde autem ut homines superbissima illa de divinis rebus iudicandi licentia inflatos propellant ad communia ipsa iusti, honestique principia in dubium revocanda.

Absit tamen, Venerabiles Fratres, ut Italia, ex qua, ob Sedem Apostolici Magisterii Romae constitutam, nationes aliae incorruptos salutaris doctrinae latices haurire solitae sunt, fiat illis in posterum lapis offensivus et petra scandalii; absit, ut dilecta haec Dominicae Vineae pars in direptionem cedat omnium bestiarum agri; absit ut Itali Populi, venefico Babylonici calicis haustu dementati, parricidalia contra matrem Ecclesiam arma susci-

<sup>1)</sup> *Ilic ref.* §. IV. *Syll.*

<sup>2)</sup> *Ilic ref. prop.* 18.

piant. Nobis quidem, uti et Vobis, in hac tanti periculi tempora occulto Dei iudicio reservatis, cavendum omnino est, ne fraudes atque impetus hominum contra Italiae Fidem conspirantium extimescamus, nostris quasi viribus superandos; cum nostrum consilium et fortitudo sit Christus, et sine quo nihil possumus, per ipsum cuncta possumus <sup>1)</sup>. Agite igitur, Venerabiles Fratres, advigilate impensus super creditum gregem, eumque a rapacium luporum insidiis et aggressionibus tueri contendite. Communicate invicem consilia, pergite, ut iam institutis, coetus habere inter Vos, ut malorum initiis, et praecipuis pro locorum diversitate periculorum fontibus communi investigatione perspectis, sub auctoritate ac ductu Sanctae huius Sedis promptiora illis remedia comparare valeatis, atque ita una Nobiscum concordissimis animis, totoque pastoralis studii robore curas laboresque Vestros, Deo adiuvante, in id conferatis, ut omnes hostium Ecclesiae impetus, artes, insidiae, molimina irrita fiant.

Ea vero ut in irritum cadant, satagendum omnino est, ne populus de Christiana Doctrina, ac de Loe Domini parum instructus, et diuturna in multis grassantium vitiorum licentia hebetatus, paratas sibi insidias, et propositorum errorum pravitatem agnoscere vix possit. A Vestra igitur pastoralis sollicitudine vehementer exposcimus, Venerabiles Fratres, ut nunquam intermittatis omnem adhibere operam, quo crediti Vobis fideles sanctissima Religionis nostrae dogmata ac praecepta, pro cuiusque captu, diligenter edoceantur, simulque moneantur, et excitentur omnimodis ad vitam moresque suos ad illorum normam componendos. Inflammate in eum finem Ecclesiasticorum hominum zelum, illorum praesertim, quibus animarum cura demandata est, ut serio meditantes ministerium, quod acceperunt in Domino, et habentes ob oculos Tridentini Concilii praescripta <sup>2)</sup>, maiori usque alacritate, prout temporum ratio postulat, in christianae plebis instructionem incumbant, et sacra eloquia, ac salutis monita in omnium cordibus inserere studeant, annunciando ipsis cum brevitate et facilitate sermonis vitia, quae eos declinare, et virtutes, quas sectari oporteat, ut poenam aeternam evadere, et caelestem gloriam consequi valeant.

Speciatim vero procurandum est, ut fideles ipsi impressum in animis habeant, alteque defixum dogma illud sanctissimae nostrae Religionis, quod est de necessitate catholicae Fidei ad obtinendam salutem <sup>3)</sup>. Hunc in finem summopere conducet, ut in publicis orationibus fideles laici una cum Clero agant identidem peculiare Deo gratias pro inestimabili catholicae Religionis beneficio, quo ipsos omnes clementissime donavit, atque ab eodem Misericordiarum Patre suppliciter petant, ut eiusdem Religionis professionem in regionibus nostris tueri, et inviolatam conservare dignetur.

Interca Vobis certe peculiaris erit cura, ut fideles omnes tempestive a Fraternitatibus Vestris suscipiant Sacramentum Confirmationis, per quod summo Dei beneficio specialis gratiae robur confertur ad Fidem catholicam in gravioribus etiam periculis constanter profitendam. Nec porro ignoratis, eundem in finem prodesse, ut ipsi a peccatorum sordibus, per sinceram illorum detestationem, et Sacramentum Poenitentiae expiati, saepius devote percipiant sanctissimum Eucharistiae Sacramentum, in quo spirituales esse constat animarum cibum et antidotum, quo liberemur a culpis quotidianis, et a peccatis mortalibus praeservemur, atque adeo symbolum unius illius corporis, cuius Christus caput existit, cuique nos, tanquam membra, arctissima fidei, spei et caritatis connexione adstrictos esse voluit, ut idipsum omnes diceremus, nec essent in nobis schismata <sup>4)</sup>.

Equidem non dubitamus, quin Parochi, eorumque adiutores et Sacerdotes alii, qui certis diebus, ieiuniorum praesertim tempore, ad praedicationis

<sup>1)</sup> Ex S. Leone Magno Epist. ad Rusticum Narbonensem.

<sup>2)</sup> Sess. V. cap. 2. — Sess. XXIV. cap. 4. et 7. de Ref.

<sup>3)</sup> Hoc dogma a Christo acceptum, et inculcatum a Patribus atque a Conciliis, habetur etiam in Formulis Professionis Fidei, tum in ea scilicet, quae apud Latinos, tum in ea, quae apud Graecos, tum in alia, quae apud ceteros Orientales Catholicos in usu est. — *Ibid. ref. prop.* 16. 17. 21.

<sup>4)</sup> Ex Trid. Sess. XIII. Decr. de SS. Euchar. Sacramento, cap. 2.

ministerium destinari consueverunt, auxiliarem Vobis operam sedulo in his omnibus sint praestituri. Attamen illorum operae adiungere interdum oportet extraordinaria subsidia Spiritualium Exercitiorum, et Sacrarum Missionum, quas, ubi operariis idoneis commissae fuerint, valde utiles benedicente Domino esse constat tum fovendae bonorum pietati, tum peccatoribus, et longo etiam vitiorum habitu depravatis hominibus ad salutarem poenitentiam excitandis, atque adeo ut fidelis populus crescat in scientia Dei, et in omni opere bono fructificet, et uberioribus caelestis gratiae auxiliis munitus a perversis inimicorum Ecclesiae doctrinis constantius abhorreat.

Ceterum in his omnibus Vestrae, ac Sacerdotum Vobis auxiliantium curae eo inter alia spectabunt, ut fideles maiorem hororem concipiant illorum scelerum, quae cum aliorum scandalo patrantur. Nostis enim, quantum diversis in locis excreverit eorum numerus, qui Sanctos Caelites, vel ipsum quoque Sacrosanctum Dei Nomen palam blasphemare audent, aut in concubinato vivere dignoscuntur cum incestu interdum coniuncto, aut Festis diebus servilia opera apertis etiam officinis exercent, aut Ecclesiae praecepta de ieiuniis ciborumque delectu pluribus quoque adstantibus contemnunt, aut alia diversa crimina simili modo committere non erubescunt. Meminerit, igitur, Vobis instantibus, fidelis populus et serio consideret magnam peccatorum huiusmodi gravitatem et severissimas poenas, quibus illorum auctores plectendi erunt tum pro reatu cuiusque criminis proprio, tum pro spirituali periculo, in quod fratres suos pravi sui exempli contagione induxerunt. Scriptum est enim: *Vae mundo a scandalis. ... Vae homini illi, per quem scandalum venit* <sup>1)</sup>.

Inter diversa insidiarum genera, quibus vaferrimi Ecclesiae humanaeque Societatis inimici populos seducere annituntur, illud certe in praecipuis est, quod nefariis consiliis suis iamdiu paratum in novae Artis librariae pravo usu invenerunt <sup>2)</sup>. Itaque in eo toti sunt, ut impios libellos et Ephemerides ac Pagellas mendacii, calumniarum et seductionis plenas edere in vulgus, ac multiplicare quotidie non intermittant. Immo et praesidio usi Societatum Biblicarum, quae a Sancta hac Sede iamdudum damnatae sunt <sup>3)</sup>, Sacra etiam Biblia praeter Ecclesiae regulas <sup>4)</sup> in vulgarem linguam translata, atque adeo corrupta, et in pravam sensum infando ausu detorta diffundere, illorumque lectionem sub Religionis obtentu fidei plebi commendare non verentur. Hinc pro sapientia Vestra ordine intelligitis, Venerabiles Fratres, quanta Vobis vigilantia, et sollicitudine adlaborandum sit, ut fideles oves a pestifera illorum lectione prorsus abhorreant; atque ut de divinis nominatim Litteris meminerint, neminem hominum id sibi arrogare posse, ut suae prudentiae inmixtus illas ad suos sensus contorquere praesumat contra eum sensum, quem tenuit, et tenet Sancta Mater Ecclesia; cui quidem soli a Christo Domino mandatum est, ut Fidei depositum custodiat, ac de vero divinatorum eloquiorum sensu, et interpretatione iudicet <sup>5)</sup>.

Ad ipsam vero pravorum Librorum contagionem comprimendam perutile erit, Venerabiles Fratres, ut quicumque penes Vos sint insignis, sanaeque doctrinae Viri, alia parvae item molis scripta, a Vobis sciencet antea probata, edant in aedificationem Fidei, ac salutarem populi instructionem. Ac Vestrae hinc curae erit, ut eadem scripta, uti et alii incorruptae pariter doctrinae, probataeque utilitatis libri ab aliis conscripti, prout locorum ac personarum ratio suggererit, inter fideles diffundantur.

Omnnes autem, qui una Vobiscum in defensionem Fidei allaborant, eo speciatim spectabunt, ut pietatem, venerationem, atque observantiam erga

<sup>1)</sup> Matthaei XVIII.

<sup>2)</sup> *Huc ref. prop.* 79.

<sup>3)</sup> Extant ea super re, praeter alia praecedentia Decreta, Encyclicae Litterae Gregorii XVI. datae postridie Nonas Maii 1844, quae incipiunt *„Inter praecipuas machinationes...* cuius sanctiones Nos quoque iurcavimus in Encycl. Epist. data 9. Novembris 1846 (pag. 19. 22). — *Huc ref.* §. IV. *Syll.*

<sup>4)</sup> Vid. Reg. 4. ex iis, quae a Patribus in Conc. Tridentino delectis conscriptae, et a Pio IV. approbatae fuerunt in Const. *Dominici gregis* 24. Mart. 1564: et additionem eidem factam a Congr. Ind'cis, auctoritate Benedicti XIV. 17. Junii 1757 (quae praemitti solent Indici Libr. prohibitorum).

<sup>5)</sup> Vid. Trid. Sess. IV. in Decret. *De editione et usu Sacrorum Librorum.*

supremam hanc Petri Sedem, qua Vos, Venerabiles Fratres, tantopere excellitis, in vestrorum fidelium animis insinuent, tueantur, atque defigant. Meminerint scilicet fideles populi, vivere hic, et praesidere in Successoribus suis Petrum Apostolorum Principem <sup>1)</sup>, cuius dignitas in indigno etiam eius haerede non deficit <sup>2)</sup>. Meminerint, Christum Dominum posuisse in hac Petri Cathedra inextinguibile Ecclesiae suae fundamentum <sup>3)</sup>, et Petro ipsi claves dedisse Regni Caelorum <sup>4)</sup>, ac propterea orasse, ut non deficeret fides eius, eidemque mandasse, ut confirmaret in illa fratres <sup>5)</sup>; ut proinde Petri Successor Romanus Pontifex in universum Orbem teneat primatum, et verus Christi Vicarius, totiusque Ecclesiae Caput, et omnium Christianorum Pater et Doctor existat <sup>6)</sup>.

In qua sane erga Romanum Pontificem populorum communione, et obedientia tuenda, brevis et compendiosa via est ad illos in Catholicae veritatis professione conservandos. Neque enim fieri potest, ut quis a Catholica Fide ulla umquam ex parte rebellet, nisi et auctoritatem abiciat Romanae Ecclesiae, in qua extat eiusdem Fidei irreformabile Magisterium a Divino Redemptore fundatum, et in qua propterea semper conservata fuit ea, quae est ab Apostolis traditio. Hinc non modo antiquis haereticis, sed etiam recentioribus Protestantibus, quorum ceteroquin tanta in reliquis suis placitis discordia est, illud commune semper fuit, ut auctoritatem impugnarent Apostolicae Sedis, quam nullo prorsus tempore, nullaque arte aut molimine, ne ad unum quidem ex suis erroribus tolerandum inducere potuerunt. Idcirco hodierni etiam Dei et humanae Societatis hostes nihil inausum relinquunt, ut Italos populos a Nostro Sanctaeque eiusdem Sedis obsequio divellant; rati nimirum tum demum posse sibi contingere, ut Italiam ipsam impietate doctrinae suae, novorumque systematum peste contaminent.

Atque ad pravam hanc doctrinam, et systemata quod attinet, notum iam omnibus est, illos eo potissimum spectare, ut libertatis et aequalitatis nominibus abutentes, exitiosa *Communismi* et *Socialismi* commenta in vulgus insinuent. Constat autem, ipsis seu *Communismi*, seu *Socialismi* magistris, diversa licet via ac methodo agentibus, illud demum commune esse propositum, ut operarios atque alios inferioris praesertim status homines suis deceptos fallacis et faustioris conditionis promissione illusos, continuus commotionibus exagitent, atque ad graviora paullatim facinora exerceant; ut postmodum illorum opera uti possint ad superioris cuiusque Auctoritatis regimen oppugnandum, ad expilandas, diripiendas vel invadendas Ecclesiae primum, ac deinde aliorum quorumcumque proprietates, ad omnia tandem violanda divina humanaeque iura, in divini cultus destructionem atque in subversionem totius ordinis civilium Societatum <sup>7)</sup>. In tanto autem Italiae discrimine Vestrum munus est, Venerabiles Fratres, omnes pastoralis studii nervos intendere, ut fidelis populus agnoscat perversa huiusmodi placita et systemata, si ab illis decipi se patiatur, in aeternam pariter ac temporalem eius perniciem fore cessura.

Moneantur itaque fideles curae Vestrae concrediti, pertinere omnino ad naturam ipsam humanae societatis, ut omnes Auctoritati obtemperare debeant legitime in illa constitutae <sup>8)</sup>; nec quidquam commutari posse in praeceptis Domini, quae in Sacris Litteris ea super re annuntiata sunt. Scriptum est enim: «Subiecti estote omni humanae creaturae propter Deum, sive regi, quasi praecellenti, sive ducibus, tanquam ab eo missis ad vindictam malefactorum, laudem vero bonorum: quia sic est voluntas Dei, ut benedicientes obmutescere faciatis imprudentium hominum ignorantiam: quasi liberi, et non quasi velamen habentes malitiae libertatem, sed sicut servi Dei <sup>9)</sup>». Et rursus: «Omnis anima potestatibus sublimioribus subdita sit: non est enim potestas nisi a Deo: quae autem sunt, a Deo ordinatae sunt.

<sup>1)</sup> Ex actis Ephesini Concilii Act. III., et S. Petro Chrysologo Ep. ad Eutychem.

<sup>2)</sup> S. Leo M. Serm. in anniv. assumpt. suae.

<sup>3)</sup> Matthaei XVI. 18.

<sup>4)</sup> Matthaei XVI. 19.

<sup>5)</sup> Lucae XXII. 31, 32.

<sup>6)</sup> Ex Concilio Oecumenico Florentino in Definit. seu Decr. Unionis.

<sup>7)</sup> *Huc ref.* §. IV. *Syll.*

<sup>8)</sup> *Huc ref. prop.* 63.

<sup>9)</sup> S. Petri Epist. I. Cap. II. 13. seq.



«Itaque qui resistit potestati, Dei ordinationi resistit. Qui autem resistunt, ipsi sibi damnationem acquirunt ».)»

Sciant praeterea, esse pariter naturalis atque adeo incommutabilis conditionis humanarum rerum, ut inter eos etiam, qui in sublimiori auctoritate non sunt, alii tamen aliis, sive ob diversas animi, aut corporis dotes, sive ob divitias, et externa huiusmodi bona praevalent: nec ullo libertatis et aequilatis obtentu fieri umquam posse, ut aliena bona, vel iura invadere, aut quomodolibet violare licitum sit. Perspicua hoc quoque in genere, et passim inculcata extant in Sacris Litteris divina praecepta, quibus nedum ab occupatione alienarum rerum, sed ab ipso etiam eius desiderio districte prohibemur <sup>1)</sup>).

Sed meminerint insuper pauperes, et miseri quicumque homines, quantum ipsi debeant Catholicæ Religioni, in qua intemerata viget, et palam praedicatur Christi doctrina; qui beneficia in pauperes, vel miseros collata perinde haberi a se declaravit, ac si facta sibi ipsi fuissent <sup>2)</sup>); atque omnibus praeunntiam voluit peculiarem rationem, quam in die iudicii habiturus est de iisdem misericordiae operibus, sive scilicet ad praemia aeternae vitae fidelibus tribuenda, qui illis vacaverint, sive ad illos, qui ea neglexerint, aeterni ignis poena multandos <sup>3)</sup>).

Ex qua Christi Domini praeunntiatione, aliisque Illius circa divitiarum usum, earumque pericula severissimis monitis <sup>4)</sup>), in Ecclesia Catholica inviolate custoditis, factum porro est, ut pauperes et miseri apud Catholicas gentes in longe mitiore, quam apud alias quaslibet, conditione versentur. Atque hi quidem in regionibus nostris uberiora adhuc subsidia obtinerent, nisi plura instituta, quae Maiorum pietate comparata fuerant ad ipsorum levamen, extincta nuper repetitis publicarum rerum commotionibus, aut direpta fuissent. De reliquo pauperes nostri, Christo ipso docente, meminerint, non esse cur tristes sint de conditione sua: quandoquidem in paupertate ipsa facilius eis parata via est ad obtinendam salutem, dummodo scilicet suam indigentiam patienter sustineant, et non re tantum, sed spiritu pauperes sint. Ait enim: «Beati pauperes spiritu, quoniam ipsorum est regnum Caelorum <sup>5)</sup>».)»

Sciat etiam fidelis populus universus, veteres Reges ethnicarum Gentium, aliosque in illis publicarum rerum Praesides multo gravius frequentiusque abusus fuisse potestate sua; atque hinc Religioni nostrae sanctissimae in acceptis referendum esse cognoscat, si Principes Christianorum temporum, reformidantes, Religione admonente, *iudicium durissimum, quod his, qui praesunt, fiet*, et destinatum peccantibus supplicium sempiternum, in quo *potentes potenter tormenta patientur* <sup>6)</sup>), iustiori erga subiectos populos et clementiori regimine utuntur.

Agnoscant denique crediti Vestris Nostrisque curis fideles, veram perfectamque hominum libertatem, et aequalitatem in Christianae Legis custodia positam esse; quandoquidem Deus Omnipotens, qui fecit *pusillum et magnum, et cui aequaliter cura est de omnibus* <sup>7)</sup>), non subtrahet personam cuiusquam, nec verebitur magnitudinem cuiusquam <sup>8)</sup>), ac diem statuit in quo *iudicaturus est Orbem in aequitate* <sup>9)</sup>), in suo unigenito Christo Iesu, qui *venturus est in gloria Patris sui cum Angelis suis, et tunc reddet unicuique secundum opera eius* <sup>10)</sup>).

Quod si fideles iidem paterna suorum Pastorum monita, et commemorata superius Christianae Legis mandata despicientes, a supradictis hodiernarum machinationum promotoribus decipi se patiantur, et in perversa *Socialismi* et *Communismi* systemata conspirare cum illis voluerint, sciant serioque considerent, thesaurizare se sibi metipsis apud Divinum Iudicem thesauros vindictae in die irae, nec quidquam interea ex conspiratione illa

<sup>1)</sup> S. Pauli Epist. ad Romanos XIII. 1. seq.

<sup>2)</sup> Exodi XX. 15. 17. — Deuteronomii V. 19. 21.

<sup>3)</sup> Matth. XVIII. 15.; XXV. 40. 45. <sup>4)</sup> Matth. XXV. 34. seq.

<sup>5)</sup> Matth. XIX. 23. seq.; Lucae VI. 4. XVIII. 22. seq.; Epist. S. Jacobi V. 1. seq.

<sup>6)</sup> Matth. V. 3.

<sup>7)</sup> Sapientiae VI. 6. 7.

<sup>8)</sup> Sapientiae VI. 8.

<sup>9)</sup> Ibidem.

<sup>10)</sup> Actorum XVII. 31.

<sup>11)</sup> Matth. XVI. 27.

temporalis in populum utilitatis, sed nova potius miseriarum et calamitatum incrementa obventura. Non enim datum hominibus est, novas stabilire societates et communionem naturali humanarum rerum conditioni adversantes; atque idcirco conspirationum huiusmodi, si per Italiam dilatarentur, non alius esse exitus posset, nisi ut hodierno publicarum rerum statu per mutuas civium contra cives aggressiones, usurpationes, caedes labefactato funditusque convulso, pauci tandem aliqui, multorum spoliis locupletati, summum in communi ruina dominatum arriperent.

Iam vero ad fidelem populum avertendum ab impiorum insidiis, et in professione custodiendum Catholicae Religionis, atque ad veras virtutis opera excitandum, magna, ut probe scitis, vis est in illorum vita et exemplo, qui divinis se ministeriis manciparunt. Verum, prohi dolor! non defuere per Italiam aliqui, pauci illi quidem, Viri Ecclesiastici, qui ad Ecclesiae hostes transfugae non minime illis ad fideles decipiendos adiumento fuerunt. Sed Vobis certe, Venerabiles Fratres, novo illorum lapsus stimulo fuit, ut acriori in dies studio in Cleri disciplinam advigiletis. Atque hic in futurum quoque tempus, pro eo ac debemus, prospicere cupientes, temperare Nobis non possumus, quin commendemus denuo, quod in prima nostra ad totius Orbis Episcopos Encyclica Epistola inculcavimus<sup>1)</sup>, nempe ut nemini cito manus imponatis<sup>2)</sup>, sed in Ecclesiasticae Munitiae delectu maiorem usque diligentiam adhibeatis. De iis praesertim, qui sacris Ordinibus initiari desiderant, inquirere et diu multumque investigare opus est, num ea doctrina, gravitate morum, et divini cultus studio commendentur, ut certa spes affluat fore, ut tamquam Incernae ardentis in Domo Domini, eorum vivendi ratione, atque opera aedificationem et spirituales Vestro gregi utilitatem afferre queant.

Quoniam vero ex Monasteriis recte administratis ingens in Ecclesia Dei splendor atque utilitas dimanat, et Regularis etiam Clerus adiutricem Vobis in procuranda animarum salute operam navat. Vobis ipsis, Venerabiles Fratres, in mandatis damus, primum quidem ut religiosas Familias cuiusque Dioecesis Nostro nomine certiores faciatis, Nobis peculiaries aerumnas ingemiscentibus, quas multae illarum in recenti calamitoso tempore perpessae sunt, non levi interea consolationi fuisse animorum patientiam, atque in virtutis, et Religionis studio constantiam, quibus plurimi ex religiosis hominibus ad exemplum se commendarunt; etsi aliqui non defuerint, qui suae professionis obliiti cum magno bonorum scandalo, et Nostro fratrumque suorum dolore turpissime praevaricati sunt: deinde vero, ut Praesides earundem Familiarum, et superiores, ubi opus fuerit, illarum Moderatores Nostri verbis adhortemini, ut pro sui officii debito, nulli pareant curae atque industriae, quo Regularis Disciplina, ubi servatur, magis in dies vigeat et floreat, ubi vero detrimentum aliquod passa fuerit, omnino reviviscat et redintegretur. Moneant instantem idem Praesides, arguant, increpent religiosos illarum Alumnos, ut serio considerantes quibus se votis Deo obstrinxerunt, illa diligenter reddere studeant, suique Instituti regulas inviolate custodiant, et mortificationem Iesu in suo corpore circumferentes ab iis omnibus abstineant, quae propriae vocationi adversantur, et operibus instent, quae caritatem Dei ac proximi, perfectaeque virtutis studium praeseferant. Caveant praesertim supradicti Ordinum Moderatores, ne ulli ad religiosa Instituta aditum faciant, nisi cuius antea vitam, mores atque indolem accuratissime expenderit; ac deinde illos tantum ad religiosam professionem admittant, qui tyrocinio rite posito ea dederint verae vocationis signa, ut iudicari merito possit, ipsos non alia de causa religiosas vitam amplecti, nisi ut Deo unice vivant, et suam atque aliorum salutem pro cuiusque Instituti ratione procurare possint. Super his autem deliberatum fixumque Nobis est, ut ea omnino serventur, quae ad Religiosarum Familiarum bonum statuta praescriptaque sunt in Decretis a Nostra Congregatione super Statu Regularium die 25. Ianuarii superiori anno editis, et Apostolica Nostra Auctoritate sancitis.

Post haec ad Saecularis Cleri delectum revocato sermone, commendatam in primis volumus Fraternitatibus Vestris instructionem, et educationem minorum Clericorum; quandoquidem idonei Ecclesiae Ministri vix

<sup>1)</sup> Die 9. Novembris 1846 (pag. 19, 24). <sup>2)</sup> I. ad Timoth. V. 22.

aliter haberi possunt, quam ex illis, qui ab adolescentia et prima ipsa aetate ad sacra eadem officia rite informati fuerint. Pergite igitur, Venerabiles Fratres, omnem impendere industriam atque operam, quo sacrae militiae tyrones a teneris annis, quoad eius fieri poterit, in Ecclesiastica Seminaria recipiantur, atque inibi, tamquam novellae plantationes succrescentes in circuitu Tabernaculi Domini, ad vitae innocentiam, religionem, modestiam et ecclesiasticum spiritum conformentur, simulque litteras et minores maioresque disciplinas, praesertim sacras addiscant a selectissimis magistris, qui scilicet doctrinam sectentur ab omni cuiusque erroris periculo alienam.

Quoniam vero haud facile Vobis continget Minorum omnium Clericorum eruditionem in Seminariis perficere, et ceteros etiam ex laicorum ordine adolescentes ad pastorem Vestram sollicitudinem pertinere non est dubium, excubate insuper, Venerabiles Fratres, aliis omnibus publicis privatisque scholis, et quantum in Vobis est omni ope atque industria adnitimini, ut tota in illis studiorum ratio ad Catholicæ doctrinae normam exigatur, et conveniens in illas inventus ab idoneis et probitate ac religione spectatis Magistris ad veram virtutem, bonasque artes et disciplinas instituta, opportunis muniatur praesidiis, quibus structas sibi ab impiis insidias agnoscat, et exitiales eorumdem errores devitet, atque ita sibi et christianae, ac civili reipublicae ornameto et utilitati esse possit.

Eo autem in genere praecipuum Vobis, planeque liberam auctoritatem et curam vindicabitis super Professoribus Sacrarum Disciplinarum, et in reliquis omnibus quae Religionis sunt, aut Religionem proxime attingunt <sup>1)</sup> Advigilate, ut in tota quidem scholarum ratione, sed in his maxime quae Religionis sunt, libri adhibeantur ab erroris cuiusque suspicione immunes<sup>2)</sup>. Commonete Animarum Curatores, ut seduli Vobis adiutores sint in iis, quae scholas respiciunt infantium et iuvenum primae aetatis; quo destinentur ad illas Magistri, et Magistrae probatissimae honestatis, et in pueris aut puellis ad Christianae Fidei rudimenta instituendis libri adhibeantur a Sancta hac Sede probati. Qua in re dubitare non possumus, quin Parochi ipsi exemplo illis sint, et Vobis sedulo instantibus, in pueros ad Christianae Doctrinae primordia instruendos quotidie magis incumbant, eamque instructionem ad graviores sui muneris partes omnino pertinere meminerint<sup>3)</sup>. Iidem vero admonendi erunt, ut in suis sive ad pueros, sive ad reliquam Plebem instructionibus habere ob oculos non omittant Catechismum Romanum, quem ex Decreto Tridentini Concilii, et S. Pii V. immortalis memoriae Decessoris Nostri iussu editum, alii porro Summi Pontifices, ac nominatim fel. record. Clemens XIII. cunctis animarum Pastoribus denuo commendatum voluit, tamquam *ad pravarum opinionum fraudes removendas, et veram, sanamque doctrinam propagandam, stabiliendamque opportunissimum subsidium* <sup>4)</sup>.

Haud sane mirabimini, Venerabiles Fratres, si de his fusiori aliquantulum calamo scripsimus. Enimvero prudentiam Vestram minime fugit, periculoso hoc tempore Vobis Nobisque ipsis omni industria atque opera, ac magna animi firmitate connitendum et invigilandum esse in illis omnibus, quae Scholas, et puerorum ac iuvenum utriusque sexus instructionem et educationem attingunt. Nostis enim, hodiernis Religionis, humanaeque Societatis inimicos, diabolico plane spiritu, in id suas omnes artes conferre, ut juveniles mentes et corda a prima ipsa aetate pervertant. Idcirco etiam nihil intentatum, nihil prorsus inausum relinquunt, ut Scholas et Instituta quaelibet iuventutis educationi destinata, ab Ecclesiae auctoritate, et a Sacrorum Pastorum vigilantia omni ex parte subducant.

Juxta haec firma spe sustentamur fore, ut carissimi in Christo Filii Nostri omnes Italiae Principes Fraternitatibus Vestris potenti patrocinio suo adfuturi sint, quo in supradictis omnibus muneri Vestro uberius satisfacere valeatis; nec dubitamus, quin iidem ipsi Ecclesiam, et omnia tam spiritualia quam temporalia eius iura tueri velint. Id quidem religioni congruum est,

<sup>1)</sup> *Huc ref. prop.* 33, 44, 46.

<sup>2)</sup> *Huc ref. prop.* 45, 47.

<sup>3)</sup> Tridentinum Sess. XXIV. 4. — Benedict. XIV. Constitut. *Etsi minime* 7. Febr. 1742.

<sup>4)</sup> In Encyclicis Litteris ea de re ad omnes Episcopos datis 14. Junii 1761

avitaeque pietati, qua se in exemplum animatos ostendunt. Illorum quoque sapientiam non latet, initia malorum omnium, quibus tantopere affligimur, a detrimentis repetenda esse, quae Religioni Ecclesiaeque Catholicae iamdiu, praesertim vero a Protestantium aetate, irrogata fuerant. Perspiciunt scilicet, ex depressa saepius sacrorum Antistitum auctoritate, et ex crescente in dies multorum in divinis et Ecclesiasticis praeceptis impune violandis temeritate, factum fuisse, ut minueretur pariter populi obsequium erga Civilem Potestatem, et hodiernae publicae tranquillitatis inimicis planior inde pateret via ad seditiones contra Principem commovendas. Perspiciunt etiam, ex occupatis non raro direptisque, ac palam divenditis temporalibus bonis ad Ecclesiam legitimo proprietatis iure spectantibus, contigisse, ut decrescente in populi reverentia erga proprietates religionis destinatione consecratas, multi hinc faciliores praeberent aures audacissimis novi *Socialismi* et *Communismi* assertoribus, qui alias pariter aliorum proprietates occupari ac dissipari, aut alia quavis ratione in omnium usum converti posse comminiscuntur. Perspiciunt insuper recidisse paulatim in civilem Potestatem impedienda illa, quae iamdiu multiplici fraude comparata fuerant ad cohibendos Ecclesiae Pastores, ne sacra sua Auctoritate uti libere possent. Perspiciunt denique calamitatum, quibus urgemur, nullum aliud inveniri posse promptius et maioris virtutis remedium, quam ut refloret in tota Italia splendor Religionis Ecclesiaeque Catholicae, in qua diversis hominum conditionibus, et indigentis opportunissima praesto esse praesidia non est dubium.

Siquidem (verbis utimur S. Augustini) «Catholica Ecclesia non solum ipsum Deum, sed etiam proximi dilectionem atque caritatem ita complectitur, ut omnium morborum, quibus pro peccatis suis animae aegrotant, omnis apud illam medicina praepolleat. Ipsa pueriliter pueros, fortiter iuvenes, quiete senes, prout cuiusque non corporis tantum, sed et animi aetas est, exercet et docet. Ipsa feminas viris suis non ad explendam libidinem, sed ad propagandam sobolem, et ad rei familiaris societatem casta, et fidei obedientia subiicit; et viros coniugibus non ad illudendum imbecilliores sexum, sed sinceri amoris legibus praeficit. Ipsa parentibus filios libera quadam servitute subiungit, parentes filiis pia dominatione praeponit. Ipsa fratribus fratres Religionis vinculo firmiore atque arctiore, quam sanguinis, necit, omnemque generis propinquitatem et affinitatis necessitudinem, servatis naturae, voluntatisque nexibus, mutua caritate constringit. Ipsa dominis servos non tam conditionis necessitate, quam officii delectatione docet adhaerere; et dominos servis, summi Dei communis Domini consideratione placabiles, et ad consulendum magis, quam coercendum propensiores facit. Ipsa cives civibus, gentes gentibus, et prorsus homines primorum parentum recordatione non societate tantum, sed quadam etiam fraternitate coniungit. Docet reges prospicere populis, monet populos se subdere regibus. Quibus honor debeatur, quibus affectus, quibus reverentia, quibus timor, quibus consolatio, quibus admonitio, quibus exhortatio, quibus disciplina, quibus obiurgatio, quibus supplicium, sedulo docet, ostendens quemadmodum et non omnibus omnia, et omnibus caritas, et nulli debeat iniuria »).

Nostrum igitur Vestrumque est, Venerabiles Fratres, ut nulli parentes labori, nulla umquam difficultate deterriti, toto pastoralis studii robore tueamur in Italiam populi cultum catholicae Religionis, et non solum obstantibus alacriter impiorum conatibus, qui Italiam ipsam ab Ecclesiae sinu avellere commoliuntur, sed etiam degeneres illos Italiae filios, qui iam eorumdem artibus seduci se passi fuerint, ad salutis viam revocare annitmur.

Verumtamen cum omne datum optimum et omne donum perfectum desursum descendat, adeamus cum fiducia ad thronum gratiae, Venerabiles Fratres, et caelestem luminum et misericordiarum Patrem publicis privatisque precibus orare suppliciter atque obsecrare non intermittamus, ut per merita Unigeniti Filii sui Domini nostri Jesu Christi, avertens faciem suam a peccatis nostris, omnium mentes et corda virtute gratiae suae propitius illustret, ac rebelles quoque ad se compellens voluntates, Ecclesiam sanctam novis victoriis et triumphis amplifect; quo in tota Italia, immo et ubique

<sup>1)</sup> S. Augustini de Moribus Cathol. Ecclesiae, Lib. I.

terrarum, merito pariter ac numero populus ei serviens augeatur. Invocemus etiam sanctissimam Dei Genitricem Immaculatam Virginem Mariam, quae praevalido apud Deum patrocinio suo quod quaerit invenit, et frustrari non potest, atque una Petrum Apostolorum Principem, et Coapostolum eius Paulum, omnesque sanctos Coelites, ut Clementissimus Dominus, eorum intervenientibus precibus, flagella iracundiae suae a fidelibus populis avertat; et cunctis, qui Christiana professione censentur, tribuat propitius per gratiam suam et illa respuere, quae huic inimica sunt nomini, et ea, quae sunt apta, sectari.

Demum, Venerabiles Fratres, Nostrae in Vos studiosissimae voluntatis testem accipite Apostolicam Benedictionem, quam intimo cordis affectu, Vobis ipsis et Clericis, Laicisque fidelibus, vigilantiae Vestrae conceditis, peramanter impertimur.

Datum Neapoli, in Suburbano Portici, die VIII. Decembris anni MDCCCXLIX. Pontificatus Nostri anno IV.

## Allocutio

habita in consistorio secreto die XX. maii anno MDCCCL<sup>1</sup>).

### Venerabiles Fratres.

Si semper antea, Venerabiles Fratres, admirabilem Dei Optimi Maximi in re catholica tuenda providentiam extitisse cognovimus, postremis hisce potissimum annis caelestem illam vim, qua Deus Ecclesiae suae usque ad consummationem saeculi sese adfuturum promisit, mirandum in modum fulgere perpeximus. Universo enim, qua late patet, terrarum orbi notae ac pervulgatae sunt tristissimae rerum vicissitudines, quibus Nos vehementer afflicti ab hac Nostra Sede sexdecim et amplius menses exsulare coacti fuimus, itemque comperta atque explorata sunt acerbissima et nunquam satis deploranda tempora, quibus tenebrarum princeps suam omnem contra Ecclesiam et hanc Apostolicam Sedem rabiem evomere, atque in hac ipsa quoque Urbe, catholicae veritatis centro, cum incredibili Nostro, Vestroque et omnium bonorum luctu debacchari visus est. Atque omnes norunt quomodo iustus et misericors Dominus, qui percutit et sanat, mortificat et vivificat, deducit ad inferos et reducit, praesentibus manifestisque suae bonitatis praesidiis consolatus Nos fuerit in tribulatione Nostra, et Nostras preces gemitusque, ac totius Ecclesiae vota propitio et sereno vultu respiciens luctuosissimam illam atque ab inferis excitatam tempestatem sedare, et carissimos Pontificiae Nostrae ditionis populos ab infelici illo, in quo misere iacebant, statu eripere, Nosque in hanc almam Urbem ipsis populis prae laetitia gestientibus atque omni catholico orbe exultante, reducere sit dignatus. Itaque cum post Nostrum in Urbem reditum hodierno die Vos primum alloquuturi simus, nihil certe Nobis potius, quam ut maximas atque immortales Omnipotenti Deo pro tantis beneficiis agamus gratias, ac meritis laudibus prosequamur inclytas illas Nationes et Principes, qui a Deo ipso excitati de Nobis deque hac Apostolica Sede optime mereri, et suis opibus, consiliis et armis civilem eiusdem Sedis Principatum tueri ac defendere, et publicam quietem et ordinem huic Urbi et Pontificiae ditioni restituere tam vehementer laetati sunt.

Atque gratissimi Nostri animi sensus, et Nostrarum laudum praeconium merito sibi vindicat carissimus in Christo Filius Noster Ferdinandus II. utriusque Siciliae Rex illustris. Ipse enim pro eximia sua religione, vix dum de Nostro Caietani adventu certior factus, nulla interposita mora ad Nos advolans, una cum augusta sua Coniuge Maria Theresia omnes singularis suae pietatis ac filialis prorsus devotionis et obsequii significationes Christi in terris Vicario exhibere vehementer gaudens, Nos munifico hospitio excepit, ac toto tempore, quo in suo Regno morati sumus, quovis officiorum genere Nos cumulare nunquam intermisit, veluti Vos ipsi testes locuple-

<sup>1</sup>) *Huc refertur nota ad §. IX. Syllabi.*

tissimi fuistis, Venerabiles Fratres. Cum autem aliae quoque Nationes ac civilem Apostolicæ huius Sedis principatum tutandum accurrerunt, idem Princeps suas ipse copias ducere voluit. Quæ quidem egregia pietissimi Regis in Nos et eandem Sedem merita animo Nostro ita infixæ hærent, ut iucundam eorum memoriam nulla unquam delere possit oblivio. Nunc vero magno cum honore et perenni grati animi Nostri testimonio nominanda a Nobis est clarissima Gallorum Natio militari gloria et in hanc Apostolicam Sedem obsequio, atque aliis tot sane nominibus illustris, cuius propensissimam in Nos voluntatem et beneficia experti sumus. Siquidem illa Natio, eiusque Reipublicæ inclutus Præ-es afflictis Nostreis et Pontificiæ ditionis rebus occurrens, nullisque sumptibus parcens strenuos suos Duces, militesque mittendos decrevit, qui multis gravibusque perfuncti laboribus hanc potissimum Urbem misere divexatam atque prostratam ab infelici, qua premebatur, conditione liberarunt, vindicarunt ac Nos in ipsam Urbem reducere tantopere gloriati sunt. Qua quidem in laude, et grati animi Nostri significatione coniunctum quoque omnino volumus carissimum in Christo Filium Nostrum Franciscum Iosephum Austriæ Imperatorem, Hungariæ Regem Apostolicum, et Bohemiæ Regem illustrem, qui pro avita sua pietate, et in hanc Petri Cathedram observantia validissimam suam opem et operam in civilem huius Apostolicæ Sedis Principatum tuendum omni alacritate et studio conferens Pontificis præsertim Aemiliæ, Piceni et Umbriæ Provincias victricibus suis copiis ab iniusta ac tristi dominatione eripuit, easque legitimo Nostro et eiusdem Sedis regimini restituit. Gratissima quoque recordatione præcipuam rationem habere debemus erga Nos meritorum carissimæ in Christo Filiae Nostræ Mariæ Elisabeth Hispaniarum Reginae Catholiciæ, eiusque Gubernii: nam, veluti optime scitis, ubi Nostras accepit calamitates, nihil antiquius habuit, quam singulari cura catholicas gentes ad communis omnium fidelium Patris causam propugnandam statim excitare, ac valentes suas deinde mittere copias ad Romanæ Ecclesiæ possessiones tuendas. Atque hic, Venerabiles Fratres, nullo modo taciti præterire possumus aliorum præclarissimorum Principum, illorum etiam qui huic Petri Cathedrae minime consociantur, propensissimam erga Nos voluntatem, qui, licet suas copias haud miserint, tamen eorum operam in temporalibus Nostreis et Romanæ Ecclesiæ iuribus rationibusque tuendis impendere studuerunt. Quocirca iis quoque omnibus debitas meritasque habemus et agimus gratias, atque ipsis Nos summopere gratos esse profitemur. Quæ quidem in re nemo admirari non potest summam illius omnia fortiter suaviterque regentis et moderantis Dei providentiam, qui in hac quoque tanta temporum perturbatione et acerbitate effecit, ut vel ipsi Principes cum Romana Ecclesiâ minime coniuncti civilem eiusdem Ecclesiæ Principatum sustinerent, defenderent, quo Romanus Pontifex singulari eiusdem divinae providentiæ consilio per tot iam continentia sæcula optimo quoque iure potitur, ut in universæ Ecclesiæ regimine sibi divinitus commisso supremam suam Apostolicam auctoritatem toto orbe ea plane libertate possit exercere, quæ ad Summi Pontificatus munus obeundum ac totius Dominici gregis salutem procurandam tantopere est necessaria <sup>1)</sup>. Debitæ autem laudis et honoris testimonium omnibus eorundem Principum et Nationum apud Nos et hanc S. Sedem Oratoribus, atque Administris deferimus, qui pro suorum Principum et Nationum erga Nos voluntate ac studiis Personam Nostram ante discessum tutati sunt, ac Nos tum in exilio tum in reditu semper sunt comitati.

Tot vero tantisque singularis pietatis, impensi amoris, devotissimi obsequii, ac largissimæ liberalitatis officiis ab universo catholico orbe affecti fuimus, ut vehementer euperemus in hoc Vestro consensu non solum singulis civitatibus et oppidis, sed unicuique etiam hominum iterum debitas pro suis erga Nos meritis persolvere gratias ac tribuere laudes, nisi longius quam par est hæc Nostra excurrere deberet oratio. Verumtamen silentio præterire non possumus illustria sane et mira fidei, pietatis, amoris et liberalitatis testimonia, quibus Nos prosequuti sunt, Venerabiles Fratres, totius catholici orbis Antistites, qui maximæ Nobis lætitiæ fuerunt. Namque

<sup>1)</sup> *Huc ref. nota ad §. IX. Syll.*

ipsi, quamvis in gravissimis angustiis ac difficultatibus constituti, sacerdotali tamen fortitudine et zelo ministerium suum implere et bonum certamen certare, et tum voce, tum salutaribus scriptis, tum episcopalibus conventibus Ecclesiae causam, iura, libertatem impavide defendere, et commissi sibi gregis saluti prospicere numquam cessarunt. Atque haud possumus quin gratissimi Nostri animi sensus Vobis quoque profiteamur, Venerabiles Fratres S. E. R. Cardinales, qui summam certe consolationem et solatium Nobis attulistis, quandoquidem Nostrarum calamitatum socii atque participes, invicto animo dura perpassi, et graviora quaeque pro Ecclesia Dei subire parati, amplissimum, quem in eadem Ecclesia obtinetis, dignitatis gradum omni virtute sustinere, Nosque in tanto rerum certamine et discrimine Vestris consiliis atque laboribus iuvare nunquam omisistis. Cum igitur maximo Dei beneficio res ita conversae fuerint, ut in hanc Apostolicam Sedem inter summas non solum huius almae Urbis, sed omnium etiam populorum gratulationes redire potuerimus, nihil certe Nobis omnibus potius esse debet, quam in humilitate cordis Nostri assiduas atque immortales ipsi clementissimo miserationum Domino agere gratias, qui fecit Nobiscum misericordiam suam, itemque Sanctissimae Dei Genitrici Immaculae Virgini Mariae, cuius potentissimo patrocinio salutem Nostram acceptam referimus.

Hactenus, Venerabiles Fratres, ea raptim commemoravimus quae Nobis iunctitati fuerunt, nunc vero pro supremi Nostri Apostolici ministerii debito haud possumus quin de iis loquamur, quae cor Nostrum intime sollicitant, angunt et premunt. Noscitis enim, Venerabiles Fratres, deterri- mum sane atque inexorabile bellum excitatum inter lucem et tenebras, inter veritatem et errorem, inter vitium et virtutem, inter Belial et Christum; neque ignoratis, quibus nefariis artibus et molitionibus inimici homines et sanctissimae nostrae Religionis res ubique affligere ac prostrare, et omnium Christianarum virtutum germen radicibus evellere, et effraenatam impiam- que opinandi vivendique licentiam quaquaversus propagare, et imperitiae praesertim multitudinis, atque improvidae iuventutis animos mentesque omnigenis, perversis perniciosisque erroribus inficere, corrumpere, et iura omnia divina et humana subvertere, et si fieri unquam posset, catholicam Ecclesiam funditus delere, Sanctamque hanc Petri Cathedram expugnare connituntur. Ac nemo non videt quibus quantisque malis et damnis Christi ovile Nobis concredidit, ac vel ipsa humana societas a tenebrarum potestate, non sine magno animi Nostri dolore, undique afflicetur et divexetur. Itaque Nobis Vobisque, Venerabiles Fratres, si umquam alias, nunc certe summa animorum consensione omnique vigilantia, zelo, contentione, et qua opere, qua verbo, qua exemplo strenue est allaborandum, ut opposites murum pro Domo Israel impavide praeliemur praelia Domini. Nos quidem licet infirmitatis Nostrae conscii, tamen omnipotentis Dei auxilio suffulti, pro supremi Nostri Apostolici muneris officio „*propter Sion non tacebimus, et propter Hierusalem non quiescemus*“; et continenter aspicientes in auctorem fidei et consummatorem Iesum, nullis certe curis, nullis consiliis, nullis laboribus umquam parcemus, ut possimus suffulcire domum, corroborare templum, et Ecclesiae reparare ruinas, omniumque saluti prospicere; prompti ac parati Nostram ipsam pro Christo Jesu Eiusque Sancta Ecclesia quam libentissime profundere vitam.

Atque hoc loco ad omnes Venerabiles Fratres catholici orbis Antistites in sollicitudinis Nostrae partem vocatos Nostram orationem convertentes, dum illis denuo vehementer gratulamur de praeclaris eorum pro Dei gloria et animarum salute laboribus, animos eis denuo addimus, ut in hoc horribili contra divinam nostram religionem bello ipsi unanimes uno ore id ipsum invicem sentientes, et confortati in Domino et in potentia virtutis Eius, sumentes in omnibus scutum inexpugnabile fidei, atque assumentes gladium spiritus, quod est verbum Dei, progrediantur, ut adhuc fecerunt, alacriori in dies studio, sua episcopali virtute, constantia, prudentia pro ipsa sanctissima religione intrepide decertare, atque inimicorum hominum conatibus obsistere, tela retundere, impetus frangere, et gregem sibi commissum ab illorum insidiis et impetu defendere atque ad salutis semitas deducere. Insuper ab

<sup>1</sup>) Isai. 62. 1.

ipsis Venerabilibus Fratribus exposcimus, ut numquam intermittant ecclesiasticos potissimum viros monere, hortari, excitare, quo orationi instantes, spiritu ferventes, ac pie sancteque viventes praebeant in omnibus se ipsos exemplum bonorum operum, et Dei gloriae, et animarum salutis zelo incensi, atque arctissimo inter se caritatis vinculo obstricti accipiant armaturam Dei, et concordissimis animis, coniunctisque viribus in aciem prodeant, ac sub proprii Antistitis ductu dies noctesque sacerdotalem vocem attollant, Dei legem, et Eius Sponsae Ecclesiae praeceptiones christiano populo diligenter annuntient. Pergant quoque ipsi Venerabiles Fratres eisdem ecclesiasticis viris inculcare, ut christianae plebi insidantium hominum fallacias et fraudes detegant, ac fideles edoceant, miseras omnes et calamitates in populos ex peccatis semper redundasse ac redundare, et veram solidamque felicitatem in christianae legis custodia consistere, et idcirco nihil intentatum relinquant, ut omnes odientes malum, et adhaerentes bono incedant per viam mandatorum Dei, utque errantes de errorum tenebris et vitiorum coeno emergant, et convertantur ad Dominum.

Iam vero, Venerabiles Fratres, Vobiscum communicamus summam certe consolationem, qua inter tantas angustias affecti fuimus, ubi cognovimus Decreta a carissimo in Christo Filio Nostro Francisco Josepho Austriae Imperatore, Hungariae Rege Apostolico, et Bohemiae Rege illustri edita, quibus pro egregia sua religione Nostri, et Venerabilium Fratrum amplissimi sui Imperii Antistitum votis et postulationibus obsequutus, maxima cum sui nominis gloria, et ingenti bonorum omnium exultatione optatissimam catholicae Ecclesiae libertatem alacri et libentissimo animo cum suis Administris in Imperio suo adserere est orsus. Quocirca eidem clarissimo Imperatori et Regi de tam insigni re, catholico Principe plane digna, meritis tribuimus laudes ac vehementer in Domino gratulamur. Atque bona profecto spe nitimur fore ut ipse religiosissimus Princeps pro suo erga Ecclesiam studio praeclarum eiusmodi opus prosecui, perficere ac suis in rem catholicam meritis cumulum afferre velit.

Verum dum hac utebamur consolatione acerbissimus sane accessit dolor, quo vehementer angimur et premimur, videntes quomodo sanctissimae nostrae Religionis res in alio catholico Regno nunc affligantur, et sacra Ecclesiae atque huius S. Sedis conculcentur iura. Probe intelligitis, Venerabiles Fratres, Nos hic loqui de Subalpino Regno, ubi, quemadmodum omnes ex privatis nuntiis, publicisque Litteris iam cognoscunt, lex Ecclesiae iuribus ac solemnibus cum hac Apostolica Sede initis conventionibus adversa fuit promulgata, et hisce diebus summo animi Nostri moerore praeclarissimus Taurinensium Antistes Venerabilis Frater Aloisius Fransonii militari manu ab episcopalibus suis sedibus avulsus, et cum magno Taurinensis Urbis ac totius illius Regni bonorum luctu in arcem est deductus. Nos itaque, prout rerum gravitas, atque officii Nostri ratio in tuendis Ecclesiae iuribus postulabat, nulla interiecta mora per Nostrum Cardinalem a publicis negotiis primum de commemorata lege, postmodum vero de iniuria et vi egregio Antistiti illata statim apud illud Gubernium reclamavimus. Atque interea dum inhaerentem cordi Nostro amaritudinem ea spe solamur, fore ut eiusmodi reclamaciones optatum assequantur exitum, Nos laud ommittemus alia Allocutione de ecclesiasticis illius Regni negotiis agere, Vosque certiores facere, cum id opportunum esse censuerimus.

Post haec abstinere non possumus quin pro paterna Nostra solitudine erga illustrem Belgarum gentem, quae catholicae Religionis studio semper enituit, Nostrum exprimamus dolorem, cum inibi rei catholicae pericula impendere prospiciamus. Sed futurum confidimus ut Serenissimus ille Rex, et ii omnes qui in eo Regno summam rerum procuracionem gerunt, pro eorum sapientia animadvertentes, quantopere catholica Ecclesia eiusque doctrina ad temporalem quoque populorum tranquillitatem prosperitatemque conducant, salutarem eiusdem Ecclesiae vim sartam tectam haberi velint, ac Sacros ipsius Ecclesiae Antistites et Ministros eorumque optimam operam tegere ac tueri studeant.

Cum autem Apostolica illa caritas, qua omnes populos et nationes in Christo complectimur, ita Nos urgeat, ut nihil prorsus aliud tam vehementer optemus, quam ut omnes occurrant in unitatem fidei et agnitionis Filii Dei,



verba Nostra ad illos omnes qui a Nobis dissident, toto cordis affectu convertimus, eosque obtestamur in Domino, ut depulsa errorum caligine veritatis lucem aspiciant, et ad sinum confugiant Sanctae Matris Ecclesiae, atque ad hanc Petri Cathedram, in qua Christus eiusdem Ecclesiae suae fundamentum posuit.

Denique, Venerabiles Fratres, ne desistamus unquam, maiore qua possumus contentione, humillimas fervidasque clementissimo bonorum omnium largitori Deo adhibere preces, ut per merita Unigeniti Fili Sui Domini nostri Jesu Christi, Eiusque Sanctissimae Genitricis Immaculae Virginis Mariae, ac Beatorum Apostolorum Petri et Pauli, omniumque sanctorum Caelitum Ecclesiam suam sanctam ab omnibus adversitatibus eripiat, eamque ubique gentium, ubique terrarum maioribus ac splendidioribus triumphis exornet et augeat, ac Nos uberrimis suae bonitatis donis in dies cumulet, et Principibus atque Nationibus de Nobis optime meritis amplitudinem rependat omnis verae felicitatis, atque universo terrarum Orbi optatissimam pacem largiatur.

## Allocutio

habita in consistorio secreto die I. novembris anni MDCCCL ).

### Venerabiles Fratres.

In Consistoriali Oratione, qua Vos alloquuti fuimus XIII. kalendas Iunii huius anni, haud praetermissimus, Venerabiles Fratres, commemorare paucis verbis, ac dolere Vobiscum, quae in carissimi in Christo Filii Nostri Sardiniae Regis ditione contra Ecclesiae ius gesta nuper statutaque fuerant, atque una significavimus consilium Nobis esse, ut super his accuratiorem in Consessu Vestro sermonem opportuno alio tempore institueremus. Ea vero spe sustentabamur fore, ut iniuriis illic Ecclesiae illatis aliquod interea remedium afferretur, quod annuntiare Vobis possemus. Sed quoniam longe admodum abfuit ut res ex sententia succederet, Nostri tandem officii esse duximus, ut ratione in hoc negotio a Nobis adhibita ab ipsis eius rei exordiis brevissime repetita, queramus et graviore oratione reclamemus contra ea omnia, quae tum in continentibus, tum etiam in transmarinis supradictae ditionis regionibus decreta in Ecclesiae iniuriam, aut facta sunt.

Nostis, Venerabiles Fratres, solemnem Conventionem, quae die 27. Martii anni 1841 inter Pontificium et Regium Legatum inita fuit, et quam sine mora tum Gregorius XVI. recol. mem. Decessor Noster, tum Carolus Albertus fel. rec. Sardiniae Rex ratam habuerunt et confirmarunt; nostis scilicet hanc Conventionem eo prorsus spectasse, ut Ecclesiasticae immunitates, quae in ditione illa ex sanctione Sacrorum Canonum diuturno multorum saeculorum decursu vigerant, quaeque recentiori tempore pactis conventis, et Romanorum Pontificum benignitate, aliqua ex parte relaxatae fuerant, novis adhuc ac multo arctioribus limitibus continerentur. Atque hinc non defuere in Subalpinis provinciis qui de indulgentia Decessoris nostri ea in re, quasi de nimis ampla concessione mirarentur; et Regium quoque Gubernium nonnullos annos abstinuit ab eiusdem Conventionis legibus in transmarinum suum Sardiniae Regnum inducendis. Jam vero idem Gubernium anno 1848 novam a Nobis Conventionem postulavit, et die 14. Septembris eius anni Regius Legatus Legato a Nobis deputato litteras tradidit eiusmodi Conventionis formulam proponentes, paucis distinctam articulis, quos prooemium quoddam haud levis sane momenti praecederet. Pervidit facile Legatus Noster postulationem ea, qua explicabatur, amplitudine ac verbis admitti prorsus non posse; immo nec agi in postulatione ipsa de mutua aliqua concessione paciscenda; quandoquidem nihil in ea proponebatur, in quo Gubernium ullam, ne levissimam quidem, obligationem erga Ecclesiam contrahere videretur. Itaque Noster idem Legatus novos proposuit articulos Gubernii votis meliori, qua fieri posse censuit, ratione consentaneos, quibus et alios adiunxit in id spectantes, ut Ecclesia omni pene civilis immunitatis usu cari-

<sup>1)</sup> *Huc referuntur Syllabi Propositiones 43, 44, 45.*

tura hanc saltem iacturam liberiore in reliquis suae auctoritatis exercitio compensaret. Declaravit tum Regius Legatus, postulaturum se novas a suo Gubernio instructiones, ut plene ad proposita respondere posset. Ignoramus equidem an instructiones illae Romam unquam advenerint; sed coniciere licet Regium Gubernium rem distulisse propter notissimas calamitates, quae Italiam pene universam subinde afflixerunt, quaeque Nos ipsos a tota Nostra civili ditione discedere coegerunt. Postea, tranquillitatis rebus, dum prope Neapolim tempus praestolaremur, quo in Urbem redire opportunum foret, novus illuc ad Nos missus est Extraordinarius Legatus, cui mandatum inter alia erat, ut intermissam de Conventionum tractationem repeteret. Attamen postquam de aliis negotiis egisset, revocatum se declaravit a Regio Gubernio, ac re necdum inchoata discessit. Itaque sperare licuit, Regiis Ministris opportunus visum fuisse, ut tractatio illa in tempus magis idoneum, post Nostrum scilicet in Urbem reditum, remitteretur.

Attamen paucos post menses accepimus, Regium ipsum Ministerium detulisse ad Regni Comitata novam Legem de Clericorum et Ecclesiarum immunitate penitus abolenda, de iudicio etiam super Patronorum nominationibus ad Beneficia Ecclesiastica Tribunalibus Laicis attribuendo, nec non de aliis nonnullis, sive eodem, sive posteriori tempore, contra Ecclesiae ius, aut non sine Religionis periculo statuendis.

Ut primum de huiusmodi Legis propositionibus significatum Nobis est, reclamari contra illam iussimus tum a Cardinali Nostro Pro-Secretario Status, tum etiam a Nostro Apostolico Nuntio tunc Augustae Taurinorum degente. Sed utraque reclamazione cadente in irritum, expostulare paulo post oportuit contra ipsas, quas memoravimus, novitates ab utroque legibus ferendis Consilio approbatas, et Regia statim auctoritate sanctas. In quo eius rei progressu atque exitu non illud modo dolendum, quod Sanctissima Ecclesiae iura, quae ex Canonum sanctionibus in tot saeculorum diuturnitate vigerant, facto ipso violata et proculcata fuerint, sed etiam quod plures ex Deputatis ac Senatoribus Regni, qui in publica utriusque Consilii deliberatione verba fecerunt, et quorum sententia vicit, eam sibi metipsis seu Laicae Potestati auctoritatem asserere non dubitaverint, ut solemnes Conventiones super usu illorum eorundem iurum cum Sede Apostolica initas, sine huius consensu, immo et ea reclamante rescindere, et declarare, ac facere irritas valeant<sup>1)</sup>.

Videtis qualia et quam gravis momenti haec sint, Venerabiles Fratres: perspicitis cuiusmodi futura esset sacrarum rerum conditio, si suus Ecclesiae iuribus honor non sit, si despiciantur illius Canones, si nulla diuturnae possessionis ratio habeatur, si tandem neque sua stet fides pactis inter Sanctam hanc Sedem et Civilem Potestatem rite conventis. Nec porro ignoratis non solum Religionis, sed etiam civilis ordinis, ac publicae privataeque rei omnino interesse, ut Ecclesiasticae eadem Conventiones sanctae atque intemeratae habeantur; quandoquidem earum vi ac iure contempto et laefactato, aliorum quoque publicorum privatorumque pactorum ratio concideret.

Iniuriis per memoratas novas sanctiones Ecclesiae et Sanctae huic Sedi illatis aliae insuper brevi intervallo additae sunt, cum scilicet Regii Administri et Iudices Laici duos praesertim sacros Antistites Nostros Venerabiles Fratres Archiepiscopum Turritanum, et Archiepiscopum Taurinensem in ius vocarunt; et illum quidem domi suae carceris loco detinuerunt, hunc vero deduxerunt militari manu in Castrum Regiae Urbis, ac tandem utrumque eorum civili poena multarunt; non aliam quidem ob causam, nisi quod pro suo pastoralis munere instructiones ad Parochos dederant de ratione, qua in novae Legis conspectu suae et suarum ovium Deum timentium conscientiae consulere valeret. Ita igitur id sibi arrogavit Civilis Auctoritas, ut de instructionibus indicaret, quas Ecclesiae Pastores ad conscientiarum normam pro suo munere ediderant<sup>2)</sup>.

Postmodum alia his eademque gravior accessit iniuria, postquam Nobilis quidam Vir, quem inter praecipuos supradictae iniustissimae Legis

<sup>1)</sup> *Huc ref. prop. 43.*

<sup>2)</sup> *Huc ref. prop. 44.*

suasores extitisse omnes noverant, quique abnuebat a facto illo suo palam improbando, indignus Archiepiscopi Taurinensis auctoritate iudicatus est, cui extrema morientium Sacramenta administrari possent. Hac scilicet occasione et Archiepiscopus idem militari manu a sua Ecclesia avulsus atque in severioris custodiae Castrum detrusus est, et Parochus e Religiosa Familia Servorum B. M. V., qui ei pro officio paruerat, una cum Religiosis Sodalibus suis e Taurinensi Coenobio per vim expulsi, atque in alia asportati sunt: quasi vero ad Laicam Potestatem pertinere possit, ut de divinatorum Sacramentorum administratione et dispositionibus ad ea suscipienda necessariis decernat.

Nec satis. Ipsa haec de Sacramentorum ministerio causa, et alia insuper de novis pro conscientiarum regula instructionibus antea iam a memorato Archiepiscopo, ex mandato etiam Nostro Regio, delatae sunt ad Taurinense Appellationis Tribunal; a quo statim die 25. mensis Septembris decretum est, ut Archiepiscopus mandaretur extra fines Regiae ditionis, atque ut omnia Archiepiscopatus bona sequestro retinerentur. Eodem fere tempore, die videlicet 21. eiusdem mensis, Tribunal Appellationum Regni Sardiniae similia decrevit contra Venerabilem Fratrem Archiepiscopum Calaritanum, cui crimini datum est, quod generalibus verbis (nullius scilicet expresso nomine) declaraverat Censuras Ecclesiasticas ab iis facto ipso contractas, qui Episcopatum Aedium immunitatem violando partem quamdam Episcopalis Tabularii intrare per vim ausi fuerant. Horum igitur Decretorum vi iidem Antistites a possessione ac procuracione deieci sunt temporalium bonorum redditumque ad Sacerdotia sua pertinentium, et alter quidem in Gallias, alter vero in Nostram hanc Almam Urbem venire coactus.

Verum alia quoque sunt, ac non levia quidem, quae Subalpinum Gubernium contra Ecclesiae iura, vel in Religionis detrimentum, statuit ac gessit. Inter quae non possumus non lamentari vehementer de funestissima Lege, quam inde a die 4. Octobris anni 1848 super publica institutione, et publicis privatisque seu maiorum seu minorum disciplinarum scholis editam fuisse cognovimus. Totum illarum regimen, Episcopaliis Seminariis aliqua ratione exceptis, attributum ea in Lege habetur Regio Ministro, atque auctoritatibus eidem subditis; et ita quidem attributum, ut in articulo 58. legis eiusdem statuatur ac declaretur, nullum alii cuicumque auctoritati fore ius immiscendi se in disciplina scholarum, in regimine studiorum, in graduum collatione, in defectu aut approbatione magistrorum<sup>1)</sup>. Hinc in Catholica illa ditione scholae cuiusque generis, atque adeo cathedrae etiam sacrarum disciplinarum, quarum ea in Lege mentio fit, nec non puerorum institutio ad elementa Christianae Fidei, quam eadem Lex inter minorum iudicagistrorum officia annumerat, ab Episcoporum auctoritate subtrahuntur. Ac ne quis ea de re dubitare valeat, in memorato articulo ipsi etiam directores spiritus inter eos recensentur, qui a Regio Ministerio sive ab auctoritatibus ei subditis, absque ullo alterius cuiuscumque auctoritatis interventu, deligi atque approbari possunt. Igitur sacri Pastores nedum privati iniustissime sunt praecipua illa auctoritate, quam a multis retro saeculis in plurima saltem studiorum instituta ex Pontificiis, Regiisque Constitutionibus, atque ex primae aevi fundationis lege potiebantur, sed nec liberum ipsis est in ea advigilare, quae in scholarum regimine doctrinam Fidei. christianos mores, aut divini cultus causam attingunt<sup>2)</sup>.

Equidem sperare iuvat fore, ut saltem in executione illius Legis aliqua Episcopalis Auctoritatis ratio habeatur. Ipsam tamen perniciosos fructus iam peperisse dignoscitur ex pestiferis opinionibus, et placitis irreformabili Ecclesiae doctrinae contrariis, quae non in liberioris tantum editionis libellis pagellisque sparguntur quotidie in vulgus, sed ab aliquo etiam in publicis scholis Doctore instillantur in mentes adolescentium, et publice propugnantur. Verba desunt, Venerabiles Fratres, quibus dolorem explicemus longe acerbissimum, quem ex notitia huius rei, haud ita pridem ad Nos perlata, concepimus. Nulla quidem interposita mora providimus, ut eadem de re accuratius cognosceremus; et nihil porro a Nobis desiderari

<sup>1)</sup> Huc ref. prop. 45.

<sup>2)</sup> Huc ref. prop. 47.

patiemur, quod ad officium pertineat custodiendae Fidei, et confirmandi in illa fratres, infirmitati Nostrae divinitus attributum.

Novissime, ut scitis, missus a Subalpino Gubernio ad Nos fuerat unus ex Primoribus spectatus Vir, ut tractationes instauraret Ecclesiasticis rebus cum Sancta hac Sede componendis. Illum tamen haudquaquam admittere potuimus ad litteras, Legationis suae testes, consueto sollemni more Nobis reddendas. Ipse enim sive cum privatim ad Nos adit, sive in sermonibus cum Cardinali Nostro Pro-Secretario Status iterum iterumque habitis, de supradicta de Immunitatibus Lege ita loquutus est, ut Laicam Potestatem in ea contra sanctiones Canonum, et contra initarum cum Sede Apostolica Conventionum fidem promulganda suo prorsus iure usam fuisse contenderet <sup>1)</sup>. Hinc eorum, quae deinde contigerant, culpam transferebat in Clerum Sacrosque Antistites, maxime autem in Venerabilem Fratrem Archiepiscopum Taurinensem, ob suam in pastoralibus officiis constantiam in severiori tunc custodia retentum. De hoc scilicet praestantissimo Praesule gravius querebatur, quasi de homine quietis ac tranquillitatis populi parum studioso; atque idcirco id se a Regio Gubernio in praecipuis mandatis habuisse declarabat, ut Nos induceret ad eundem Antistitem in aliud extra Regiam ditionem munus transferendum. Post haec opus non est ut alia explicemus, quae deinceps inter illum et Cardinalem praedictum mutuo sermone incassum tentata sunt ad aliquam rerum componendarum viam reperiendam. Interim vero tantum abfuit, ut Gubernium a sua agendi ratione cessaret; quin potius illo ipso tempore prodierit, atque ad effectum perductae fuerint supradictae Tribunalium saecularium in ecclesiasticis causis novissimae sententiae tum contra memoratum Archiepiscopum, tum contra Archiepiscopum Calaritanum.

Ceterum de supradictis Ecclesiarum Clericorumque immunitatibus notum omnibus esse volumus, Nos, qui tractationes alterum ante annum a Subalpino Gubernio propositas minime recusavimus, hodie pariter non abhorre a Canonum sanctionibus circa immunitates ipsas pro loco ac tempore moderandis, prout scilicet opportunum in Domino visum fuerit, ac dummodo Ecclesia aliis in rebus liberi suorum iurium exercitio potiat. Non enim defecit in Nobis studium paternae benevolentiae, quo Romanos Pontifices Decessores Nostros inelytam Sabaudiae Domum prosequutos fuisse compertum est: dolemus insuper calamitates et aerumnas, quibus in eius ditione Fratres Filique Nostri in his rerum adiunctis haud leviter anguntur; ideoque et prompti sumus ad opportuna in eorum levamen adhibenda remedia; ex constanti nimirum instituto Sanctae huius Romanae Ecclesiae, quae veluti amantissima mater filiis succurrere in angustia ac tribulatione positis, et Apostolica Auctoritate sua ad sanandas contritiones Israel uti iugiter consuevit. Hac tamen auctoritate, quae Nobis in aedificationem, non in destructionem data est, haudquaquam uti possumus, ubi non de alio agatur, nisi ut quae in Ecclesiae iniuriam, quae in contemptum sacrorum Canonum, quae contra solemnes Conventiones, immo et ad ipsam quarumcumque Conventionum rationem labefactandam, quae tandem contra Sacerdotes et praecipuos ipsos Ecclesiae Praesules pastoralis suo munere circa conscientiarum moderationem, Sacramentorumque administrationem fungentes deliberata, decreta, aut facta illic dolumus, patientia, conniventia et concessionibus Nostris approbare quodammodo videamur <sup>2)</sup>.

Absit, Venerabiles Fratres, ut Auctoritate Nostra in Ecclesiae et Catholicae rei detrimentum abuti umquam velimus. Immo divino praesidio nixi omnem industriam atque operam in id constanti animo collocabimus, ut Religionis utilitati prospiciamus, et sanctissima Ecclesiae iura sarta tecta habeamus. Iuxta haec igitur attollentes hodie in sollemni hoc Conventu Nostram Apostolicam vocem, reclamamus maiorem in modum contra ea, quae superius enaravimus, et contra alia omnia, quae sive in Continente sive in Transmarinis regionibus Summo Taurinensi Principi subditis contra Ecclesiae ius, aut in Religionis damnum gesta quomodolibet aut tentata sunt; et ab omnibus, ad quos pertinet, gravissime exposcimus, ut desistant a vexandis Ecclesiae Pastoribus sacrorumque Ministris, et illata illic Sacrae Rei damna reparare festinent.

<sup>1)</sup> *Huc ref. prop. 30.*

<sup>2)</sup> *Huc ref. prop. 32, 43.*

Interea ne intermittamus, Venerabiles Fratres, Deo Misericordiarum Patri humiles orationes et obsecrationes offerre, et invocato etiam piissimo interventu Immaculatae Deiparae Virginis, et SS. Apostolorum Petri et Pauli, ab Eo suppliciter poscere, ut dilectam illam Dominicæ Vineae partem dextera sua tegat et brachio sancto suo defendat.

## Damnatio et prohibitio

Operis in sex tomis hispanico idiomate editi<sup>1)</sup> sub titulo: *Defensa de la autoridad de los Gobiernos y de los Obispos contra las pretensiones de la Curia Romana, por Francisco de Paula G. Vigil. Lima 1848.*

### Ad perpetuam rei memoriam.

Multiplices inter gravissimasque, quibus undique premimur, officii Nostri curas, et maximas huius temporis calamitates, quae in gliscenti rerum omnium novitate animum Nostrum sollicitant anguntque vehementer, illud accedit magnopere dolendum, quod Libri perniciosissimi e latebris Iansenistarum aliorumque huius generis hominum in diem erumpant, quibus huius saeculi filii in persuasibilibus humanae sapientiae verbis loquuntur perversa, ut abducant discipulos post se. Apostolici itaque Nostri Ministerii ratio postulat, ut Libros istiusmodi solemniorem in modum ad Catholicae Religionis puritatem ac venerandam Ecclesiae disciplinam tuendam conservandamque proscribamus et damnemus, ac Dominicum gregem a Pastorum Principe Iesu Christo humilitati Nostrae commissum ab exitiosa illorum lectione et retentione tamquam a venenatis pascuis omni sollicitudine praeservare et avertere non praetermittamus.

Iam vero cum in lucem prodierit acceperimus Librum seu Opus, sex tomis constans, hispanico idiomate exaratum, cui titulus: „*Defensa de la autoridad de los Gobiernos y de los Obispos contra las pretensiones de la Curia Romana, por Francisco de Paula G. Vigil. Lima 1848,*“ atque ex ipsa Operis inscriptione satis intellexerimus, auctorem esse hominem in hanc Apostolicam Sedem malevolo animo affectum, haud omisimus illud pervolvere, ac facili negotio, quamvis non sine maximo cordis Nostri moerore, eundem Librum plures Pistoriensis Synodi errores dogmatica Bulla *Auctorem Fidei* fel. rec. Pii VI. Decessoris Nostri iam confixos renovantem, aliisque pravis doctrinis et propositionibus iterum iterumque damnatis undique redundantem, novimus atque perspeximus.

Auctor enim, licet Catholicus, ac divino Ministerio, ceu fertur, mancipatus, ut indifferentissimum ac rationalissimum, quo se infectum prodit, securius, ac impune sequatur, denegat, Ecclesiae inesse potestatem dogmaticae definiendi, Religionem Ecclesiae Catholicae esse unice veram Religionem<sup>2)</sup>, docetque cuique liberum esse eam amplecti ac profiteri Religionem, quam rationis lumine quis ductus veram putaverit<sup>3)</sup>: legem caelibatus impudenter aggreditur, et Novatorum more statum conjugalem anteponit statui virginitatis<sup>4)</sup>: potestatem, qua Ecclesia donata est a suo Divino Institute, stabilendi impedimenta Matrimonium dirimentia, a Principibus terrae dimanare tuetur, eamque Christi Ecclesiam sibi arrogasse impie affirmat<sup>5)</sup>: Ecclesiae et personarum immunitatem, Dei ordinatione et canonicis sanctionibus constitutam, a iure civili ortum habuisse asserit<sup>6)</sup>; nec illum pudet defendere, maiori aestimatione et obsequio prosequendam esse domum Oratoris alicuius Nationis, quam templum Dei viventis: Gubernio laico attribuit ius depnendi ab exercitio pastoralis ministerii Episcopos, quos Spiritus Sanctus posuit regere Ecclesiam Dei<sup>7)</sup>: suadere nititur iis, qui clavum tenent publicarum rerum, ne obediant Romano Pontifici in iis, quae Episcopatum et

<sup>1)</sup> *Huc referuntur Syllabi Propositiones* 15, 21, 23, 30, 51, 54, 68, 74.

<sup>2)</sup> *Huc ref. prop.* 21.

<sup>3)</sup> *Huc ref. prop.* 15.

<sup>4)</sup> *Huc ref. nota ad §. VIII. Syll.* <sup>5)</sup> „ „ „ 68.

<sup>6)</sup> *Huc ref. prop.* 30. <sup>7)</sup> „ „ „ 51.

Episcoporum respiciunt institutionem: Reges, aliosque Principes, qui per Baptismum facti sunt membra Ecclesiae, subtrahit ab eiusdem Ecclesiae iurisdictione non secus ac Reges paganos, quasi Principes Christiani in rebus spiritualibus et ecclesiasticis non essent filii ac subditi Ecclesiae): imo caelestia terrenis, sacra profanis, summa imis monstruose permiscens, docere non veretur, te renam potestatem in quaestionibus iurisdictionis dirimendis superiorem esse Ecclesia, quae columna est et firmamentum veritatis: tandem ut alios quamplures omittamus errores, eo audaciae et impietatis progreditur, ut Romanos Pontifices et Concilia Occumenica a limitibus suae potestatis recessisse, iura Principum usurpasse, atque etiam in rebus fidei, et morum definiendis erasse infando ausu contendat ).

Quamquam vero tot ac tanta in eodem Opere contineri errorum capita cuique facile innotescat; attamen Praedecessorum Nostrorum vestigiis inhaerentes mandavimus, ut in Nostra Universalis Inquisitionis Congregatione praefatum Opus in examen adduceretur, ac postea eiusdem Congregationis iudicium Nobis referretur. Porro Ven. Fratres Nostri S. R. E. Cardinales Inquisitores Generales, praevia eiusdem Operis censura, et perpensis Consultorum suffragiis, memoratum Opus, tanquam continens doctrinas et propositiones respective *secundu osus, temerarias, falsas, schismaticas, Romanis Pontificibus et Conciliis Oecumenicis iniurias, Ecclesiae potestatis, libertatis, et iurisdictionis eversivas, erroneas, impias, et haereticas*, damnandum atque prohibendum censuerunt.

Hinc Nos, audita praedictorum relatione, et cunctis plene ac mature consideratis, de consilio praefatorum Cardinalium, atque etiam motu proprio, ex certa scientia, deque Apostolicae potestatis plenitudine memoratum Opus, in quo doctrinae ac propositiones, ut supra notatae, continentur, ubicumque et quocumque alio idiomate, seu quavis editione, aut versione huc usque impressum, vel in posterum, quod absit, imprimum, tenore praesentium damnamus et reprobamus, atque legi ac retineri prohibemus, eiusdemque Operis impressionem, descriptionem, lectionem, retentionem, et usum omnibus et singulis Christianis fidelibus, etiam specifica et individua mentione et expressione dignis, sub poena excommunicationis per contrariantes ipso facto, absque alia declaratione, incurrenda, a qua nemo a quoquam, praeterquam a Nobis, seu Romano Pontifice pro tempore existente, nisi in mortis articulo constitutus, absolutionis beneficium obtinere queat, omnino interdicimus.

Volentes, et Auctoritate Apostolica mandantes, ut quicumque Librum, seu Opus praedictum penes se habuerint, illud statim atque praesentes Litterae innotuerint, locorum Ordinariis, vel haereticae pravitatis Inquisitoribus tradere atque consignare teneantur. In contrarium facientibus non obstantibus quibuscumque.

Ut autem eadem praesentes Litterae ad omnium notitiam facilius perducantur, nec quisquam illarum ignorantiam allegare queat, volumus, et Auctoritate praefata decernimus, illas ad valvas Basilicae Principis Apostolorum, et Cancellariae Apostolicae, nec non Curiae Generalis in Monte Citatorio, et in Acie Campi Florae in Urbe per aliquem ex Cursoribus Nostris, ut moris est, publicari, illarumque exempla ibidem affixa relinqui: sic vero publicatas, omnes et singulos, quos concernunt, perinde afficere et arctare, ac si unicuique illorum personaliter notificatae et intimatae fuissent; ipsarum autem praesentium Litterarum transumptis, seu exemplis, etiam impressis, manu alicuius Notarii publici subscriptis, et sigillo personae in Ecclesiastica dignitate constitutae munitis, eandem prorsus fidem tam in iudicio, quam extra illud ubique locorum haberi, quae haberetur eisdem praesentibus, si exhibitae forent, vel ostensae.

Datum Romae apud S. Petrum, sub Annulo Piscatoris, die X. Iunii, anno MDCCCLI. Pontificatus Nostri Anno Quinto.

A. Card. Lambruschini.

<sup>1)</sup> *Huc ref. prop. 54, coll. 42.*

<sup>2)</sup> *Huc ref. prop. 23.*

## Damnatio et prohibitio

Operis<sup>1)</sup>, cui titulus „*Juris Ecclesiastici Institutiones Joannis Nepomuceni Nuytz, in Regio Taurinensi Athenaeo Professoris*,“ Itemque „*In Jus Ecclesiasticum universum Tractationes, Auctoris eiusdem*.“

### Ad perpetuam rei memoriam.

Ad Apostolicae Sedis fastigium sola miserentis Dei clementia, nullo suffragio meritorum evecti, atque a caelesti Patrefamilias vineae suae custodiendae praepositi, omnino officii Nostri, ac muneris esse ducimus, si qua noxia germina excrevisse noscamus, ea succidere, atque evellere stirpitus, ne in Dominici agri perniciem altius radices agant, ac diffundantur. Et sane quum iam inde ab Ecclesiae surgentis exordio, tamquam in igne aurum, probari oportuerit electorum fidem, idcirco Apostolus vas electionis monitos iam tum fideles voluit surrexisse quosdam, qui „*convertunt et conturbant Evangelium Christi*“<sup>2)</sup>; quibus falsas doctrinas disseminantibus, Fideique deposito detrahentibus, „*etiamsi Angelus evangelizet, praeterquam quod evangelizatum est*,“ anathema diceretur. Et quamquam infensissimi veritatis hostes profligati semper victique ceciderint, numquam tamen destiterunt assurgere, acriusque exerere vires, quibus universam, si fieri posset, Ecclesiam labefactare niterentur. Hinc profanas manus iniicientes in Sancta Apostolicae huius Sedis praerogativas, et iura invadere, Ecclesiae constitutionem pervertere, atque integrum Fidei depositum pessumdare ausu impio contenderunt. Porro etsi Nobis magno solatio sit Christi Servatoris promissio, qua portas inferi numquam contra Ecclesiam praevaliturus edicit, non possumus tamen non intimo cruciari animi angore, gravissimam animorum perniciem considerantes, quam ex effraeni pravos libros edendi licentia, perversaque impudentia ac scelere quilibet contra divina ac sacra audendi, latius in dies manare comperimus.

Jam vero in hac librorum undique grassantium peste, locum sibi vindicat Opus sic inscriptum: „*Juris Ecclesiastici Institutiones Joannis Nepomuceni Nuytz, in Regio Taurinensi Athenaeo Professoris*,“ itemque: „*In Jus Ecclesiasticum universum Tractationes, Auctoris eiusdem*,“ cuius nefarii Operis doctrina ex una illius Athenaei Cathedra sic diffusa est, ut selectae ex eo acatholicae theses ad disputandum propositae sint prolytis ephebis, qui lauream, seu doctoris gradum consequi aspirarent. In his vero libris ac thesibus, in speciem adserendi iura Sacerdotii atque Imperii, illi traduntur errores, ut pro salutaris doctrinae praeceptis venenata omnino pocula iuventuti porrigantur. Auctor siquidem pravis suis propositionibus, earumque commentis, illa omnia, quae a Romanis Pontificibus Praedecessoribus Nostris, praesertim Joanne XXII., Benedicto XIV., Pio VI., ac Gregorio XVI., atque a tot Conciliorum decretis, praesertim a Lateranensi IV., Florentino ac Tridentino damnata iamdiu ac reiecta sunt, quodam furo novitatis adpersa, atque illita auditoribus proponere suis, ac typis edere non erubuit. Quandoquidem palam et aperte in editis dicti Auctoris libris assertitur: „*Ecclesiam vis inferendae potestatem non habere. neque potestatem ullam temporalem directam vel indirectam*“<sup>3)</sup>. Divisioni Ecclesiae in Orientalem atque Occidentalem nimia Romanorum Pontificum arbitria contulisse<sup>4)</sup>; praeter potestatem Episcopatu inhaerentem, aliam esse attributam temporalem, a civili imperio, vel expresse vel tacite concessam, revocandam propterea cum liberit a civili imperio<sup>5)</sup>: civili potestati, vel ab infideli imperante exercitae, competere potestatem indirectam negativam in sacra<sup>6)</sup>: civilem potestatem, ab Ecclesiastica si damno afficiatur, sibi consulere per potestatem indirectam negativam in sacra; illi competere nedum ius, quod vocant, *exequatur*, sed vero etiam appellationem ab abusu; in conflictu legum utrius-

<sup>1)</sup> Huc referuntur Syllabi Propositiones 24, 25, 34, 35, 36, 38, 41, 42, 65, 66, 67, 69, 70, 71, 72, 73, 74, 75.

<sup>2)</sup> Ad Gal. I.

<sup>3)</sup> Huc ref. prop. 24.

<sup>4)</sup> Huc ref. prop. 38.

<sup>5)</sup> „ „ „ 25.

<sup>6)</sup> „ „ „ 41.

que potestatis, ius civile praevalere<sup>1)</sup>; nihil vetare alicuius Concilii generalis sententia, aut universorum populorum facto, Summum Pontificatum ab Romano Episcopo, atque Urbe ad alium Episcopum, aliamque Civitatem transferri<sup>2)</sup>; nationalis Concilii definitionem nullam admittere disputationem, et civilem administrationem, rem ad hosce terminos exigere posse<sup>3)</sup>: doctrinam comparantium libero Principi Romanum Pontificem, et agentem in universa Ecclesia, doctrinam esse, quae medio aevo praevaluit, effectusque adhuc manere<sup>4)</sup>: de temporalis regni cum spirituali compatibilitate disputare inter se Christianae et Catholicae Ecclesiae filios<sup>5)</sup>. Plura quoque de Matrimonio falsa asseruntur: «Nulla ratione ferri posse, Christum exivisse Matrimonium ad dignitatem Sacramenti<sup>6)</sup>; Matrimonii Sacramentum non esse nisi quid contractui accessorium, ab eoque separabile, ipsumque Sacramentum in una tantum nuptiali benedictione situm esse<sup>7)</sup>: iure naturae Matrimonii vinculum non esse indissolubile<sup>8)</sup>: Ecclesiam non habere potestatem impedimenta Matrimonium dirimentia inducendi, sed eam civili potestati competere, a qua impedimenta existentia tollenda sint<sup>9)</sup>: causas Matrimoniales, et Sponsalia suapte natura ad forum civile pertinere<sup>10)</sup>; Ecclesiam sequioribus saeculis dirimentia impedimenta inducere coepisse, non iure proprio, sed illo iure usam, quod a civili potestate mutuata erat<sup>11)</sup>; Tridentinos Canones<sup>12)</sup>, qui anathematis censuram illis inferunt, qui facultatem impedimenta dirimentia inducendi Ecclesiae negare audeant, vel non esse dogmaticos, vel de hac mutuata potestate intelligendos<sup>13)</sup>.» Quin addit: «Tridentinam formam sub infirmitatis poena non obligare ubi lex civilis aliam formam praestituat, et velit hac nova forma interveniente Matrimonium valere<sup>14)</sup>: Bonifacium VIII. votum castitatis in Ordinatione emissum nuptias nullas reddere primum asseruisse<sup>15)</sup>.» Plura denique de potestate Episcopali, de poenis haereticorum et schismaticorum, de Romani Pontificis infallibilitate, de Conciliis, temere atque audacter in hisce libris proposita occurrunt, quae persequi singillatim, ac referre in tanta errorum colluvie omnino taedeat.

Quapropter compertum est, Auctorem per huiusmodi doctrinam, ac sententias eo intendere, ut Ecclesiae constitutionem, ac regimen pervertat, et Catholicam fidem plane destruat; siquidem ne errantes in viam possint redire iustitiae, externo iudicio et potestate coercitiva Ecclesiam privat, de Matrimonii natura ac vinculo falsa sentit ac docet, et ius statuendi vel relaxandi impedimenta dirimentia Ecclesiae denegat, et civili addicit potestati; denique sic Ecclesiam eidem civili imperio subditam esse per summum nefas asserit, ut ad potestatem civilem directe, vel indirecte conferat quidquid de Ecclesiae regimine, de personis, rebusque sacris, de iudiciali Ecclesiae foro Divina est institutione, vel Ecclesiasticis legibus sancitum, atque adeo impium renovat Protestantium systema, quo fidelium societas in servitutum redigitur civilis imperii. Quamquam vero nemo est qui non intelligat, perniciosum huiusmodi, pravumque systema errores instaurare iamdiu Ecclesiae iudicio profligatos, tamen ne simplices, atque imperiti decipiantur, admonere omnes de pravae doctrinae insidiis ad Nostrum pertinet Apostolatam; expedit siquidem «ut ibi damna fidei sarciantur, ubi non potest fides sentire defectum<sup>16)</sup>.» Propterea de unitate atque integritate Catholicae fidei ex Apostolici ministerii officio solliciti, ut fideles omnes perversam auctoris doctrinam devitent, fidemque a Patribus per hanc Apostolicam Sedem, columnam et firmamentum veritatis, acceptam constanter teneant, memoratos libros, in quibus recensitae nefariae opiniones continentur ac defenduntur, accurato primum examini subiecinus, ac deinde Apostolicae censurae gladio percellere ac damnare decrevimus.

<sup>1)</sup> *Huc ref. prop.* 42.

<sup>2)</sup> " " " 36.

<sup>3)</sup> " " " 75.

<sup>4)</sup> " " " 66.

<sup>5)</sup> " " " 68.

<sup>11)</sup> " " " 69.

<sup>13)</sup> " " " 70.

<sup>15)</sup> " " " 72.

<sup>2)</sup> *Huc ref. prop.* 35.

<sup>4)</sup> " " " 34.

<sup>6)</sup> " " " 65.

<sup>8)</sup> " " " 67.

<sup>10)</sup> " " " 74.

<sup>12)</sup> Sess. XXIV. de Matrim. c. 4.

<sup>14)</sup> *Huc ref. prop.* 71.

<sup>16)</sup> S. Bern. Epist. 190.



Itaque acceptis consultationibus in Theologica et sacrorum Canonum Facultatibus Magistrorum, acceptisque suffragiis VV. FF. NN. S. R. E. Cardinalium Congregationis Supremae et Universalis Inquisitionis, motu proprio, ex certa scientia ac matura deliberatione Nostra, deque Apostolicae potestatis plenitudine praedictos libros, tamquam continentes propositiones et doctrinas respective falsas, temerarias, scandalosas, erroneas, in S. Sedem iniuriosas, eiusdem iuribus derogantes, Ecclesiae regimen, et divinam eius constitutionem subvertentes, schismaticas, haereticas, Protestantisimo eiusque propagationi faventes, et in haeresim et in systema iamdiu ut haereticum damnatum in Luthero, Baio, Marsilio, Patavino, Janduno, Marco Antonio De-Dominis, Richerio, Laborde et Pistoriensibus, aliisque ab Ecclesia pariter damnatis inducentes, necnon et Canonum Concilii Tridentini eversivas, reprobamus, damnamus ac pro reprobatis et damnatis ad omnibus haberi volumus et mandamus.

Praecipimus idcirco, ne quisquam fidelium cuiuscumque conditionis et gradus, etiamsi specifica et individua mentione dignus esset, audeat praefatos libros ac theses apud se retinere, aut legere sub poenis suspensionis a divinis quoad Clericos, et quoad laicos excommunicationis maioris ipso facto incurrendis, quarum absolutionem et relaxationem Nobis et Successoribus Nostris Romanis Pontificibus reservamus, excepto tantum quoad excommunicationem mortis articulo.

Mandamus quoque Typographis ac Bibliopolis, cunctisque et singulis cuiuscumque gradus et dignitatis, ut quoties praedicti libri ac theses ad eorum manus pervenerint, deferre teneantur Ordinariis sub iisdem respective poenis, nempe quoad Clericos suspensionis a divinis, quoad laicos excommunicationis maioris superius comminatis.

Neque tantum memoratos libros ac theses, sed alias, aliosque quoscumque sive scriptis, sive typis exaratos libros, vel forte exarandos et imprimendos, in quibus eadem nefaria doctrina renovetur ex integro, aut in parte, sub iisdem poenis superius expressis damnamus, reprobamus, atque legi, imprimi, retineri omnino prohibemus.

Hortamur tandem in Domino, et obsecramus, Venerabiles Fratres, quos Nobiscum pastoralis zelus et Sacerdotalis constantia coniungit, ut pro sibi commisso docendi ministerio omni sollicitudine vigilantes in custodia gregis Christi, oves suas a tam venenatis pascuis, hoc est ab horum librorum lectione avertere satagant; et quoniam «veritas cum minime defenditur, opprimitur<sup>1)</sup>», murum aeneum, et columnam ferream sese constituent pro domo Dei contra vaniloquos et seductores, qui divina atque humana iura sua deque miscentes neque Caesari quae sunt Caesaris, neque quae Dei sunt, Deo ipsi reddentes, Sacerdotium et imperium committunt inter se, atque adeo impetere utrumque, atque evertere conituntur.

Ut autem praesentes Litterae omnibus innotescant nec quisquam illarum ignorantiam praetexere et allegare valeat, volumus ac iubemus, ipsas ad valvas Basilicae Apostolorum Principis, et Cancellariae Apostolicae, necnon Curiae Generalis in Monte Citatorio, et in acie Campi Florae de Urbe per aliquem ex Cursoribus Nostris, ut moris est, publicari, illarumque exempla ibi affixa relinqui; sic vero affixas ac publicatas perinde omnes afficere, ad quos spectant, ac si unicuique illorum personaliter notificateae atque intimatae fuissent. Praesentium quoque Litterarum transumptis, etiam impressis, manu alicuius publici Notarii subscriptis et Sigillo personae in Ecclesiastica dignitate constitutae munitis, eandem fidem in iudicio et extra haberi volumus, quae eisdem his haberetur, si forent exhibitae vel ostensae.

Datum Romae, apud sanctum Petrum, sub Annulo Piscatoris, die XXII. Augusti, anni MDCCCLI. Pontificatus Nostri Anno Sexto.

A. Card. Lambruschini.

<sup>1)</sup> S. Felix III. dist. 83.

## Allocutio

habita in consistorio secreto die V. septembris anni MDCCCLI<sup>1)</sup>.

### Venerabiles Fratres.

Quibus luctuosissimis perturbationibus et calamitatibus ob tristissimas rerum conversiones multos per annos incluta Hispana Natio de catholica Ecclesia, et hac S. Sede tot illustribus, gloriosissimisque factis optime merita, miserandum in modum fuerit exagitata, quaeque gravissima, et nunquam satis deploranda mala amplissimi illius Regni Ecclesiis, Episcopatibus, Capitulis, Monasteriis, cunctoque Clero, Populoque fidei incubuerint, et quae saeva deinde clades Catholicam Religionem, Sacrorum Antistites, ecclesiasticosque viros affligerit, divexarit, quaeque adversus sacratiora Ecclesiae iura, eiusque bona, libertates, et adversus huius Apostolicae Sedis dignitatem, auctoritatemque ibidem fuerint perpetrata, universo, qua late patet, terrarum orbi, ac Vobis multo magis compertum, exploratumque est, Venerabiles Fratres. Atque optime scitis quanta cura et studio rec. mem. Gregorius XVI. Praedecessor Noster expostulationes, querimonias, preces adhibuerit, nihilque intentatum reliquerit, ut afflictis illis, ac prostratis religionis rebus succurreret, mederetur et consuleret. Neque ignoratis, qua sollicitudine Nos, vix dum, licet immerentes, inscrutabili Dei iudicio in eiusdem Deccessoris Nostri locum suffecti, et in hac sublimi Principis Apostolorum Cathedra collocati fuimus, praecipuas paterni animi Nostri curas, cogitationesque ad clarissimam illam Nationem convertimus, quo ecclesiasticas ibi res, quantum fieri posset, ad Sacrorum Canonum normam componere, et inflicta Ecclesiae vulnera sanare possemus. Quamobrem postquam certiores facti fuimus, praecipuas quasdam, ac potiores conditiones, et cautiones a Nobis antea praescriptas fuisse admissas, ac in tuto positas, carissimae in Christo Filiae Nostrae Mariae Elisabeth postulationibus alacri, ac libentissimo animo obsecundantes ad Eam, ut probe nostis, misimus Venerabilem Fratrem Joannem Archiepiscopum Thessalonicensem, opportunis facultatibus et instructionibus munitum, qui apud ipsam Catholicam Maiestatem Apostolici Delegati, ac deinde suo tempore Nostri et huius S. Sedis Nuntii munus obiret, omnemque suam operam ecclesiasticis ibi negotiis tractandis, ordinandis, sedulo ac sollicito impenderet. Ac meministis, Venerabiles Fratres, nihil Nobis potius, nihil antiquius fuisse, quam illius Regni Ecclesias, legitimo pastore a longe iam tempore pene omnes misere viduatas, idoneis Antistitibus in primis committere, Nostrasque in id curas, Deo bene iuvante, et ipsis carissimae in Christo Filiae Nostrae opera, non levi certe animi Nostri consolatione optatum exitum habuisse.

Jam vero Vobis significamus, Nostras sollicitudines pro aliis sacris ecclesiasticisque illius Regni rebus componendis susceptas, ob propensam praesertim eiusdem carissimae in Christo Filiae Nostrae in Religionis bonum voluntatem haud eccidisse irritas. Siquidem post diuturnam operosamque tractationem Conventio inter Nos et Reginam Catholicam est inita, quam delecti ex utraque parte Plenipotentarii subscripserunt, Nomine quidem Nostro idem Venerabilis Frater Joannes. Archiepiscopus Thessalonicensis, Nomine autem Reginae dilectus Filius Nobilis Vir Eques Emmanuel Bertran de Lis a publicis Maiestatis Suae negotiis. Quam Conventionem ab eadem Regina et a Nobis ipsis, audito consilio VV. FF. NN. S. R. E. Cardinalium Congregationis negotiis ecclesiasticis extraordinariis propositae, iam ratam habitam, Vobis exhiberi mandavimus una cum Apostolicis Nostreis Litteris, quibus Conventionem ipsam confirmavimus, ut omnia clarius et plenius agnoscere possitis.

Illud quidem Nobis vel maxime cordi fuit, ut sanctissimae nostrae Religionis incoluntati, et spiritualibus Ecclesiae rebus studiosissime consuleremus. Itaque constitutum perspicietis. Catholicam Religionem cum omnibus suis iuribus, quibus ex divina sua institutione et Sacrorum Canonum sanctione potitur, ita unice in eo Regno, veluti antea, vigere ac dominari

<sup>1)</sup> Huc refertur Syllabi Propositio 45.

debere, ut omnis alius cultus plane sit amotus et interdictus. Hinc cautum quoque est, ut instituendi ac docendi ratio in cunctis tum Universitatibus, tum Collegiis, tum Seminariis, tum publicis privatisque scholis cum eiusdem catholicae religionis doctrina plane congruat, atque Episcopi alique Dioecesiani Antistites, qui ex proprii ministerii officio in catholicae doctrinae puritatem tuendam, propagandam, et in christianam iuventutis educationem procurandam totis viribus incumbere debent, nullo prorsus umquam praepediuntur impedimento, quominus publicis etiam scholis sedulo advigilare, et in illas pastoralis sui muneris partes libere exercere possint<sup>1)</sup>. Ac pari studio ecclesiasticae auctoritatis libertatem dignitatemque asserendam curavimus. Etenim non solum statutum est, Sacrorum praesertim Antistites ad Episcopalem eorum iurisdictionem exercendam plena libertate pollere, quo catholicam fidem et ecclesiasticam disciplinam tueri, et morum honestatem in christiano populo tutari, et optimam iuvenum, eorum potissimum qui in sortem Domini vocantur, institutionem procurare, et alia omnia proprii ministerii munera explere valeant; verum etiam decretum est, omnes Regni Magistratus eorum operam praestare debere, quo ab omnibus ecclesiasticae auctoritati et dignitati debitus exhibeatur honor, observantia et obedientia. Accedit etiam, ut praestantissima Regina, eiusque Gubernium iisdem Episcopis valido suo patrocinio et praesidio omnem opem ferre profiteantur, cum ab ipsis pro pastoralis munere illorum potissimum hominum improbitas est cohibenda, et coercenda audacia, qui fidelium mentes pervertere, moresque corrumpere nefarie commoliuntur, et a proprio grege detestabilis ac dira perversorum librorum pestis atque perniciēs est avertenda ac profliganda<sup>2)</sup>.

Et quoniam relatum ad Nos est, ex nova Dioecesium divisione maiora spiritualia bona in illius Regni fideles redundare, iccirco novam huiusmodi circumscriptionem Nostra auctoritate, et ipsius Reginae consensu peragendam statuimus, atque Apostolicas de hac re suo tempore proferemus Litteras, postquam ea omnia fuerint perspecta et statuta, quae ad rem ipsam perficiendam sunt necessaria. Cum autem Religiosae Familiae pie institutae, ac recte administratae maximo sint Ecclesiae et civili societati usui et ornamēto, quantum in Nobis fuit haud omisimus eniti, ut illic Regulares Ordines conserventur, restituantur, augeantur. Atque in eam profecto spem erigimur fore, ut propter avitam eiusdem carissimae in Christo Filiae Nostrae pietatem, et eximiam Hispaniae Nationis religionem ipsi Regulares Ordines ibi pristina dignitate ac splendore fruantur. Ne quid autem Religionis bono quavis ratione officere possit, non solum constitutum est, Leges, Ordinationes et Decreta quaecumque Conventioni adversantia de medio sublata omnino esse ac penitus abrogata, verum etiam sancitum, ut cetera omnia, quae ad ecclesiasticas res et personas pertinent, de quibus in Conventione nulla est habita mentio, iuxta canonicam et vigentem Ecclesiae disciplinam exigi et administrari plane debeant.

Nec vero ea praetermisimus, quae ad temporale Ecclesiae bonum possunt pertinere. Omni enim studio et contentione vindicandum ac tuendum curavimus ius, quo Ecclesia pollet, acquirere scilicet et possidere quaecumque bona stabilia et frugifera, veluti innumera prope Conciliorum acta et sanctorum Patrum sententiae et exempla, et Praedecessorum Nostrorum Constitutiones apertissime loquuntur, sapientissime docent ac demonstrant<sup>3)</sup>. Atque utinam ubique gentium, ubique terrarum possessiones Deo eiusque sanctae Ecclesiae dicatae semper inviolatae fuissent, et homines debita illas reverentia essent prosequuti! Equidem haud cogremur delere plurima, omnibusque notissima mala et damna in civilem ipsam societatem derivata ex iniusta prorsus et sacrilega ecclesiasticarum rerum ac bonorum spoliatione et direptione, quae ad funestissimos quosque ac perniciosissimos *Socialismi* et *Communismi* errores fovendos magna ex parte viam munivit<sup>4)</sup>. Jam porro in Conventione constabilitum, firmatumque conspectis Ecclesiae iam novas acquirere possessiones, ac simul sancitum, ut proprietates bonorum omnium, quae vel in praesentia possidet, vel in posterum acquireret, integra et inviolabilis omnino habeatur atque persistat. Hinc constitutum etiam fuit,

<sup>1)</sup> *Huc ref. prop.* 45.

<sup>3)</sup> " " " 26.

<sup>2)</sup> *Huc ref. prop.* 79.

<sup>4)</sup> *Huc ref. §. IV. Syll.*

ut, nulla interposita mora, Ecclesiae illa omnia statim restituantur bona, quae nondum divendita fuere. Verum cum ex gravibus ac fide dignis testimoniis acceperimus, nonnulla ex iisdem bonis nondum alienatis ita in deterius esse prolapsa, et administrationis incommodis obnoxia, ut evidens constet Ecclesiae utilitas, si illorum pretium in publici aeris alieni redditus nunquam quavis alia ratione transferendos convertatur, eiusmodi permutationi indulgendum esse censuimus, postquam vero bona ipsa fuerint Ecclesiae restituta.

Omnam quidem dedimus operam, ut Episcopi, Capitula, Seminaria, Parochi congruis ac stabilibus potiantur redditibus, qui Ecclesiae perpetuo addicti, ab ea libere erunt administrandi. Et si vero hi redditus cum antiqua Hispani Cleri dote conferri non possint, et ob temporum asperitatem minores, quam Nos optavissemus, existant; tamen prae noscentes, qua singulari religione et pietate idem Hispaniarum Clerus summopere praestet, plane non dubitamus, quin ipse in divina voluntate conquiescens, et omni virtutum genere magis in dies undique refugens, in vineam Domini naviter scienterque excolendam alacriori usque solertia et studio incumbat, cum praesertim per ecclesiasticam libertatem in Conventione sancitam iis omnibus expeditis sit impedimentis, quae antea libero sacri ministerii exercitio adversabantur, atque ita populorum obsequium, amorem et venerationem sibi magis magisque conciliet et devinciat. Ceterum cum plenum ac liberum acquirendi ac possidendi ius fuerit sancitum ac servatum, patet Hispanis Ecclesiis aditus ad ampliores obtinendos redditus, quibus et maiori divini cultus splendori, et decentiori Cleri sustentationi facilius et commodius consulatur. Atque id felicioribus temporibus ex regia carissimae in Christo Filiae Nostrae munificentia, eiusque Gubernii studio, et ex egregia ac perspecta Hispanae Nationis religione futurum Nobis pollicemur. Ex iis, quae raptim cursimque commemoravimus, intelligitis, Venerabiles Fratres, quo studio Nostras omnes curas in ecclesiasticis Hispaniae rebus instaurandis posuerimus, ac futurum confidimus, ut, divina adspirante gratia, in amplissimo illo Regno catholica Ecclesia, eiusque salutaris doctrina quotidie magis latissime dominetur, vigeat et efflorescat.

Nunc vero noscatis velimus, dilectissimum in Christo Filium Nostrum Leopoldum II. Magnum Etruriae Ducem et Lucensem Ducem pro egregia sua pietate vehementer optasse, ut vigentes in Etruria leges quodammodo ordinari et componi possent cum iis omnibus, quae ecclesiasticas leges respiciunt. Itaque enixis precibus a Nobis efflagitavit, ut nonnulla interea tempori conciliare vellemus, cum eidem religiosissimo Principi in animo fixum destinatumque sit, plenam cum hac Apostolica Sede in posterum inire Conventionem, qua in regionibus ei subiectis ecclesiasticarum rerum regimini et rationibus prospere consulatur. Quocirca firma ac certa spe freti fore, ut idem dilectissimus in Christo Filius Noster eiusmodi Conventionem iuxta Nostra desideria, maiori qua fieri potest celeritate, sit initurus, illius votis obsecundantes aliqua capita, a VV. FF. NN. S. R. E. Cardinalibus eiusdem Congregationis Negotiis ecclesiasticis extraordinariis propositae perpensa, interim constituta fuere, quae a Nobis et ab ipso Principe rata habita sunt. Quibus quidem capitibus, seu articulis inter cetera constitutum est, ut Episcopi omnem habeant libertatem in iis omnibus peragendis, quae ad sacrum pertinent ministerium, ac in scripta et opera quae de rebus ad religionem spectantibus tractant, censuram ferant, ut propriam eorum episcopalem auctoritatem libere adhibeant ad fideles a prava quavis lectione tum religioni, tum moribus perniciose arcendos<sup>1)</sup>, ac simul cautum, ut omnes cum hac B. Petri Cathedra catholicae veritatis et unitatis centro libere communicare valeant<sup>2)</sup>, et causae omnes spirituales et ecclesiasticae ad sacrae potestatis iudicium unice et omnino spectare debeant ex sacrorum Canonum praescripto. Non levi autem incunditate affecti fuimus, proptereaquod idem dilectissimus in Christo Filius Noster haud omisit Nobis polliceri et profiteri, se omnem suam opem et operam esse collaturum ad sanctissimam nostram religionem tutandam, ad divinum cultum tuendum, et ad publicam morum honestatem fovendam, ac valido suo auxilio praesto futurum, quo Sacrorum Antistites episcopalem eorum auctoritatem libere exerceant. Quocirca confidimus, ut,

<sup>1)</sup> *Huc ref. prop. 79.*

<sup>2)</sup> *Huc ref. prop. 49.*

Deo bene iuvante, earum, quas indulsimus, rerum usus in Ecclesiae utilitatem cedat, iis insuper difficultatibus penitus amotis, quae lucusque eiusdem Ecclesiae libertati obstiterunt.

Denique certiores Vos facimus, Nostras iam convertisse curas ad catholicae religionis res in longinqua regione componendas, ac Nos magna spe sustentari fore, ut Conventio possit iniri, quae iuxta Nostra et vestra desideria Ecclesiae iuribus, rationibus ac prosperitati respondeat. Ac vel maxime optaremus, ut huiusmodi exemplum omnes earum dissitarum partium regiones, quarum populos praecipuo caritatis affectu in Domino prosequimur, imitari properarent, quo penitus averterentur plurima et maxima damna, quibus in nonnullis praesertim earumdem partium regionibus immaculata Christi sponsa cum summo animi Nostri dolore affligitur ac divexatur. Atque hic haud possumus, quin illis Venerabilibus Fratribus vehementer gratulemur, eisque meritis debitasque tribuamus laudes, qui in tristissima licet conditione ibi constituti, tamen haud omittunt episcopali eorum zelo, et firmitate Ecclesiae causam strenue tueri, eiusque iura impavide defendere, ac dilectarum ovium saluti sollicitè prospicere.

Haec erant, Venerabiles Fratres, quae Vobis hodierno die significanda existimavimus. Reliquum est, ut nunquam desinamus dies noctesque in humilitate cordis Nostri, et in sinceritate fidei, firmitate spei, et caritatis ardore assiduas clementissimis misericordiarum Patri adhibere preces, ut omnipotenti sua dextera, quae mari et ventis imperat, Ecclesiam suam sanctam a tantis, quibus iactatur, procellis eripiat, eamque a solis ortu usque ad occasum novis ac splendidioribus triumphis exornet et augeat.

## Lettera

data da sua Santità a S. M. il re  
Vittorio Emanuele li 9 settembre  
1852 sul matrimonio civile <sup>1)</sup>.

La lettera che V. M. Ci ha fatto tenere in data 25 luglio ultimo in séguito d' altra da Noi direttale, ha dato motivo di consolazione al Nostro cuore, riconoscendo in quella un' interpellazione, che un Sovrano cattolico dirige al Capo della Chiesa sul gravissimo argomento del progetto di legge sui matrimoni civili. Questa prova di rispetto verso la nostra SS. Religione, che V. M. Ci presenta, ben dimostra il retaggio glorioso, che Le fu trasmesso dagli augusti suoi Antenati; l'amore cioè alla fede da quelli professata; per cui abbiamo ferma fiducia, che V. M. saprà conservarne puro il deposito a beneficio di tutti i suoi sudditi a fronte della malvagità dei tempi, che corrono.

Questa lettera Ci chiama ad eseguire i doveri dell' Apostolico Nostro Ministero, dandole una risposta franca e decisa: e ciò facciamo tanto più volentieri, in quanto che V. M. Ci

<sup>1)</sup> A questa Lettera si riferisce la *Proposizione 73 del Sillabo*.

## Litterae

ad August. Regem Victorem Emmanuelem datae die IX. Septembris anni  
MDCCCLIII. de matrimonio civili <sup>1)</sup>.

Litterae quas Maiestas Tua die 25. Julii huius anni, aliis a Nobis ad Te directis respondens, ad Nos misit, consolationi animo Nostro fuerunt, quandoquidem eas ceu interrogationem habuerimus, qua catholicus Princeps ab Ecclesiae Capite sciscitatur, quid in gravissima causa de matrimonio civilis lege proponenda agendum sit. Hoc reverentiae erga sanctissimam nostram Religionem argumentum, a Maiestate Tua Nobis exhibitum, indicium plane est gloriosae illius haereditatis, ab augustis Tuis Maioribus ad Te transmissae: amoris scilicet erga Fidem quam ipsi profitebantur; quocirca firmiter confidimus fore ut etiam Maiestas Tua depositum illud pro omnium subditorum Tuorum salute inter praesentium temporum nequitias purum integrumque conservet.

Quae quidem Litterae a Nobis postulant, ut libere distincteque Tibi respondentes, Apostolici Nostri Ministerii officium exsequamur. Quod eo libentius adgredimur, quo certius

<sup>1)</sup> Huc refertur *propositio 73. Sylabi*.

assicura, che terra questa risposta in molto conto. Senza entrare a discutere il contenuto nei fogli dei Ministri Regii che la M. V. Ci ha inviati, nei quali si pretende di fare l'apologia della legge del 9 aprile, insieme al progetto dell'altra sul matrimonio civile, facendo derivare quest'ultima dagli impegni contratti nella pubblicazione della prima; senza rimarcare, che quest'apologia si fa nel momento stesso, in cui pendono le trattative iniziate per la conciliazione dei diritti della Chiesa violati da quelle leggi; senza qualificare alcuni principii, che in detti fogli si esternano evidentemente contrarii alla sana dottrina della Chiesa; Ci proponiamo soltanto di esporre colla brevità, che conviene ai limiti di una lettera, la dottrina Cattolica su tale argomento. Da questa dottrina V. M. rileverà quanto occorre, affinchè questo affare così importante sia messo in regola; la qual cosa tanto più siamo convinti di poter ottenere, in quanto che i suoi Ministri hanno dichiarato di non consentire mai a fare una proposizione contraria ai precetti della Religione, qualunque sieno le opinioni prevalenti.

È donna di fede essere stato elevato il matrimonio da N. S. G. C. alla dignità di Sacramento<sup>1)</sup>, ed è dottrina della Chiesa cattolica che il Sacramento non è una qualità accidentale aggiunta al contratto, ma è di essenza al matrimonio stesso<sup>2)</sup>, cosicchè l'unione coniugale tra i cristiani non è legittima, se non nel matrimonio Sacramento, fuori del quale non vi è che un pretto concubinato<sup>3)</sup>. Una legge civile che, supponendo divisibile pei cattolici il Sacramento dal contratto di matrimonio, pretenda di regolarne la validità, contraddice alla dottrina della Chiesa, invade i diritti inalienabili della medesima, e praticamente parifica il concubinato al Sacramento del matrimonio, sanzionando legittimo l'uno come l'altro.

Nè la dottrina della Chiesa sarebbe posta in salvo, nè bastantemente sarebbero garantiti i diritti della

Maiestas Tua affirmat, responsum Nostrum magni pretii a Te esse habendum. Nolumus tamen de iis disserere quae in libello a Regiis Ministris conscripto et a Maiestate Tua Nobis transmissio continentur; conantur enim apologiam texere Legis die 9. Aprilis conditae, et alterius etiam de matrimonio civili, postea ferendae, quam a priori derivare contendunt, asserentes se istius publicatione etiam ad illam proponendam constringi. Nolumus praeterea animadvertere, apologiam hanc eodem tempore tentari, quo tractationes inceptae pro conciliandis Ecclesiae iuribus, per eiusmodi leges violatis, adhuc perdurant; neque volumus censura afficere quaedam principia in isto libello expressa, quae sanae Ecclesiae doctrinae evidenter adversantur. Hoc unum Nobis propositum est: exponere videlicet breviter, ne epistolae limites praetergrediamur, catholicam doctrinam de isto argumento. Ex qua doctrina Maiestas Tua profecto percipiet quae necessaria sint, ut res adeo gravis ad rectam normam componatur. Quod eo vel magis assequi posse confidimus, quum Maiestatis Tuae Ministri declaraverint, se numquam aliquid esse proposituros, quod Religionis praecipitis adversetur, quaecumque tandem ab opinionibus praevalebantibus exigi videantur.

Est fidei dogma, matrimonium a Domino nostro Jesu Christo ad Sacramenti dignitatem evectum esse<sup>1)</sup>; estque Ecclesiae catholicae doctrina, Sacramentum non esse qualitatem quamdam accidentalem, contractui adiunctam, sed matrimonio ipsi essentialiter inhaerere<sup>2)</sup>, ita ut unio coniugalis inter christianos legitima non sit, nisi in sacramentali matrimonio, extra quod nonnisi concubinatus habetur<sup>3)</sup>. Lex civilis itaque, quae Sacramentum a contractu matrimonii inter catholicos dividi posse supponens, huius validitatem stabilire praetendit, doctrinae Ecclesiae adversatur, inalienabilia Ecclesia iura invadit, et practice concubinatum Sacramento parem facit, dum unum aequè ac alterum ceu legitimum sancit.

Neque etiam Ecclesiae doctrina salva consisteret, neque eiusdem Ecclesiae iura satis tuta redderentur, si

<sup>1)</sup> *Huc ref. prop. 65.*

<sup>2)</sup> " " " 73.

<sup>3)</sup> *Huc ref. prop. 66.*

Chiesa stessa, ove venissero adottate nella discussione del Senato le due condizioni accennate dai Ministri della M. V.: 1.<sup>a</sup> cioè, che la legge tenga per validi i matrimoni regolarmente celebrati al cospetto della Chiesa: 2.<sup>a</sup> che quando siasi celebrato un matrimonio, che la Chiesa non riconosce per valido, la parte, che più tardi vuole uniformarsi ai suoi precetti, non sia tenuta di perseverare in una convivenza condannata dalla religione. Imperciocchè in quanto alla prima condizione, o s'intendono per validi i matrimoni regolarmente celebrati avanti alla Chiesa, e in questo caso la disposizione della legge è superflua, che anzi sarebbe una vera usurpazione del potere legittimo, se la legge civile pretendesse di conoscere e giudicare, se il Sacramento del matrimonio sia stato regolarmente celebrato *in facie Ecclesiae*; o si vogliono intendere per validi avanti la medesima quei soli matrimoni contratti *regolarmente*, cioè secondo le leggi civili, ed anche in questo caso si va a violare un diritto, che è di esclusiva competenza della Chiesa.

Per la seconda condizione poi, lasciandosi ad una delle parti la libertà di non perseverare in una convivenza illecita, stante la nullità del matrimonio, perchè non celebrato innanzi la Chiesa, nè in conformità alle sue leggi, si lascierebbe sussistere come legittima avanti al potere civile una unione, che viene dalla legge condannata. Ambedue poi le condizioni non distruggendo il supposto, dal quale parte la legge in tutte le sue disposizioni, di separare cioè il Sacramento dal contratto, lasciano sussistere la opposizione di sopra ricordata tra la legge stessa e la dottrina della Chiesa intorno al matrimonio.

Non vi è pertanto altro mezzo di conciliazione che, ritenendo Cesare quello che è suo, lasci alla Chiesa ciò, che ad essa appartiene. Il potere civile disponga pure degli effetti civili, che derivano dalle nozze, ma lasci alla Chiesa il regolarne la validità fra i cristiani. La legge civile prenda le mosse dalla validità od invalidità del matrimonio, come sarà dalla Chiesa determinata, e partendo da questo fatto, che è fuori della sua sfera il costituirlo, disponga allora degli effetti civili.

in deliberatione a Senatu habenda duae conditiones a Maiestatis Tuae Ministris indicatae recipiuntur: 1. quod lex matrimonia in facie Ecclesiae regulariter celebrata tamquam valida habeat; 2. quod, si matrimonium aliquod, cuius validitatem Ecclesia non agnoscit, initum fuerit, ea pars, quae postea Ecclesiae praeceptis sese subicere velit, ad perseverandum in contubernio a Religione damnato non obligetur.

Etenim quod primam conditionem attinet, aut habentur ut valida matrimonia regulariter celebrata in facie Ecclesiae, et tunc legis civilis dispositio superflua plane est, immo vera legitimae potestatis usurpatio foret, si lex civilis decernere et diiudicare praesumeret, utrum matrimonii Sacramentum reipsa regulariter *in facie Ecclesiae* celebratum sit; aut ea tantummodo matrimonia tamquam valida in facie Ecclesiae agnosci volunt, quae *regulariter*, hoc est, ad normam legum civilium, contracta fuerint, et tunc pariter violatur ius, quod exclusive Ecclesiae competit.

Quod vero secundam conditionem spectat, dum uni parti libertas conceditur non perseverandi in illicito contubernio, propter nullitatem matrimonii, quod neque in facie Ecclesiae, neque iuxta Ecclesiae leges celebratum fuit, tamen in foro potestatis civilis connubium, quod a lege damnatur, tamquam legitimum permaneret.

Utraque autem conditio nullatenus tollit suppositum, quo lex ista in omnibus suis dispositionibus nititur, separationem videlicet Sacramenti a contractu; ideoque etiam oppositionem inter praedictam legem et Ecclesiae doctrinam de matrimonio tollere nequit.

Quocirca nulla alia conciliationis ratio reperitur, nisi quod Caesar, sua retinens, Ecclesiae ea, quae ipsius propria sunt, relinquat. Potestas civilis de effectibus civilibus et matrimonio ortis disponat; Ecclesiam vero de matrimonii validitate inter christianos decernere sinat. Lex civilis a validitate vel invaliditate matrimonii, prout ab Ecclesia determinata fuerit, initiumumat, hancque facti instar supponens (id enim constituit, ad legem civilem non pertinet) porro de effectibus civilibus disponat.

La lettera poi della M. V. Ci chiama a chiarire altre proposizioni, che abbiamo rilevate dalla medesima. E primieramente V. M. dice d'aver saputo da un canale, che Ella deve credere ufficiale, che la proposta della suddetta legge non fu riguardata da Noi come ostile alla Chiesa. Abbiamo voluto su questo proposito parlare, prima della sua partenza da Roma, col Ministro di V. M. conte Bertone, il quale Ci ha assicurato sull'onore suo, di avere scritto unicamente ai Ministri di V. M., che il Papa non poteva nulla opporre, se conservati al Sacramento tutti i suoi sacri diritti e la libertà che gli compete, si fossero volute fare delle leggi riguardanti solo gli effetti civili del matrimonio.

V. M. aggiunge, che queste stesse leggi, le quali sono in vigore presso certi Stati limitrofi al Regno del Piemonte, non hanno impedito alla S. Sede di riguardarli con occhio di benevolenza e di amore. A questo risponderemo, che la stessa S. Sede non si è mai acquietata sui fatti, che si citano, e sempre ha reclamato contro queste leggi appena ne conobbe l'esistenza, conservandosi anche adesso ne' Nostri archivii i documenti delle fatte rimozioni: ma queste proteste non hanno mai impedito nè impediscono di amare i cattolici di quelle nazioni, che furono costrette a sottoporsi all'esigenza di queste leggi. Dovremo forse non amare i cattolici del Regno di V. M., quand'anche si trovassero nella dura necessità di subire questa legge? Mai no! Diremo di più, dovranno in Noi cessare i sentimenti di carità verso la M. V. nel caso si trovasse trascinata (che Dio nol permetta mai) a sanzionarla? La Nostra carità si raddoppierebbe, e con zelo maggiore dirigeremmo più fervide preghiere a Dio, supplicandolo a non voler ritrarre la sua mano onnipotente dal capo di V. M., e a volerla soccorrere più che mai coi lumi e colle ispirazioni della sua grazia.

Intanto però non possiamo a meno, anzi sentiamo tutto il debito che Ci corre, di prevenire il male per quanto da Noi dipende, e dichiariamo a V. M. che, se la S. Sede ha reclamato altra volta contro questa legge, oggi

Ceterum e Maiestatis Tuae Litteris alias etiam deprompsimus sententias, quibus lucem affundere debemus. Et primo quidem Maiestas Tua affirmat, Te e fontibus, qui publicae auctoritatis fidem mereantur, accepisse, legis praedictae rogationem Nobis eiusmodi visam non esse, quae Ecclesiae inimica censeatur. Nos igitur hac de re cum Maiestatis Tuae Ministro, Comite Bertone, priusquam Roma protisceretur, verba facere volumus. Ipse vero, honore suo interposito, Nobis confirmavit, se Maiestatis Tuae Ministris tantummodo scripsisse, Pontificem non habere quae opponat, si, servatis omnibus sacris iuribus Sacramenti et servata libertate eidem debita, leges ferri voluerint, quae civiles tantum Matrimonii effectus respicerent.

Addit Maiestas Tua, easdem leges in quibusdam regnis Subalpino finitimis vigere, neque tamen impedimento fuisse, quominus Apostolica Sedes iis ipsis benevolentiae et amoris signa praebere. Ad haec respondimus, Apostolicam Sedem factis quae haec indicantur, numquam acquiescere, sed semper contra eiusmodi leges, quum primum earum existentia innovuit, reclamasse; et etiamnum in archiviiis Nostri harum protestationum documenta servantur. Attamen protestationes istae numquam impediverunt neque nunc impediunt, quominus fideles catholicos earum nationum, quae illarum legum exactiōni sese submittere cogebantur, paterno amore prosequamur. An vero catholici Maiestatis Tuae regno subditi amandi a Nobis non essent, quando dura necessitate coacti legi isti se subicere deberent? Absit! Ut graviora dicamus, num deficere forsitan deberent caritatis sensus, quibus erga Maiestatem Tuam ferimur, si umquam, quod Deus avertat, eo abigeretur, ut eiusmodi legem sanciret? Augeretur potius caritas Nostra, et maiori etiam zelo ferventiores ad Deum preces dirigeremus, enixe supplicantes, ne manum suam omnipotentem a Maiestate Tua retrahat, sed ut magis magisque lumine et inspirationibus gratiae suae Eidem succurrat.

Interim officio Nostro supersedere non possumus, immo gravissimo debito adstringimur, ut malum, quantum Nobis licet, praeventientes, Maiestati Tuae palam declaremus: quod si Apostolica Sedes iam alias adversus eius-



più che mai è stretta dal dovere di farlo verso il Piemonte, e nei modi i più solenni, perchè appunto il Ministero di V. M. invoca gli esempi di altri Stati, dei quali funesti esempi incombe a Noi il dovere di impedire la riproduzione, ed anche perchè, procedendosi allo stabilimento di una tal legge in tempo che sono aperte le trattative per la conciliazione di altri affari, una tal circostanza potrebbe forse somministrare l'occasione di far supporre che vi fosse una qualche connivenza per parte della S.<sup>a</sup> Sede. Ci sarebbe veramente penoso un tal passo, ma come esonerarcene avanti a Dio, che Ci affidò il regime della sua Chiesa, e la custodia de' suoi diritti? Solo la M. V. potrebbe arrecarci questo grande conforto col togliercene l'occasione, ed una sola sua asserzione in proposito compirebbe la consolazione che abbiamo provato nell' essersi a Noi diretta; e quanto più sollecita sarà la sua risposta, tanto Ci riuscirà più gradita, come quella che Ci solleverà da un pensiero che assai affligge il Nostro cuore, ma che saremmo costretti di sentire nella sua piena estensione, quando uno stretto dovere di coscienza reclamasse da Noi quest'atto solenne.

Ora Ci resta di chiarire l' equivoco in cui è V. M. circa l' amministrazione della diocesi di Torino. E senza trattenerla soverchiamente su questo punto, Noi le dimandiamo solo di avere la pazienza di leggere due Nostre lettere a Lei dirette in data 7 Settembre e 9 Novembre 1849. Il suo Ministro in Roma, conte Bertone, ora in Torino, potrà anche riferirle a questo proposito una Nostra riflessione a lui esternata, e che ora ripetiamo con tutta ingenuità a V. M. Insistendo egli sulla nomina dell' amministratore della diocesi di Torino, facemmo ad esso osservare che il Ministero piemontese, essendosi reso responsabile della riprovevole carcerazione e dell' esiglio di Mons. Arcivescovo, ha ottenuto un fine che non conosciamo se fosse nelle sue vedute, ha cioè ottenuto che il Prelato abbia incontrato la simpatia e il rispetto di una grande parte del cattolicesimo dimostratosi in tante maniere, per cui siamo stati oggi posti nell' impossibilità di andare incontro

modi legem protestata est, nunc multo magis munere suo adigitur, ut adversus Subalpinum istud Regnum solemniori quo poterit modo reclamet, quandoquidem Maiestatis Tuae Ministerium ad eadem ipsa aliorum Regnorum exempla provocat, Nobisque officium plane incumbit, impedire, quominus exempla adeo funesta repetantur. Insuper, quum de eiusmodi legis rogatione eo ipso tempore agatur, quo de aliis negotiis componendis tractationes habentur, facile quis exinde ansam arripere posset suspicandi, Apostolicam Sedem istis inceptis quodammodo connivere. Gravi utique dolore afficeremur, si ita agere deberemus; sed qua ratione satisfaceremus Deo, qui Ecclesiae suae regimen et iurium suorum custodiam Nobis commisit? Sola Maiestas Tua est, quae doloris causam amovendo grande hoc solatium Nobis praebere posset; de qua re si uno verbo Nobis fidem dare velit, gaudium profecto complebit, quo affecti fuimus, quum Maiestas Tua illis Litteris Nos adibat. Et quanto citius responsio Tua ad nos perveniet, tanto iucundior Nobis erit, quum sollicitudinem cordi Nostro satis acerbam propulsura sit, qua tamen vehementissime affligi deberemus, si quando severissimum conscientiae Nostrae imperium solemnem istum actum postularet.

Superest ut ambiguitatem dilucidemus, in qua Maiestas Tua quoad administrationem Diocesis Taurinensis versatur. Ne hanc quaestionem nunc nimium protrahamus, a Maiestate Tua solummodo petimus, ut duas Nostras Litteras, die 7. Septembris et 9. Novembris anni 1849 ad Eandem directas, patienter legere velit. Maiestatis Tuae Minister in hac Urbe, Comes Bertoni, qui nunc Taurini moratur, Eidem etiam exponere poterit, quae hac de re ipsi manifestavimus, quaeque ingenue prorsus coram Maiestate Tua iterum proferimus. Quum enim penes Nos insisteret, ut Administratorem Diocesis Taurinensis nominaremus, significavimus ipsi, Ministerium Subalpinum, Rmum Archiepiscopum iniusto plane modo in carcerem mittens et in exilium pellens, aliquid obtinuisse, quod an optatis suis respondeat, dubitamus. Evenit enim, ut hic Sacrorum Antistes plurimorum catholicorum amorem et venerationem, multis sane modis demonstratam, in se converterit; ideo-

all'ammirazione dello stesso cattolicesimo con privare Monsig. Arcivescovo dell'amministrazione della sua diocesi.

Finalmente rispondiamo all'ultima osservazione che V. M. Ci esterna addebitando ad una parte del Clero piemontese e pontificio, di far guerra al suo Governo e di eccitare i sudditi alla rivolta contro di Lei e contro le sue leggi. Una tale asserzione Ci sembrerebbe del tutto inverosimile se non ci fosse scritta da V. M., la quale assicura di averne in mano i documenti; ed in questo caso è fuori di dubbio che debbono esser puniti i rei nei debiti modi. Ci duole solo di non conoscere questi documenti, per non sapere quali sieno i membri del Clero che si sarebbero accinti alla pessima impresa di eccitare una rivoluzione al Piemonte. Questa ignoranza Ci pone nella necessità di non poterli punire; se mai però s'intendessero per eccitamento alla rivolta gli scritti, che per parte del Clero sono comparsi per opporsi al progetto di legge sul matrimonio, diremo che, prescindendo dai modi che qualcuno avesse potuto adoperare, il Clero ha fatto il suo dovere. Noi scrivemmo a V. M. che la legge non è cattolica, e se la legge non è cattolica, è obbligato il Clero di avvertire i fedeli anche a fronte del pericolo che incorre. Maestà, Noi Le parliamo anche a nome di Gesù Cristo, del quale siamo Vicario, quantunque indegni, e nel suo santo Nome Le diciamo di non sanzionare questa legge che è fertile di mille disordini.

La preghiamo poi di volere ordinare che sia messo un freno alla stampa che ribocca continuamente di bestemmie e d'immoralità. I peccati che derivano dalla licenza di parlare e di scrivere, sono senza numero. Deh! per pietà che questi peccati non si riversino mai sopra chi, avendone il potere, non ne impedisse la cagione! V. M. si lamenta del Clero, ma questo Clero è stato sempre in questi ultimi anni avvilito, bersagliato, calunniato, deriso da quasi tutti i fogli che si stampano nel Piemonte. Non si potrebbero ridire tutte le villanie e le rabbiose invettive scagliate e che si scagliano contro questo Clero. Ed ora perchè esso si accinge a difendere la verità e la

que, huic Archiepiscopo suae Dioeceseos administrationem adimentes, communem catholici orbis admirationem offendere deberemus, quod plane non possumus.

Respondendum denique est ad ea, quae Maiestas Tua ultimo loco Nobis significavit, partem Cleri tam Subalpini Regni quam Pontificiae Nostrae ditionis accusans, quod contra Maiestatis Tuae Gubernium bellum agat, subditosque ad rebellionem contra Te Tuasque leges excitet. Quod nullo modo veri simile existimarem, nisi Maiestas Tua ipsa id scripto assereret, et documentis, quae in Eiusdem manibus sint, confirmari diceret. Dubitari ergo non debet, reos pro merito esse puniendos. Id unum dolemus, Nobis praesto non esse illa documenta, quibus doceamur, quinam sint isti Clerici, qui pessimo facinore rebellionem in Subalpino Regno excitare attentant. Quos cum nesciamus, punire non valeamus. Si vero forsitan scripta a quibusdam clericis edita, ut propositae legi de Matrimonio se opponerent, instigationes ad rebellionem nominari velint, Nos aperte declarabimus, quod Clerus haec scribendo (nisi forte unus alterve rectum modum excesserit) officio suo satisfecit. Nos Maiestati Tuae scripsimus, istiusmodi legem non esse catholicam; atqui si lex non est catholica, Cleri officium est, fideles monere, etiamsi eam ob rem periculum subeat. Maiestatem Tuam in nomine Domini nostri Jesu Christi alloquimur, cuius, licet indigni, Vicarius sumus; et in Ipsius sancto Nomine Te monemus, ne istam legem sancias, quae innumerabilium malorum fertilis causa est.

Rogamus etiam Maiestatem Tuam, ut scriptis quibuscumque pro lubitu publicandis frenos iniicere iubeas; blasphemias enim et turpissimis rebus pleraque scatent. Peccata quae ex effrenata hac loquendi et scribendi licentia nascuntur, omnem numerum superant. Faxit Deus, ut haec peccata numquam in eum redundant qui, cum potuerit, eorum causam non compescuit! Maiestas Tua de Clero conqueritur; sed Clerus iste his postremis annis fere ab omnibus ephemeridibus, in Subalpino Regno editis, maledictis, opprobriis, calumniis et ludibris continuo cumulabatur; neque repetere licet convicia omnia rabi-dasque contumelias, quibus idem Clerus vexabatur et etiamnum vexa-

purità della fede, dovrà questo Clero forse incontrare la disgrazia della M. V.? Noi non possiamo persuadercene, e Ci abbandoniamo volentieri alla speranza di vedere dalla M. V. sostenuti i diritti della Chiesa, protetti li suoi ministri, e liberato il suo popolo dal pericolo di sottostare a certe leggi, che seco portano l'impronta della decadenza della religione e della moralità negli Stati.

Pieni di questa fiducia alziamo al cielo le mani, pregando la Santissima Trinità a far discendere la benedizione apostolica sopra l'augusta sua Persona e tutta la reale Famiglia.

Datum Castri Gandulphi, die XIX. Septembris MDCCCLII.

tur. Quum vero ad veritatem et fidei puritatem defendendam consurgit, num forte in Maiestatis Tuæ offensionem idcirco incurrere deberet? Absit ut haec opinemur; libenter potius spem concipimus fore ut Maiestas Tua Ecclesiae iura sustineat, sacros eius ministros protegat, populumque subditum a periculo eximat se submittendi quibusdam legibus, quae religionis morumque ruinam in republica portendant.

Hac fiducia erecti manus Nostras in coelum levamus, Sanctissimam Trinitatem precantes, ut Apostolicam Benedictionem in Augustissimam Tuam Personam, universamque Regiam Familiam abundanter demittat.

Datum Castri Gandulphi, die XIX. Septembris MDCCCLII.

## Allocutio

habita in consistorio secreto die XXVII. septembris anni MDCCCLII<sup>1)</sup>.

### Venerabiles Fratres.

Acerbissimum Vobiscum, Venerabiles Fratres, hodie communicamus dolorem, quo iamdiu intime premimur ob maxima, et numquam satis lugenda damna, quibus plures ab hinc annos Catholica Ecclesia in Neogranatensi Republica miserandum in modum affligitur, atque vexatur. Quod numquam fore putavissemus, cum omnes noscant, quibus praecipuae benevolentiae significationibus haec Apostolica Sedes illam Rempublicam fuerit prosequuta, et qua alacritate felicis recordationis Gregorius XVI. Praedecessor Noster ad religionis, et spirituale illius gentis bonum omni studio procurandum, atque ad mutuae amicitiae vincula magis magisque obstringenda, Rempublicam ipsam prae aliis omnibus Americae regionibus non modo primum recognoverit, sed etiam Apostolicam Nunciaturam ibi constituerit. Atque eo magis dolemus, quod adhuc irritae faere curae omnes tum ab eodem Praedecessore Nostro, tum a Nobis ipsis summa contentione apud illud Gubernium adhibitae, ut tot catholicae religioni illata amoverentur damna, ac nefariae et iniustissimae de medio tollerentur leges ibi a civili potestate cum maximo fidelium detrimento contra divinam Ecclesiae institutionem, eiusque veneranda iura et libertatem, contra supremam huius Apostolicae Sedis potestatem, contra sacrorum Antistites, et ecclesiasticos viros latae atque sancitae. Noverat enim idem Decessor Noster, legem ibi mense Aprili anno 1845 fuisse promulgatam, qua inter alia statuitur, ut, vix dum aliqua apud illa laicae potestatis tribunalia accusatio adversus ecclesiasticos viros, ac vel ipsos Episcopos fuisset admissa, non solum Sacerdotes Domini alique Clerici, sed etiam Episcopi, quos Spiritus Sanctus posuit regere Ecclesiam Dei, ab omni sui ministerii exercitio se abstinere, ac proprii muneris partes aliis committere debeant<sup>2)</sup>, constitutis quoque carceris, exilii, et aliis poenis in eos omnes, qui id agere noluissent. Quapropter ipse Praedecessor Noster, nulla interposita mora, suas eodem anno ad illius Reipublicae Praesidem misit Litteras, quibus legem illam omni certe reprehensione dignissimam vehementer improbavit, ac simul summopere exposulavit, ut eadem lex statim abrogaretur, et Ecclesiae iura sarta, tecta haberentur. Nos autem, postquam inscrutabili Dei indicio ad hanc Principis Apostolorum Cathedram evecti,

<sup>1)</sup> *Huc referuntur Syllabi Propositiones 31, 51, 53, 55, 67, 73, 74, 78.*

<sup>2)</sup> *Huc ref. prop. 51.*

totius Ecclesiae gubernacula tractanda suscepimus, afflictis inibi sanctissimae nostrae religionis rebus consulere vel maxime cupientes, iam inde ab anno 1847 ad eiusdem Neogranatensis Reipublicae Praesidem scripsimus Litteras. Quibus quidem Litteris significantes, quantopere de illa Dominici gregis parte solliciti et anxii essemus, et quo singulari paternae Nostrae caritatis studio opportuna vellemus adhibere remedia ad sanandas ibi contritiones Israel, lamentati sumus vehementer deplorandam conditionem, in qua versabatur Ecclesia. Neque praetermisimus iisdem Litteris inter alia summopere conquiri de binis illis praesertim iam conceptis decretis, quorum altero proponebatur, ut, hac Apostolica Sede minime consultata, decimae tollerentur; altero autem, ut hominibus illuc immigrantibus liceret publicum proprii cuiusque cultus exercitium habere<sup>1)</sup>. Atque commemorata improbantur decreta etiam atque etiam efflagitavimus, ut illa nullum umquam obtinerent exitum, et Ecclesia suis omnibus iuribus, ac plena frueretur libertate.

Ea porro spe nitebamur fore, ut Neogranatense Gubernium has Nostras voces, monita, expostulationes, querelas, quae ex amantissimi aequae ac afflictissimi communis omnium fidelium Patris corde erumpebant, prout vellet auribus excipere. Verum incredibili animi Nostri dolore Vobis nunciare cogimur, hostiles violentosque in Christi Ecclesiam impetus quotidie magis, ac duobus praesertim ab hinc annis, adeo esse factos, ut nova et gravissima Ecclesiae ipsi per laicam potestatem indesinenter inflicta sint vulnera. Etenim, Venerabiles Fratres, non solum iniustissimae illae leges, de quibus dolenter loqui i sumus, minime sublatae fuerunt, verum etiam aliae ab utroque illius Gubernii Consilio legibus ferendis praeposito sunt conditae, quibus sanctissima Ecclesiae et huius Sanctae Sedis iura maiorem in modum violantur, oppugnantur et proculcantur. Namque inter alia iam inde a mense Maio superioris anni lex prodit contra Religiosas Familias, quae pie institutae, recteque administratae magno christianae et civili reipublicae usui et ornameto esse solent. Ea enim lege confirmatur expulsio Religiosae Societatis Iesu Familiae, quae illuc primum arcessita ac tantopere exoptata, de re catholica et civili illic optime merebatur; atque eadem lege vetatur, ne ulla in Neogranatensis Reipublicae territorio Societas institui possit, quae *passivae*, ut dicunt, obedientiae vinculo potissimum obstringatur. Insuper eadem lege iis omnibus promittitur auxilium, qui a suscepto religiosae vitae instituto deficere, ac solennia vota frangere velint<sup>2)</sup>, ac Venerabili Fratri Emmanueli, illius ecclesiasticae provinciae Archiepiscopo vigilantissimo, viro summis Nostris et huius Apostolicae Sedis praeconis decorando, interdicitur exercere facultatem ei ab hac Apostolica Sede iam inde ab anno 1835 tributam, visitandi scilicet Religiosas illius regionis Familias, et regularem restituendi disciplinam. Eodem subinde mense et anno alia sancita lex est, qua Ecclesiasticum Forum de medio omnino tollitur, ac declaratur, causas omnes ad idem forum pertinentes, ac vel ipsas tum Archiepiscopi, tum Episcoporum causas sive civiles sive criminales, ante laicalia tribunalia ab illius Reipublicae Magistratibus in posterum esse iudicandas<sup>3)</sup>. Postmodum, die nempe vigesima septima eiusdem mensis Maii anni 1851, de Parochiis nominandis promulgata lex est, qua Nationalia Consilia mentium falsumque ius designandi Parochos a Praeside illius Reipublicae ad quemdam excoGITatum Parochialem Conventum, quem *Cabildo parroquial* appellant, ex cuiusque Paroeciae patribusfamilias praesertim comparatum transferunt, ut, cum aliqua Paroecia suo fuerit Parocho orbata, ille Conventus novum Parochum nominare queat. Aliquibus insuper eiusdem legis articulis prohibentur Sacrorum Antistites ullum seu sacrae visitationis, seu alio quocumque iure percipere emolumentum; atque eidem Parochiali Conventui tribuitur potestas pro suo arbitrio statuendi et immutandi tam Parochorum redditus, quam impendia sacris functionibus necessaria; et alia statuuntur, quibus ecclesiasticae proprietatis iura violantur ac delentur<sup>4)</sup>. Post haec die primo mensis Iunii eiusdem anni 1851 alia sancita est lex, qua vetatur, ne Canonicales Cathedralium Ecclesiarum Praebendae conferantur, nisi postquam a maiore Provincialium cuiusque Diocesis Consiliorum parte

<sup>1)</sup> *Huc ref. prop.* 78.

<sup>2)</sup> „ „ „ 31.

<sup>3)</sup> *Huc ref. prop.* 53.

<sup>4)</sup> „ „ „ 26.

id pro eorum arbitrio fuerit statutum. Aliae deinde promulgatae sunt leges, quibus et omnibus data est facultas se liberandi ab onere solvendi census, qui potissimum ecclesiasticorum reddituum partem constituunt, soluta dimidia pretii parte Gubernio, et Archiepiscopalis Seminarium sanctae Fidei de Bogota bona Nationali Collegio adiudicata, ac suprema in idem Seminarium inspectio laicae potestati attributa <sup>1)</sup>. Neque silentio praeterendum, per novam illius reipublicae constitutionem postremis hisce temporibus sancitam inter alia ius quoque liberae institutionis defendi, et omnimodam omnibus tribui libertatem, ut quisque suas cogitationes, ac monstrosa quaeque opinionum portentia typis quoque in vulgus edere et privatim publiceque quemlibet cultum profiteri valeat <sup>2)</sup>.

Videtis profecto, Venerabiles Fratres, quam teterrimum ac sacrilegum bellum catholicae Ecclesiae a Neogranatensis Reipublicae Moderatoribus sit indictum, et quae quantaque iniuriae eidem Ecclesiae, eiusque sacris iuribus, Pastoribus, Ministris, ac supremae Nostrae et Sanctae huius Sedis auctoritati fuerint illatae. Cum autem enunciatae leges iam inde ab eodem anno 1851 executioni fuerint mandatae, iam tum sacrorum Antistites, et ecclesiastici viri, qui catholicis sensibus vere animati nefariis illis decretis merito, atque optimo iure reclamabant et obsistebant, summo cum fidelium populorum damno crudeliter vexati, et in gravissima quaeque adducti fuere discrimina. Siquidem et sacra Episcoporum oppressa auctoritas, et Parochorum ministerium vinculis constrictum atque irretitum, et optimi divinae legis praecones in carcerem detrusi, et cuiusque gradus Clerici ad egestatem redacti, omnibusque malis et aerumnis obnoxii. Atque in primis Venerabilis Frater Emmanuel Iosephus de Mousquera, vigilantissimus Sanctae Fidei de Bogota Archiepiscopus, gravioribus fuit angustiis et laboribus exagitatus, eam scilicet ob causam, quod praestantissimus ille Antistes singulari pietate, doctrina, prudentia, consilio praecellens, et apostolico zelo plane incensus, pro sui muneris debite contra illas impias leges sapienter fortiterque protestari, ac saeculi licentiae, et pravis impiorum hominum consiliis inviete resistere, ac Dei et Ecclesiae causam strenue propugnare numquam intermisit. Quo autem potissimum praetextu Neogranatense Gubernium uti voluerit ad clarissimum illum divexandum Antistitem, accipite, Venerabiles Fratres. Cum enim in illis regionibus mos invaluerit, ut sexto quoque mense habeantur experimenta ad eorum periclitandam doctrinam, qui vacantibus parochialibus Ecclesiis sunt praeficiendi, Neogranatense Gubernium per legem ibi iamdiu contra Canonicas sanctiones sancitam sibi temere ius arrogavit, non solum cogendi Episcopos ad id sexto quoque mense redeunte peragendum, verum etiam compellendi Metropolitanum, aut viciniorum Antistitem ad idem praestandum, si quis Antistes commemorato tempore eiusmodi experimenta minime habuisset. Huius igitur legis vi ipsum Gubernium anno 1851 eidem clarissimo Sanctae Fidei de Bogota Archiepiscopo denunciare non dubitavit, ut eadem experimenta indiceret. Et quoniam idem Archiepiscopus adversae valetudinis conflictabatur incommodis, ideo illius Vicarius generalis Gubernio respondens sui Antistitis nomine iniustam hanc petitionem cunctando repellendam esse existimavit, veritus praesertim, ne praedictam de nominandis Parochis legem quodammodo ipse probare videretur. Ob hanc itaque rectam ac prudentem agendi rationem, omni certe laude dignam, ab illo Vicario habitam, idem ad laicalia tribunalia fuit accusatus, a proprii muneris exercitio interdictus, palam publiceque comprehensus, ac deinceps carceri per duos menses, ac per sex capitivitati, seu detentioni damnatus, aliisque afflictatus poenis. Atque in hac re illud vel maxime dolendum, Venerabiles Fratres, quod Vicarius Capitularis vacantis Ecclesiae Antiochensis, quae vicinior est Bogotae, Neogranatensis Gubernii sensibus et consiliis turpiter obsequens haud timuit, Kalendis Martii huius anni Edictum emitte, quo contra suum Metropolitanum insurgens, et in eius iurisdictionem invadens, de illius Archidioecesis Paroeciis concursus contra Canonicas Sanctiones indixit. Ubi id Nostras pervenit ad aures, nulla interiecta mora, eidem Vicario Capitulari scripsimus Litteras, quibus tantum eius facinus gravibus severisque, uti par erat, verbis reprehendentes et dam-

<sup>1)</sup> *Huc ref. prop. 46.*

<sup>2)</sup> *Huc ref. prop. 79.*

nantes, illi mandavimus, ut ab incepto statim desisteret, ne Nos, licet inviti, in ipsum ea cogeremur decernere, quae Sacrorum Canonum severitas, et Apostolici Nostri ministerii ratio postulabant. Interim vero ipse pietissimus Archiepiscopus suo munere provide sapienterque fungens continuo Edictum edidit, quo iustissime docebat, nullum irritumque esse Edictum ab illo Vicario Capitulari adversus Sacrorum Canonum praescripta promulgatum, ac simul omni iure vetabat, ne quis eidem Edicto suas aures ullo modo praeberet unquam vellet. Tum vero illud Deputatorum Consilium in proprium Pastorem magis magisque irruens non dubitavit spectatissimum Archiepiscopum, sicut violatarum legum reum, accusare, et Neogranatensis Senatus haud veritus est tam iniustam et impiam admittere accusationem. Atque ex infanda illa lege, quam, uti ab initio diximus, rec. mem. Gregorius XVI. Praedecessor Noster reprobaverat, denuntiaturum est eidem Archiepiscopo, ut suam iurisdictionem remitteret, eamque alii ecclesiastico viro deferret. Hac tam iniqua denuntiatione accepta, ille religiosissimus doctissimusque Antistes, egregius ac strenuus rei catholicae, et Ecclesiae iurium propugnator, paratus aspera quaeque propter iustitiam pati, sapientissimum verissimumque dedit responsum, quo invicta episcopalis sui animi fortitudine clare aperteque declaravit, se nunquam posse eam dimittere potestatem, quam sibi unice a Deo, atque ab hac Apostolica Sede collatam esse probe noscebat. Hinc Neogranatense Gubernium haud extimuit, maximo cum omnium bonorum luctu et indignatione, non solum Archiepiscopalis mensae reductus sequestro ponere, verum etiam proprium Archiepiscopum, de illa Archidioecesi summopere meritum ac tot sane nominibus illustrem, pellere in exilium. Qui quidem Antistes gravissimo deinde morbo correptus, eum e Neogranatensis Reipublicae territorio protinus decedere haud potuerit, in quamdam villam, quae a Bogotensi civitate iter duorum dierum distat, se recipere est coactus. Cum autem inter plurimos spectatissimos viros Minister quoque inclytae exterae Nationis ibi commorans, tam indigna re commotus, sua officia apud illud Gubernium interponenda curaverit, visum est Gubernium idem propendere ad id dumtaxat permittendum, ut scilicet ipse Archiepiscopus exsularet, statim ac iter aggredi posset. Neque id satis. Hisce namque diebus tristissimi venerunt nuntii, ex quibus pari animi Nostri amaritudine accepimus, Venerabilem Fratrem Episcopum de Cartagena, ac Dilectum Filium Vicarium Capitularem Dioecesis S. Marthae, similem de paroeciarum concursu denuntiationem ab illo accepisse Gubernio, eisque ipsissima ingruere discrimina, proptereaquod summa cum eorum nominis laude denuntiationem ipsam respuere non dubitarunt. Perlatum quoque ad Nos est, ea ipsa de causa eandem Venerabili Fratri Episcopo Neo-Pampilonensi impendere procellam, cum ipse etiam paratus sit ad sui muneris partes splendide abundans, et ad Ecclesiae iura fortiter constanterque tuenda. Atque eiusmodi vexationibus, iniuriis, contumeliis subiecti quoque fuere alii illius Reipublicae lectissimi ecclesiastici viri, ac vel ipse Noster et huius S. Sedis Legatus. Etenim semel atque iterum in illis Consiliis inter maxima et horrenda cuiusque generis contra Christi hic in terris Vicarium, et hanc Apostolicam Sedem convicia propositio facta fuit dimittendi eundem Nostrum Legatum, qui ea, qua par erat, prudentia et fortitudine Nostro nomine tot nefariis et sacrilegis ausis reclamare non praetermisit. Omittimus autem hic commemorare novas alias leges a nonnullis e Deputatorum Consilio propositas, quae irreformabili Catholicae Ecclesiae doctrinae, eiusque sanctissimis iuribus omnino adversantur. Itaque nihil dicimus de illis conceptis decretis, quibus proponebatur, ut Ecclesia nempe a Statu seiungeretur<sup>1)</sup>, ut Regularium Ordinum, piorumque Legatorum bona oneri mutuum dandi omnino subicerentur, ut omnes abrogarentur leges, quae ad Religiosarum Familiarum statum tutandum, earumque iura et officia tuenda pertinent<sup>2)</sup>, ut civili auctoritati tribueretur ius erigendi et circumscribendi Dioeceses et Canonicorum Collegia, ut ecclesia-

<sup>1)</sup> *Huc ref. prop. 55.* — In Litteris Apostol. „*Deus humanae salutis*“ d. d. 3. Nov. 1855, quibus Conventio cum Austriae Imperatore inita confirmatur, haec legimus opportuna: „Sic a Deo (sunt) mortalia composita et distributa, ut inter se copularentur sacerdotium et imperium ad humani generis incolumitatem.“ *N. Edit.*

<sup>2)</sup> *Huc ref. prop. 53.*

stica iis conferretur iurisdictio, qui a Gubernio nominati fuissent<sup>1)</sup>. Nihil dicimus de alio illo decreto, quo matrimonii Sacramenti mysterio, dignitate, sanctitate omnino despecta, eiusque institutione et natura prorsus ignorata et eversa, atque Ecclesiae in Sacramentum idem potestate penitus sprete, proponebatur iuxta iam damnatos haereticorum errores, atque adversus Catholicæ Ecclesiæ doctrinam, ut matrimonium tamquam civilis tantum contractus haberetur, et in variis casibus divortium proprie dictum sanciretur<sup>2)</sup>, omnesque matrimoniales causae ad laica deferrentur tribunalia, et ab illis iudicaretur<sup>3)</sup>; cum nemo ex Catholicis ignoret, aut ignorare possit, matrimonium esse vere et proprie unum ex septem Evangelicæ legis Sacramentis a Christo Domino institutum, ac propterea inter fideles matrimonium dari non posse, quin uno eodemque tempore sit Sacramentum, atque iccirco quamlibet aliam inter Christianos viri et mulieris, præter Sacramentum, coniunctionem, cuiuscumque etiam civilis legis vi factam, nihil aliud esse nisi turpem atque exitialem concubinatum ab Ecclesia tantopere damnatum; ac proinde a coniugali foedere Sacramentum separari numquam posse<sup>4)</sup>, et omnino spectare ad Ecclesiæ potestatem ea omnia decernere, quæ ad idem Matrimonium quovis modo possunt pertinere. Atque hæc omnia omittimus, propterea quod etiamsi hæc leges ab aliquibus e Deputatorum Consilio fuisse proposita, tamen plerique Deputati ac Senatores, Deo bene iuvante, eas leges reiiciendas esse decrevere, et horruerunt tot iam gravibus inflictis Ecclesiæ vulneribus alia nova imponere vulnera.

In tanta autem acerbitate Nos recreat singularis tum Bogotensis Archiepiscopi, tum aliorum illius Reipublicæ Antistitum religio, pietas ac sacerdotalis fortitudo et constantia. Ipsi enim probe memores loci, quem tenent, dignitatis, qua insigniti sunt, sacramenti, quo in solemni inauguratione se obstrinxerunt, illustribus Archiepiscopi vestigiis insistentes maxima cum eorum laude haud intermiserunt episcopalem tollere vocem contra tot illatas Ecclesiæ iniurias, ac promptissimi sunt pro ipsius Ecclesiæ defensione ad omnia subeunda pericula. Neque parum Nos quoque reficit egregia Neogranatensis populorum virtus, pietas, qui longe maxima ex parte summopere dolentes, et indignantes tam iniqua ac tristia contra eorum religionem et Antistites facta, nihil antiquius habent, quam publicis luculentisque testimoniis ostendere, sibi maxime cordi esse et catholicam profiteri religionem, et suos Antistites summa observantia et amore prosequi, ac Nobis et huic Apostolicæ Sedi catholicæ veritatis et unitatis centro firmiter adhaerere.

Iam porro, Venerabiles Fratres, vix dum Nobis innotuit, tam prava et nunquam satis improbanda consilia in Neogranatensi Republica contra Ecclesiam, eiusque sacra iura, bona, Pastores, Ministros suscepta ac perfecta fuisse, nunquam destitimus per nostrum Cardinalem a publicis Nostris Negotiis apud illud Gubernium iteratis expostulationibus reclamare et conqueri adversus tot gravissimas eidem Ecclesiæ et huic Apostolicæ Sedi illatas iniurias. Attamen, dolentes et inviti dicimus, nihil Nostræ voces, clamores et questus profecerunt, nihil illorum Antistitum querelæ valuerunt, qui proprii ministerii munere in exemplum fungentes, Nostrisque paternis Litteris confirmati, haud omiserunt opponere murum pro Domo Israel. Itaque ut fideles illic degentes sciant, et universus orbis agnoscat quam vehementer a Nobis improbenentur ea omnia, quæ ab illius Reipublicæ Moderatoribus contra Religionem, Ecclesiam, eiusque leges, Pastores, Ministros, et contra huiusmodi Beati Petri Cathedræ iura et auctoritatem gesta sunt, pastorem Nostram in amplissimo Vestro Consensu vocem apostolica libertate attollentes prædicta omnia decreta, quæ ibi a civili potestate tanto cum Ecclesiasticæ auctoritatis, et huius S. Sedis contemptu, ac tanta cum Religionis, et sacrorum Antistitum iactura ac detrimento sancita sunt, improbamus, damnamus, et irrita prorsus ac nulla declaramus. Præterea eos omnes, quorum opera et iussu illa edita sunt, gravissime monemus, ut serio reputent poenas et censuras, quæ adversus sacrarum personarum, et rerum, atque ecclesiasticæ potestatis et libertatis violatores, profanatores, et Ecclesiæ atque huius Apostolicæ Sedis iurium usurpatores ab Apostolicis Constitutionibus, sacrisque Conciliorum canonibus sunt constitutæ.

<sup>1)</sup> *Huc ref. prop.* 50.

<sup>2)</sup> " " " 74.

<sup>2)</sup> *Huc ref. prop.* 65—67.

<sup>4)</sup> " " " 73.

Utinam vero Nostris hisce vocibus, monitis, querelis tandem aliquando illi ipsi dociles praebeant aures, quorum opera tot tantisque malis oppressa ingemiscit Ecclesia; utinam huius moestissimae et amantissimae Matris aspectu commoti illam salutifera poenitentia consolari, eiusque gravissima vulnera lacrimis abstergere, ac damna statim reparare properent, atque ita haud exspectare et experiri velint, quam iratus iudex Deus in illos exurgat, qui suam Ecclesiam polluere, violare, et affligere audent! Nos autem, Venerabiles Fratres, numquam intermittamus dies noctesque clementissimum misericordiarum Patrem et Deum totius consolationis assiduus fervidisque precibus orare et obsecrare, ut divina sua gratia omnes errantes ad veritatis, iustitiae, et salutis semitas reducere velit, ac simul omnipotenti sua virtute efficiat, ut Ecclesia sua sancta tum ibi, tum alibi nefariis impiorum hominum consiliis tam vehementer afflicta ac divexata ponat luctum, squalorem abiciat, et induat vestes iucunditatis suae, atque a solis ortu usque ad occasum splendidiorebus in dies augeatur et exornetur triumphis.

## Allocutio

habita in consistorio secreto die IX. decembris anni MDCCCLIV <sup>1)</sup>

### Venerabiles Fratres.

Singulari quadam perfusi laetitia exultamus in Domino, Venerabiles Fratres, cum Vos hodierno die lateri Nostro frequentes adstare videamus, quos Nostrum gaudium et coronam iure possumus nuncupare. Vos enim pars estis eorum, quibuscum communicamus labores et curas in pascendo humilitati Nostrae concredito dominico grege universo, in tutandis iuribus catholicae religionis, eique novis adiungendis sectatoribus, qui iustitiae et veritatis Deum in sinceritate fidei colant, et venerentur. Itaque quod olim Christus Dominus dixit Apostolorum Principi: «Tu aliquando conversus confirma fratres tuos,» id ipsum Nobis, qui in eius locum, licet immerentes, divina benignitate suffecti sumus, hac oblata opportunitate praestandum videtur, ut Vobis nimirum, Venerabiles Fratres, verba faciamus, non ut Vos aut commoneamus officii, aut languentes excitemus, quos inflammatos studio novimus divini Nominis gloriae propagandae, sed ut tamquam voce ipsa Beatissimi Petri, qui vivit vivetque in Successoribus suis, recreati, atque erecti novo veluti robore muniamini ad quaerendam commissarum ovium salutem, ad Ecclesiae causam in tanta asperitate temporum animose ac fortiter sustinendam.

Neque vero deliberandum fuit, cuius potissimum adhibeamus patrocinium apud caelestem Patrem luminum, ut eo adiuvante alloqui Vos fructuose possimus; siquidem cum ea de causa apud Nos conveneritis, ut conspirantibus animis studia, curasque conferremus amplificando honori augustae Genitricis Dei Mariae, Sanctissimam ipsam Virginem, Sapientiae Sedem ab Ecclesia nuncupatam, iteratis precibus obsecravimus, ut impetrare Nobis radium velit sapientiae caelestis, qua collustrati ea Vobis loquamur, quae et incolunitati et prosperitati Ecclesiae Dei maximopere sint profutura. Iamvero ex hac tamquam arce religionis intuentibus Nobis errorum monstra, quae per catholicum orbem hac difficillima aetate grassantur, nihil opportunius visum est quam illa Vobis indicare, ut ad eadem debellanda vires exeratis vestras, Venerabiles Fratres, qui custodes praepositi estis, et speculatores domui Israel.

Existere etiam nunc dolendum est impium incredulorum genus, qui omnem, si fieri posset, exterminatum vellent religionis cultum, eisque adnumerandi inprimis sunt clandestinarum societatum gregales, qui nefario inter se foedere coniuncti nullas non adhibent artes, ut quibusque violatis iuribus rem et sacram et publicam perturbent, evertant<sup>2)</sup>; in quos profecto verba illa cadunt divini Reparatoris: «Vos ex patre diabolo estis, et opera

<sup>1)</sup> Huc referuntur Syllabi Propositiones 8, 17, 19.

<sup>2)</sup> Huc ref. §. IV. Syll.



patris vestri vultis facere.» Hos si excipiamus, fatendum est praesentis aetatis homines generatim abhorrere ab incredulorum pravitate, et inclinationem quamdam animorum ostendere erga religionem et fidem. Sive enim facinorum ob atrocitatem, quae superiori praesertim saeculo perpetrata incredulis tribuenda sunt, quaeque animus meminisse reformidat, sive ob metum seditionum ac tumultuum, qui miserandum in modum convellunt, afficiant nationes et regna, sive denique divini Spiritus opera, qui spirat ubi vult, imminutum esse patet perditorum numerum, qui incredulitate se iacent, et gloriantur; contra vero commendari audimus interdum vitae ac morum honestatem, excitatumque praeterea novimus in animis hominum admirationis sensum catholicam erga religionem, quae quidem in omnium incurrit oculos tamquam lux solis.

Non exiguum hoc est bonum, Venerabiles Fratres, et quidam quasi ad veritatem progressus; sed tamen multa adhuc sunt, quae a veritate plane assequenda absterrent homines et remorantur.

Sunt enimvero plerique, qui rebus publicis tractandis praepositi fautores se religionis, et adsertores dicant, illam laudibus attollant, humanaeque societati quam maxime accommodatam, atque utilem praedicant; nihilominus eius moderari disciplinam volunt, sacros ministros regere, sacrorum procuracionem attingere, uno verbo civilis intra status limites coercere nituntur Ecclesiam, eique dominari, quae tamen sui iuris est, divinoque consilio nullius imperii terminis contineri debet, sed ad ultimas terras propagari, omnesque complecti gentes ac nationes, ut sempiternae illis beatitudinis iter designet, expediat<sup>1)</sup>. Et, proh dolor! dum haec loquimur, Venerabiles Fratres, in Subalpina ditione proposita lex est, qua regularia et ecclesiastica instituta de medio tolluntur, et Ecclesiae iura plane conculcantur, atque, si fieri potest, delentur. Sed tamen de re tam gravi hoc ipso in loco alias ageamus. Utinam vero qui libertati obsistunt catholicae religionis, agnoscant aliquando quantopere publicae rei bono ipsa conducatur, quae sua cuique civium observanda proponit, et inculcat officia ex caelesti, quam accepit, doctrina; utinam persuadere sibi tandem velint quod olim Zenoni Imperatori scribebat sanctus Felix Praecessor Noster: «Nihil esse utilius Principibus, quam sinere Ecclesiam uti legibus suis; hoc enim illis esse salutare, ut cum de causis Dei agitur, regiam voluntatem Sacerdotibus Christi studentes subdere, non praeferre.»

Sunt praeterea, Venerabiles Fratres, viri quidam eruditione praestantes, qui religionem munus esse fatentur longe praestantissimum a Deo hominibus datum, humanam nihilominus rationem tanto habent in pretio, tantopere extollunt, ut vel ipsi religioni equiparandam stultissime putent<sup>2)</sup>. Hinc ex vana ipsorum opinione theologicae disciplinae perinde ac philosophicae tractandae sunt; cum tamen illae fidei dogmatibus innitantur, quibus nihil firmitus, nihil stabilius, istae vero humana explicitur atque illustrentur ratione, qua nihil incertius, utpote quae varia est pro ingeniorum varietate, innumerisque fallaciis et praestigiis obnoxia. Ita quidem reiecta Ecclesiae auctoritate difficillimis quibusque, reconditisque quaestionibus latissimus patuit campus, ratioque humana infirmis suis confisa viribus licentius excurrens turpissimos in errores lapsa est, quos hic referre nec vacat nec lubet, quippe Vobis probe cognitos atque exploratos, quique in religionis et civilis rei detrimentum, illudque maximum redundarunt. Quamobrem istis hominibus, qui plus aequo vires efferunt humanae rationis, ostendere oportet, plane id esse contrarium verissimae illi sententiae Doctoris gentium: «Si quis putet se aliquid esse, cum nihil sit, ipse se seducit.» Demonstrandum illis est quanta sit arrogantiae pervestigare mysteria, quae revelare nobis dignatus est clementissimus Deus, eademque assequi, complectique audere humanae mentis imbecillitate et angustiis, cum longissime ea vires excedant nostri intellectus, qui ex Apostoli eiusdem dicto captivandus est in obsequium fidei.

Atque huiusmodi humanae rationis sectatores, seu cultores potius, qui eam sibi certam veluti magistram proponunt, eiusque ductu fausta sibi omnia pollicentur, obliiti certe sunt quam grave et acerbum ex culpa primi

<sup>1)</sup> *Huc ref. prop. 19.*

<sup>2)</sup> *Huc ref. prop. 8, 9.*

parentis inflictum sit vulnus humanae naturae, quippe quod et obfusae tenebrae menti, et prona effecta ad malum voluntas. Hinc celeberrimi ex antiquissima aetate philosophi, quamvis multa praecellere scripserint, doctrinas tamen suas gravissimis erroribus contaminarunt; hinc assiduum illud certamen quod in nobis experimur, de quo loquitur Apostolus: «Sento in membris meis legem repugnantem legi mentis meae.» Nunc quando ex originis labe in universos Adami posteros propagata extenuatum esse constet rationis lumen, et ex pristino iustitiae atque innocentiae statu miserrime deciderit humanum genus, equis satis esse rationem ducat ad assequendam veritatem? Ecquis in tantis periculis, atque in tanta virium infirmitate ne labatur et corruat, necessaria sibi neget ad salutem religionis divinae, et gratiae coelestis auxilia? Quae quidem auxilia benignissime iis largitur Deus, qui humili prece eadem flagitent, cum scriptum sit: «Deus superbis resistit, humilibus autem dat gratiam.» Idcirco conversus olim ad Patrem Christus Dominus altissima veritatum arcana patefacta haud esse affirmavit prudentibus et sapientibus huius saeculi, qui ingenio doctrinaeque sua superbiunt, et praestare negant obsequium fidei, sed vero humilibus ac simplicibus hominibus, qui fidei divinae oraculo nituntur et conquiescunt. Salutare hoc documentum eorum animis inculcetis oportet, qui humanae rationis vim usque adeo exaggerant, illius ut ope mysteria ipsa scrutari audeant atque explicare, quo nihil ineptius, nihil insanius. Revocare illos contendite a tanta mentis perversitate, exponentes nimirum nihil esse praestabilius a providentia Dei concessum hominibus, quam fidei divinae auctoritatem, hanc nobis esse quasi facem in tenebris, hanc ducem quam sequamur ad vitam, hanc necessariam prorsus esse ad salutem, utpote quod «sine fide impossibile est placere Deo, et qui non crediderit, condemnabitur.»

Errorum alterum nec minus exitiosum aliquas catholici orbis partes occupasse non sine moerore novimus, animisque insedisse plerumque catholicorum, qui bene sperandum de aeterna illorum omnium salute putant, qui in vera Christi Ecclesia nequaquam versantur<sup>1)</sup>. Idcirco percontari saepenumero solent, quanam futura post obitum sit eorum sors et conditio, qui catholicae fidei minime addicti sunt, vanissimisque adductis rationibus responsum praestolantur, quod pravae huic sententiae suffragetur. Absit, Venerabiles Fratres, ut misericordiae divinae, quae infinita est, terminos audeamus apponere; absit ut perscrutari velimus arcana consilia et iudicia Dei, quae sunt abyssus multa, nec humana queunt cogitatione penetrari. Quod vero Apostolici Nostri muneris est, Episcopalem vestram et sollicitudinem et vigilantiam excitatam volumus, ut, quantum potestis contendere, opinionem illam impiam aequae ac funestam ab hominum mente propulsetis, nimirum quavis in religione reperiri posse aeternae salutis viam. Ea qua praestatis solertia ac doctrina, demonstretis commissis curae vestrae populis, miserationi ac iustitiae divinae dogmata catholicae fidei neutiquam adversari. Tenendum quippe ex fide est, extra Apostolicam Romanam Ecclesiam salvum fieri neminem posse, hanc esse unicam salutis arcam, hanc qui non fuerit ingressus, diluvio periturum<sup>2)</sup>; sed tamen pro certo pariter habendum est, qui verae religionis ignorantia laborent, si ea sit invincibilis, nulla ipsos obstringi huiusce rei culpa ante oculos Domini. Nunc vero quis tantum sibi arroget, ut huiusmodi ignorantiae designare limites queat iuxta populorum, regionum, ingeniorum, aliarumque rerum tam multarum rationem et varietatem? Enimvero cum soluti corporeis huiusmodi vinculis videbimus Deum sicuti est, intelligimus profecto quam arcto pulchroque nexu miseratio ac iustitia divina copulentur; quamdiu vero in terris versamur, mortali hac gravati mole quae hebetat animam, firmissime teneamus ex catholica doctrina unum Deum esse, unam fidem, unum baptisma; ulterius inquirendo progredi nefas est. Ceterum prout caritatis ratio postulat, assiduas fundamus preces, ut omnes quaquaversus gentes ad Christum convertantur, communique hominum saluti pro viribus inserviamus; neque enim abbreviata est manus Domini, gratiaeque caelestis dona nequaquam illis defutura sunt, qui hac luce recreari sincero animo velint et postulent. Huiusmodi veritates defendenda altissime sunt fidelium mentibus, ne falsis corrumpi queant doctrinis eo spectantibus,

<sup>1)</sup> *Huc ref. prop. 17.*

<sup>2)</sup> *Huc ref. prop. 21.*

ut religionis foveant indifferentiam, quam ad exitium animarum serpere latius videmus ac roborari.

Præcipuos contra errores hactenus expositos, quibus maxime hoc tempore oppugnatur Ecclesia, vestram opponite, Venerabiles Fratres, et virtutem et constantiam, ad eosque profligandos, planeque delendos habeatis Ecclesiasticos viros necesse est laboris socios et adiutores. Immortaliter quidem gaudemus catholicum Clerum nihil prætermittere, nihil molestiarum defugere, ut officio suo, ac muneri cumulate satisfaciatur; atque adeo non asperitate et longitudine itineris, non ullo incommodorum metu retardari quominus regiones pertingat terrarum marisque tractu disiunctissimas, ut efferatas ibi gentes ad humanitatem, et christianae legis disciplinam salubriter instituat; gaudemus pariter, Clerum ipsum in teterrimae luis calamitate, quae tot oppida, tot frequentissimas urbes funestavit, adeo alacriter obivisse quaelibet caritatis officia, ut vitam profundere ad salutem proximorum pulchrum sibi ac decorum existimaverit. Quo sane argumento magis constabit, catholica in Ecclesia, quae unice vera est, inextinctum ardere pulcherrimum caritatis ignem, quem Christus venit mittere in terram ut accendatur. Vidimus enim religiosas mulieres in adiuvandis aegris cum Clero certasse, neque mortis aspectu fuisse deterritas, quam pleraeque constantissime oppetiverunt: cuius inusitatae fortitudinis exemplo illi ipsi obstupefacti admiratione sunt, qui a catholica fide dissentiunt.

Est hoc Nobis iure laetandum, Venerabiles Fratres, verumtamen illud ad animi Nostri curam grave et acerbum, quibusdam in locis non deesse ex Clero aliquos, qui non semet exhibeant in omnibus ministros Christi, et dispensatores mysteriorum Dei. Hinc deest christiano populo divini verbi pabulum, unde nutriatur ad vitam, hinc infrequens sacramentorum usus, quibus tanta vis inest ad Dei gratiam vel conciliandam vel retinendam. Monendi hi quidem sunt, Venerabiles Fratres, ac vehementius excitandi, ut sacri ministerii partes recte ac fideliter explendas curent; docendi sunt quam gravi se culpa obstringant, qui messis multa cum sit, laborare detrectent in agro Domini. Hortandi sunt, ut quanta sit divinae hostiae virtus ad propitiandum Deum, et flagitiorum poenas avertendas, frequenter explicant fidelibus, ut iidem salutari Missae sacrificio religiose adesse, uberesque ex illo fructus percipere studeant. Sane quidem promptiores alicubi fideles essent ad pietatis actus exercendos, si vehementiora haberent a Clero et incitamenta et praesidia. Videtis hinc, Venerabiles Fratres, ad comparandos idoneos ministros Christi quanta sit Seminariorum necessitas et opportunitas; in quibus moderandis non civilis potestatis, sed Episcoporum dumtaxat versari debet cura et industria <sup>1)</sup>. Collectos ibi juvenes in spem religionis succrescentes ad pietatem doctrinamque sedulo informetis, ut duplici quasi instructi gladio boni olim milites esse queant ad praelianda praelia Domini. Tum in theologicis, tum vero in philosophicis etiam disciplinis probatae fidei scriptores eisdem proponatis, ne qua imbuantur opinione catholicae doctrinae minus consentanea.

Ita quidem Ecclesiae bono et incremento consultum per Vos erit, Venerabiles Fratres. Quo vero susceptae pro Ecclesia curae secundissimos habeant exitus, summa extet concordia opus est consensusque animorum, longeque dissidia quaelibet prohibeantur, quae solvunt caritatis vinculum, quaeque fovere solet vaferimus nostri generis inimicus utpote sibi ad nocendum opportunissima. Repetendum memoria est, veteres illos catholicae fidei propugnatores de pertinacissimis haeresibus retulisse victoriam, quum scilicet una secum, et cum Apostolica Sede tamquam cum duce suo coniuncti milites <sup>2)</sup> firmo animo erectoque in certamen descendissent <sup>3)</sup>.

Haec sunt, quae significanda Vobis duximus, Venerabiles Fratres, in hac cura et sollicitudine satis Apostolico ministerio faciendi, quod divina clementia et bonitate impositum est infirmitati Nostrae. Erigimur primum, ac recreamur spe caelestis auxilii, deinde ab explorato vestro religionis ac pietatis studio non mediocriter Nobis pollicemur in tantis rerum difficultatibus adiumentum. Aderit Ecclesiae suae Deus, aderit communibus votis Nostris, aderit praesertim si oratrix pro nobis accedat Virgo Sanctissima Dei parens

<sup>1)</sup> Huc ref. prop. 46.

<sup>2)</sup> Huc ref. prop. 13.

Maria, cuius immunitatem ab originalis noxae macula Vobis magno cum Nostro gaudio adstantibus et plaudentibus divino adiuvante Spiritu pronunciamus. Eximium sane privilegium, quod Dei Matrem plane decebat, in communi nostri generis exitio sospitem atque incolumem evasisse. Atque huius privilegii amplitudo plurimum quidem valitura est ad eos refellendos, qui deteriorem factam esse inficiantur ex primaeva culpa hominum naturam, viresque amplificanti rationis ad negandum vel minuendum revelatae religionis beneficium. Faxit tandem Virgo Beatissima, quae interemit ac perdidit universas haereses, ut hic etiam evellatur stirpitis, ac deleatur rationalismi error perniciosissimus, qui hac miserrima aetate non civilem modo societatem, sed vero etiam tantopere affligit et vexat Ecclesiam.

Reliquum nunc est, Venerabiles Fratres, ut quanto animi Nostri solatio summa Vos alacritate ex dissitis etiam terris properasse conspeximus ad Apostolicam hanc Sedem, propugnaculum fidei, magistram veritatis, catholicae unitatis firmamentum, tanto perinde amoris studio anteaquam sedes repetatis vestras, omnia Vobis precemur fausta, felicia ac salutaria. Arbiter ille omnium rerum et bonorum auctor Deus det Vobis spiritum sapientiae et intellectus, ut prohibeatis ab ovium perniciem ubique latentes insidias, ac quidquid ad commoditatem vestrarum Ecclesiarum vel suscepistis iam, vel eritis suscepturi, id praepotenti numine suo bonus propitiusque confirmet; permissis autem Vestrae curae fidelibus det illam mentem, ut abstrahere se nunquam velint a pastoris latere, sed vocem ipsius audiant, quoque ipse velit, accurrant. Adsit Vobis Virgo Sanctissima ab origine Immaculata; sit ipsa Vobis in dubiis rebus fidele consilium, in angustiis levamen, in adversis auxilium. Ad extremum levantes manus Nostras in caelum, Vobis gregique vestro ex intimo cordis affectu benedicimus. Sit porro Apostolicae huius benedictionis munus tamquam pignus certissimum caritatis erga Vos Nostrae, sit exploratissimum tamquam omen beatissimae vitae ac sempiternae, quam Vobis gregique vestro et optamus et poscimus a Supremo animarum pastore Christo Iesu, cui cum Patre et Sancto Spiritu sit et honor et laus et gratiarum actio per omnem aeternitatem.

## Allocutio

habita in consistorio secreto die XXII. ianuarii anno MDCCCLV<sup>1)</sup>

### Venerabiles Fratres.

Probe memineritis, Venerabiles Fratres, quanto animi Nostri moerore ex hoc ipso loco Vobiscum saepe lamentati fuerimus maxima sane damna, quibus plures abhinc annos catholica Ecclesia in Subalpino Regno miserandum in modum affligitur, ac divexatur. Nullam certe quidem sollicitudinis, studii, et longanimitatis partem praetermisimus, ut pro Apostolici Nostri ministerii officio tot malis mederi possemus, summopere optantes aliquid tandem Vobis nuntiare, quod Nostrum, Vestrumque dolorem aliqua saltem ex parte leniret. Irritae tamen fuere Nostrae omnes sollicitudines, nihilque valuerunt tum iteratae expostulationes per Nostrum Cardinalem a publicis negotiis, tum curae per alium Cardinalem Nostrum Plenipotentiarium adhibitae, tum familiares Nostrae Epistolae ad carissimum in Christo Filium Nostrum Sardiniae Regem Illustrem datae. Namque omnes norunt plurima facta, atque decreta, quibus illud Gubernium cum summo bonorum omnium luctu et indignatione, solennes cum hac Apostolica Sede initas Conventiones plane contemnens, non dubitavit quotidie magis et Sacros Ministros, et Episcopos, Religiosasque Familias exagitare, et Ecclesiae immunitatem, libertatem, eiusque veneranda iura laedere, violare, ac bona usurpare, et gravissimas eidem Ecclesiae ac Supremae Nostrae, et huius Sanctae Sedis auctoritatis iniurias inferre, eamque plane despiciere. Nuper vero, ut scitis, alia in medio posita lex est vel ipsi naturali, divino, et sociali iuri omnino repugnans, et humanae societatis bono vel maxime adversa, ac perniciosissi-

<sup>1)</sup> *Huc refertur Syllabi Propositio 53.*

mis funestissimisque *Socialismi* et *Communismi* erroribus plane favens, qua inter alia proponitur, ut omnes fere Monasticae, Religiosaeque utriusque sexus Familiae, et Collegiatae Ecclesiae, ac Beneficia simplicia etiam iuris patronatus penitus extinguantur, utque illorum bona et redditus civilis potestatis administrationi et arbitrio subiiciantur, et vindicentur). Insuper eadem proposita lege attribuitur laicae potestati auctoritas praescribendi condiciones, quibus reliquae Religiosae Familiae quae de medio minime fuerint sublatae, subiacere debeant.

Equidem nobis verba desunt ad explicandam amaritudinem, qua intime conficimur, cum videamus tot vix credibilia, planeque teterrima fuisse patrata, atque in dies patrari contra Ecclesiam, eiusque veneranda iura, contra supremam et inviolabilem huius Sanctae Sedis auctoritatem in illo Regno, ubi quamplurimi egregii existunt catholici, et ubi Regum praesertim pietas, religio, atque in hanc Beati Petri Cathedram, eiusque Successores observantia in exemplum olim vigeabant, atque florebant. Cum autem res eo fuerint deductae, ut satis non sit illata Ecclesiae damna deplorare, nisi curam omnem et operam ad illa tollenda adhibeamus, ideo muneris Nostri partes implentes, in hoc amplissimo Vestro consensu Nostram iterum vocem apostolica libertate attollimus, ac non solum omnia et singula decreta ab illo Gubernio in Religionis, Ecclesiae, et huius Sanctae Sedis iurium, et auctoritatis detrimentum iam prolata, verum etiam legem recens propositam reprobamus, et damnamus, illaque omnia irrita prorsus ac nulla declaramus. Praeterea tum eos omnes, quorum nomine, opera et iussu ipsa decreta iam edita sunt, tum illos, qui legi nuper propositae quovis modo favere, vel illam probare, aut sancire non formidaverint, gravissime monemus, ut etiam atque etiam animo menteque reputent poenas, et censuras, quae ab Apostolicis Constitutionibus, sacrorumque Conciliorum Canonibus, maxime Tridentini<sup>1)</sup>, adversus rerum sacrarum praedatores, et profanatores, ecclesiasticae potestatis, ac libertatis violatores, et Ecclesiae, Sanctaeque Sedis iurium usurpatores constitutae sunt. Utinam tantorum malorum auctores Nostri hisce vocibus, monitisque permoti atque excitati tandem aliquando cessent a tot ausibus contra ecclesiasticam immunitatem, et libertatem, ac properent reparare innumera damna Ecclesiae illata, atque ita paterno Nostro animo durissima avertatur necessitas animadvertendi in ipsos illis armis, quae sacro Nostro ministerio divinitus fuere attributa!

Ut autem catholicis orbis perspiciat curas a Nobis pro Ecclesiae causa in Subalpino Regno tuenda susceptas, ac simul cognoscat agendi rationem, quae ab illo Gubernio adhibita fuit, peculiarem rerum expositionem typis edi, et cuique Vestrum tradi iussimus.

Antequam vero loquendi finem faciamus, haud possumus, quin summis meritisque laudibus efferamus Venerabiles Fratres eiusdem Subalpini Regni Archiepiscopos et Episcopos, qui propriae dignitatis et officii memores, Nostrique votis quam cumulatissime respondentes, nunquam destiterunt singulari virtute et constantia qua voce, qua scriptis opponere murum pro Domo Israel, ac Dei, eiusque sanctae Ecclesiae causam strenue propugnare. Atque hic gratulamur quoque ex animo tot spectatissimis laicis Viris, qui in illo Regno morantes, et catholicis sensibus egregie animati, ac Nobis et huic Apostolicae Sedi firmiter adhaerentes, gloriati sunt sacra Ecclesiae iura tum voce, tum scriptis palam publiceque defendere.

Interim a Vobis, Venerabiles Fratres, qui in partem sollicitudinis Nostrae vocati estis, exposcimus, ut una Nobiscum, potentissimo Immaculatae Virginis Mariae patrocinio suffulti, assiduas fervidasque preces Deo adhibere nunquam desinatis, ut caelesti sua ope Nostri curis et conatibus adesse, atque omnipotenti sua virtute Ecclesiae suae sanctae causam tueri, et errantes ad veritatis et iustitiae semitam reducere velit.

<sup>1)</sup> *Huc ref. prop.* 53.

<sup>2)</sup> Sess. XXII. cap. 11.

## Allocutio

habita in consistorio secreto die XXVI. iulii anni MDCCCLV<sup>1)</sup>.

### Venerabiles Fratres.

Cum saepe in hoc Vestro consessu, veluti optime nostis, Venerabiles Fratres, non sine maximo animi Nostri dolore afflictas in Subalpino Regno sanctissimae Religionis res lamentati simus, tum praesertim in Allocutione die vigesimo secundo Januarii huius anni ad Vos habita, typisque edita, denuo conquesti sumus acerbissima sane vulnera, quae plures ab hinc annos Subalpinum Gubernium catholicae Ecclesiae, eiusque potestati, iuribus, sacrisque Ministris, Episcopis, ac supremae Nostrae et huius Sanctae Sedis potestati et dignitati in dies imponere non desinit. Qua quidem Allocutione Apostolicam Nostram iterum extollentes vocem reprobavimus, damnavimus, et irrita prorsus ac nulla declaravimus tum omnia et singula decreta ab eodem Gubernio in Religionis, Ecclesiae, et huius Sanctae Sedis iurium detrimentum edita, tum iniustissimam, funestissimamque legem tunc in medio positam, qua inter alia proponebatur, omnes fere Monasticas ac Religiosas utriusque sexus Familias, et Collegiales Ecclesias, ac simplicia Beneficia iuris quoque patronatus penitus esse extinguenda, illorumque redditus et bona civilis potestatis administrationi et arbitrio subiicienda. Neque omisimus tantorum malorum auctores, fautoresque eademque Allocutione monere, ut etiam atque etiam animo reputarent censuras, poenasque spirituales, quas Apostolicae Constitutiones, et Oecumenicorum Conciliorum decreta contra iurium, bonorumque Ecclesiae invasores facto ipso incurrendas infligunt. Ea porro spe sustentabamur fore, ut ipsi, qui catholico nomine gloriantur, et in eo morantur Regno, in quo vel ipsum Statutum decernit, catholicam Religionem esse debere solam ipsius Regni religionem, ac simul praescribit, omnes proprietates sine ulla exceptione inviolabiles esse tuendas, tandem aliquando iustissimis Venerabilium Fratrum ipsius Regni praestantium Antistitum expostulationibus, ac Nostris iteratis reclamationibus, querelis, paternisque monitis commoti suas mentes, voluntatesque ad saniora consilia revocarent, atque a divexanda Ecclesia desisterent. Quam spem ostendebant nonnulla potissimum promissa iisdem Episcopis facta, quibus fidem haberi posse arbitrabamur.

At dolentes dicimus, non solum Subalpinum Gubernium nec suorum Episcoporum postulationibus, nec Nostris vocibus auditum praebuilt, verum etiam graviores semper Ecclesiae ac Nostrae et huius Apostolicae Sedis auctoritati inferens iniurias, ac plures Nostras protestationes et paterna etiam monita plane contemnens, haud reformidavit commemoratam quoque legem, verbis licet et specie quadam immutatam, sed re tamen, fine ac spiritu prorsus eandem approbare, sancire, et promulgare. Equidem gravissimum, molestissimumque Nobis est, Venerabiles Fratres, debere ab ea mansuetudine ac lenitate, quam a natura ipsa hausimus, expressimus, atque ab aeterno Pastorum Principe didicimus, et quam ideo constanti voluntate semper libentissime exercuimus, deflectere, ac severitatis partes, a quibus paternus Noster animus vel maxime abhorret, suscipere. Attamen cum videamus, omnem curam, sollicitudinem, longanimitatem et patientiam pro reparandis illic Ecclesiae ruinis a Nobis sex et amplius ab hinc annos adhibitam nihil valuisse, nullamque affulgere spem fore, ut tantorum ausuum auctores velint hortationibus dociles praebere aures, quandoquidem ipsi Nostris monitis omnino despectis non cessant iniurias iniuriis cumulare, et omnia conari, ut in Subalpino Regno Ecclesiam, eiusque potestatem, iura, libertatem oppriment, ac funditus evertant, cogimur in illos ecclesiastica severitate uti, ne officio Nostro deesse, et Ecclesiae causam deserere videamur. Atque hac agendi ratione, veluti probe scitis, illustribus inhaeremus exemplis tot Romanorum Pontificum Decessorum Nostrorum, qui sanctitate ac doctrina insignes non dubitarunt degeneres, contumacesque Ecclesiae filios, eiusque iurium pertinaces violatores et usurpatores iis poenis plectere, quae a Sacris Canonibus contra eiusmodi eriminum reos sunt constitutae.

<sup>1)</sup> *Huc refertur Syllabi Propositio 53.*

Quamobrem in hoc amplissimo Vestro conventu Apostolicam Nostram iterum efferimus vocem, ac tam enunciatam legem, quam alia omnia et singula facta et decreta a Subalpino Gubernio in Religionis, Ecclesiae, ac Nostrae et huius Sanctae Sedis auctoritatis et iurium detrimentum edita, de quibus tum in Nostra Allocutione die vigesimo secundo Januarii ventitis anni habita, tum in hac praesenti dolenter loquuti sumus, denuo reprobamus, condemnamus, ac nulla prorsus et irrita decernimus. Praeterea cum incredibili animi Nostri moerore cogimur declarare, eos omnes, qui in Subalpino Regno praedicta decreta et legem contra Ecclesiae et huius Sanctae Sedis iura proponere, probare, sancire non extimuerunt, nec non illorum mandantes, fautores, consultores, adhaerentes, executores maiorem excommunicationem, aliasque censuras et poenas ecclesiasticas a Sacris Canonibus, Apostolicis Constitutionibus, et generalium Conciliorum, Tridentini<sup>1)</sup> praesertim, decretis inflictas incurrisse. Etsi vero inevitabili muneris Nostri implendi necessitate compulsi Apostolicam adhibeamus severitatem, tamen probe noscimus, atque meminimus, Illius vicariam hic in terris Nos, licet immeritos, gerere operam, qui cum iratus fuerit misericordiae recordatur. Quocirca levantes oculos Nostros ad Dominum Deum nostrum, ab Ipso humiliter enixeque exposcere non desistimus, ut degeneres Ecclesiae suae sanctae filios cuiusque ordinis, gradus, et conditionis, tum laicos, tum Clericos sacro etiam characterе insignitos, quorum errata nunquam satis lugeri possunt, caelestis suae gratiae lumine illustrare, illosque ad sanio rem mentem reducere velit, cum nihil cordi Nostro gratius, nihil optabilius, nihil iucundius esse possit, quam ut errantes resipiscant, ac redeant ad cor. Neque omittimus in omni oratione et obsecratione cum gratiarum actione ipsum divitem in misericordia Deum exorare, ut uberrimis quibusque divinae suae gratiae donis omnes Venerabiles Fratres Subalpini Regni Archiepiscopos et Episcopos in tot angustiis ac tribulationibus constitutos adiuvari et consolari nunquam desinat, quo ipsi, veluti adhuc tanta cum sui nominis laude egerunt, pergant egregia sua episcopali virtute, constantia, et prudentia Religionis et Ecclesiae causam strenue defendere, ac proprii gregis salutem et incolumitatem studiosissime advigilare. Atque humillimas quoque, fervidasque clementissimum misionum Domino sine intermissione offerimus preces, ut caelestis sua ope confortare dignetur non modo fidelem illius Regni Clerum, qui maxima ex parte suorum Antistitum exempla sequens proprio munere praeclare fungitur, verum etiam tot spectatissimos ipsius Regni laicos viros, qui catholicis sensibus egregie animati, ac Nobis, et huic Petri Cathedrae ex animo addicti, eorum operam in Ecclesiae iuribus tuendis impendere vehementer gloriantur.

## Allocutio

habita in consistorio secreto die XXVI. iulii anni MDCCCLV<sup>2)</sup>.

### Venerabiles Fratres.

Nemo vestrum ignorat, Venerabiles Fratres, quatuor nondum elapsos esse annos, ex quo nullis neque curis, neque consiliis, neque laboribus Nobis parcendum esse duximus, ut ecclesiasticis in Hispania negotiis consulere mus. Notissima Vobis est Conventio a Nobis cum carissima in Christo Filia Nostra Maria Ehsabeth Hispaniarum Regina Catholica anno millesimo octingentesimo quinquagesimo primo inita, ac veluti lex Status eo in Regno sancita, et sollemniter promulgata. Neque Vos latet quomodo in eadem Conventione inter plurima, quae statuta fuerunt ad catholicae religionis rationes tuendas, cautum in primis fuerit, ut ipsa augusta religio, quocumque alio cultu excluso, pergens esse sola religio hispanicae Nationis, esset ut antea in universo Hispaniarum Regno conservanda cum omnibus iuribus et praerogativis, quibus potiri debet iuxta legem et Canonicas Sanctiones: ut institutio in omnibus quibusque publicis, privatisque scholis foret omnino

<sup>1)</sup> Sess. XXII. cap. 11.

<sup>2)</sup> *Huc refertur Syllabi Propositio 77.*

conformis catholicae doctrinae; ut sacrorum praesertim Antistites in episcopali munere obeundo, et in iis, quae ad ius et exercitium ecclesiasticae auctoritatis, sacraeque Ordinationis pertinent, plena illa uterentur libertate, quam Sacri Canones statuunt; ut Ecclesia nativo suo iure libere omnino polleret, acquirendi scilicet legitimo quovis titulo novas possessiones, et inviolabilis esset eiusmodi Ecclesiae proprietas in omnibus, quae tunc possidebat, vel in posterum acquireret. Hinc ea profecto nitebamur fiducia fore, ut Pontificiae Nostrae curae et sollicitudines optatum assequerentur exitum, et catholica Ecclesia iuxta Nostra desideria in Hispania prospere feliciterque denuo magis in dies vigeret, atque floresceret, cum praesertim omnis illa inclyta Natio catholicam religionem profiteri et huic Petri Cathedrae firmiter adhaerere vehementer gloriatur<sup>1)</sup>

Verum cum summa animi Nostri admiratione et amaritudine vidimus, quod nunquam fore putavissemus, eo in Regno commemoratam Nostram Conventionem, ipsa hispaniensi Natione nedum invita, sed etiam summopere moerente et reclamante, impune frangi ac violari, novasque Ecclesias, eiusque iuribus, Episcopis, ac supremae Nostrae, Sanctaeque huius Sedis potestati iniurias inferri, quas apud Vos condolare compellimur, Venerabiles Fratres. Etenim latae fuerunt leges, quibus primus et secundus ipsius Conventionis articulus non absque levi religionis detrimento invertitur, itemque praecipitur Ecclesiae bona esse vendenda. Accedit etiam ut varia edita fuerint decreta, quibus interdicitur Episcopis sacros Ordines conferre, et Virgines Deo sacrae prohibentur in tirocinium proprii Religiosi instituti alias mulieres admittere, et statuunt Cappellaniae laicales, aliasque pias institutiones in saecularem plane statum esse redigendas. Ubi primum novimus tam graves Religioni, Ecclesiae, Nobis et huic Sanctae Sedi parari iniurias, Nostro fungentes munere nulla interposita mora haud praetermissimus tum per Nostrum Cardinalem Secretarium Status, tum per Nostrum negotiorum Gestorem Matriti morantem contra omnes huiusmodi ausus apud Matritense Gubernium vehementer protestari et reclamare. Atque eidem Gubernio significandum quoque duximus, Nostras reclamaciones ad fidelium notitiam esse deducendas, nisi proposita lex de bonis Ecclesiae alienandis reiiceretur, ut fideles ipsi ab illis emendis se abstinerent. Illud etiam ad Matritensis Gubernii memoriam revocavimus, veluti in Apostolicis Nostris de eadem Conventione Litteris clare aperteque ediximus, quod cum pacta in eadem Conventione sancita tam graviter violarentur et frangerentur, non amplius locum haberet indulgentia a Nobis ob ipsius Conventionis rationem adhibita, qua declaravimus, nullam a Nobis, ac Romanis Pontificibus Successoribus Nostris molestiam eos esse habituros, qui Ecclesiae bona ante eandem Nostram Conventionem alienata acquisiverant.

Sed non solum irritae fuerunt iustissimae Nostrae reclamaciones, ac praestantium Hispaniae Sacrorum Antistitum expostulationes, verum etiam nonnulli ex spectatissimis illis Episcopis, qui merito atque optimo iure commemoratis legibus ac decretis obstiterant, a propriis Dioecesisbus violenter avulsi fuerunt, et alio amandati ac relegati. Probe intelligitis, Venerabiles Fratres, quo conficiamur moerore, cum conspiciamus tot curas ac sollicitudines pro ecclesiasticis in illo Regno instaurandis negotiis frustra a Nobis fuisse susceptas, atque ibi denuo Christi Ecclesiam gravissimis affligi calamitatibus, eiusque libertatem et iura, ac Nostram et huius Sanctae Sedis auctoritatem conculcari. Itaque haud passi sumus, Nostrum negotiorum Gestorem longius ibi morari, illique mandavimus, ut ab Hispania decederet, et in hanc Urbem rediret. Vehementer quidem dolemus, propterea quod illustrem hispanam Nationem Nobis ob eximium eius in rem catholicam studium, et egregia in Ecclesiam, ac Nos, et hanc Apostolicam Sedem merita summopere dilectam, ex hac nova sacrarum rerum perturbatione in religionis periculum iterum adductam esse perspicimus. Cum autem Apostolici Nostri ministerii officium omnino postulet, ut Ecclesiae causam Nobis divinitus commissam totis viribus propugnemus, tum haud possumus, quin palam publiceque ac sollemniori modo Nostras querelas et expostulationes proferamus.

<sup>1)</sup> Vide supra, pag. 64. sqq.

<sup>2)</sup> Huc ref. prop. 77, coll. 51. 53.



Quapropter in hoc vestro consensu Nostram attollentes vocem etiam atque etiam de iis omnibus expostulamus, quae in Hispania a laica potestate perperam gesta sunt et geruntur adversus Ecclesiam, eiusque libertatem, iura, et adversus Nostram, atque huius Sanctae Sedis auctoritatem; ac praesertim maiorem in modum lamentamur, solemnem Nostram Conventionem vel ipso gentium iure reclamante violatam, et propriam Episcoporum auctoritatem in sacri ministerii exercitio praepeditam, et violentiam contra ipsos Episcopos adhibitam, et Ecclesiae patrimonium contra omnia divina et humana iura usurpatum. Insuper commemoratas leges et decreta auctoritate Nostra Apostolica reprobamus, abrogamus, illaque prorsus irrita, ac nullius roboris fuisse et fore declaramus. Summa autem qua possumus contentione tantorum auctorum auctores monemus, hortamur et obsecramus, ut serio considerent, Dei manum eos omnes effugere non posse, qui Ecclesiam suam sanctam affligere et vexare non reformidant.

Nunc Nobis temperare non possumus, quin vel maxime gratulemur, et amplissimas meritasque laudes deferamus Venerabilibus Fratribus Hispaniae Archiepiscopis et Episcopis, qui proprium obeuntes munus, nulloque periculo deterriti coniunctis animis, studiis, consiliis episcopalem vocem efferre, et Ecclesiae causam strenue constanterque defendere non omiserunt. Praecipuas quoque laudes tribuamus oportet hispaniensi fidei Clero, qui propriae vocationis et officii memor sua omnia studia in id conferre non praetermisit. Debito etiam laudum praeconio prosequimur tot egregios laicos hispanos viros, qui singulari erga sanctissimam Religionem, Ecclesiam, et erga Nos atque hanc Sanctam Sedem pietate et obsequio spectati, tum voce tum scriptis ipsius Ecclesiae iura defendere summopere sunt gloriati. Atque Apostolicae Nostrae caritatis affectu deplorandam sane miserantem conditionem, in qua illustris illa, Nobisque carissima Natio, etusque Regina in praesentia versantur, cuius precibus Deo Optimo Maximo supplicamus, ut ipsam Nationem et Reginam omnipotenti sua virtute tueri, consolari, et a tantis angustiis eripere velit.

Iam vero noscatis velimus, Venerabiles Fratres, incredibili Nos angustitudine ob luctuosissimum sane statum, ad quem redacta est sanctissima nostra religio in Helvetia, ac praesertim, prohi dolor! in quibusdam potioribus catholicis eorum foederatarum regionum pagis. Namque ibi et catholicae Ecclesiae potestas, atque libertas oppressa, et Episcoporum, sanctaeque huius Sedis proculcata auctoritas, et matrimonii ac iurisiurandi sanctitas violata et spreta, et Clericorum Seminaria, ac Religiosarum Familiarum Coenobia vel penitus extincta, vel civilis potestatis arbitrio omnino subiecta, et beneficiorum collatio atque ecclesiastica bona usurpata, et catholicus Clerus miserandum in modum exagitatus ac divexatus. Haec sane tristissima, ac nunquam satis lugenda, et omnino improbanda Vobis hodierno die raptim significamus, quandoquidem consilium Nobis est in hoc vestro consensu alium super eiusmodi acerbissimo argumento habere sermonem.

Interim ne intermittamus unquam, Venerabiles Fratres, assiduus fervidisque precibus clementissimum misericordiarum Patrem et Deum totius consolationis dies noctesque orare et obsecrare, ut Ecclesiam suam sanctam tot undequaque calamitatibus pressam, tot undique procellis iactatam in potentia brachii sui adiuvet, defendat, eamque ab omnibus, quibus affligitur, adversitatibus eripiat.

## \* Allocutio

habita in consistorio secreto die III. novembris anni MDCCCLV.

Venerabiles Fratres.

Quod pro Apostolica Nostra de universo Dominico grege sollicitudine, ac paterna erga omnes fideles populos Imperiali et Regiae Austriacae Domui subiectos caritate vel ab ipsis supremi Nostri Pontificatus primordiis omni studio curavimus, et maxime concupivimus, Venerabiles Fratres, ut nempe sanctissimae nostrae religionis rebus, ac rationibus in vastissimo illo imperio

consulere possemus, id singulari Dei Optimi Maximi beneficio, et insigni Carissimi in Christo Filii Nostri Francisci Iosephi Austriae Imperatoris et Regis Apostolici pietate, Nobis tributum esse vehementer laetamur. Namque idem religiosissimus Princeps, ubi aviti sui imperii gubernacula tractanda suscepit, iustissimis Nostris ac Praedecessorum Nostrorum votis quam libentissime obsecrands, ac probe noscens, ex divina nostra religione eiusque salutifera doctrina veram populorum felicitatem, incolumitatem, tranquillitatemque omnino pendere<sup>1)</sup>, nihil sibi antiquius habendum esse duxit, quam in amplissimis suis ditionibus Catholicae Ecclesiae libertatem cum maxima sui nominis gloria, et ingenti bonorum omnium gratulatione asserere ac tueri. Nostris deinde curis omni alacritate et filiali prorsus pietate magis in dies obsequutus a Nobis enixe efflagitavit, ut cum ipso Conventionem inire vellemus, qua et ecclesiastica in suo imperio negotia componere, et spirituali illorum populorum utilitati Auctoritate Nostra Apostolica maiorem in modum prospicere valeremus. Vos ipsi, Venerabiles Fratres, vel facile intelligitis, quanta animi Nostri incunditate exceperimus has Caesareae et Apostolicae Maiestatis postulationes, omni certe laude dignas, quae Nostris ac Decessorum Nostrorum optatis studiisque plane respondentes ostendunt quo religionis amore idem praestantissimus Princeps eniteat. Nulla igitur interposita mora, curas omnes cogitationesque Nostras ad tam salutare conficiendum negotium convertimus, ac Deo bene iuvante, exoptatam cum eodem Carissimo in Christo Filio Nostro Conventionem absolvimus, cui ex utraque parte delecti Plenipotentiarii subscripserunt, nomine scilicet Nostro Dilectus Filius Noster Michael S. R. E. Presbyter Cardinalis Viale Prelà, Noster et huius Sanctae Sedis apud ipsam Caesaream et Apostolicam Maiestatem Pro-Nuntius, ac nuper a Nobis Bononiensis Archiepiscopus renunciatus; nomine vero eiusdem clarissimi Imperatoris et Regis Venerabilis Frater Iosephus Othmarus Archiepiscopus Vindobonensis. Quam quidem Conventionem iam a Nobis ipsoque Imperatore et Rege ratam habitam Vobis exhiberi iussimus cum Nostris Apostolicis Litteris, quibus illam rite solemniterque confirmavimus.

Nunc vero non possumus, quin palam publiceque in hoc amplissimo vestro consensu summam illam Vobiscum communicemus laetitiam, quam ex hoc faustissimo eventu percepimus, cum datum Nobis fuerit ea statuere, quae in vastissimo illo imperio tum ad Catholicae Ecclesiae et huius Sanctae Sedis dignitatem, auctoritatem, doctrinam, ac iura tuenda, tum ad spirituale illorum populorum bonum quotidie magis procurandum fovendumque maxime pertinent. Etenim, Venerabiles Fratres, illud in primis eadem in Conventionem cautum fuit, ut Religio Catholica Apostolica Romana in universo Austriaco Imperio, et in singulis, quibus illud constituitur, Ditionibus sarta etaque semper sit servanda cum iis omnibus iuribus et praerogativis, quibus ex Dei ordinatione, et canonicis sanctionibus ipsa frui ac potiri omnino debet. Cum autem Romanus Pontifex Christi hic in terris Vicarius, et beatissimi Apostolorum Principis Successor primatum tam honoris quam iurisdictionis in universam, qua late patet, Ecclesiam divino obtineat iure,

<sup>1)</sup> *Huc ref. prop. 40.* — His adde, quae a Ss. D. N. Pio IX., post quatuor mensium iter Romam reverso, die 25. Sept. 1857 in Allocutione „Cum primum“ pronuntiantur. „Quae cum ita sint, Venerabiles Fratres, laudem Domini loquatur os nostrum, et anima, spiritus ac lingua nostra benedicat nomen sanctum Eius, propterea quod singulari suo beneficio sanctissima Eius fides ac religio in populorum animis feliciter viget, non vero defecit, quemadmodum vellent Dei hominumque hostes, qui Satanae administri ambulantes in impietatibus suis divinam nostram fidem religionemque usquequaque tollere conantur, neque erubescunt impie ac stulte asserere, *catholicae religionis tempus abisse*. Sed illorum desiderium peribit, atque nefarii multiplicesque eorum conatus irriti semper erunt. Catholica namque religio ad hominum salutem e caelo in terram delapsa, divinis undique circummunita praesidiis, et caelestium divitiarum ditata thesauris, nulla unquam neque temporis diuturnitate, neque rerum vicissitudine potest laefactari, sed omnia per petuo vincens certamina, ac de suis hostibus triumphans, omni tempore stabilis immota et invicta persistet usque ad consummationem saeculi, et portae inferi ac versus eam praevalere nunquam poterunt.“

tum catholicum hoc dogma in ipsa Conventione luculentissimis fuit verbis expressum, ac propterea simul de medio sublata, et radicitus evulsa, penitusque deleta falsa illa perversa, et funestissima opinio, eidem divino primatui eiusque iuribus plane adversa, et ab hac Apostolica Sede semper damnata atque proscripta, de habenda scilicet a civili Gubernio venia, vel executione eorum, quae res spirituales, et ecclesiasticae negotia respiciunt<sup>1)</sup>. Quocirca sancitum fuit, ut prorsus libera, et nulli unquam cuiusque generis regiae veniae obnoxia esse debeat mutua omnium Austriacae Ditionis sacrorum Antistitum, Cleri, et fidelium populorum cum hac Apostolica Sede communicatio in rebus spiritualibus, ecclesiasticisque negotiis. Neque minori certe studio consultum est, ut sacrorum Antistites in episcopali munere fungendo plenam habeant libertatem, quo in proprii gregis salutem procurandam magis in dies incumbere possint. Siquidem inter alia statutum est, ut Archiepiscopi et Episcopi omnimoda libertate possint non solum cum suo Clero populoque fidei communicare, verum etiam pastorales epistolas, instructiones, et mandata de ecclesiasticis rebus publicare; et clericos ad sacrorum Canonum normam ecclesiasticae militiae adscribere, eosque sacris ordinibus initiare, et quos indignos existimaverint ab illis arcere; beneficia minora erigere; paroecias fundare, ac ordinare; publicas preces, supplicationes praescribere, et indicere; et Synodos cum provinciales, tum dioecesananas cogere; ac pestiferos libros religioni morumque honestati perniciosos censura perstringere, et ab illorum lectione fideles detertere<sup>2)</sup>. Et quoniam rei cum sacrae tum civilis maxime interest, ut adolescentes pietatem sanamque doctrinam mature addiscant, ideoque cautum est, ut in singulis publicis privatisque scholis omnis catholicae iuventutis institutio cum catholicae Ecclesiae doctrina plane congruere debeat<sup>3)</sup>. Quapropter Episcoporum erit ex proprii officii munere non solum religiosos iuventutis educationem in omnibus quibusque instructionis locis dirigere, verum etiam studiosissime advigilare, ut in quavis tradenda disciplina nihil unquam doceatur, quod catholicae religioni, morumque honestati adversetur; adeoque catholicae omnes primordiorum scholae ecclesiastico inspectori erunt subiacendae. Praescriptum quoque est, ut Episcopi ex sacrorum Canonum sanctione Clericorum Seminaria omni prorsus libertate regant, moderentur, administrent, ac pro eorum prudentia et arbitrio in iisdem Seminariis tum Rectores, tum humaniorum litterarum severiorumque disciplinarum Professores et Magistros statuunt, eligant, atque alumnos admittant<sup>4)</sup>. Nemini vero fas unquam erit absque Episcoporum auctoritate vel theologicis disciplinas, vel canonici iuris scientiam, vel catechesim alicubi tradere.

Iam vero omnes ecclesiasticae causae, et illae praesertim quae fidem, sacramenta, et sacri ministerii iura respiciunt, atque ad Ecclesiae forum unice spectant, ab ecclesiasticis iudicibus erunt cognoscendae<sup>5)</sup>, qui ad sacrorum canonum normam et Concilii Tridentini praescripta de matrimonialibus etiam causis sententiam ferent, remissis tantum ad laicos iudices iis rebus, quae civiles dumtaxat matrimonii effectus attingunt<sup>6)</sup>. Atque ab eadem ecclesiastica auctoritate iudicium quoque erit proferendum de sponsalium existentia, deque effectibus quoad matrimonium impediendum, iis tamen sedulo servatis, quae idem Tridentinum Concilium, et Apostolicae felicitis recordationis Pii VI. Decessoris Nostri Litterae, quarum initium «Auctorem fidei» provide sapienterque constituunt. Sacrorum Antistites suo pleno fruentur iure infligendi Clericis reprehensione dignis poenas a canonicis legibus statutas, vel alias, quas ipsi congruentes existimaverint, neque ullo detineantur impedimento, quominus censuris animadvertere possint in quoscumque fideles, qui ecclesiasticas leges et canonicas sanctiones violare et frangere non dubitant<sup>7)</sup>. Etsi vero causae de patronatus iure ab ecclesiastico iudice erunt cognoscendae, tamen consensimus, ut quando agatur de laicali patronatu, saecularia tribunaia possint iudicare quoad eundem patronatum. Ac temporum ratione habita concessimus, ut causas mere civiles clericorum laici iudices cognoscant: atque indulsimus, ut ad laicum iudicem deferantur causae

<sup>1)</sup> *Huc ref. prop.* 20, 28, 41, 44, 49.

<sup>2)</sup> *Huc ref. prop.* 79.

<sup>3)</sup> " " " 33, 46.

<sup>4)</sup> " " " 74.

<sup>5)</sup> *Huc ref. prop.* 45, 47

<sup>6)</sup> " " " 44.

<sup>7)</sup> " " " 20, 24.

circa crimina et delicta a Clericis admissa, quae imperii legibus animadvertuntur, ita tamen, ut in hisce criminalibus causis Episcopus, nulla interiecta mora, de rebus omnibus quam diligentissime certior fiat, iique omnes habeantur respectus, quos clericalis conditio requirit ).

Cum autem Dei domus summo religionis et venerationis studio ab omnibus sit colenda, tum Templorum reverentiae eorumque immunitati, quoad fieri potuit, provisum est ). Ipse vero religiosissimus Imperator et Rex nunquam patietur, ut Catholica Ecclesia, eiusque fides, liturgia, et sacra instituta, qua verbis, qua scriptis, qua factis ullo modo laedantur, despiciantur, et Episcopi, sacrique ministri impediuntur, quominus proprium obeant officium ac munus in fide praesertim morumque doctrina tuenda, atque in ecclesiastica disciplina servanda. Insuper validissimo suo auxilio efficiet, ut executioni demandentur sententiae ab Episcopis contra clericos latae; ac vehementer sollicitus de honore, qui sacris debetur ministris, non solum nunquam sinet aliquid fieri, quod illis dedecori esse possit, verum etiam mandabit, ut omnes imperii sui magistratus debitum Archiepiscopis, Episcopis, et Clero honorem exhibeant.

Inter alias res sanctitas huic Apostolicae Sedi fuit integrum inviolatumque suum ius servatum alias erigendi Dioeceses, novasque illarum peragendi circumscriptiones, cum ipsa ad fidelium utilitatem id reducere cognoverit, atque Caesarea et Apostolica Maiestas in exercendo privilegio sibi ab eadem Sancta Sede concessio, praesentandi scilicet ac nominandi Episcopos, in posterum comprovincialium Antistitem consilio in primis utetur<sup>1)</sup>. Prima cuiusque Metropolitanae, Archiepiscopalis, et Episcopalis Ecclesiae Dignitas a Nobis et Successoribus Nostriis erit conferenda, nisi illa ad privatum laicalem patronatum pertineat, nam tunc secunda erit substituenda. Ad ceteras vero Dignitates et canonicas Praebendas Caesarea Maiestas Sua nominare perget, iis tamen exceptis, quae ad liberam Episcoporum collationem vel patronatum ius legitime acquisitum spectant. Quae quidem canonicales Praebendae iis erunt sacerdotibus tribuendae, qui dotibus ex canonum sanctione insigniti, vel in animarum cura exercenda, vel in ecclesiasticis negotiis tractandis, vel in sacris disciplinis tradendis fuerint cum laude versati. Constitutum etiam fuit, ut in Metropolitanis et Episcopalibus Ecclesiis, ubi desint, canonicus tum Poenitentiarius, tum Theologus, in Collegialibus vero Theologus Canonicus ex Concilii Tridentini praescripto quamprimum constituatur, atque secundum eisdem Concilii sanctiones ac Pontificia Decreta huiusmodi munia conferantur. Cum autem ad animarum salutem vehementer conduceret dignos atque idoneos Parochos eligi, sancitum est, ut omnes Paroeciae, publico indicto concursu, ac Tridentinae Synodi praescriptionibus diligenter servatis deferantur, et ad paroecias ecclesiastici patronatus unum ex tribus, quos Episcopus enunciata forma proposuerit, patroni praesentare teneantur. Summopere vero optantes perenne singularis Nostrae benevolentiae testimonium clarissimo Imperatori et Regi exhibere, quam libentissime Ipsi, eiusque catholicis in Austriaco Imperio Successoribus indultum concessimus nominandi ad omnes canonicatus et parochas subiectas patronatus iuri, quod ex fundo religionis seu studiorum promanat ea tamen lege, ut unus ex tribus deligatur, quos Episcopus publico habito experimento digniores iudicaverit. Neque omissum est prospicere, ut pro rerum ac temporum ratione indigentes paroeciae congrua instruantur dote. Cum vero canonica tantum institutio ius in ecclesiastica bona tribuat, tum sancitum est ut omnes, qui ad quaecumque seu maiora seu minora beneficia fuerint nominati, bonorum ad illa pertinentium administrationem nunquam suscipere possint, nisi postquam canonicam institutionem rite fuerint consequuti; itemque cautum est ut in cathedralium Ecclesiarum, illarumque bonorum possessione incura sedulo ea servantur, quae a Canonicis Sanctionibus, ac praesertim a Pontificali et Caeremoniali Romano praescripta sunt, quovis usu et consuetudine in contrarium omnino sublati.

Quod vero attinet ad Religiosas Familias, quae recte administratae maximo christianae et civili reipublicae usui et ornamento semper esse solent,

<sup>1)</sup> *Huc ref. prop. 31.*

<sup>2)</sup> *Huc ref. prop. 30.*

<sup>3)</sup> " " " 50, 51.

statutum est ut ipsae ex proprii cuiusque instituti legibus a supremis suis Moderatoribus penes hanc Apostolicam Sedem morantibus regantur, salva tamen semper Episcoporum auctoritate iuxta sacrorum Canonum et Concilii Tridentini praescripta; ut ipsi supremi Moderatores cum iisdem Religiosis Familiis sibi subiectis libere communicare, easque pro potestate visitare possint; utque omnes Regulares Ordines absque ullo impedimento et proprii Instituti seu Congregationis regulas observare, et candidatos in tyrocinium adsciscere, et ad religiosam professionem admittere queant. Omnes sacrorum Antistites libere poterunt in propriis Dioecesibus Religiosos utriusque sexus Ordines seu Congregationes constituere, iis servatis, quae Sacri Canones sapientissime praescribunt <sup>1)</sup>.

Neque vero praetermissum est omni cura et studio asserere ac tueri nativum, quo Ecclesia pollet, ius possidendi scilicet quaecumque bona <sup>2)</sup>. Siquidem in eadem Conventione constabilitum est, ut ipsa Ecclesia legitimo quovis titulo novas possessiones libere acquirere possit; et proprietates bonorum, quae in praesentia possidet, vel in posterum acquirat, integra et inviolabilis omnino esse debeat. Atque ideo neque antiquae, neque novae ecclesiasticae fundationes absque huius Apostolicae Sedis venia vel extingui, vel simul coniungi unquam poterunt, sartis tamen tectisque facultatibus, quas Tridentina Synodus Episcopis hac in re concessas voluit. Ecclesiastica bona ab illis erunt administranda, quibus sacri Canones eiusmodi administrationis ius tribuunt. Cum autem pietissimus Imperator Ecclesiarum indigentis subsidia ex publico aerario praebeat, ac praebere non desinet, tum eadem bona nec vendi, nec notabili onere gravari poterunt sine huius Apostolicae Sedis, et Maiestatis Suae consensu, aut illorum quibus hoc munus demandandum duxerint. Praeterea cum bona ibi existant, quae fundos religionis, et studiorum appellant, quaeque ex eorum origine ad Ecclesiae proprietatem spectant, ideo huiusmodi bona ipsius Ecclesiae nomine erunt administranda, et Episcopi in illa inquirent iuxta normam ab hac Sancta Sede cum Maiestate Sua praefiniendam. Ac redditus, qui religionis fundum constituunt, in divinum cultum, in templorum aedificia, in Seminaria, atque in omnia opera ecclesiastici ministerii propria erunt erogandi, donec fundus ipse, collatis inter hanc Apostolicam Sedem et Imperiale Gubernium consiliis, in ecclesiasticas stabiles dotes dispertiat. Redditus vero fundi studiorum in catholica institutione unice erunt collocandi, atque ex pia fundatorum mente. Ad religionis fundum fructus quoque vacantium beneficiorum pertinebunt, atque in illis Austriaci Imperii provinciis, ubi fundus idem minime existit, mixta Consilia seu Commissiones instituentur, quibus bona erunt administranda, tum cuiusque episcopalis mensae, tum omnium beneficiorum, quamdiu vacaverint, ad formam et regulam ab hac Apostolica Sede cum Caesarea Maiestate Sua praescribendam. Porro cum ob tristissimam temporum conversionem in plerisque Austriacae Ditionis locis ecclesiasticae decimae civili lege de medio fuerint sublatae, atque ob peculiaria rerum adiuncta in universo Imperio illae restitui haud possint, tum Maiestatis Suae postulationibus obsecundantes, ac publicam tranquillitatem, quae religionis vel maxime interest, prae oculis habentes concessimus atque statuimus, ut salvo et integro permanente iure exigendi decimas, ubi illud in praesentia existit, in aliis locis earundem decimarum vice, seu compensationis titulo ab Imperiali Gubernio adsurguntur dotes in bonis fundisque stabilibus, seu super Imperii debito fundatae, et iis omnibus ac singulis attribuantur, qui potiebantur iure exigendi decimas; atque huiusmodi dotes, veluti Maiestas Sua quoque declaravit, prout fuerint assignatae, habendae sint titulo omnino oneroso, atque eodem prorsus decimarum, quibus succedunt, iure percipiendae ac tenendae.

Denique sancitum fuit, ut alia omnia ad ecclesiasticas personas ac res pertinentia, de quibus nulla in Conventionis articulis habita fuit mentio, sint dirigenda et administranda secundum catholicam Ecclesiae doctrinam, eiusque vigentem disciplinam, ab hac Apostolica Sede approbatam; ac simul constitutum, ut leges, ordinationes, decreta quovis modo et forma in Austriaco Imperio ac singulis, quibus constituitur, ditionibus hactenus lata, quae initae Conventioni adversantur, de medio plane sublata atque abrogata habeantur,

<sup>1)</sup> *Huc ref. prop. 52, 53.*

<sup>2)</sup> *Huc ref. prop. 26.*

et Conventio ipsa in omnibus Austriaci Imperii ditionibus veluti lex Status vigeat atque servetur.

Præcipua hæc sunt novissimæ huius Conventionis capita, quæ heic Vobis breviter recensuimus, Venerabiles Fratres, ut summas insimul agamus gratias Patri misericordiarum, et Deo totius consolationis, qui dedit Carissimo in Christo Filio Nostro Francisco Josepho Austriae Imperatori et Regi Apostolico cor sapiens atque intelligens. Eidem Omnipotenti Domino per merita Sanctissimæ Matris Suæ Mariæ ab omni originalis peccati labe præservatæ, omniumque beatorum Caelitum, quorum sub una solemnitatis lælitia mox celebravimus festivitatem, humiliter supplicemus, ut ab Ecclesiæ finibus errores omnes calamitatesque depellat; atque ut maiora ubique servienti sibi populo christiano tribuat propitius incrementa gratiarum.

## Epistola Encyclica.

Dilectis Filiis Nostris S. R. E. Cardinalibus, ac Venerabilibus Fratribus Archiepiscopis et Episcopis universæ Imperialis ac Regiæ Austriacæ Ditionis <sup>1)</sup>.

### Pius PP. IX.

Dilecti Filii Nostri, et Venerabiles Fratres, Salutem et Apostolicam Benedictionem.

Singulari quidem animi Nostri gaudio cognoscimus, Vos, Dilecti Filii Nostri, ac Venerabiles Fratres, Nostris, et carissimi in Christo Filii Nostri Francisci Josephi Austriae Imperatoris, et Regis Apostolici desideriiis, cuique Vestrum uno fere eodemque tempore significatis, quam libentissime obsequentes, pro egregia vestra religione, et pastoralis sollicitudine statuissæ convenire in istam Imperialem et Regiam Vindobonensem civitatem, quo ibi inter Vos colloqui, et consilia conferre possetis, ut rite ea omnia perficiantur, quæ a Nobis cum eodem carissimo in Christo Filio Nostro sancita sunt in Conventione, quam idem clarissimus et religiosissimus Princeps cum summa Nostra consolatione, et immortalis sui nominis gloria ob Ecclesiæ iura vindicata, bonis omnibus præ lætitia gesticentibus, ineundam Nobiscum curavit. Itaque dum Vobis, Dilecti Filii Nostri, et Venerabiles Fratres, vel maxime gratulamur, quod in hoc habendo conventu insigne ac perspectum vestrum pro Ecclesiæ studium impense ostenditis, Nobis temperare non possumus, quin Vos hac occasione peramanter alloquamur et intimos Vobis animi Nostri sensus aperiamus, ex quibus maiorem in modum intelligetis, quanta Vos, et omnes amplissimi istius Imperii fideles populos curæ vestrae commissos benevolentia prosequamur. Atque in primis quod attinet commemoratæ Conventionis executionem, cum optime noscatis, multos in illa esse articulos, qui a Vobis præcipue sunt exsequendi, tum vehementer optamus, ut quoad modum in eorumdem articulorum executione unam eandemque certam viam atque rationem habere velitis, ea tamen circumspectione sedulo prudenterque adhibita, quam varia diversarum latissimi Austriaci Imperii Provinciarum adiuncta postulare poterunt. Si quæ autem de aliquis articuli sensu dubitatio, vel difficultas oriatur, quod non fore arbitramur, gratissimum Nobis erit, illam a Vobis ad Nos deferri, ut, collatis inter Nos et Caesaream Apostolicam Maiestatem consiliis, veluti in tricesimo quinto eiusdem Conventionis articulo cautum est, opportunas declarationes dare possimus.

Jam vero ardentissima illa caritas, qua universum Dominicum gregem Nobis ab ipso Christo Domino divinitus commissum complectimur, et gravissimum Apostolici Nostri ministerii munus, quo omnium nationum, et populorum salutem totis viribus procurare debemus, urgent Nos, Dilecti Filii Nostri, ac Venerabiles Fratres, ut eximiam vestram pietatem, virtutem, et episcopalem vigilantiam maiore, qua possumus, contentione etiam atque etiam excitemus, ut alacriori usque zelo pergatis omnes episcopalis vestri muneris partes diligentissime implere, ac nullis neque curis, neque consiliis, neque

<sup>1)</sup> Huc referuntur Syllabi Propositiones 4, 16.

laboribus unquam parcere, quibus sanctissimae fidei nostrae depositum in vestris Dioecesibus integrum inviolatumque custodiatis, et vestri gregis incoluitati consulentes, illum ab omnibus defendatis inimicorum hominum fraudibus et insidiis. Namque probe noscitis nefarias, multiplicesque artes ac molitiones, et monstrosa omnis generis opinionum portenta, quibus callidissimi perversorum dogmatum architecti improvidos praesertim et imperitos a veritatis et iustitiae tramite avertere, atque in errorem exitiumque inducere connituntur. Neque ignoratis, Dilecti Filii Nostri, ac Venerabiles Fratres, inter plurima, et nunquam satis lugenda mala, quae ecclesiasticam et civilem societatem vel maxime perturbant, atque divexant, duo potissimum nunc eminere, quae aliorum omnium quaedam veluti origo non immerito videantur. Vobis enim apprime nota sunt innumera, et funestissima sane damna, quae in christianam, et civilem rempublicam ex putidissimo *indifferentismi* errore redundant. Hinc enim omnia erga Deum, in quo vivimus, movemur, et sumus, officia penitus neglecta, hinc sanctissima religio plane posthabita, hinc omnis iuris, iustitiae, virtutisque fundamenta concussa, ac propemodum eversa. A qua turpissima sane *indifferentismi* forma haud admodum distat illud de religionum *indifferentia* systema e tenebris eruptum, quo homines a veritate alienati, veraeque confessionis adversarii, suaeque salutis immemores, et inter se pugnantis docentes, et nunquam stabilitam sententiam habentes, nullum inter diversas fidei professiones discrimen admittunt, et pacem passim cum omnibus miscent, omnibusque aeternae vitae portum ex qualibet religione patere contendunt<sup>1)</sup>. Nihil enim interest illis, licet diversa tractantibus, dum ad unius veritatis expugnationem conspirent<sup>2)</sup>. Videtis profecto, Dilecti Filii Nostri, ac Venerabiles Fratres, qua vigilantia Vobis sit excubandum, ne tam dirae contagia pestis vestras oves misere inficiant, ac perdant. Itaque ne desinatis populos Vobis traditos ab hisce perniciosissimis erroribus sedulo defendere, eosque catholicae veritatis doctrina magis in dies accurrate imbuere, et illos docere, quod sicut unus est Deus Pater, unus Christus eius, unus Spiritus Sanctus, ita una est divinitus revelata veritas, una divina fides humanae salutis initium, omnisque iustificationis fundamentum, qua iustus vivit, et sine qua impossibile est placere Deo, et ad filiorum eius consortium pervenire<sup>3)</sup>; et una est vera, sancta, catholica, Apostolica, Romana Ecclesia, et Cathedra una super Petrum Domini voce fundata<sup>4)</sup>, extra quam nec vera fides, nec aeterna invenitur salus, cum habere non possit Deum Patrem, qui Ecclesiam non habet matrem, et falso confidat, se esse in Ecclesia, qui Petri Cathedram deserat, super quam fundata est Ecclesia<sup>5)</sup>. Nullum vero maius potest esse delictum, et nulla macula deformior, quam adversus Christum stetisse, quam Ecclesiam divino Eius Sanguine partam et acquisitam dissipasse, quam evangelicae dilectionis oblitum contra unanimem et concordem Dei populum hostilis discordiae furore pugnasse<sup>6)</sup>.

Cum autem ratio divini cultus ex hisce duobus constet, piis dogmatibus, et actionibus bonis, neque doctrina sine operibus bonis accepta sit Deo, neque opera recipiat Deus a religiosis dogmatibus seiuncta, neque in solo opere virtutum, aut in sola observantia mandatorum, sed etiam in tramite fidei angusta et ardua sit via, quae ducit ad vitam<sup>7)</sup>, tum ne intermittatis fideles vestros populos continenter monere et excitare, ut non solum in catholicae religionis professione magis in dies stabiles et immoti persistant, verum etiam per bona opera certam suam vocationem et electionem facere satagant. Dum autem in vestri gregis salutem procurandam incumbitis, ne omittatis, in omni bonitate, patientia et doctrina miseros errantes ad unicum Christi ovile, atque ad catholicam unitatem revocare, illis praesertim Angustini verbis: Venite, fratres, si vultis, ut inseramini in vite: dolor est, cum vos videamus praecisos ita iacere; numerate sacerdotes vel ab ipsa Petri Sede, et in ordine illo patrum quis cui successit videte; ipsa est petra, quam

<sup>1)</sup> *Ilic ref. prop.* 16.

<sup>2)</sup> Tertull. de praescript. cap. 41.

<sup>3)</sup> Ad Rom. cap. 1; Ad Hebr. cap. 11; Trid. Sess. VI. cap. 8.

<sup>4)</sup> S. Cyprian. Epist. 43.

<sup>5)</sup> S. Cyprian. de unitat. Eccl.

<sup>6)</sup> S. Cyprian. Epist. 72.

<sup>7)</sup> S. Cyrill. Hierosolym. Cath. IV. Illuminand. n. 2; S. Leo, Serm. 5 de Nativitate Domini.

non vincunt superbae inferorum portae<sup>1)</sup>. Quicumque extra hanc domum agnum comederit, profanus est; si quis in arca Noë non fuerit, peribit regnante diluvio<sup>2)</sup>.

Verum non minori sane pernicie alter nunc grassatur morbus, cui ab elatione, et quodam veluti rationis fastu, *rationalismi* nomen est inditum. Non improbat certe Ecclesia<sup>3)</sup> eorum studium, qui veritatem scire voluerunt, quia Deus hominis naturam veri adipiscendi capientissimam fecit; neque improbat rectae sanacque rationis studia, quibus animus excolitur, natura investigatur, et abditissima quaecumque eiusdem arcana in apertam proferuntur lucem. Siquidem novit, ac probe tenet pietissima mater, inter collata caelitus munera<sup>4)</sup> illud esse praeclarum, quod ratione continetur et quo ea omnia, quae sensibus obnoxia sunt, praetergressi, insignem quamdam Dei imaginem in nobis ipsis praeferimus. Novit quaerendum esse donec invenias, et credendum quod credidisti, dum hoc insuper credas aliud non esse credendum, ideoque nec requirendum, cum id inveneris, et credideris quod a Christo institutum est, qui non aliud tibi mandat inquirendum, quam quod instituit<sup>5)</sup>. Ecquid igitur est, quod ipsa non patitur, non sinit, et quod pro iniuncto sibi officio tuendi depositi omnino reprehendit, ac damnat? Illorum nimirum morem vehementer reprehendit, ac semper damnavit et damnat Ecclesia, qui ratione abutentes, eam Dei ipsius loquentis auctoritati impie et stulte opponere ac praeferre non erubescunt, neque reformidant; et dum insolenter se extollunt, propria superbia, suoque tumore caecati veritatis lumen amittunt, fidem, de qua scriptum est: qui non crediderit condemnabitur<sup>6)</sup>, superbissime aspernantur, sibi praeudentes<sup>7)</sup> diffidentur ipsi Deo de se credendum esse, et iis, quae cognitioni nostrae de se tribuit, obsequendum<sup>8)</sup>. Hi sunt, quibus constantissime opponit, aequum esse<sup>9)</sup>, ut de cognitione Dei ipsi Deo credamus, cuius scilicet totum est, quod de eo credimus, quia utique ab homine Deus, uti oportet, cognosci non potuit, nisi salutarem sui cognitionem ipse tribuisset. Hi sunt, quos ad mentis sanitatem hisce verbis revocare contendit: Quid magis contra rationem, quam ratione rationem conari transcendere? et quid magis contra fidem, quam credere nolle quidquid non possis ratione attingere<sup>10)</sup>? Atque his inculcare non desinit, fidem non rationi, sed auctoritati inniti<sup>11)</sup>; nec enim decebat, ut cum Deus ad hominem loqueretur, argumentis assereret suas voces, tamquam fides ei non haberetur, sed, ut oportuit, est loquutus, quasi rerum omnium maximus iudex, cuius non est argumentari, sed pronuntiare<sup>12)</sup>. His apertissime denuntiat, unam hominis spem, unamque salutem positam esse in christiana fide, quae veritatem docens, ac divina sua luce humanae ignorantiae tenebras discutienti per caritatem operatur, et in catholica Ecclesia, quae verum retinens cultum est stabile ipsius fidei domicilium, et Dei templum, extra quod, citra invincibilis ignorantiae excusationem, quisquis fuerit, est a spe vitae et salutis alienus<sup>13)</sup>. Et hos gravissime monet, ac docet, quod humanae artis peritia, si quando tractandis sacris eloquiis adhibetur, non debet ius magisterii sibi arroganter arripere, sed veluti ancillae Dominae quodam famulatus obsequio subservire, ne si praecedat oberret, et dum exteriorum verborum sequitur consequentias, intus virtutis lumen amittat, et rectum veritatis tramitem perdat<sup>14)</sup>. Neque existimari iccirco debet, nullum in Ecclesia Christi profectum haberi religionis<sup>15)</sup>. Habetur namque, idemque maximus, dummodo tamen vere profectus sit fidei, non permutatio. Crescat igitur oportet, et multum vehementerque proficiat tam singulorum, quam omnium, unius hominis, quam totius Ecclesiae actatum, ac saeculorum gra-

<sup>1)</sup> In psalm. contr. part. Donat.

<sup>2)</sup> S. Hieronym. Epist. 14. ad Damas.

<sup>3)</sup> Lactant. divin. institut. lib. 3. cap. 1.

<sup>4)</sup> Clemens Alex. Stromat. lib. 1. cap. 3; lib. 2. cap. 2; et Gregor. Thaumaturg. orat. panegy. cap. 7. 13.

<sup>5)</sup> Marc. XVI. 16.

<sup>6)</sup> *Ilic ref. prop. 4.*

<sup>7)</sup> S. Bernard. epist. 190.

<sup>8)</sup> Lactant. divin. Institut. lib. 3. cap. 1.

<sup>9)</sup> S. Petrus Damian. opusc. 36. cap. 5.

<sup>10)</sup> Tertull. de praescript. cap. 9.

<sup>11)</sup> S. Hilar. de Trinit. lib. 4.

<sup>12)</sup> Cassian. de Incarnat. lib. 4. cap. 2.

<sup>13)</sup> S. Bernard. de Considerat. lib. 5. cap. 3.

<sup>14)</sup> *Ilic ref. prop. 17.*

<sup>15)</sup> „ „ „ 5.



dibus intelligentia, scientia, sapientia, qua intelligatur illustrius quod antea credebatur obscurius, qua posteritas intellectum gratuletur, quod vetustas non intellectum venerabatur, qua pretiosae divini dogmatis gemmae exsculpantur, fideliter coaptentur, adornentur sapienter, et splendore, gratia, venustate ditescant, in eodem tamen genere, in eodem scilicet dogmate, eodem sensu, eademque sententia, ut cum dicantur nove, non dicantur nova').

Neminem Vestrum mirari arbitramur, Dilecti Filii Nostri, ac Venerabiles Fratres, si pro Nostro fidei primatu et principatu<sup>1)</sup> de luctuosissimis hisce, ac rei cum sacrae, tum publicae perniciosissimis erroribus denuo loquuti simus, eximiamque vestram episcopalem vigilantiam ad illos profigiendos excitare censuerimus. Cum enim inimicus homo non cesset supereminare zizania in medio tritici, tum Nos qui, divina disponente Providentia, dominico agro excolendo praesumus, atque uti servi fideles et prudentes super Domini familiam constituti sumus'), ab iis partibus explendis desistere non debemus, quae ab Apostolico Nostro munere separari non possunt.

Nunc vero a singulari vestra pietate et prudentia exposcimus, ut in hoc congressu ea potissimum inter Vos consilia provide sapienterque inire studeatis, quae in amplissimi istius Imperii regionibus ad maiorem Dei gloriam promovendam, ac sempiternam hominum salutem procurandam conducere existimaveritis. Etsi enim vehementer in Domino laetamur, cum noscamus multos existere tum ecclesiasticos, tum laicos homines, qui christianae fidei et caritatis spiritu egregie animati bonum Christi diffundunt odorem, tamen non mediocri afficimur dolore, cum haud ignoremus, in aliquibus locis nonnullos ex Clero suae dignitatis et officii oblitos minime ambulare pro ea vocatione, qua vocati sunt, et christianum populum sanctissimis divinae nostrae religionis praeceptionibus parum instructum, gravibusque obnoxium periculis, a pietatis operibus et Sacramentorum frequentia infelicitate abstinere, atque a morum honestate, christianaeque vitae disciplina deflectere, et ad interitum ruere. Persuasissimum Nobis est, Vos pro spectata vestra episcopali sollicitudine omnes curas, cogitationesque esse collatos, ut commemorata damna omnino eliminentur. Et quoniam optime scitis, Dilecti Filii Nostri, ac Venerabiles Fratres, quantam ad ecclesiastici Ordinis disciplinam instaurandam, populorum mores corrigendos, eorumque damna avertenda vim habeant Provincialia Concilia a canonicis sanctionibus sapientissime praescripta, et a sanctis Antistitibus maximo semper Ecclesiae bono frequentata, ideoque vel maxime optamus, ut Provinciales Synodos ad Sacrorum Canonum normam rite concelebretris, pro communibus cuiusque ecclesiasticae istius Imperii Provinciae malis opportuna ac salutaria adhibeatis remedia. Cum autem multa et gravia in hisce Provincialibus Synodis a Vobis sint agenda, Nostris in votis est, ut pro vestra sapientia in isto Vindobonensi conventu concordissimis animis ea inter Vos suscipiatis consilia, quibus unanimes esse possitis tum circa potiores praesertim res, quae in Provincialibus Synodis erunt tractandae ac statuendae, tum circa illa, quae uno eodemque studio a Vobis erunt praestanda, ut in omnibus istius Imperii Provinciis divina nostra religio, eiusque salutaris doctrina magis in dies vigeat, floreat, dominetur, et fideles populi, declinantes a malo et facientes bonum, ambulent ut filii lucis in omni bonitate, iustitia, ac veritate.

Et cum nihil sit, quod alios magis ad virtutem, pietatem, ac Dei cultum assidue instruat, quam eorum vita, et exemplum, qui se divino ministerio dedicarunt, ne praetermittatis omni industria inter Vos ea statuere, quibus Cleri disciplinam, ubi prolapsa est, instauretis, et accuratam illius institutionem, ubi opus fuerit, promoveatis. Quocirca, Dilecti Filii Nostri, ac Venerabiles Fratres, collatis inter Vos consiliis coniunctisque studiis, diligentissime prospicite, ut ecclesiastici viri propriae dignitatis et officii semper memores ab iis omnibus declinent quae Clericis vetita, quaeque eos nequaquam decent, ac virtutum omnium ornatu praefulgentes exemplum sint fidei in verbo, in conservatione, in caritate, in fide, in castitate; ut diurnas canonicas horas, qua decet, attentione ac pietatis affectu recitent, ac sancta

<sup>1)</sup> Vinc. Lirin. Commemoror.

<sup>2)</sup> S. Ambros. de Incarnat. cap. 4. n. 32.; Cassian. de Incarnat. lib. 3. cap. 12.

<sup>3)</sup> S. Ambros. de fide ad Gratian. Imperat. lib. 5. in prolog.

oratione se exercent, et rerum caelestium meditationi instent, decorem domus Dei diligant, sacras functiones et caeremonias iuxta Pontificale et Rituale Romanum peragant, et proprii ministerii munia naviter, scienter, ac sancte obeant, et sacrarum praesertim disciplinarum studia nunquam intermittant, et sempiternae hominum saluti quaerendae assiduam navent operam. Ac pari cura consulite, ut omnes cuiusque Metropolitanis, Cathedralis et Collegialis Templi Canonici, alique Beneficarii choro addicti, morum gravitate, vitae integritate, ac pietatis studio undique praeulgere studeant tamquam lucernae ardentes positae super candelabrum in templo Domini, et omnes suscepti muneris partes diligenter expleant, residendi legem servant, divini cultus splendorem curent, atque alacres in excubiis Domini divinas laudes studiose, rite, pie, religiose, non vero mente vaga, non vagis oculis, non indecoro corporis statu concelebrant, memoria semper repetentes, quod ipsi ad chorum accedunt, non modo ut sanctissimum Deo cultum, venerationemque tribuant, verum etiam ut a Deo ipso et sibi et aliis omne bonum deprecantur.

Sed quam vehementer ad ecclesiasticum spiritum tuendum et fovendum, atque ad salutarem constantiam retinendam conferant spiritualia Exercitia, innumeris iccirco per Romanos Pontifices Praedecessores Nostros ditata Indulgentiis, quisque Vestrum optime nescit. Ea proinde cunctis ecclesiasticis vestris viris etiam atque etiam commendare et inculcare ne desinatis, quo ipsi certo dierum spatio in opportunum aliquem locum saepe secedant, ubi quavis humanarum rerum cura abiecta, omnia sua facta, dicta, cogitata coram Deo quam diligentissime reputantes, et annos aeternos assidua meditatione habentes in mente, ac maxima beneficia sibi a Deo collata recolentes, studeant contractas de mundano pulvere sordes abluere, et resuscitare gratiam, quae ipsis data est per impositionem manuum, et exspoliantes veterem hominem cum actibus suis novum induant, qui creatus est in iustitia et sanctitate.

Quoniam vero Sacerdotum labia custodire debent scientiam, qua et respondere possint iis, qui legem requirunt de ore ipsorum, et contradicentes revincere, iccirco, Dilecti Filii Nostri, ac Venerabiles Fratres, in rectam, accuratamque Cleri institutionem omnes vestras curas convertatis oportet. Summa igitur contentione omnia conamini, ut in vestris praecipue Seminariis optima ac plane catholica vigeat studiorum ratio, qua adolescentes Clerici vel a prima pueritia per probatissimos magistros ad pietatem, omnemque virtutem, et ecclesiasticum spiritum mature fingantur, ac latinae linguae cognitione, et humanioribus litteris, philosophicisque disciplinis ab omni prorsus cuiusque erroris periculo alienis sedulo imbuantur. Atque in primis omnem adhibete vigilantiam, ut cum dogmaticam, tum moralem Theologiam ex divinis libris, sanctorumque Patrum traditione, et infallibili Ecclesiae auctoritate haustam ac depromptam, ac simul solidam divinarum litterarum, sacrorum Canonum, ecclesiasticarumque historiae, rerumque liturgicarum scientiam congruo necessarii temporis spatio diligentissime addiscant. Ac Vobis summopere cavendum in librorum delectu, ne in tanta grassantium errorum colluvie a sanae doctrinae semita ecclesiastici adolescentes temere abducantur; cum praesertim haud ignoretis, viros eruditos a Nobis in religione dissidentes, et ab Ecclesia praecisos, in vulgus edere tam divinos libros, quam Sanctorum Patrum opera, concinna illa quidem elegantia, sed saepe, quod maxime est dolendum, vitiosa, ac praeposteris commentariis a veritate detorta. Neminem Vestrum latet quantopere Ecclesiae hisce praesertim temporibus intersit, idoneos habere ministros qui vitae sanctitate, et salutaris doctrinae laude praestantes, ac potentes in opere et sermone, valeant Dei, eiusque sanctae Ecclesiae causam strenue tueri, et aedificare Domino domum fidelem. Nihil itaque intentatum est relinquendum, ut iuniores Clerici vel a teneris annis sancte ac docte educantur, quandoquidem nonnisi ex ipsis rite institutis utiles Ecclesiae ministri fieri possunt. Quo vero facilius proximia vestra religione, ac pastoralis sollicitudine accuratam Cleri institutionem, ex qua Ecclesiae bonum ac populorum salus tantopere pendet, quotidie magis promovere valeatis, ne vos pigeat exhortari, rogare egregios vestrarum Dioecesium ecclesiasticos, laicosque viros divitiis pollentes, et in rem catholicam praeclare animatos, ut vestrum sectantes exemplum aliquam

pecuniae vim perlibenter tribuere velint, quo nova etiam Seminaria erigere, et congrua dote instruere possitis, in quibus adolescentuli Clerici vel ab ineunte aetate rite instituantur.

Nec minori studio, Dilecti Filii Nostri, ac Venerabiles Fratres, ea omnia consilia suscipienda curate, quibus vestrarum Dioecesium iuventus cuiusque conditionis et sexus magis in dies catholico plane modo educetur. Quapropter episcopalis vestrae vigilantiae nervos intendite, ut iuventus ante omnia spiritu timoris Dei mature imbuta, ac pietatis lacte enutrita nedum fidei elementis, sed pleniori sanctissimae nostrae religionis cognitione sedulo excolatur, atque ad virtutem, morumque honestatem, christianaeque vitae rationem conformetur, et ab omnibus perversionis, et corruptionis illecebris, et scopulis arceatur. Pari autem sollicitudine ne desinatis unquam fideles populos Vobis commissos opportunis quibusque modis ad religionem et pietatem etiam atque etiam excitare. Itaque ea omnia peragite, quibus ipsi fideles populi magis in dies salutaris catholicae veritatis ac doctrinae pabulo enutriti Deum ex toto corde diligant, eiusque mandata apprime servant, Sanctuarium eius frequenter, ac religiose adeant, Sabbata eius sanctificent, ac saepe, qua par est, veneratione et pietate tum divini Sacrificii celebrationi intersint, tum ad sanctissima Poenitentiae, et Eucharistiae Sacramenta accedant, et singulari devotione Sanctissimam Dei Genitricem Immaculatam Virginem Mariam prosequantur, et colant, ac mutuam inter se continuam caritatem habentes, et precibus instantes ambulent digne Deo per omnia placentes, et in omni opere bono fructificantes. Cum autem sacrae Missiones idoneis operariis peractae summopere conducant ad fidei, religionisque spiritum in populis excitandum, eosque ad virtutis ac salutis semitam revocandos, vehementer optamus, ut illas identidem in vestris Dioecesibus agendas curetis. Ac meritis summasque laudes iis omnibus deferimus, qui e vestro ordine in suas Dioeceses tam salutare sacrarum Missionum opus iam invexere, ex quo divina adspirante gratia uberes fructus perceptos fuisse gaudemus.

Haec potissimum in isto vestro conventu prae oculis habeatis oportet, Dilecti Filii Nostri, ac Venerabiles Fratres, ut communibus malis communibus studiis provide mederi possitis. Etenim ad praecipua cuiusque vestrae Dioecesis damna reparanda, eiusque prosperitatem promovendam, nihil frequentius eiusdem Dioeceseos lustratione, et Dioecesanarum Synodi celebratione validius esse probe intelligitis. Quae duo quantopere a Concilio praesertim Tridentino sint praescripta et inculcata, neminem Vestrum fugit. Quamobrem pro spectata vestra in gregem Vobis commissum sollicitudine et caritate, nihil antiquius habere velitis, quam ex canonicis sanctionibus vestras Dioeceses impensissimo studio invisere, et ea omnia accurate perficere, quae ad ipsam visitationem fructuose peragendam omnino pertinent. Quo in munere obeundo Vobis summopere cordi sit, summa cura, ac paternis praesertim monitis, et frugiferis concionibus, aliisque opportunissimis modis errores, corruptelas, et vitia, si quae irrepserint, radicitus evellere, omnibus salutis documenta praebere, cleri disciplinam sartam tectamque tueri, et fideles spiritualibus praesertim quibusque subsidiis iuvare, munire, et omnes Christo lucrificare. Nec dissimilem diligentiam impendite in Dioecesanis Synodis iuxta sacrarum Canonum normam celebrandis, ea praecipue statuentes, quae ad maius cuiusque vestrae Dioecesis bonum spectare pro vestra prudentia duxeritis. Ne vero in Sacerdotibus, qui doctrinae et lectioni attendere debent, quique obstricti sunt officio docendi populum ea, quae scire omnibus necessarium est ad salutem, et ministrandi Sacramenta <sup>1)</sup>, sacrarum disciplinarum studium unquam restinguatur, aut languescat industria, optatissimum Nobis est, ut a Vobis, ubi fieri possit, in omnibus vestrarum Dioecesium regionibus, instituantur opportunis regulis congressus de morum praesertim Theologia, ac de sacris Ritibus, ad quos singuli potissimum Presbyteri teneantur accedere, et afferre scripto consignatam propositae a Vobis quaestionis explicationem, et aliquo temporis spatio a Vobis praefinienti inter se disse-rere de morali Theologia, deque sacrarum Rituum disciplina, postquam aliquis ex ipsis Presbyteris sermonem de sacerdotalibus praecipue officiis habuerit.

<sup>1)</sup> Concil. Trid. Sess. XXIII. cap. 14. de Reformat.

Cum autem in vestro grege procurando operam prae ceteris, manum, auxiliumque Vobis praestent Parochi, quos in sollicitudinis partem adscitos, et in arte omnium maxima obeunda adiutores habetis, eorum zelum omni studio inflammare ne intermittatis, Dilecti Filii Nostri, ac Venerabiles Fratres, ut proprio munere ea, quae par est, diligentia, ac religione fungantur. Illis iccirco inculcate, ut nunquam cessent christianam plebem sibi traditam sedulo pascere divini verbi praeconio, ac Sacramentorum et multiformis gratiae Dei dispensatione, et rudes homines, ac maxime puerulos christianae fidei mysteriis, nostraeque Religionis documentis amanter, patienterque erudire, et errantes ad salutis iter adducere; ut summopere studeant odia, similitudines, inimicitias, discordias, scandala tollere, et confortare pusillanimes, et visitare infirmos, eosque omni praesertim spiritali ope iuvare, et miseris afflictos, atque aerumnosos consolari, omnesque exhortari in doctrina sana, et monere, ut religiosissime reddant quae sunt Dei Deo, et quae sunt Caesaris Caesari, docentes quod omnes non solum propter iram. sed etiam propter conscientiam Principibus et potestatibus subditi esse et obedire debent in iis omnibus, quae Dei, et Ecclesiae legibus minime adversantur.

Pergite vero, ut facitis, cum summa vestri nominis laude, Dilecti Filii Nostri, ac Venerabiles Fratres, accuratam vestrarum Dioecesium relationem statutis temporibus ad Nostram Concilii Congregationem mittere, ac Nos de rebus ad ipsas Dioeceses pertinentibus diligenter certiores facere, ut maiori cum vestrae, tum earumdem Dioecesium utilitati providere possimus. Nobis autem innotuit, in quibusdam germanici territorii Dioecesium aliquas circa parochiarum potissimum collationem invaluisse consuetudines, et nonnullos ex Vobis optare, ut huiusmodi consuetudines serventur. Nos quidem propensi sumus ad adhibendam indulgentiam, postquam tamen easdem consuetudines ab unoquoque Vestrum speciatim, ac perdiligerenter expositas debito examine perpenderimus, ut eas intra illos permittamus limites, quos necessitas, et praecipua locorum adiuncta suadere poterunt, cum pro Apostolici Nostri ministerii munere curare omnino debeamus, ut Canonicae praescriptiones generatim sedulo observentur.

Antequam finem huic Nostrae Epistolae faciamus, qua Vos omnes Austriaci Imperii Sacrorum Antistites alloqui summopere gaudemus, Nostrum ad Vos sermonem praesertim convertimus, Venerabiles Fratres Archiepiscopi et Episcopi, qui in eodem nobilissimo Imperio morantes, ac Nobiscum in vera fide et catholica unitate coniuncti, et huic Petri Cathedrae adhaerentes, Orientalis Ecclesiae ritus et laudabiles consuetudines ab hac Sancta Sede probatas, seu permissas colitis. Compertum, exploratumque Vobis est quo in pretio haec Apostolica Sedes vestros semper habuerit ritus, quorum observantiam tantopere inculcavit, quemadmodum luculenter testantur tot Romanorum Pontificum Decessorum Nostrorum Decreta et Constitutiones, inter quas commemorare satis est Litteras Benedicti XIV. Praedecessoris pariter Nostri, die 26. Iunii anno 1755 editas, quarum initium «Allatae,» et Nostras die 6. Ianuarii anno 1848 omnibus Orientalibus missas, quae incipiunt «In suprema Petri Apostoli Sede.» Itaque Vos etiam summopere excitamus, ut pro eximia vestra religione et episcopali sollicitudine ministerium vestrum implentes, atque ante oculos habentes ea omnia, de quibus loquuti sumus, vestram omnem curam, industriam et vigilantiam continenter impendatis, ut vester Clerus virtutibus omnibus ornatus, et optimis disciplinis potissimum sacris accurate excultus, in sempiternam fidelium salutem quaerendam intentissimo studio incumbat, ut fideles populi instant viam, quae ducit ad vitam, ut quotidie magis sancta augeatur et amplificetur catholicae Religionis unio, ut sacramenta administrentur, ac divina celebrentur officia iuxta vestram disciplinam, iis tamen liturgicis libris adhibitis, qui ab hac Sancta Sede probati fuerunt. Et cum nihil Nobis optatius, quam vestris et vestrorum fidelium indigentis quam libentissime occurrere, ne omittatis ad Nos confugere, Nobisque exponere vestrarum Dioecesium res, et illarum relationem ad Nostram Congregationem Fidei propagandae praepositam quarto quoque anno mittere.

Denique, Dilecti Filii Nostri, ac Venerabiles Fratres, Vos obtestamur, ut intentissimo studio connitamini magis in dies conservare, fovere, et augere

pacem et concordiam inter universum istarum omnium Dioecesium Clerum tum latini, tum graeci-catholici ritus, ut omnes, qui militant in castris Domini, mutuo fraternae caritatis affectu se invicem honore praeventientes, Dei gloriae, et animarum saluti unanimiter ac studiosissime inserviant.

Habetis quae pro impensissima Nostra erga Vos, et fideles istius vastissimi Imperii populos caritate Vobis, Dilecti Filii Nostri, ac Venerabiles Fratres, nunc potissimum significanda censuimus, ac pro certo habemus, Vos pro egregia vestra virtute, religione, pietate, ac perspecta in Nos, et hanc Petri Cathedram fide et observantia hisce paternis Nostris desideriis, monitisque quam libentissime, et cumulatissime esse obsequuturos. Ac plane non dubitamus, quin vos omnes, Dilecti Filii Nostri, ac Venerabiles Fratres, Pastorem Principem Christum Iesum continenter intuentes, qui se humilem et mitem corde est professus, quique dedit animam suam pro ovibus suis relinquens nobis exemplum, ut sequamur vestigia Eius, contendatis totis viribus Illius exempla sectari, documenta obsequi, et gregi, curae vestrae commisso, assidue advigilare, in omnibus laborare, ministerium vestrum implere, et quaerere non quae vestra sunt, sed quae Christi Iesu, neque iam ut dominantes in Cleris, sed uti Pastores, immo Patres amantissimi, et facti forma gregis ex animo nihil tam molestum, tam impeditum, tam arduum unquam fore putetis, quod in omni patientia, mansuetudine, lenitate, prudentia ferendum, expediendum ac providendum pro vestrarum ovium salute non curetis. Nos interim in humilitate cordis Nostri haud omittimus assiduas fervidasque clementissimo luminum et misericordiarum Patri Deo totius consolationis adhibere preces, ut uberrima quaeque suae Bonitatis dona super Vos propitius semper effundat, quae in dilectas quoque oves Vobis concreditas copiose descendant. Cuius divini praesidii auspicem et propensissimae aequae ac studiosissimae Nostrae in Vos voluntatis testem Apostolicam Benedictionem ex imo corde depromptam Vobis singulis, Dilecti Filii Nostri, ac Venerabiles Fratres, cunctisque istarum Ecclesiarum Clericis, Laicisque fidelibus peramanter impertimur.

Datum Romae apud Sanctum Petrum, die XVII. Martii, anno MDCCCLVI. Pontificatus Nostri Anno Decimo.

## Allocutio

habita in consistorio secreto die XV. decembris anni MDCCCLVI<sup>1)</sup>.

### Venerabiles Fratres.

Nunquam fore putavissemus, Venerabiles Fratres, ut magno cum animi Nostri dolore affictas ac prostratas etiam in Mexicana republica catholicae Ecclesiae res lamentari, ac deplorare compelleremur. Illud enim Gubernium, postquam iam inde ab anno millesimo octingentesimo quinquagesimo tertio significaverat, suis in votis esse Conventionem inire cum hac Apostolica Sede, idipsum insequente anno per suum Ministrum dilectum Filium Emmanuelem Larrainzar hac in Urbe morantem ac debita potestate munitum enixe efflagitavit. Nos itaque spirituali illorum fidelium bono consulere, et ecclesiastica illius Reipublicae negotia componere vel maxime optantes, huiusmodi postulationi perlibenter obsecundavimus, et opportunas cum eodem Mexicano Ministro tractationes suscipiendas esse constituimus. Quae quidem tractationes inchoatae fuerunt, sed absolvi et ad optatum exitum perducere minime potuere, proptereaquod congruae retardabantur explicationes, quas a suo Gubernio commemoratus Plenipotentiarius Minister Romae degens postulabat, qui deinde in Mexico fuit revocatus ob notissimam rerum conversionem, et Gubernii immutationem, cui Mexicana Respublica misere fuit obnoxia.

Ubi autem novum extitit Gubernium, statim acerrimum Ecclesiae, eiusque sacris rebus, iuribus, ministris bellum indixit. Postquam enim Clerum in popularibus electionibus utroque suffragio privavit, legem die

<sup>1)</sup> *Huc referuntur Syllabi Propositiones 26, 28, 29, 31, 46, 50, 52, 79.*

vigesimo tertio mensis Novembris superiore anno condidit, qua ecclesiasticum forum de medio sustulit, quod in universa Mexicana Republica semper viguerat<sup>1)</sup>. Etsi vero Venerabilis Frater Lazarus Archiepiscopus Mexicanus tum suo, tum omnium illius Reipublicae Sacrorum Antistitem et Cleri nomine contra hanc legem protestari haud omiserit, tamen irrita fuit eiusmodi reclamatio, et Gubernium minime extimuit declarare, se nunquam sua acta supremæ huius Apostolicæ Sedis auctoritati esse subiecturum. Atque idem Gubernium molestissime ferens indignationem, quam fidelis praesertim Angelopolitanus populus ostenderat ob eamdem legem, duo edidit decreta, quorum altero omnia Angelopolitanae Ecclesiae bona civilis auctoritatis potestati et arbitrio subiecit, adiudicavit, altero normam praescripsit, qua bona ipsa essent administranda. Cum autem Venerabilis Frater Pelagius Episcopus Angelopolitanus suo munere egregie fungens contra tam iniusta aequæ ac sacrilega decreta episcopalem extulerit vocem, tum Gubernium eundem Antistitem vexare, insectari, eumque militari manu comprehendere et in exilium pellere minime reformidavit. Ac nihil valere expostulationes Venerabilis Fratris Aloisii Archiepiscopi Damasceni, Nostri ibi Delegati Apostolici, et Venerabilium Fratrum tum Petri Episcopi Guadalaxarensis, tum Petri Episcopi S. Aloisii Potosiensis, qui omni studio apud idem Gubernium agere non destiterunt, ut illa abrogarentur decreta. Mexicanum enim Gubernium his quoque iustissimis reclamationibus plane despectis, ulterius progrediens, et bona omnia, quae Ecclesia in tota illa Republica possidet, sibi ausu prorsus temerario et sacrilego vindicare cupiens, aliud die vigesimo quinto Iunii huius anni edidit decretum, illudque die vigesimo octavo eiusdem mensis divulgavit, quo Ecclesiam suis omnibus in eadem Republica bonis ac proprietatibus omnino spoliare non exhorruit<sup>2)</sup>. Contra tam iniustum decretum suam vocem attollere haud omiserunt Venerabiles Fratres Lazarus Archiepiscopus Mexicanus, Clemens Episcopus Mecoacanus, et Petrus Episcopus Guadalaxarensis, qui suis expostulationibus eidem obsistentes decreto, Ecclesiae causam strenue propugnarunt. Mexicanum vero Gubernium huiusmodi Sacrorum Antistitem reclamationes non solum contempsit, reiecit, verum etiam decrevit, Episcopum Guadalaxarensem exilio esse mulctandum, et legem promulgatam celeriter, ac severe exsequendam. Et quo facilius ac citius sacrilega haec bonorum Ecclesiae spoliatio conficeretur, haud extimuit varias stipulari alienationes, et ecclesiasticis Coetibus permittere, ut fundos distraherent, quin adhaerent normae ab ipso Gubernio praescriptae, dummodo tamen solveretur quod sibi Gubernium arrogat ob titulum translati dominii, et aliae servarentur conditiones in eadem lege statutae.

Atque hic, Venerabiles Fratres, illud vel maxime dolendum, quod nonnulli ex Religiosis Familiis reperti sint viri, qui propriae vocationis, officii, et instituti prorsus obliti, ac regularem disciplinam perosi non erubere cum maxime fidelium scandalo, et bonorum omnium luctu Apostolicae Visitationi a Nobis in ipsos Regulares constitutae, et Venerabili Fratri Episcopo Mecoacano commissae impudenter resistere, adversari, et nefariis Ecclesiae hostium consiliis favere, et commemoratam legem amplecti, ac proprii Coenobii fundos dividere, gravissimis quibusque canonicis sanctionibus et poenis omnino despectis et contemptis. Ac pari dolore dicere cogimur, aliquos etiam e Clero saeculari fuisse viros, qui suae dignitatis, muneris, sacrorumque Canonum immemores, et Ecclesiae causam deserere, et eadem iniustissima lege uti, et Gubernii voluntati obsequi haud veriti sunt.

Sed Mexicanum Gubernium, ecclesiasticis bonis direptis, alia fecit decreta, quorum uno legem de quadam Religiosa Familia in Mexicum revocanda abolevit, altero vero declaravit, se omnem opem et operam praebere iis omnibus utriusque sexus Regularium Ordinum Sodalibus, qui a suscepta religiosa vita desciscere, claustra deserere, seque a debita propriis Moderatoribus obedientia eximere vellent<sup>3)</sup>. Neque id satis. Namque Nationalis ille Conventus Deputatorum Consilio inter plurima contra sanctissimam nostram religionem, eiusque sacros Ministros, Pastores et Christi hic in terris Vicarium maledicta et convicia, novam proposuit Constitutionem multis

<sup>1)</sup> *Huc ref. prop. 31.*

<sup>2)</sup> *Huc ref. prop. 26.*

<sup>3)</sup> " " " 53.

conflatam articulis, quorum plures divinae ipsi religioni, eiusque salutari doctrinae, sanctissimisque institutis et iuribus plane adversantur. Hac enim nova proposita Constitutione, praeter alia, et omne ecclesiastici fori privilegium tollitur, et statuitur, neminem ullo prorsus emolumento perfrui posse, quod grave sit societati: et cuique interdicitur, ut aliqua se obligatione obstringat seu contractus, seu promissionis, seu religiosi voti causa; et ad populorum mores animosque facilius corrumpendos, ac detestabilem, terribilissimamque *indifferentismi* pestem propagandam, ac sanctissimam nostram religionem convellendam admittitur liberum cuiusque cultus exercitium, et omnibus quaslibet opiniones cogitationesque palam publiceque manifestandi plena tribuitur potestas<sup>1)</sup>. Et quoniam Angelopolitanus praecipue Clerus, eiusque Vicarius Generalis illum Deputatorum Congressum impensissime rogarunt et obsecrarunt, ut saltem articulus de libertate cuiusque religionis exercendae numquam sanciretur, iccirco plures spectatissimi, tum ecclesiastici, tum laici Angelopolitani viri, idemque Vicarius Generalis, senectute licet confectus, pulsus sunt in exilium, et alii etiam egregii Mexicanae civitatis sacerdotes comprehensi et in oppidum Verae Crucis exportati, ut in exteris traducerentur regiones. Ne autem ad fideles illos populos suorum Antistitum voces et salutaria monita perveniant, qui pro pastoralis muneris officio in tanta contra Ecclesiam violentia, tantaque insectatione silere non possunt, Mexicanum Gubernium omnibus illarum regionum Gubernatoribus severissime praecepit, ut assidue speculentur, et omni adhibita ratione impendant, quominus ullo modo Pastorales Episcoporum Litterae vel vulgentur, vel circumferantur, vel in sacris aedibus legantur<sup>2)</sup>. Ac simul gravissimas in ecclesiasticos potissimum viros constituit poenas, qui huic iniusto non obsequentes

<sup>1)</sup> *Huc ref. prop. 79.* — His adde, quae leguntur in Encycl. „Exsultavit“ d. d. 21. Nov. 1851, qua publicae orationes indicuntur et indulgentiae in forma Jubilaei conceduntur: „Nemo enim Vestrum ignorat, Venerabiles Fratres, quibus subdolis artibus, quibus monstrosis opinionum portentis, et nefariis cuiusque generis machinationibus, Dei et humani generis hostes omnium mentes pervertere, moresque corrumpere connituntur, ut religionem, si fieri unquam posset, usquequaque tollere, et civilis societatis vincula revellere, camque funditus evertere valeant. Hinc porro deploranda multorum mentibus offusa caligo; acerrimum contra catholicam rem universam, atque hanc Apostolicam Sedem bellum; terriberrimum contra virtutem, honestatemque odium; perditissima vitia mentito virtutis nomine dishonestata; effrenata opinandi, vivendi, et quidlibet audendi licentia; impotens cuiusque imperii, potestatis, atque auctoritatis intolerantia; sacrarum rerum, ac sanctissimarum legum, optimarumque institutionum ludibrium, contemptus; miseranda improvidae praesertim iuventutis corruptio; pestifera pravorum librorum et undique volantium ac peccare docentium libellorum, ephemeridum, ac pagellarum colluvies; mortiferum *indifferentismi*, et incredulitatis virus; impiarum conspirationum motus, et iura cum humana, tum divina spreta, atque irrita. Neque Vos latet, Venerabiles Fratres, quae exinde anxietas, quae dubitatio, quae haesitatio, ac formido omnium praesertim bene sentientium animos sollicitet, et angat, cum gravissima quaeque mala privatis, publicisque rationibus sint pertimescenda, ubi homines a veritatis, iustitiae, et religionis norma misere desciscunt, ac pravis indomitisque servientes cupiditatibus omne nefas animo moluntur.“ — Eadem repetuntur in Encyclica „Apostolicae Nostrae“ d. d. 1. Aug. 1854, qua iterum publicae preces, praesertim ob dogma de Immaculato Virginis Conceptu definiendum, praescribuntur, indulgentiaeque in forma Jubilaei impertiuntur: „Atque illud vel maxime dolendum, quod inter tot numquam satis lugenda damna et mala filii tenebrarum, qui sunt prudentiores filiis lucis in generatione sua, magis in dies diabolicis quibusque fraudibus, artibus, ac molitionibus connitantur acerrimum contra catholicam Ecclesiam, eiusque salutarem doctrinam bellum gerere, legitimae cuiusque potestatis auctoritatem convellere et labefactare, omnium animos mentesque depravare, corrumpere, mortiferum *indifferentismi* atque *incredulitatis* virus usquequaque propagare, iura omnia divina et humana *permiscere*, dissensiones, discordias, atque impiarum rebellionum motus excitare, fovere, prava quaeque flagitia et crudelissima facinora admittere, nihilque intentatum relinquere, ut, si fieri unquam posset, sanctissima nostra religio de medio tollatur, et ipsa humana societas funditus evertatur.“ *Nota edit.*

<sup>2)</sup> *Huc ref. prop. 28.*

mandato, erunt etiam a loco, ubi morantur, expellendi et alio asportandi, vel in Mexicanam civitatem deducendi. Ad haec Gubernium idem jam penitus extinxit Religiosam Familiam Ordinis S. Francisci in eadem Mexicana civitate sitam, eiusque reditus ad pia legata pertinentes nationali aerario attribuit, Coenobii aedificium magna ex parte destruxit, et nonnullos eiusdem Familiae religiosos Sodales in carcerem coniecit. Atque ipsius Gubernii iussu Venerabilis Frater Clemens Episcopus Mecoacanus comprehensus, et a sua Dioecesi crudeliter divulsus in ipsam Mexicanam civitatem interim fuit relegatus. Utinam ne alii egregii Sacrorum Antistites, et ecclesiastici, laique viri eadem exagitantur procella!

Ex quibus luctuosissimis sane factis, quae dolenter commemoravimus, plane perspicitis, Venerabiles Fratres, quomodo a Mexicano Gubernio sanctissima nostra religio fuerit percussa et afflicta, et quantae ab ipso catholicae Ecclesiae, eiusque sacris iuribus, Ministris, Pastoribus, ac supremae Nostrae, et huius Sanctae Sedis auctoritati iniuriae fuerint inflatae. Absit vero, ut Nos in tanta sacrarum rerum perturbatione, et Ecclesiae, eiusque potestatis, ac libertatis oppressione Apostolici Nostri ministerii munus obire unquam praetermittamus. Quapropter, ut fideles ibi degentes sciant, et universus Catholicus Orbis cognoscat, a nobis vehementer improbari ea omnia, quae a Mexicanae Reipublicae Moderatoribus contra catholicam Religionem, Ecclesiam, eiusque sacros Ministros, Pastores, leges, iura, proprietates, et contra huius Sanctae Sedis auctoritatem gesta sunt, Pontificiam Nostram in hoc amplissimo vestro consensu apostolica libertate vocem attollimus, et praedicta omnia decreta ac cetera, quae ibi a civili potestate cum tanto ecclesiasticae auctoritatis, et huius Apostolicae Sedis contemptu, ac tanta Religionis et Sacrorum Antistitum et ecclesiasticorum praesertim hominum iactura ac detrimento sancita sunt, damnamus, reprobamus et irrita prorsus, ac nulla declaramus. Insuper eos omnes, quorum opera, consilio, iussu illa patrata sunt, gravissime monemus, ut serio reputent poenas et censuras, quae adversus sacrarum personarum et rerum, atque ecclesiasticae libertatis et potestatis violatores, profanatores, et huius Sanctae Sedis iurum usurpatores ab Apostolicis Constitutionibus, sacrisque Conciliorum Canonibus sunt constitutae.

Nunc autem haud possumus, quin ex animo gratulemur, et maximas meritasque laudes tribuamus Venerabilibus Fratribus illius Reipublicae Sacrorum Antistitibus, qui proprii episcopalis muneris optime memores singulari firmitate, et constantia Ecclesiae causam impavide propugnarunt, et invicto animo dura quaeque et aspera pro ipsius Ecclesiae defensione perpeti sunt gloriati. Debito quoque laudum praeconio illos omnes tum ecclesiasticos, tum laicos viros prosequimur, qui catholicis sensibus vere animati, et illustra suorum Antistitum exempla sectantes, in idipsum suos etiam labores pro viribus conferre haud omiserunt, gravissima omnia subeuntes pericula et discrimina. Atque etiam summopere collaudamus fidelem Mexicanae Reipublicae populum, qui ex parte longe maxima vehementer dolens, et indignans tam tristia et iniqua contra suam religionem, suosque Pastores facta, nihil antiquius habet, quam et catholicam profiteri fidem, et suos Episcopos omni amore et obsequio prosequi, ac Nobis, et huic Petri Cathedrae firmiter constanterque adhaerere. Quocirca in eam spem erigimur fore, ut dives in misericordia Deus super illam vineam suam propitius respiciat, et eam ab omnibus, quibus tantopere affligitur, malis eripiat.

Iam vero non minori moerore conficimur, Venerabiles Fratres, ob gravissima sane damna, quibus Ecclesia in plerisque meridionalis etiam Americae regionibus, Hispaniarum Regno olim subiectis, a civili potestate miserandum in modum premitur ac divexatur. In illis enim regionibus laica potestas, inter alia, sibi temere arrogat ius praesentandi Episcopos, et ab illis exigit ut iuncant Dioecesium procuracionem, antequam ipsi canonicam ab hac Sancta Sede institutionem, et Apostolicas Litteras accipiant<sup>1)</sup>. Atque in iisdem regionibus prohibentur Episcopi libere damnare acatholica scripta, nec fas est eis sine Gubernii venia vel ipsas Apostolicas Litteras promulgare<sup>2)</sup>. Insuper coarctatur Ecclesiae libertas in acquirendis proprie-

<sup>1)</sup> *Huc ref. prop.* 50.

<sup>2)</sup> *Huc ref. prop.* 28.



tatibus, et impeditur executio gratiarum huius Apostolicae Sedis<sup>1)</sup>, et studiorum methodus in Clericorum Seminariis adhibenda civili auctoritati subiicitur<sup>2)</sup>, et ab ipsa laica potestate ecclesiasticae decimae vel penitus sublatae, vel publico aerario adiudicatae fuere, et iniuncta est Episcopis, ecclesiasticisque viris obligatio iurandi plures res Ecclesiae iuribus adversas, quae in civili Constitutione continentur. In una autem ex ipsis regionibus non solum haec omnia contra Ecclesiae potestatem et iura geruntur, verum etiam civile Gubernium novam de Episcopis eligendis normam praescripsit, qua disciplina ab Ecclesia statuta labefactatur; et legem sancivit, qua ecclesiastici fori privilegium, decimae, et parochorum emolumenta de medio sublata sunt. Praeterea in hac eadem regione et nativum Ecclesiae ius omnino oppugnatur, acquirendi scilicet proprietates<sup>3)</sup>, et non omnia admittuntur matrimonialia impedimenta ab Ecclesia statuta<sup>4)</sup>; et nullae prorsus declarantur gratiae a Romano Pontifice concessae, nisi per Gubernium fuerint imploratae<sup>5)</sup>; et proprio arbitrio immutata est aetas ab Ecclesia praescripta pro religiosa tam mulierum, quam virorum professione, et omnes Religiosae Familiae neminem sine Gubernii permissu ad solemnia vota nuncupanda admittere possunt<sup>6)</sup>. Atque in aliis eisdem Americae meridionalis regionibus laica potestas eo temeritatis devenit, ut etiam res vel maxime sacras et spirituales, quae ab Episcoporum voluntate unice pendent, suae auctoritati subicere audeat.

Quae sane omnia, incredibili animi Nostri aegritudine a Nobis breviter cursimque enunciata, quam vehementer improbare ac detestari debeamus, probe intelligitis, Venerabiles Fratres, cum civilis potestas nefariis hisce molitionibus divinam Ecclesiae institutionem, eiusque sanctissimam doctrinam, ac venerandam auctoritatem, disciplinam, omniaque ipsius Ecclesiae iura, ac supremam huius Apostolicae Sedis dignitatem, potestatemque impetere, convellere, et conculcare connitatur. In tanta vero acerbitate mirifice Nos recreat, et consolatur eximia Venerabilium Fratrum earundem meridionalis Americae regionum Sacrorum Antistitum virtus, religio, pietas, qui divino auxilio freti, ac proprii muneris partes implentes cum immortalis sui nominis et ordinis laude non desistunt hisce saecularis potestatis conatibus fortiter obsistere, et qua voce, qua scriptis Ecclesiae libertatem, ac iura tam iniuste occupata tueri, repetere, et confidenter profiteri, paratissimi ad omnia subeunda pericula.

At vero minime ignoratis, Venerabiles Fratres, quam vehementer anxii et solliciti simus de tristissima conditione, ad quam sanctissima nostra religio redacta est in Helvetia, ac profecto meminertis, Nos in Consistoriali oratione, die vigesimo sexto mensis Iulii superiore anno habita, raptim perstrinxisse innumera fere damna ibi a laica potestate Ecclesiae, eiusque sacrae auctoritati, iuribus, rebus, Episcopis, et ministris allata. Equidem Nobis in animo est. cum id opportunum existimabimus, peculiarem de hoc molestissimo sane argumento habere sermonem, cum praesertim in illis regionibus multiplices, et omnino detestandi contra Ecclesiam ausus magis in dies invaluerint et excreverint. Interim vero, etiamsi non levi animi Nostri solatio et consolatione noscamus, fidelem illarum regionum Clerum ex parte longe maxima inter plurimas difficultates sui ministerii munia sedulo obire, et pro viribus praeliari bella Domini, tamen Nobis temperare non possumus quin summopere doleamus, improbemus, damnemus perversam paucorum ecclesiasticorum hominum agendi rationem, qui nefariis laicae potestatis conatibus favere, et in Ticinensi praesertim pago maximum bonis omnibus Catholicis scandalum afferre, ac Dei indignationem in se concitare non horrent. Ea porro spe sustentamur fore, ut illarum regionum Moderatores tandem aliquando velint saniora inire consilia, et cognoscere, veram populorum felicitatem prosperitatemque sine divina nostra Religione, eiusque salutari doctrina, ac debito erga veneranda Ecclesiae iura obsequio et reverentia non posse consistere. In quam speciem eo magis inducimur quod

<sup>1)</sup> *Huc ref. prop.* 29.

<sup>3)</sup> " " " 26.

<sup>5)</sup> " " " 29.

<sup>2)</sup> *Huc ref. prop.* 46.

<sup>4)</sup> " " " 68.

<sup>6)</sup> " " " 52.

audivimus, Episcopum ab exilio quamprimum revocatum iri. Faxit Deus, ut huiusmodi Nostrae spes minime sint fallaces!

Nos certe Deo auxiliante nunquam officio Nostro deerimus, et nunquam desinemus omnes perferre labores, omnes suscipere curas, omnia adhibere studia, ut Ecclesiae causam Nobis divinitus commissam pro Apostolici Nostri muneris debito viriliter tueamur ac propugnemus. Interea vero una Vobiscum, Venerabiles Fratres, levantes cor et oculos Nostros in montem excelsum et sanctum, unde omne Nobis auxilium affuturum confidimus, nunquam intermittamus dies noctesque assiduis precibus gemitibusque misericordiarum Patrem et Deum totius consolationis orare et obsecrare, ut omnipotenti sua virtute Ecclesiam suam sanctam a tantis, quibus tum in illis regionibus afflicta, calamitatibus defendat, eripiat, ac simul dignetur caelesti sua gratia ipsius Ecclesiae inimicorum animos, mentesque illustrare, expugnare, eosque de impietatis et perditionis via ad iustitiae ac salutis semitas reducere.

## \* Litterae

Venerabili Fratri Henrico Episcopo Wratislaviensi die XXX. martii  
anni MDCCCLVII.

### Pius PP. IX.

Venerabilis Frater, Salutem et Apostolicam Benedictionem.

Novum eximiae Tuae erga Nos, et hanc Apostolicam Sedem observantiae testimonium, et egregiae Tuae episcopalis vigilantiae documentum perlibenter animadvertimus in Litteris, quas, Venerabilis Frater, die 10. huius mensis ad Nos dedisti. Significas enim, quod ubi primum per publicas ephemerides novisti decretum a Nobis sancitum, et a Nostra Indicis Congregatione die 8 proximi mensis Ianuarii editum, quo prohibita fuere opera a Dilecto Filio Presbytero Antonio Günther germanico idiomate scripta, typisque in lucem emissa, statim intellexeris, eiusdem Auctoris doctrinam esse proscriptam, eamque neque in philosophicis, neque in theologicis disciplinis tradendis admitti posse, atque approbari. Hinc nulla interposita mora a Dilecto Filio Canonico Ioanne Baptista Baltzer Güntheri assecla, atque in ista Universitate Theologiae Dogmaticae Professore exegisti declarationem, qua clare aperteque suam mentem de lato in Güntherianam doctrinam decreto patefaceret. Quocirca idem Canonicus suam Tibi tradidit Epistolam die 5. huius mensis Nobis scriptam, atque a Te cum Tuis Litteris ad Nos missam, qua declarat, se commemorato Decreto in causa Güntheri iam publicato ex debita obedientia simpliciter esse subiectum, ac non posse supremae Nostrae auctoritati non obedire. Non mediocrem voluptatem ex hac Canonici Baltzer declaratione percepimus, quae catholico Sacerdote plane digna singularem illam auxit consolationem, qua affecti fuimus, cum obsequentissimas ipsius Antonii Günther Litteras Nobis die 10. clapsi mensis Februarii scriptas legimus, quibus is amplissimis verbis, et summa cum sui nominis laude semel iterumque professus est, nihil sibi potius esse, quam supremae Nostrae, et huius Apostolicae Sedis auctoritati semper obtemperare, et idcirco se humillime subicere commemorato decreto de suis operibus promulgato.

Quae quidem dum non leve Nobis afferunt solatium, spemque faciunt fore, ut alii etiam eiusdem doctrinae sectatores christianam utriusque commemorati Doctoris obedientiam, debitamque magisterio Nostro subiectionem imitentur, dumque Nobis occasionem praebent Tibi impense gratulandi, Venerabilis Frater, quod, uti decebat, Tuum munus expleveris, non possumus, quin pro Apostolici Nostri ministerii officio apertissime edicamus, sumnam Tibi adhibendam esse vigilantiam, ne contenta Güntherianis libris doctrina diutius ullo modo tradatur, aut comprobetur.

Et re sane vera, quod non sine paterni animi Nostri dolore significamus, neque pauca, neque levia in commemoratis libris reperiuntur, quae tum verbis, tum rebus a catholica veritate non minimum discedunt. Quo quidem numero ea praesertim censentur, quae auctor tuetur et affirmat de

augustissima Trinitate, de Sacramento Dominicae Incarnationis, de rerum creatione, de habitu philosophiae, ac theologiae, scientiae, ac fidei. Neque enim satis intellexit philosophiae esse in iis, quae ad religionem pertinent, non dominari, sed ancillari, non praescribere quid credendum sit, sed rationabili obsequio amplecti, neque altitudinem scrutari mysteriorum Dei, sed illam pie, humiliterque revereri<sup>1)</sup>. Immo neque satis intellexit quantopere deferendum sit venerandae Sanctissimorum Patrum auctoritati, et quo studio cavendum, ne profanae novitatis amore tuta illorum vestigia deserantur, et gravissimi diffundantur errores<sup>2)</sup>.

Habes, Venerabilis Frater, quid Tibi de hoc argumento in praesentia respondendum esse existimavimus, ac pro certo habemus, Te ob egregiam Tuam religionem hisce Nostris monitis studiosissime esse obsequuturum. Denique caelestium omnium munerum auspicem, et praecipuae Nostrae in Te benevolentiae testem Apostolicam Benedictionem ex imo corde profectam Tibi ipsi, Venerabilis Frater, et gregi Tuae curae commisso peramanter impertimur.

Datum Romae apud Sanctum Petrum die 30. Martii anno 1857,

Pontificatus Nostri Anno Undecimo.

Pius PP. IX.

## Epistola

ad eminentissimum Archiepiscopum Coloniensem de Güntherianismi damnatione<sup>3)</sup>

*Dilecto Filio Nostro Joanni, Tituli S. Laurentii in Viminali, Presbytero S. R. E. Cardinali De Geissel, Archiepiscopo Coloniensi.*

Pius PP. IX.

Dilecte Fili Noster, Salutem et Apostolicam Benedictionem.

Eximiam Tuam Nobisque plane cognitam pastorem in catholica doctrina tuenda curam et sollicitudinem non mediocri certe animi Nostri iucunditate undique elucere perspeximus in Litteris, quas, Dilecti Fili Noster, die 16. proximi mensis Aprilis ad Nos dedisti super Decreto Pontificia Nostra auctoritate sancito, atque a Nostra Indicis Congregatione die 8. mensis Januarii huius anni edito, quo opera Dilecti Filii Presbyteri Antonii Günther proscripta fuerunt. Nos quidem pro Apostolici Nostri ministerii officio nullis unquam parcentes curis, nullisque laboribus, ut fidei depositum, Nobis divinitus concreditum, integrum inviolatumque custodiatur, ubi primum a pluribus Venerabilibus Fratribus spectatissimis Germaniae Sacrorum Antistitibus accepimus, non pauca Güntheri libris contineri, quae ipsi in sinceræ fidei, et catholicae veritatis perniciem cedere arbitrabantur, nulla interposita mora eidem Congregationi commisimus, ut ex more opera eiusdem Güntheri accurate diligenterque excuteret, perpenderet, examinaret, ac deinde omnia ad Nos referret. Cum igitur ipsa Congregatio Nostris mandatis obsequuta, suoque munere functa omnem in hoc gravissimo saepe, maximeque momenti negotio curam et operam scite riteque collocaverit, nullumque praetermiserit studium in Güntheriana doctrina accuratissimo examine noscenda ac ponderanda, animadvertit, plura in Güntheri libris reperiri omnino improbanda ac damnanda, utpote quae catholicae Ecclesiae doctrinae maxime adversarentur. Hinc rebus omnibus a Nobis etiam perpensis, eadem Congregatio Decretum illud suprema Nostra auctoritate probatum, Tibique notissimum edidit, quo Güntheriana opera prohibentur et interdicuntur.

Quod quidem Decretum Nostra auctoritate sancitum, Nostroque inssu vulgatum sufficere plane debebat, ut quaestio omnis penitus dirempta censeretur, et omnes, qui catholico gloriantur nomine, clare aperteque intelligerent, sibi esse omnino obtemperandum, et sinceram haberi non posse

<sup>1)</sup> *Huc ref. prop. 8, 9.*

<sup>2)</sup> *Huc ref. prop. 13.*

<sup>3)</sup> *Huc refertur Nota ad §. II. Syllabi.*

doctrinam Güntherianis libris contentam, ac nemini deinceps fas esse doctrinam iis libris traditam tueri, ac propugnare, et illos libros sine debita facultate legere, ac retinere. A quo quidem obedientiae, debitique obsequii officio nemo immunis propterea videri censerique poterat, quod in eodem Decreto vel nullae nominatim propositiones notarentur, vel nulla certa, statique adhiberetur censura. Ipsum enim per se valebat Decretum, ne qui sibi integrum putarent ab iis, quae Nos comprobavimus, utcumque discedere.

Sed vehementer errant, qui generalis eiusmodi prohibitionis causam inde profectam esse arbitrantur, quod ipsa Congregatio nullas singillatim Güntherianorum operum sententias, nullasque praecise opiniones censura dignas deprehenderit. Etenim non sine dolore apprime noscimus, in iisdem operibus erroneum, ac perniciosissimum, et ab hac Apostolica Sede saepe damnatum rationalismi systema ampliter dominari; itemque noscimus, in iisdem libris ea inter alia non pauca legi, quae a catholica fide, sinceraque explicatione de Unitate divinae substantiae in Tribus distinctis, sempiternisque Personis non minimum aberrant. In compertis pariter habemus, neque meliora, neque accuratiora esse, quae traduntur de Sacramento Verbi Incarnati, deque unitate divinae Verbi personae in duabus naturis, divina et humana. Noscimus, iisdem libris laedi catholicam sententiam ac doctrinam de homine, qui corpore et anima ita absolvatur, ut anima eaque rationalis sit vera per se, atque immediata corporis forma. Neque ignoramus, ea iisdem libris doceri et statui, quae catholicae doctrinae de suprema Dei libertate a quavis necessitate soluta in rebus procreandis plane adversantur. Atque illud etiam vel maxime improbandum ac damnandum, quod Güntherianis libris humanae rationi et philosophiae, quae in religionis rebus non dominari, sed ancillari omnino debent, magisterii ius temere attribuitur ac propterea omnia perturbentur, quae firmissima manere debent tum de distinctione inter scientiam et fidem, tum de perenni fidei immutabilitate, quae una semper, atque eadem est, dum philosophia, humanaeque disciplinae neque semper sibi constant, neque sunt a multiplici errorum varietate immunes<sup>1)</sup>. Accedit, nec ea sanctos Patres reverentia haberi, quam Conciliorum Canones praescribunt, quamque splendidissima Ecclesiae lumina omnino promerentur; nec ab iis in catholicas Scholas dicteris abstineri, quae recolendae memoriae Pius VI. Decessor Noster solemniter damnavit<sup>2)</sup>. Neque silentio praeteribimus, in Güntherianis libris vel maxime violari sanam loquendi formam, ac si liceret verborum Apostoli Pauli oblivisci<sup>3)</sup>, aut horum quae gravissime monuit Augustinus «Nobis ad certam regulam loqui fas est, ne verborum licentia <etiam de rebus, quae his significantur, impiam gignat opinionem>».

Ex quibus omnibus profecto vides, Dilecte Fili Noster, qua cura et studio cum Tibi, tum Venerabilibus Fratribus Episcopis Tuis Suffraganeis sit advigilandum, ut ab istis Dioecesibus Güntheriana opera amoveantur, et qua singulari sollicitudine excubandum, ne doctrina eisdem operibus contenta et iam proscripta ullo unquam modo sive in philosophicis, sive in theologicis disciplinis a quovis in posterum tradatur, aut comprobetur.

Jam vero dum Güntheri opera damnanda esse censuimus, ac censemus, hand possumus, quin tibi significemus, ipsum Dilectum Filium Presbyterum Antonium Günther non mediocri Nos affecisse consolatione, quandoquidem obsequentissimis suis Litteris die 10. mensis Februarii ad Nos scriptis cum summa sui nominis laude amplissimis verbis semel iterumque professus est, nihil sibi potius, quam supremae Nostrae, et huius Apostolicae Sedis auctoritati semper obtemperare, et idcirco se humillime subiicere commemorato Decreto de suis operibus promulgato. Hoc autem egregium sane Güntheri exemplum pari animi Nostri gaudio imitati sunt plures Dilecti Filii Doctores Theologiae, Philosophiae, Historiae ecclesiasticae, et Canonici Juris in variis Germaniae Lyceis, ac primarii Güntherianae doctrinae asseclae, qui suis ad Nos datis Litteris contestati sunt, se commemorato Decreto humillime subiicere, nihilque sibi magis cordi esse, quam Pontificiae Nostrae, et huius Sanctae Sedis auctoritati animo obedire. Dum vero hac re summopere laetamur, in eam porro spem erigimur fore, ut alii omnes Güntherianae doctrinae

<sup>1)</sup> *Huc ref. prop.* 8. 9.

<sup>2)</sup> *Huc ref. prop.* 13.

<sup>3)</sup> *II. ad Timoth.* 13.

<sup>4)</sup> *De Civit. Dei lib.* 10. cap. 23.

sectatores christianam tum ipsius auctoris, tum horum animi docilitatem, et obedientiam, debitamque magisterio Nostro subiectionem Deo bene iuvante aemulari velint, atque ita ipsius auctoris coronam augeant, et Nostram expleant cumulentque laetitiam. Habes, Dilecte Fili Noster, quae Tibi de hoc argumento rescribenda esse existimavimus, atque hac etiam occasione libentissime utimur, ut iterum ostendamus et confirmemus praecipuam, qua Te in Domino complectimur, benevolentiam. Cuius quoque certissimum pignus esse volumus Apostolicam Benedictionem, quam toto cordis affectu Tibi ipsi, Dilecte Fili Noster, et gregi Tuae vigilantiae commisso peramanter impertimur.

Datum Bononiae, die XV. Junii, anno MDCCCLVII., Pontificatus Nostri Anno Undecimo.

## \* Epistola Encyclica.

Venerabilibus Fratribus Patriarchis, Primatibus, Archiepiscopis, Episcopis, aliisque locorum Ordinariis, gratiam et communionem cum Apostolica Sede habentibus.

### Pius PP. IX.

Venerabiles Fratres, Salutem et Apostolicam Benedictionem.

Qui nuper per Italiam erupit contra legitimos Principes seditionis motus, in regionibus etiam Pontificiae ditioni finitimis, nonnullas ex Provinciis Nostris quaedam veluti incendii flamma pervasit; quae quidem et funesto illo permotae exemplo, et externis actae incitamentis a paterno Nostro regimine sese subdlexerunt, et vero etiam paucis adnitentibus id quaerunt, ut italico illi subiiciantur Gubernio, quod per annos hosce postremos Ecclesiae, ac legitimis illius iuribus, sacrisque administris se gessit adversum. Dum Nos rebellionis huiusmodi actus et reprobamus, et dolemus, quibus quaedam tantum populi pars turbatis in iisdem provinciis iniuste adeo respondet paternis studiis, curisque Nostris, ac dum necessarium esse palam edicimus Sanctae huic Sedi civilem principatum, ut in bonum religionis sacram potestatem sine ullo impedimento exercere possit <sup>1)</sup>, quem quidem civilem Principatum extorquere eidem connituntur vaferrimi hostes Ecclesiae Christi, Vobis in tanto rerum turbine praesentes damus litteras, Venerabiles Fratres, ut aliquod dolori Nostro solatium quaeramus. Atque hac occasione Vos etiam hortamur, ut pro explorata pietate vestra, pro eximio erga Apostolicam Sedem, eiusque libertatem studio id praestandum curetis, quod olim Aaroni supremo Hebraeorum Pontifici praescripsisse legimus Moysem <sup>2)</sup>: „*Tolle thribulum, et hausto igne de altari mitte incensum desuper, pergens cito ad populum, ut roges pro eis; iam enim egressa est ira a Domino, et plaga desaevit.*“ Itemque Vos hortamur, ut preces fundatis quemadmodum sancti illi fratres, Moyses nimirum, atque Aaron, qui „*proni in faciem dixerunt: Fortissime Deus spirituum universae carnis, num aliquibus peccantibus contra omnes ira tua desaeviet*“ <sup>3)</sup>? Ad hoc scilicet, Venerabiles Fratres, praesentes Vobis mittimus litteras, ex quibus non parum solatii percipimus, quippe confidimus, desideriis Vos, curisque Nostris cumulate responsuros. Ceterum palam hoc profitemur, indutos Nos virtute ex alto, quam infirmitati Nostrae immitteret fidelium precibus exoratus Deus, quidvis discriminis, quidvis acerbitalis antea perpersuros quam Apostolicum ulla ex parte deseramus officium, ac quidquam admittamus contra iuramenti sanctitatem, quo Nos obstrinximus, cum licet immerentes supremam hanc Apostolorum Principis Sedem, arcem, et propugnaculum Catholicae fidei, Deo sic volente, consendimus. In pastore vestro tuendo munere omnia laeta, ac felicia, Venerabiles Fratres, Vobis adprecantes, caelestis auspicem beatitatis Apostolicam benedictionem, Vobis, gregique vestro peramanter impertimur.

Datum Romae apud Sanctum Petrum die 18. Junii Anno 1859. Pontificatus Nostri Anno Decimoquarto.

<sup>1)</sup> *Huc ref. Nota ad §. IX. Syll.*

<sup>2)</sup> Num. Cap. XVI.

<sup>3)</sup> Num. Cap. XVI.

## \* Allocutio

habita in consistorio secreto die XX. iunii anni MDCCCLIX.

Venerabiles Fratres.

Ad gravissimum, quo cum bonis omnibus propter bellum inter catholicas nationes excitatum premimur, dolorem maximus accessit moeror ob luctuosam rerum conversionem ac perturbationem, quae in nonnullis Pontificiae Nostrae ditionis Provinciis nefaria impiorum hominum opera ac sacrilego prorsus ausu nuper evenit. Probe intelligitis, Venerabiles Fratres, Nos dolenter loqui de scelestis sane perduellum contra sacrum legitimumque Nostrum, et huius Sanctae Sedis civilem principatum coniuratione et rebellionem, quam vaferrimi homines in eisdem Nostris provinciis commorantes tum clandestinis pravisque coetibus, tum turpissimis consiliis cum finitimarum regionum hominibus initis, tum fraudulentis calumniosisque editis libellis, tum exteris armis comparatis et investis, tum perversis quibusque aliis fraudibus et artibus moliri, fovere, et efficere minime reformidarunt. Nec possumus non vehementer dolere, infestam huiusmodi coniurationem primum erupisse in civitate Nostra Bononiensi, quae paternae Nostrae benevolentiae ac liberalitatis ornata beneficiis duos fere ab hinc annos, cum ibi diversati sumus, suam erga Nos et hanc Apostolicam Sedem venerationem ostendere, ac testari haud omiserat. Bononiae enim die duodecima huius mensis, postquam Austriacae inopinato discesserunt copiae, nulla interposita mora coniurati homines audacia insignes, omnibus divinis, humanisque proculcatis iuribus, laxatisque improbitatis habenis, haud exhorruerunt tumultuari, atque urbanam cohortem, aliosque armare, cogere, educere, atque Cardinalis Nostri Legati aedes adire, ibique ablatis Pontificiis Insignibus eorum loco rebellionis vexillum attollere et collocare cum summa honestiorum civium indignatione ac fremitu, qui tantum facinus improbare, ac Nobis et Pontificio Nostro Gubernio plaudere haud extimescebant. Hinc ab ipsis perduellibus eidem Cardinali Nostro Legato protectio fuit denunciata, qui pro sui muneris officio tot scelestis ausibus obsistere, ac Nostram, et huius Sanctae Sedis dignitatem et iura asserere ac tueri minime praetermittebat. Atque eo sceleris et impudentiae rebelles devenerunt, ut minime veriti sint gubernium immutare, et Sardiniae Regis Dictaturam petere, et ob hanc causam suos ad eundem Regem deputatos mittere. Cum igitur Noster Legatus haud posset tantas impedire improbitates, easque diutius ferre et intueri, solemnem tum voce tum scripto edidit protestationem contra omnia quae a factiosis hominibus adversus Nostram et huius Sanctae Sedis iura fuerunt patrata, ac Bononia decedere coactus Ferrariam se contulit.

Quae Bononiae tam nefarie peracta sunt, eadem similibus criminosis modis Ravennae, Perusiae, et alibi flagitiosi homines communi bonorum omnium luctu agere minime dubitarunt, haud timentes posse suos impetus a Pontificiis Nostris copiis reprimi ac refringi, cum illae numero paucae eorum furori et audaciae resistere minime possent. Quocirca in eisdem civitatibus a perduellibus omnium divinarum, humanarumque legum conculcata auctoritas, et suprema civilis Nostra atque huius Sanctae Sedis oppugnata potestas, et defectionis erecta vexilla, et legitimum Pontificium gubernium de medio sublatum, et Sardiniae Regis Dictatura petita, et Nostri Delegati publica emissa protestatione ad protectionem vel impulsu, vel coacti, et alia multa rebellionis admissa facinora.

Nemo vero ignorat quo isti civilis Apostolicae Sedis principatus osiores semper potissimum spectent, et quid ipsi velint, quid cupiant, quid exoptent. Omnes quidem norunt singulari Divinae Providentiae consilio factum esse, ut in tanta temporalium Principum multitudine et varietate Romana quoque Ecclesia temporalem dominationem nemini prorsus obnoxiam haberet, quo Romanus Pontifex Summus totius Ecclesiae Pastor, nulli unquam Principi subiectus, supremam universi Dominici gregis pascendi, regendique potestatem auctoritatemque ab ipso Christo Domino acceptam per universum qualem patet orbem plenissima libertate exercere, ac simul facilius divinam religionem magis in dies propagare, et variis fidelium indigentis occurrere,

et opportuna flagitantibus auxilia ferre, et alia omnia bona peragere posset, quae pro re ac tempore ad maiorem totius christianae reipublicae utilitatem pertinere ipse cognosceret. Infestissimi igitur Romanae Ecclesiae temporalis domini hostes civilem eiusdem Ecclesiae, Romanique Pontificis principatum caelesti quadam rerum dispensatione, et vetusta per tot iam continentia saecula possessione, ac iustissimo quovis alio optimoque iure comparatum, et communi omnium populorum et Principum vel acatholicorum consensione uti sacrum inviolatumque Beati Petri patrimonium semper habitum ac defensum invadere, labefactare, ac destruere connituntur, ut, Romana Ecclesia suo spoliata patrimonio, Apostolicae Sedis, Romanique Pontificis dignitatem, maiestatemque deprimant, pessumdent, et liberius sanctissimae religioni maxima quaeque damna, ac terrimum bellum inferant, ipsamque religionem, si fieri unquam posset, funditus evertant. Huc sane semper spectantur ac spectant nequissima illorum hominum consilia, molitiones et fraudes, qui temporalem Romanae Ecclesiae dominationem convellere exoptant, veluti diuturna ac tristissima experientia omnibus clare aperteque demonstrat<sup>1)</sup>.

Quamobrem cum Nos Apostolici Nostri muneris officio, solemnique iuramento adstricti debeamus religionis incolumitati summa vigilantia prospicere, ac iura et possessiones Romanae Ecclesiae omnino integras inviolatasque tueri, et huius Sanctae Sedis libertatem, quae cum universae Ecclesiae utilitate est plane coniuncta, asserere et vindicare, ac proinde ipsius Principatum defendere, quo ad liberam rei sacrae in toto terrarum orbe procuracionem exercendam Divina Providentia Romanos Pontifices donavit, illumque integrum et inviolatum Nostri Successoribus transmittere, idcirco non possumus non vehementer damnare, detestari impios nefariosque perduellium subditorum ausus, conatus, illisque fortiter obsistere.

Itaque postquam per reclamacionem Nostri Cardinalis Secretarii Status missam ad omnes Oratores, Ministros et negotiorum Gestores exterarum Nationum apud Nos et hanc S. Sedem, nefarios huiusmodi rebellium ausus reprobavimus ac detestati sumus, nunc in amplissimo hoc Vestro Consessu, Venerabiles Fratres, Nostram attollentes vocem maiori qua possumus animi Nostri contentione protestamur contra ea omnia, quae perduelles in commemoratis locis agere ausi sunt, et suprema Nostra auctoritate damnamus, reprobamus, rescindimus, abolemus omnes et singulos actus tum Bononiae, tum Ravennae, tum Perusiae, tum alibi ab ipsis perduellis contra sacrum legitimumque Nostrum, et huius S. Sedis Principatum quovis modo factos et appellatos, et eosdem actus irritos omnino, illegitimos, et sacrilegos esse declaramus, atque decernimus. Insuper in omnium memoriam revocamus maiorem excommunicationem, aliasque ecclesiasticas poenas et censuras a sacris Canonibus, Apostolicis Constitutionibus et Generalium Conciliorum, Tridentini praesertim<sup>2)</sup> decretis inflictas, et ulla absque declaratione incurrendas ab iis omnibus qui quovis modo temporalem Romani Pontificis potestatem impetere audeant: in quas proinde eos omnes misere incidisse declaramus qui Bononiae, Ravennae, Perusiae, et alibi civilem Nostram, et huius Sanctae Sedis potestatem, et iurisdictionem, ac Beati Petri patrimonium opera, consilio, assensu, et alia quacumque ratione violare, perturbare, et usurpare ausi sunt.

Dum vero officii Nostri ratione compulsi haec non sine levi animi Nostri dolore declarare, et edicere cogimur, miserrimam tot filiorum caecitatem illacrimantes a clementissimo misericordiarum Patre humiliter enixeque exposcere non desistimus, ut omnipotenti sua virtute efficiat, ut quamprimum optatissimus illucescat dies, quo et ipsos filios resipiscentes, atque ad officium reductos iterum paterno sinu cum gaudio excipere, et perturbatione sublata ordinem tranquillitatemque in tota Pontificia Nostra ditione restitutam videre possimus. Hac autem in Deo fiducia suffulti ea quoque spe sustentamur fore, ut Europae Principes, uti antea, ita hoc etiam tempore suam omnem operam in temporali Nostro, sanctaeque huius Sedis principatu tuendo, et integre servando consociatis studiis consiliisque impendant, cum eorum cuiusque vel maxime intersit, Romanum Pontificem plenissima frui libertate, quo Catholicorum conscientiae in eorundem Principum ditionibus

<sup>1)</sup> *Huc ref. §. IX. Syll.*

<sup>2)</sup> *Sess. 22. cap. 11. de Reform.*

commorantium tranquillitati rite consultum sit. Quae quidem spes augetur, proptereaquod Gallicae copiae in Italia degentes, iuxta ea quae carissimus in Christo Filius Noster Gallorum Imperator declaravit, non modo nihil contra temporalem Nostram et huius S. Sedis dominationem agent, immo vero eandem tuebuntur atque servabunt.

## \* Allocutio

habita in consistorio secreto die XXVI. septembris anni MDCCCLIX.

### Venerabiles Fratres.

Maximo animi Nostri dolore in Allocutione ad Vos die vicesimo proximi mensis Junii habita, Venerabiles Fratres, lamentati sumus ea omnia, quae ab huius Apostolicae Sedis hostibus tum Bononiae, tum Ravennae, tum alibi contra civilem legitimumque Nostrum, et eiusdem Sedis principatum patrata sunt. Insuper eadem Allocutione illos omnes in ecclesiasticas censuras et poenas a sacris Canonibus inflictas incidisse declaravimus, et omnes eorum actus nullos et irritos esse decrevimus.

Ea porro spe sustentabamur fore, ut rebelles isti filii Nostris hisce vocibus excitati ac permoti ad officium redire vellent, cum omnes praesertim noscant quanta mansuetudine ac lenitate, vel ab ipso Supremi Nostri Pontificatus initio semper usi simus, et quanta alacritate studioque inter gravissimas temporum difficultates nunquam intermiserimus curas omnes cogitationesque ad temporariam quoque Nostrorum populorum utilitatem tranquillitatemque promovendam convertere. Sed Nostra haec spes prorsus evanuit. Etenim ipsi externis potissimum consiliis, instigationibus, et omnibus cuiusque generis auxiliis freti, atque iccirco audentiores facti nihil inausum, nihilque intentatum reliquerunt, ut omnes Aemiliae provincias Pontificiae Nostrae ditioni subiectas perturbarent, easque a civili Nostro, et huius Sanctae Sedis principatu distraherent. Hinc in iisdem provinciis rebellionis ac defectionis erecto vexillo, et Pontificio sublato Gubernio, primum Subalpini Regni Dictatores constituti fuerunt, qui postea Commissarii extraordinarii dicti, ac deinde Gubernatores generales appellati, quique Supremi Nostri Principatus iura sibi temere arrogantes a publicis obeundis muneribus illos amoverunt, quos ob spectatam erga legitimum Principem fidem cum pravis eorum consiliis minime consentire suspicabantur. Non dubitarunt autem huiusmodi homines in ecclesiasticam quoque invadere potestatem, cum novas de Nosocomiis, Orphanotrophiis, aliisque Pii Legatis, Locis et Institutis leges ediderint. Neque timuerunt aliquos ecclesiasticos viros vexare, eosque vel expellere, vel etiam in carcerem conicere. Apertissimo vero in hanc Apostolicam Sedem odio perciti minime reformidarunt die sexta huius mensis conventum Bononiae agere ab ipsis nationalem Aemiliae populorum appellatum, atque in illo promulgare decretum falsis criminationibus et praetextis refertum, quo populorum unanimiorem mendaciter asserentes, contra Romanae Ecclesiae iura declararunt, se nolle amplius Pontificio civili Gubernio subesse. Atque insequenti die declararunt item, veluti in more nunc est, se velle Sardiniae Regis ditioni et imperio adhaerere.

Hos inter lamentabiles ausus non desinunt huius factionis moderatores omnem eorum artem in corrumpendis populorum moribus impendere per libros praesertim atque ephemerides tum Bononiae, tum alibi editas, quibus fovetur quidlibet audendi licentia et Christi hic in terris Vicarius iniuriis laceratur, ac religionis pietatisque exercitationes ludibrio habentur, precesque ad Immaculatam Sanctissimamque Dei Genitricem Virginem Mariam colendam, eiusque potentissimum patrocinium implorandum adhibitae irriduntur<sup>1)</sup>. In scenicis vero spectaculis publica morum honestas, pudor virtusque offenditur, et personae Deo sacrae communi omnium contemptioni et irrisioni exponuntur.

<sup>1)</sup> *Huc ref. prop. 79*



Haec autem ab illis aguntur, qui se catholicos esse, et supremam Romani Pontificis spiritualem potestatem auctoritatemque colere, ac venerari affirmant<sup>1)</sup>. Omnes profecto vident, quam fallax sit huiusmodi declaratio: ipsi namque talia agentes cum illis omnibus conspirant, qui teterrimum adversus Romanum Pontificem et catholicam Ecclesiam bellum gerunt, quique omnia conantur, ut, si fieri unquam posset, divina nostra religio, eiusque salutaris doctrina ex omnium animis evellatur et exstirpetur.

Quamobrem Vos praesertim, Venerabiles Fratres, qui Nostrorum laborum et molestiarum estis participes, vel facile intelligitis quo in moerore versemur, et quo una cum Vobis bonisque omnibus luctu et indignatione afficiamur.

In tanta autem acerbitate hoc solatio utimur, quod Aemiliae provinciarum populi ex parte longe maxima dolentes huiusmodi molitiones, atque ab illis summopere abhorrentes, suam erga legitimum Principem fidem servant, ac civili Nostrae, et huius Sanctae Sedis dominationi constanter adhaereant; et quod universus earundem provinciarum Clerus summis certe laudibus dignus nihil antiquius habuit, quam in hoc rerum motu et perturbatione sui officii partes sedulo explere, ac luculenter ostendere qua singulari fide et observantia Nos et hanc Apostolicam Sedem prosequatur, asperrima quaeque contemnens ac despiciens pericula.

Jam vero cum Nos gravissimi officii Nostri ratione, solemnique iuramento adstricti debeamus sanctissimae nostrae Religionis causam impavide propugnare, et iura possessionesque Romanae Ecclesiae ab omni violatione fortiter tueri, civilemque Nostrum, et huius Apostolicae Sedis principatum constanter defendere, illumque Nostris Successoribus, veluti Beati Petri patrimonium, integrum transmittere, haud possumus, quin iterum Apostolicam Nostram attollamus vocem, ut universus praesertim catholicus orbis, atque in primis omnes Venerabiles Fratres Sacrorum Antistites, a quibus inter maximas angustias tot eximia et illustra immobilis eorum erga Nos et hanc Sanctam Sedem, ac Beati Petri patrimonium fidei, amoris studiique testimonia cum summa animi Nostri consolatione accepimus, cognoscant quam vehementer a Nobis improbentur quae eiusmodi homines in Aemiliae provinciis Pontificiae Nostrae ditionis patrare ausi sunt. Itaque in hoc amplissimo vestro consensu tum commemoratos, tum alios omnes quoscumque rebellium actus contra ecclesiasticam potestatem et immunitatem, et contra supremam Nostram, huiusque Sanctae Sedis civilem dominationem, principatum, potestatem, iurisdictionemque, quovis nomine actus ipsi appellentur, omnino reprobamus, illosque plane irritos et nullos esse decernimus.

Nemo autem ignorat, eos omnes, qui in praedictis provinciis suam operam, consilium, assensum memoratis actibus praestiterunt, vel alia quavis ratione illis faverunt, incidisse in ecclesiasticas censuras et poenas, quas in praedicta Nostra Allocutione commemoravimus.

Ceterum, Venerabiles Fratres, adeamus cum fiducia ad thronum gratiae, ut divini auxilii ope solatium et fortitudinem in rebus tam adversis assequamur: nec desistamus, divitem in misericordia Deum assiduus fervidisque precibus humiliter enixeque orare et obsecrare, ut omnipotenti sua virtute omnes aberrantes, quorum forsitan aliqui misere decepti nesciunt quid faciant, ad meliora consilia, atque ad iustitiae, religionis, salutisque semitas reducat.

<sup>1)</sup> *Huc ref. §. IX. Syllabi.*

## \* Epistola Encyclica.

Venerabilibus Fratribus Patriarchis, Primatibus, Archiepiscopis, Episcopis, aliisque locorum Ordinariis, gratiam et communionem cum Apostolica Sede habentibus.

### Pius PP. IX.

Venerabiles Fratres, Salutem et Apostolicam Benedictionem.

Nullis certe verbis explicare possumus, Venerabiles Fratres, quanto solatio, quantaeque laetitiae Nobis fuerit inter maximas Nostras amaritudines singularis ac mira vestra, et fidelium, qui Vobis commissi sunt, erga Nos et hanc Apostolicam Sedem fides, pietas et observantia, atque egregius sane in eiusdem Sedis iuribus tuendis, et iustitiae causa defendenda consensus, alacritas, studium et constantia. Etenim ubi primum ex Nostris Encyclicis Litteris die 18. Junii superiori anno ad Vos datis, ac deinde ex binis Nostris Consistorialibus Allocutionibus cum summo animi vestri dolore cognovistis gravissima damna, quibus sacrae civilesque res in Italia affligebantur, atque intellexistis nefarios rebellionis motus et ausus contra legitimos eiusdem Italiae Principes, ac sacrum legitimumque Nostrum et huius S. Sedis principatum, Vos, Nostris votis curisque statim obsecundantes, nulla interiecta mora, publicas in vestris Dioecesebus preces omni studio indicere properastis. Hinc non solum obsequentissimis acque ac amantissimis vestris Litteris ad Nos datis, verum etiam tum pastoralibus Epistolis, tum aliis religiosis doctisque scriptis in vulgus editis, episcopalem vestram vocem cum insigni vestri ordinis ac nominis laude attollentes, ac sanctissimae nostrae religionis iustitiaeque causam strenue propugnantes, vehementer detestati estis sacrilega ausa contra civilem Romanae Ecclesiae principatum admissa. Atque ipsum principatum constanter tuentes, profiteri et docere gloriati estis, eundem singulari Divinae illius omnia regentis ac moderantis Providentiae consilio datum fuisse Romano Pontifici, ut ipse nulli civili potestati unquam subiectus supremum Apostolici ministerii munus, sibi ab ipso Christo Domino divinitus commissum, plenissima libertate, ac sine ullo impedimento in universum orbem exerceat<sup>1)</sup>. Atque Nobis carissimi catholicae Ecclesiae filii vestris imbuti doctrinis, vestroque eximio exemplo excitati eosdem sensus Nobis testari summopere certarunt et certant. Namque ex omnibus totius catholici orbis regionibus innumerabiles paene accepimus tum ecclesiasticorum tum laicorum hominum cuiusque dignitatis, ordinis, gradus et conditionis Litteras, etiam a centenis catholicorum millibus subscriptas, quibus ipsi filialem suam erga Nos, et hanc Petri Cathedram devotionem ac venerationem luculenter confirmant, et rebellionem, aususque in nonnullis Nostris Provinciis admissos vehementer detestantes, Beati Petri patrimonium omnino integrum inviolatumque servandum, atque ab omni iniuria defendendum esse contendunt; ex quibus insuper non pauci id ipsum, vulgatis apposite scriptis, docte sapienterque asseruere. Quae praeclarae vestrae ac fidelium significationes, omni certe laude ac praedicatione decorandae, et aureis notis in catholicae Ecclesiae fastis inscribendae ita Nos commoverunt, ut non potuerimus non laete exclamare: „*Benedictus Deus et Pater Domini Nostri Jesu Christi, Pater misericordiarum et Deus totius consolationis, qui consolatur Nos in omni tribulatione nostra.*“ Nihil enim Nobis inter gravissimas, quibus premimur, angustias gratius, nihil iucundius nihilque optatius esse poterat quam intueri quo concordissimo atque admirabili studio Vos omnes, Venerabiles Fratres, ad huius S. Sedis iura tutanda animati et incensi estis, et qua egregia voluntate fideles curae vestrae traditi in idipsum conspirant. Ac per Vos ipsi vel facile cogitatione assequi potestis, quam vehementer paterna Nostra in Vos, atque in ipsos catholicos benevolentia merito atque optimo iure in dies augeatur.

Dum vero tam mirificum vestrum, et fidelium erga Nos et hanc Sanctam Sedem studium et amor Nostrum lenibat dolorem, nova aliunde tristitiae accessit causa. Itaque has Vobis scribimus Litteras, ut in tanti momenti

<sup>1)</sup> *Huc ref. §. IX. Syll.*

re animi Nostri sensus Vobis in primis denuo notissimi sint. Nuper, quemadmodum plures ex Vobis iam noverint, per Parisienses ephemeridas, quibus titulus «Moniteur,» vulgata fuit Gallorum Imperatoris Epistola, qua Nostris respondit Litteris, quibus Imperialem Maiestatem Suam omni studio rogavimus, ut validissimo suo patrocinio in Parisiensi Congressu integram et inviolabilem temporalem Nostram et huius Sanctae Sedis ditionem tueri, illamque a nefaria rebellione vindicare vellet. Hac sua Epistola summus Imperator, commemorans quoddam suum consilium paulo ante Nobis propositum de rebellibus Pontificiae Nostrae ditionis provinciis, Nobis suadet, ut earumdem provinciarum possessioni renuntiare velimus, cum ei videatur hoc tantum modo praesenti rerum perturbationi posse mederi.

Quisque vestrum, Venerabiles Fratres, optime intelligit, Nos gravissimi officii Nostri memores haud potuisse silere, cum huiusmodi epistolam accepimus. Hinc, nulla interposita mora, eidem Imperatori rescribere properavimus, Apostolica animi Nostri libertate clare aperteque declarantes, nullo plane modo Nos posse eius annuere consilio, proptereaquod *insuperabiles praeseferat difficultates ratione habita Nostrae et huius Sanctae Sedis Dignitatis, Nostrique sacri characteris, atque eiusdem Sedis iurium, quae non ad alicuius regalis familiae successionem, sed ad omnes catholicos pertinent;* ac simul professi sumus, *non posse per Nos cedi quod nostrum non est, ac plane a Nobis intelligi, victoriam, quae Aemiliae perduellibus concedi vellet, stimulo futuram indigenis, exterisque aliarum provinciarum perturbatoribus ad eadem patranda, cum cernerent prosperam fortunam quae rebellibus contingeret.* Atque inter alia eidem Imperatori manifestavimus, *non posse Nos commemoratas Pontificiae Nostrae ditionis in Aemilia provincias abdicare, quin solemnia, quibus obstricti sumus, iuramenta violemus, quin querelas motusque in reliquis Nostris provinciis excitemus, quin catholicis omnibus iniuriam inferamus, quin denique infirmemus iura non solum Italiae Principum, qui suis dominiis iniuste spoliati fuerunt, verum etiam omnium totius christiani orbis Principum, qui indifferenter videre nequirent perniciosissima quaedam induci principia.* Neque praetermisimus animadvertere, *Maiestatem Suam haud ignorare, per quos homines, quibusque pecuniis, ac praesidiis recentes rebellionis ausus Bononiae, Ravennae et in aliis civitatibus excitati ac peracti fuerint, dum longe maxima populorum pars motibus illis, quos minime opinabatur, veluti attonita maneret, et ad illos sequendos se nullo modo propensam ostendit.* Et quoniam Serenissimus Imperator illas Provincias a Nobis abdicandas esse censebat ob rebellionis motus ibi identidem excitatos, opportune respondimus, huiusmodi argumentum, utpote nimis probans, nihil valere: quandoquidem non dissimiles motus tum in Europae regionibus, tum alibi persaepe evenerunt; et nemo non videt legitimum exinde capi non posse argumentum ad civiles ditiones imminuendas. Atque haud omisimus eidem Imperatori exponere, diversam plane fuisse a postremis suis Litteris primam suam Epistolam ante Italicum bellum ad Nos datam, quae Nobis consolationem, non afflictionem attulit. Cum autem ex quibusdam imperialis epistolae per commemoratas ephemerides editae verbis timendum Nobis esse censuerimus, ne praedictae Nostrae in Aemilia provinciae iam essent considerandae veluti a Pontificia Nostra ditione distractae, ideo Maiestatem Suam Ecclesiae nomine rogavimus, ut etiam proprii ipsius Maiestatis Suae boni utilitatisque intuitu efficeret, ut huiusmodi Noster timor plane evanesceret. Ac paterna illa caritate, qua sempiternae omnium salutis prospicere debemus, in Ipsius mentem revocavimus, ab omnibus districtam aliquando rationem ante Tribunal Christi esse reddendam, et severissimum iudicium subeundum, ac propterea cuique enixe curandum, ut misericordiae potius quam iustitiae effectus experiat.

Haec praesertim inter alia summo Gallorum Imperatori respondimus. quae Vobis, Venerabiles Fratres, significanda esse omnino existimavimus, ut Vos in primis, et universus catholicus orbis magis magisque agnoscat, Nos, Deo auxiliante, pro gravissimii officii Nostri debito omnia impavide conari, nihilque intantum relinquere, ut religionis ac iustitiae causam fortiter propugnemus, et civilem Romanae Ecclesiae principatum, eiusque temporales possessiones ac iura, quae ad universum catholicum orbem pertinent, integra, et inviolata constanter tueamur et servemus, nec non iustae aliorum Prin-

cupum causae prospiciamus. Ac divino Illius auxilio freti qui dixit: *In mundo pressuram habebitis, sed confidite, ego vici mundum*<sup>1)</sup>, et *beati qui persecutionem patiuntur propter iustitiam*<sup>2)</sup>, parati sumus illustria Praedecessorum Nostrorum vestigia persequi, exempla aemulari, et aspera quaeque et acerba perpeti, ac vel ipsam animam ponere, antequam Dei, Ecclesiae ac iustitiae causam ullo modo deseramus. Sed vel facile conicere potestis, Venerabiles Fratres, quam acerbo conficiamur dolore videntes, quo terribimo sane bello sanctissima nostra religio maximo cum animarum detrimento vexetur, quibusque maximis turbinibus Ecclesia et haec Sancta Sedes iactentur. Atque etiam facile intelligitis quam vehementer angamur probe noscentes, quantum sit animarum discrimen in illis perturbatis Nostreis provinciis, ubi pestiferis praesertim scriptis in vulgus editis pietas, religio, fides, morumque honestas in dies miserrime labefactatur. Vos igitur, Venerabiles Fratres, qui in sollicitudinis Nostrae partem vocati estis, quique tanta fide, constantia ac virtute ad Religionis, Ecclesiae et huius Apostolicae Sedis causam propugnandam exarsistis, pergite maiore animo studioque eandem causam defendere; ac fideles curae vestrae concreditis quotidie magis inflammate, ut sub vestro ductu omnem eorum operam, studia, consilia in catholicae Ecclesiae et huius Sanctae Sedis defensione, atque in tuendo civili eiusdem Sedis principatu, Beatique Petri patrimonio, cuius tutela ad omnes catholicos pertinet, impendere nunquam desinant. Atque illud praesertim a Vobis etiam atque etiam exposcimus, Venerabiles Fratres, ut una Nobiscum fervidissimas Deo Optimo Maximo preces sine intermissione cum fidelibus curae vestrae commissis adhibere velitis, ut imperet ventis et mari, ac praesentissimo suo auxilio adsit Nobis, adsit Ecclesiae suae, atque exsurgat et iudicet causam suam, utque caelesti sua gratia omnes Ecclesiae et huius Apostolicae Sedis hostes propitius illustrare, eosque omnipotenti sua virtute ad veritatis, iustitiae, salutisque semitas reducere dignetur. Et quo facilius Deus exoratus inclinet aurem suam ad Nostras, vestras, omniumque fidelium preces, petamus in primis, Venerabiles Fratres, suffragia Immaculae Sanctissimaeque Dei Genitricis Virginis Mariae, quae amantissima nostrum omnium est mater et spes fidissima, ac praesens Ecclesiae tutela et columen, et cuius patrocinio nihil apud Deum validius. Imploremus quoque suffragia tum Beatissimi Apostolorum Principis, quem Christus Dominus Ecclesiae suae petram constituit, adversus quam portae inferi praeverale non poterunt, tum coapostoli eius Pauli, omniumque Sanctorum Coelitum, qui cum Christo regnant in coelis. Nihil dubitamus, Venerabiles Fratres, quin pro eximia vestra religione ac sacerdotali zelo, quo summopere praestatis, Nostreis hisce votis postulationibusque studiosissime obsequi velitis. Atque interim flagrantissimae Nostrae in Vos caritatis pignus Apostolicam Benedictionem ex intimo corde profectam, et cum omnis verae felicitatis voto coniunctam Vobis ipsis, Venerabiles Fratres, cunctisque Clericis, Laicisque fidelibus cuiusque vestrum vigilantiae commissis peramanter impertimur.

Datum Romae apud Sanctum Petrum die 19. Januarii anno 1860. Pontificatus Nostri Anno Decimoquarto.

## Litterae Apostolicae

quibus maioris excommunicationis poena infligitur invasoribus et usurpatoribus aliquot provinciarum pontificiae ditionis<sup>3)</sup>.

Pius PP. IV.

Ad perpetuam rei memoriam.

Cum Catholica Ecclesia a Christo Domino fundata et instituta, ad sempiternam hominum salutem erandam, perfectae societatis formam vi divinae suae institutionis obtinuerit, ea proinde libertate pollere debeat ut in sacro suo ministerio obeundo nulli civili potestati subiaceat. Et quoniam ad

<sup>1)</sup> Joann. XVI. 33.

<sup>2)</sup> Matth. V. 10.

<sup>3)</sup> *Huc referuntur Syllabi Propositiones* 63, 76.

libere, ut par erat, agendum iis indigebat praesidiis quae temporum conditioni ac necessitati congruerent, idcirco singulari prorsus divinae providentiae consilio factum est, ut cum Romanum corrui imperium et in plura fuit regna divisum, Romanus Pontifex, quem Christus totius Ecclesiae suae caput centrumque constituit, civilem assequeretur principatum. Quo sane a Deo ipso sapientissime consultum est, ut in tanta temporalium Principum multitudine ac varietate Summus Pontifex illa frueretur politica libertate, quae tantopere necessaria est ad spiritualem suam potestatem, auctoritatem et iurisdictionem toto orbe absque ullo impedimento exercendam<sup>1)</sup>. Atque ita plane decebat, ne catholico orbi ulla oriretur occasio dubitandi, impulsu fortasse civilium potestatum, vel partium studio duci quandoque posse in universali procuracione gerenda Sedem illam, ad quam *propter potioem principalem necesse est omnem Ecclesiam convenire*.

Facile autem intelligitur, quemadmodum eiusmodi Romanae Ecclesiae Principatus, licet suapte natura temporalem rem sapiat, spiritualem tamen induat indolem vi sacrae, quam habet, destinationis, et arctissimi illius vinculi, quo cum maximis Rei Christianae rationibus coniungitur<sup>2)</sup>. Quod tamen nil impedit quominus ea omnia, quae ad temporalem quoque populorum felicitatem conducunt, perfici queant, quemadmodum gesti a Romanis Pontificibus per tot saecula civilis regiminis historia luculentissime testatur.

Cum porro ad Ecclesiae bonum et utilitatem respiciat Principatus de quo loquimur, mirum non est quod Ecclesiae ipsius hostes persaepe illum convellere et labefactare multiplici insidiarum et conatum genere contenderint: in quo tamen nefaria illorum molimina, Deo Ecclesiam suam iugiter adiuvante, in irritum serius ocyus ceciderunt. Jam vero novit universus orbis, quomodo luctuosis hisce temporibus infestissimi Catholicae Ecclesiae et huius Apostolicae Sedis osores, *abominabiles facti in studiis suis, ac loquentes in hypocrisi mendacium*, hanc ipsam Sedem, proculcatis divinis humanisque iuribus, civili, quo potitur, Principatu spoliare nequiter adnitantur, idque assequi studeant non manifesta quidem, uti alias, aggressionem, armorumque vi, sed falsis aequae ac perniciosae principiis callide inductis, ac popularibus motibus malitiose excitatis. Neque enim erubescunt nefandam populis suadere rebellionem contra legitimos principes<sup>3)</sup>, quae ab Apostolo clare aperteque damnatur ita docente: *Omnia anima potestatibus sublimioribus subdita sit. Non est enim potestas nisi a Deo: quae autem sunt, a Deo ordinatae sunt. Itaque qui resistit potestati, Dei ordinationi resistit. Qui autem resistunt, ipsi sibi damnationem acquirunt*<sup>4)</sup>. Dum vero pessimi istiusmodi veteratores temporalem Ecclesiae dominationem aggreduuntur, eiusque venerandam auctoritatem despiciunt, eo impudentiae deveniunt, ut suam in Ecclesiam ipsam reverentiam et obsequium palam iactare non desinant. Atque illud vel maxime dolendum, quod tam prava agendi ratione sese polluerit non nemo etiam ex iis, qui, uti Catholicae Ecclesiae filii, in ipsius tutelam atque praesidium impendere debent auctoritatem, qua in subiectos sibi populos potiuntur.

In subdolis ac perversis, quas lamentamur, machinationibus praecipuam habet partem Subalpinum Gubernium, a quo pridem omnes norunt quanta et quam deploranda eo in Regno damna ac detrimenta Ecclesiae eiusque iuribus, sacrisque Ministris fuerint inlata, de quibus in Consistoriali potissimum Allocutione, die XXII. Januarii MDCCCLV. habita<sup>5)</sup>, vehementer doluimus. Post despectas haecenus Nostras ea de re iustissimas reclamaciones, Gubernium ipsum eo temeritatis modo progressum est, ut ab irroganda universali Ecclesiae iniuria minime abstinuerit, civilem impetens Principatum, quo Deus hanc B. Petri Sedem instructam voluit ad apostolici ministerii libertatem, uti animadvertimus, tuendam atque servandam. Primum sane ex manifestis aggressionis indicibus prodiit quum in Parisiensi Conventu, anno 1856 acto, ex parte eiusdem Subalpini Gubernii inter hostiles nonnullas expositiones speciosa quaedam ratio proposita fuit ad civile Romani Pontificis dominium infirmandum, et ad Ipsius Sanctaeque huius Sedis auctoritatem

<sup>1)</sup> *Huc ref. Nota ad §. IX. Syll.*

<sup>2)</sup> *Huc ref. prop. 27.*

<sup>3)</sup> *Huc ref. prop. 63.*

<sup>4)</sup> S. Paul. Ep. ad Rom. c. XIII. v. 1. et seq. <sup>5)</sup> *Supra, pag. 82.*

imminuendam. Ubi vero superiore anno Italicum exarsit bellum inter Austriae Imperatorem, et foederatos invicem Imperatorem Galliarum ac Sardiniae Regem, nihil fraudis, nihil sceleris praetermissum est, ut Pontificiae Nostrae Ditionis populi ad nefariam defectionem modis omnibus impellerentur. Hinc instigatores missi, pecunia largiter effusa, arma suppeditata, incitamenta pravis scriptis et ephemeridis admota, et omne fraudum genus adhibitum vel ab illis, qui eiusdem Gubernii legatione Romae fungentes, nulla habita gentium iuris, honestatisque ratione, proprio munere perperam abutebantur ad tenebrosas molitiones in Pontificii Nostri Gubernii perniciem agendas.

Oborta deinde in nonnullis Ditionis Nostrae Provinciis, quae dudum occulte comparata fuerat, seditione, illico per fautores Regia Dictatura proclamata est. statimque a Subalpino Gubernio Commissarii adlecti, qui, alio etiam nomine postea appellati, provincias illas regendas sumerent. Dum haec agerentur, Nos gravissimi officii Nostri memores non praetermissimus binis Nostreis Allocutionibus die XX. Junii et XXVI. Septembris superiore anno habitis<sup>1)</sup> de violato civili huiusce S. Sedis principatu altissime conqueri, simulque violatores serio monere de censuris ac poenis per canonicas sanctiones inflictis, in quas ipsi proinde misere inciderant. Existimandum porro erat, patratae violationis auctores per iteratas Nostras monitiones ac querelas ab iniquo proposito destituros, praesertim cum universi Catholici Orbis Sacrorum Antistites, et fideles cuiusque ordinis, dignitatis et conditionis eorum curae commissi, suas Nostreis expostulationibus adiungentes unanimi alacritate Nobiscum huius Apostolicae Sedis, et universalis Ecclesiae iustitiaeque causam propugnandam susceperint, cum optime intelligerent, quantopere civilis, de quo agitur, principatus ad liberam supremi Pontificatus iurisdictionem intersit. Verum (horrescentes dicimus!) Subalpinum Gubernium non solum Nostra monita, querelas, et ecclesiasticas poenas contempsit, sed etiam in sua persistens improbitate, populari suffragio, pecuniis, minis, terrore, aliisque callidis artibus contra omne ius extorto, minime dubitavit commemoratas Nostras provincias invadere, occupare, et in suam potestatem dominationemque redigere. Verba quidem desunt ad tantum improbandum facinus, in quo plura et maxima habentur facinora. Grave namque admittitur sacrilegium, quo una simul aliena iura contra naturalem divinamque legem usurpantur, omnis iustitiae ratio subvertitur. et cuiusque civilis Principatus ac totius humanae Societatis fundamenta penitus evertuntur.

Cum igitur ex una parte non sine maximo animi Nostri dolore intelligamus, irritas futuras novas expostulationes apud eos qui, *velut aspides surdae obturantes aures suas*, nihil hucusque monitis ac questibus Nostreis commoti sunt; ex altera vero parte intime sentiamus quid a Nobis in tanta rerum iniquitate omnino postulet Ecclesiae huiusque Apostolicae Sedis ac totius Catholici Orbis causa, improborum hominum opera tam vehementer oppugnata, idcirco cavendum Nobis est ne diutius cunctando gravissimi officii Nostri muneri deesse videamur. Eo nempe adducta res est, ut illustribus Praedecessorum Nostrorum vestigiis inhaerentes suprema illa auctoritate utamur, qua cum solvere, tum etiam ligare Nobis divinitus datum est; ut nimirum debita in fontes adhibeatur severitas, eaque salutari ceteris exemplo sit.

Itaque post Divini Spiritus lumen privatis publicisque precibus imploratum, post adhibitum selectae VV. FF. NN. S. R. E. Cardinalium Congregationis consilium, Auctoritate Omnipotentis Dei et SS. Apostolorum Petri et Pauli ac Nostra denuo declaramus, eos omnes, qui nefariam in praedictis Pontificiae Nostrae Ditionis Provinciis rebellionem et earum usurpationem, occupationem, invasionem, et alia huiusmodi, de quibus in memoratis Nostreis Allocutionibus die XX. Junii et XXVI. Septembris superioris anni conquesti sumus, vel eorum aliqua perpetrarunt, itemque ipsorum mandantes, fautores, adiutores, consiliarios, adhaerentes, vel alios quoscumque praedictarum rerum exequutionem quolibet praetextu et quovis modo procurantes, vel per se ipsos exequentes, Maiorem Excommunicationem, aliasque censuras ac poenas ecclesiasticas a SS. Canonibus, Apostolicis Constitutionibus, et Generalium Conciliorum, Tridentini praesertim<sup>2)</sup>, Decretis inflictas incurrisse; et si opus

<sup>1)</sup> Supra. pag. 108, 110.

<sup>2)</sup> Sess. XXII. cap. 11. de Reform.

est, de novo excommunicamus, et anathematizamus, item declarantes, ipsos omnium et quorumcumque privilegiorum, gratiarum, et indultorum sibi a Nobis, seu Romanis Pontificibus Praedecessoribus Nostri, quomodolibet concessorum amissionis poenas eo ipso pariter incurrisse; nec a censuris huiusmodi a quoquam, nisi a Nobis, seu Romano Pontifice pro tempore existente (praeterquam in mortis articulo, et tunc cum reincidentia in easdem censuras eo ipso quo convaluerint) absolvi ac liberari posse; ac insuper inhabiles et incapaces esse qui absolutionis beneficium consequantur, donec omnia quomodolibet attentata publice retractaverint, revocaverint, cassaverint et aboleverint, ac omnia in pristinum statum plenarie et cum effectu redintegraverint, vel alias debitam et condignam Ecclesiae, ac Nobis, et huic Sanctae Sedi satisfactionem in praemissis praestiterint. Idcirco illos omnes, etiam specialissima mentione dignos, nec non illorum successores in officiis a retractatione, revocatione, cassatione et abolitione omnium ut supra attentatorum per se ipsos facienda, vel alias debita et condigna Ecclesiae, ac Nobis, et dictae S. Sedi satisfactione realiter et cum effectu in eisdem praemissis exhibenda, praesentium Litterarum, seu alio quocumque praetextu, minime liberos et exemptos, sed semper ad haec obligatos fore et esse, ut absolutionis beneficium obtinere valeant, earundem tenore praesentium decernimus et pariter declaramus.

Dum autem hanc muneris Nostri partem, tristi Nos urgente necessitate, moerentes implemus, minime obliviscimur, Nosmetipsos Illius hic in terris vicariam operam agere, qui *non vult mortem peccatoris, sed ut convertatur et vivat*, quique in mundum venit *quaerere, et salum facere quod perierat*. Quapropter in humilitate cordis Nostri ferventissimis precibus Ipsius misericordiam sine intermissione imploramus et exposcimus, ut eos omnes, in quos ecclesiasticarum poenarum severitatem adhibere coacti sumus, divinae suae gratiae lumine propitius illustret, atque omnipotenti sua virtute de perditionis via ad salutis tramitem reducat.

Decernentes, praesentes Litteras, et in eis contenta quaecumque, etiam ex eo quod praefati, et alii quicumque in praemissis interesse habentes, seu habere quomodolibet praetendentes, cuiusvis status, gradus, ordinis, praecminentiae, et dignitatis existant, seu alias specifica et individua mentione et expressione digni, illis non consenserint, seu ad ea vocati, citati et auditi, causaeque, propter quas praesentes emanaverint, sufficienter adductae, verificatae, et iustificatae non fuerint, aut ex alia qualibet causa, colore, praetextu, et capite, nullo unquam tempore de subreptionis vel obreptionis, aut nullitatis vitio, aut intentionis Nostrae, vel interesse habentium consensus, ac alio quocumque defectu notari, impugnari, infringi, retractari, in controversiam vocari, aut ad terminos iuris reduci, seu adversus illas apercitionis oris, restitutionis in integrum, aliudve quodcumque iuris, facti, vel gratiae remedium intentari vel impetrari, aut impetrato, seu etiam motu, scientia, et potestatis plenitudine paribus concesso, et emanato, quempiam in iudicio, vel extra illud uti, seu iuvari ullo modo posse; sed ipsas praesentes Litteras semper firmas, validas, et efficaces existere et fore, suosque plenarios et integros effectus sortiri, et obtinere, ac ab illis, ad quos spectat, et pro tempore quandocumque spectabit, inviolabiliter et inconcusse observari: sique et non aliter in praemissis per quoscumque iudices ordinarios et delegatos, etiam causarum Palatii Apostolici Auditores, et S. R. E. Cardinales, etiam de Latere Legatos, et Sedis praedictae Nuncios, aliosve quoslibet quacumque praecminentia et potestate fungentes, et functuros, sublata eis et eorum cuiuslibet quavis aliter iudicandi et interpretandi facultate et auctoritate, iudicari et definiri debere; ac irritum et inane, si secus super his a quoquam quavis auctoritate scienter vel ignoranter contigerit attentari.

Non obstantibus praemissis, et quatenus opus sit, Nostra et Cancellariae Apostolicae regula de iure quaesito non tollendo, aliisque Constitutionibus et Ordinationibus Apostolicis, nec non quibusvis etiam iuramento, confirmatione Apostolica, vel quavis firmitate alia roboratis statutis, et consuetudinibus, ac usibus, et styli etiam inmemorabilibus, privilegiis quoque indultis, et Litteris Apostolicis, praedictis, aliisque quibuslibet Personis, etiam quacumque ecclesiastica vel mundana dignitate fulgentibus, et alias quomodolibet qualificatis, et specialem expressionem requirentibus sub quibus-

cumque verborum tenoribus et formis, ac cum quibusvis etiam derogatoriis derogatoriis, aliisque efficacioribus, efficacissimis, et insolitis clausulis, irritantibusque, et aliis Decretis, etiam motu, scientia, et potestatis plenitudine similibus, et consistorialiter, et alias quomodolibet in contrarium praemissorum concessis, editis, factis ac pluries iteratis et quantiscumque vicibus approbatis, confirmatis, et innovatis. Quibus omnibus et singulis, etiamsi pro illorum sufficienti derogatione de illis eorumque totis tenoribus specialis, specifica, expressa, et individua, ac de verbo ad verbum, non autem per clausulas generales idem importantes, mentio, seu quaevis alia expressio habenda, aut aliqua alia exquisita forma ad hoc servanda foret, tenores huiusmodi, ac si de verbo ad verbum, nil penitus omisso, et forma in illis tradita observata, exprimerentur et insererentur, praesentibus pro plene et sufficienter expressis et insertis habentes, illis alias in suo robore permanentibus, ad praemissorum effectum hac vice dumtaxat specialiter et expresse derogamus, et derogatum esse volumus, ceterisque contrariis quibuscumque non obstantibus.

Cum autem eadem praesentes Litterae ubique, ac praesertim in locis, in quibus maxime opus esset, nequeant tute publicari, uti notorie constat, volumus illas, seu earum exempla ad valvas Ecclesiae Lateranensis, et Basilicae Principis Apostolorum, nec non Cancellariae Apostolicae, Curiaeque Generalis in Monte Citatorio, et in Acie Campi Florae de Urbe, ut moris est, affigi et publicari, sicque publicatas et affixas omnes et singulos, quos illae concernunt, perinde arctare, ac si unicuique eorum nominatim et personaliter intimatae fuissent.

Volumus autem ut eandem Litterarum Transumptis, seu Exemplis, etiam impressis, manu alicuius Notarii Publici subscriptis, et sigillo alicuius Personae in dignitate ecclesiastica constitutae munitis, eadem prorsus fides ubique locorum et gentium tam in iudicio, quam extra illud ubique adhibeatur, quae adhiberetur ipsis praesentibus, ac si forent exhibitae vel ostensae.

Datum Romae apud S. Petrum, sub Annulo Piscatoris, die XXVI. Martii anno MDCCCLX. Pontificatus Nostri Anno Decimo Quarto.

Loco Sigilli.

**Pius PP. IX.**

Anno a Nativitate Domini MDCCCLX. Indict. III. die vero 29. Martii Pontificatus Ssni in Christo Patris et Domini nostri Domini Pii divina providentia Papae Noni anno XIV. praesentes Litterae Apostolicae affixae et publicatae fuerunt ad valvas Basilicarum Lateranensis et Vaticanae, Cancellariae Apostolicae, ac Magnae Curiae Innocentianae atque in Acie Campi Florae per me Aloisium Serafini Apost. Curs.

Philippus Ossani Magist. Curs.

## Litterae

Venerabili Fratri Henrico Episcopo Wratislaviensi die XXX. aprilis anni MDCCCLX <sup>1)</sup>.

**Pius PP. IX.**

Venerabilis Frater, Salutem et Apostolicam Benedictionem.

Dolore hand mediocri litteris, quas nuper ad Nos dedisti, percepimus dissidia Catholicorum per Antonii Güntheri philosophiam enata, posteaquam Sedes Apostolica de huius scriptoris operibus et doctrina iudicasset, nondum esse penitus extincta; proptereaquod cum alibi tum in ista Wratislaviensi Academia etiam inter sacrae doctrinae magistros reperiantur, qui nonnulla saltem Güntheriana dogmata retinere atque defendere multis videantur. Quorum unus, dilectus scilicet Filius Joannes B. Baltzer Wratislaviensis Ecclesiae Canonicus, cum libellum, in quo de hominis natura disseritur, Tibi, Venerabilis Frater, tradidisset, precibus eius obsecundans, libellum eundem

<sup>1)</sup> *Huc refertur Nota ad §. II. Syllabi. — Cf. supra, pag. 104, 105.*



ad Nos transmisisti, rogans, ut Nostro iudicio, quid de doctrina in eo contenta sentiendum sit, definiretur. Ac Nos quidem Tuum, Venerabilis Frater, studium catholicae doctrinae tuendae magnopere laudantes, atque pro muneris Nostri officio nihil magis curae habentes quam *fidei depositum* ubique terrarum intactum custodire, interque Christifideles *servare unitatem spiritus in vinculo pacis*, Baltzeri scriptum nonnullis huius almae Urbis Theologis discutiendum tradidimus. Quorum fida relatione compertum Nobis est, in eo doctrinam eandem, quae in Güntheri libris traditur et ante horum proscriptionem a Baltzero quoque propugnabatur, retineri, nihilque aliud agi, nisi ut haec doctrina demonstraretur et Verbo Dei scripto ac tradito conformis, nec ulla ratione contraria esse iis, quae SS. Concilia, nominatim Concilium Oecumenicum VIII. et Viennense sub Clemente V. statuerunt, aut ipsi Nos litteris ad dilectum Filium Nostrum Cardinalem Presbyterum De Geissel Archiepiscopum Coloniensem, die 15. Juni 1857 datis, iudicavimus, dicentes *hominem corpore et anima ita absolvi, ut anima eaque rationalis sit vera per se atque immediata corporis forma*. At vero Nos non modo his verbis catholicam de homine doctrinam declaravimus, sed etiam hanc ipsam *catholicam doctrinam doctrina Güntheri laedi* pronuntiavimus. Ad quod si Baltzer animum advertisset, intellexisset sane, doctrinam de homine, quam in suo scripto profitetur, tamquam ecclesiasticis dogmatibus consentaneam defendere idem esse atque Nosmet incusare, quod in Güntheriana doctrina iudicanda erraverimus.

Notatum praeterea est, Baltzerum in illo suo libello cum omnem controversiam ad hoc revocasset, sitne corpori vitae principium proprium, ab anima rationali re ipsa discretum, eo temeritatis progressum esse, ut oppositam sententiam et appellaret haereticam, et pro tali habendam esse multis verbis argueret. Quod quidem non possumus non vehementer improbare, considerantes hanc sententiam, quae unum in homine ponit vitae principium, animam scilicet rationalem, a quo corpus quoque et motum et vitam omnem et sensum accipiat, in Dei Ecclesia esse communissimam atque Doctoribus plerisque, et probatissimis quidem maxime, cum Ecclesiae dogmate ita videri coniunctam, ut huius sit legitima solaque vera interpretatio. nec proinde sine errore in fide possit negari.

Quae cum Tibi, Venerabilis Frater, ex certa scientia et motu proprio rescribimus, ardentem cupimus, imo fidenter speramus fore, ut dilectus Filius Joannes Baltzer et ceteri, qui huic aliisve Güntheri opinionibus a Nobis reprobatis quocunque modo adhaeserint, iam se erga hanc Ecclesiam, quam Christus Dominus reliquarum omnium Matrem et Magistram esse voluit, dociles et morigeros exhibeant, quemadmodum et Baltzer ipse et alii dudum laudabiliter sunt polliciti. Te vero, Venerabilis Frater, hortamur, ut Apostoli exemplo *in captivitatem redigens omnem intellectum in obsequium Christi*, hanc plenam submissionem ab iis praesertim, qui alios docent, auctoritate Tua postules, licentiam autem eorum, qui forte audire detrectant, potestate, quam dedit Tibi Deus, coerceas.

Superest, ut Tibi, Venerabilis Frater, ac gregi universo tuis curis commisso Apostolicam Benedictionem toto cordis affectu impertiamur.

Datum Romae apud Sanctum Petrum, die XXX. Aprilis anno MDCCCLX. Pontificatus Nostri Anno Decimoquarto.

---

## \* Allocutio

habita in consistorio secreto die XIII. iulii anni MDCCCLX

---

### Venerabiles Fratres.

Omnibus notum planeque perspectum est, Venerabiles Fratres, acerbissimum bellum contra catholicam Ecclesiam calamitosis hisce temporibus a tenebrarum filiis excitatum. Siquidem ipsi diabolica prorsus malitia animati «dicentes malum bonum, et bonum malum, ac ponentes tenebras lucem

et lucem tenebras<sup>1)</sup>» pravis quibusque molitionibus eandem Ecclesiam, eiusque salutarem doctrinam, si fieri unquam posset, funditus evertere, omnesque christianae fidei virtutisque, et ipsius naturalis legis, iustitiae, honestatis, probitatisque sensus exstinguere, et radicitus extirpare conantur. Nemo autem ignorat quam infelix et omnino luctuosus nunc sit in Italia sanctissimae nostrae religionis status nefaria eorumdem hominum conspiratione et opera, qui ambulantes secundum desideria sua in impietatibus et alienati a via Dei, religionem ipsam, sacraque omnia oppugnare ac prosternere contendunt. Itaque incredibili animi Nostri dolore deplorare cogimur nova et semper gravissima vulnera, quae ab iniustis legitimae potestatis in Italia usurpatoribus Apostolicae Nostrae auctoritati, catholicae Ecclesiae, eiusque sacris ministris, rebus ac iuribus quotidie illata sunt et inferuntur. In variis enim Italiae regionibus Subalpinae ditioni iniuste subiectis publicae institutae sunt scholae, in quibus cum maximo animarum detrimento erronea quaevis, falsa ac depravata doctrina catholicae Ecclesiae omnino adversa palam publiceque traditur, et ipsa oppugnatur Ecclesia<sup>2)</sup>. Omnes autem norunt innumera fere opuscula, ephemerides et scripta tum in Italia, tum alibi ex satanae officinis ad exitium et perniciem emissa, ac turpissimis, abominandisque imaginibus edita, quibus implacabiles isti religionis hostes, ac peritissimi scelerum et fraudum artifices sacrosancta ipsius religionis mysteria, praecepta, ac veneranda Ecclesiae instituta, eiusque leges ac censuras contemnere, irridere, omniumque animos corrumpere, et a cultu catholico avellere, ac dissolutam vivendi licentiam, et abnormem usquequaque impietatem fovere, inducere, ac sacros Ministros, et Christi hic in terris Vicarium omnibus iniuriis, calumniis, conviciisque proscindere, et legitimae cuiusque potestatis imperium labefactare, ac tum Ecclesiae, tum civilis societatis excidium procurare adnituntur<sup>3)</sup>.

Atque hi lucis et veritatis osores minime dubitant violentas, sacrilegasque eorum manus sacris Ecclesiae Ministris et patrimonio iniicere. Postquam enim Subalpinum Gubernium Parmensis et Placentini Ducatus dominium usurpavit, die decimano proximi mensis Aprilis Monachos Ordinis S. Benedicti in Parmensi S. Joannis Evangelistae Coenobio commorantes inique expulit, omniaque illorum bona sibi vindicavit<sup>4)</sup>. Decreto autem die decima praeteriti mensis Maii edito Clericorum Placentiae Seminarium claudendum praescripsit, ut Placentinum ulcisceretur Episcopum, qui merito se abstinuit a sacris peragendis caeremoniis, quae a civili praeicipiebantur potestate. Ac deinde idem vigilantissimus Episcopus fuit comprehensus, atque a sua Dioecesi abreptus, et Augustam Taurinorum deductus, ac tum carcere, tum pecunia damnatus; quas poenas etiam subiere ipsius Episcopi Vicarius Generalis, et nonnulli Placentini Canonici. Atque eadem de causa tum in usurpatis Nostris Aemiliae provinciis, tum in aliis locis iniustae Subalpinae dominationi petissimum subditis plures egregii Venerabiles Fratres Episcopi, et ecclesiastici Viri, ac Religiosarum Familiarum alumni per summam iniuriam vehementer vexati, ac durissimae inquisitioni obnoxii, quorum non pauci etiam deprehensi, et vel in exilium exacti, vel in vincula coniecti. Hinc Pro-Vicarius Bononiensis de sui Cardinalis Archiepiscopi eo ipso tempore, quo animam agebat, latere divulgus, et in carcerem missus, ac deinde tum pecunia, tum carcere multatus. Ubi vero clarissimus ille Archiepiscopus ex hac vita migravit, Archiepiscopatus Bononiensis bona eiusdem Gubernii administrationi statim subiecta fuerunt. Hinc ab ipso Gubernio Venerabilis Frater pientissimus Faventiae Episcopus primum militari custodia in suis aedibus septus, propterea quod gravi conflictatus morbo in carcerem contrudi minime potuerit, ac postea carere et pecunia damnatus. Hinc spectatissimi vestri Collegae Dilecti Filii Nostri S. R. E. Cardinales Archiepiscopus Pisannus militari manu comprehensus, a suo grege avulsus, et Augustam Taurinorum traductus, et Forocorneliensis Antistes suis in aedibus militari custodia detentus, ac Ferrariensium Archiepiscopus variis modis exagitatus.

<sup>1)</sup> Isai. V. 20.

<sup>2)</sup> *Huc ref. prop.* 79.

<sup>3)</sup> *Huc ref. prop.* 45. 47. 48.

<sup>4)</sup> " " " 53.

Nota vero sunt gravissima damna, quae in Sicilia perditorum hominum opera, legitimi Principis regno perturbato, religio, eiusque ministri nuper perpassi sunt. Etenim inter alia duo Religiosi Ordines de re christiana optime meriti fuere sublati, eorumque alumni exulare coacti. Ac vel maxime dolendum, Venerabiles Fratres, quod ibi nonnulli ex Clero reperti fuerint, qui nescientes Dominum, neque officium Sacerdotum ad populum, minime erubuerunt cum summo bonorum omnium scandalo et fremitu suam operam Ecclesiae et omnis iustitiae inimicis praestare, illisque favere. In usurpatis autem Nostri provinciis plures Dioeceses cum maximo fidelium discrimine sunt suis orbatæ pastoribus, cum hi, ob adiectas ab illegitima potestate conditiones, illas attingere minime possint. Atque id inter alia manifestissime ostendit quo potissimum ii homines spectent, qui nequissimis et sacrilegis ausibus civilem Romani Pontificis, et huius Apostolicæ Sedis principatum usurpare ac diruere exoptant, ut scilicet civili eisdem Pontificis et Sedis potestate et maiestate depressa et eversa, catholicam Ecclesiam facilius oppugnare queant. Omittimus vero tot alia id genus ausa recensere, quibus Ecclesiam, sacrosque Ministros isti homines tantopere affligunt, divexant, dum perfida sane nequitia omnium libertatem dolosis fraudulentisque modis ubique praedicare et extollere non cessant<sup>1)</sup>.

Quae quidem omnia gravia facinora cum summa bonorum omnium indignatione ac luctu peracta, quantam Ecclesiae, quantam Nobis, et Apostolicæ Nostræ auctoritati, et huic Sanctæ Sedi, Vestroque Ordini, et Episcopali dignitati, universoque Clero iniuriam, violentiam, et contumeliam afferant, optime intelligitis, Venerabiles Fratres.

In tanta vero acerbitate non levi afficimur gaudio, cum videamus qua insigni sane fide, patientia et constantia commemorati tum Dilecti Filii Nostri S. R. E. Cardinales, tum Venerabiles Fratres Sacrorum Antistites summa cum eorum nominis laude omnes aerumnas, calamitatesque sine ulla iusta causa sibi illatas tolerare, et Ecclesiae iustitiaeque causam strenue defendere gloriantur, et cum simul noscamus qua firmitate, paucis exceptis, Italiae Clerus omni commendatione dignus, suae vocationis et officii memor illustribus suorum Antistitum vestigiis insistat, omnesque perferat molestias, vexationes, suoque munere egregie fungatur.

Dum autem intimo moerore conficimur. Apostolici Nostri muneris probe memores nunquam desistemus divino auxilio suffulti Ecclesiae causam Nobis ab ipso Christo Domino divinitus commissam omni studio, totisque viribus impavide propugnare. Quamobrem in hoc amplissimo Vestro consensu, et coram universo catholico orbe Nostram attollentes vocem tam tristitia, et nunquam satis deploranda facta omnino reprobamus, damnamus, ac maiore, qua possumus, animi Nostri contentione ecclesiasticam immunitatem violatam, Cardinalitiam et Episcopalem Dignitatem despectam, ecclesiasticum ordinem afflictum, et omnia Ecclesiae, atque huius Apostolicæ Sedis iura proculcata etiam atque etiam reclamamus, et reclamare nunquam desinemus.

Verum in hac tanta temporum rerumque conversione, in hac tanta Ecclesiae oppugnatione, omniumque divinorum, humanorumque iurium conculcatione, et Sacerdotii contemptu non concidamus animo, Venerabiles Fratres. Caelum enim et terra transibunt, verba autem promissionesque Domini non praeteribunt, ac, veluti apprime nostis, florentissima imperia, regna, urbes et regiones dissipari, deleri et corruiere possunt, sed Ecclesia a Christo Domino fundata, et omnipotenti Eius virtute continenter sustentata et illustrata nullo unquam modo convelli et labefactari potest, persecutionibus non vincitur, non imminuitur, sed augetur, novisque semper ac splendidioribus exornatur triumphis. «Hoc enim Ecclesiae proprium est, ut tunc vincat cum laeditur, tunc intelligatur cum arguitur, tunc obtineat cum deseritur<sup>2)</sup>.»

Ne intermittamus autem in omni fide, spe, et humilitate cordis dies noctisque ardentiori usque studio misericordiarum Deum orare et obsecrare, ut per merita Unigeniti Filii Sui Domini nostri Jesu Christi velit omnium praevaricantium propitius misereri, eosque caelesti sua gratia perfundere,

<sup>1)</sup> *Huc ref. §§. IX. et X. Syll.*

<sup>2)</sup> *S. Hilar. de Trinit. lib. VII. c. IV.*

illustrare, atque ad se convertere, reducere; utque, omnibus profligatis erroribus, omnibusque amotis iniquitatibus, divina sua religio, eiusque salutaris doctrina, quae ad temporalem quoque regnorum populorumque felicitatem et tranquillitatem tantopere conducit, quotidie magis ubique terrarum vigeat, floreat ac dominetur.

Atque hic sermonem Nostrum ad omnes Venerabiles Fratres totius catholici orbis Sacrorum Antistites intimo cordis affectu convertentes, ipsis, et fidelibus eorum curae traditis iterum vel maxime gratulamur de eximia eorum erga Nos, et hanc Petri Cathedram fide, amore et observantia, ac simul gratissimi animi Nostri sensus iisdem Venerabilibus Fratribus et fidelibus palam publiceque profitemur ob mira sane studia, quibus Nostras angustias modis omnibus sublevare non desinunt. Nihil vero dubitamus, quin iidem Venerabiles Fratres pro egregia, qua maxime praestant, religione, pietate ac sacerdotali zelo pergant maiore usque alacritate et opera una cum fidelibus sibi commissis Ecclesiae et huius Apostolicae Sedis causam constanter defendere, ac ferventissimis suis, suorumque fidelium precibus adire cum fiducia una Nobiscum ad Thronum gratiae, ac potentissimum Immaculatae Sanctissimaeque Dei Genitricis Virginis Mariae patrocinium implorare, ut, tam magna tamque turbulenta tempestate depulsa, et Catholica Ecclesia optatissimam assequatur pacem, ac sua ubique libertate fruatur, et omnes a veritatis ac iustitiae via aberrantes redeant ad cor, et convertantur ad Deum, ac declinantes a malo, et facientes bonum incedant per semitas Domini.

## Allocutio

habita in consistorio secreto die XXVIII. septembris anni MDCCCLX<sup>1</sup>).

### Venerabiles Fratres.

Novos et ante hunc diem inauditos ausus a Subalpino Gubernio contra Nos, hanc Apostolicam Sedem, et Catholicam Ecclesiam admissos denuo cum incredibili animi Nostri dolore vel moerore potius deplorare ac detestari cogimur, Venerabiles Fratres. Ipsum, uti nostis, Gubernium victoria abutens, quam bellicosae magnaeque nationis opibus adiutum ex funestissimo bello reportavit, suum per Italiam regnum contra omnia divina et humana iura extendens, populis ad rebellionem excitatis, legitimisque Principibus ex propria dominatione per summam iniustitiam expulsis, aliquot Pontificiae Nostrae in Aemilia ditionis provincias iniustissimo ac prorsus sacrilego ausu invasit et usurpavit. Dum autem universus Catholicus Orbis iustissimis gravissimisque Nostris respondens querelis contra hanc impiam usurpationem vehementer clamare non desinit, idem Gubernium alias huius Sanctae Sedis provincias in Piceno, Umbria, et Patrimonio sitas sibi vindicare constituit. At cum videret, earum provinciarum populos omni perfrui tranquillitate, eosque Nobis fideliter adhaerere, nec posse pecuniis largiter profusis, aliisque improbis adhibitis dolis, a legitimo Nostro et huius Sanctae Sedis civili imperio alienari ac divelli. iccirco in ipsas provincias immisit tum perditorum hominum manum, qui turbas seditionemque ibi excitarent, tum ingentem suum exercitum, qui easdem provincias hostili impetu armorumque vi subiceret.

Optime nostis, Venerabiles Fratres, impudentes litteras a Subalpino Gubernio ad suum tuendum latrocinium Nostro Cardinali a publicis negotiis scriptas, quibus haud erubuit nuntiare, se suis copiis in mandatis dedisse, ut commemoratas Nostras provincias occuparent, nisi dimitterentur exteri homines adscripti parvo Nostro exercitui, qui ceteroquin ad Pontificiae ditionis, eiusque populorum tranquillitatem servandam fuerat instructus. Nec ignoratis, a Subalpinis copiis easdem provincias ipso fere tempore fuisse occupatas, quo illae litterae accipiebantur. Equidem nemo non potest magnopere commoveri, et summa affici indignatione reputans mendaces criminationes, variasque calumnias et contumelias, quibus idem Gubernium haud pudet huiusmodi suam hostilem impiamque contra civilem Romanae

<sup>1</sup>) *Huc referuntur Syllabi Propositiones 62, 76.*

Ecclesiae principatum aggressionem tegere, Nostrumque Gubernium impetere. Ecquis enim non summopere miretur audiens, Nostrum reprehendi Gubernium, propterea quod Nostro exercitui homines fuerint adscripti, cum omnes noscant nulli legitimo Gubernio denegari unquam posse ius cooptandi in suas copias externos homines? Quod quidem ius potiori quadam ratione ad Nostrum et huius Sanctae Sedis Gubernium pertinet, cum Romanus Pontifex, veluti communis omnium catholicorum pater, non possit non libentissime eos omnes catholicos excipere, qui religionis studio impulsii velint in Pontificiis copiis militare et ad Ecclesiae defensionem concurrere. Atque hic animadvertendum existimamus, huiusmodi catholicorum exterorum concursum fuisse praesertim excitatum illorum improbitate, qui civilem huius Sanctae Sedis principatum aggressi sunt. Nemo enim ignorat qua indignatione, et quo luctu universus catholicus orbis fuerit commotus ubi novit tam impiam, tamque iniustam civili huius Apostolicae Sedis dominio aggressionem fuisse illatam. Ex quo porro factum est, ut quamplurimi ex variis christiani orbis regionibus fideles sua sponte et summa alacritate ad Pontificiam Nostram ditionem convolaverint, suumque nomen Nostrae militiae dederint, quo Nostra, huius Sanctae Sedis, et Ecclesiae iura strenue defenderent. Singulari autem malignitate Subalpinum Gubernium Nostris militibus mercenarii notam per summam calumniam inurere minime veretur, cum non pauci ex indigenis exterisque Nostris militibus nobili genere nati, et illustrium familiarum nomine conspicui, ac religionis amore unice excitati, sine ullo emolumento in Nostris copiis militare voluerint. Neque latet Subalpinum Gubernium, qua fide et integritate Noster exercitus praestet, cum eidem Gubernio perspectum sit, irritas fuisse omnes dolosas artes adhibitas ut Nostri milites corrumperentur. Nihil vero est cur immoremur in refellenda feritatis accusatione Nostris copiis improbe illata, cum nullum plane argumentum obtractatores valeant adducere, quin potius huiusmodi criminatio in ipsos iure converti possit, quemadmodum vulgatae Subalpini exercitus Ducum truculentae proclamationes manifestissime ostendunt.

Hic autem animadvertere praestat, Nostro Gubernio minime suspicandum fuisse de huiusmodi hostili invasione, cum ipsi asseveratum esset Subalpinas copias prope territorium Nostrum accessisse non quidem invadendi animo, immo vero ut inde perturbatorum turmas arcerent. Hinc summus Nostrarum copiarum Dux ne cogitare quidem poterat, sibi cum Subalpino exercitu esse pugnandum. Verum ubi, rebus praeter omnem expectationem perperam immutatis, agnovit hostilem irruptionem ab illo exercitu factam, qui sane pugnantium numero armorumque vi maxime praevalebat, providum suscepit consilium se Anconam, utpote arce munitam, recipiendi, ne Nostri milites tam facili mortis periculo exponerentur. Cum autem ingruentibus hostium copiis in itinere interciperetur, manus conserere coactus est, ut sibi militibusque suis viam aperiret.

Ceterum dum meritas debitasque laudes tribuimus commemorato Nostrarum copiarum Duci, ac illarum ductoribus, et militibus, qui inspectata hostili irruptione lacesitii pro Dei, Ecclesiae, huius Apostolicae Sedis, ac iustitiae causa fortiter, viribus licet longe imparibus, dimicarunt; vix lacrymas contineri possumus noscentes quot strenui milites, ac lectissimi praesertim iuvenes in hac iniusta et crudeli invasione occubuerint, qui religioso sane nobilique animo ad civilem Romanae Ecclesiae principatum tuendum advolarunt. Nos insuper summopere commovet luctus, qui in illorum familiis redundat. Utinam eisdem familiis fletum Nostris verbis abstergere possemus! Confidimus vero non levi ipsis solatio et consolationi futuram honorificentissimam mentionem, quam de extinctis suis liberis et propinquis merito facimus ob splendidum sane eximiae eorum erga Nos et hanc Sanctam Sedem fidei, pietatis et amoris exemplum, quod christiano orbi cum immortalis eorum nominis laude exhibuerunt. Atque in eam profecto spem erigimur fore, ut ii omnes, qui gloriosam pro Ecclesiae causa mortem obierunt, illam sempiternam assequantur pacem et beatitatem, quam a Deo Optimo Maximo apprecati sumus, et apprecari nunquam omitemus. Quo loco debitis quoque laudibus prosequimur dilectos Filios Praesides provinciarum, praesertim Urbino-Pisaurensis, et Spoletanae, qui in hac tristissima temporum vicissitudine suo munere sedulo constanterque perfuncti sunt.

Jam vero, Venerabiles Fratres, quis ferre unquam poterit insignem impudentiam et hypocrisim, qua nequissimi invasores in suis programmatis asserere non dubitant, se Nostras aliasque Italiae adire provincias, ut ibi moralis ordinis principia restituant? Atque id ab eis temere affirmatur, qui acerrimum Catholicae Ecclesiae, eiusque Ministris, ac rebus iamdiu bellum inferentes, et ecclesiasticas leges, censurasque plane despicientes ausi sunt spectatissimos tum S. R. E. Cardinales, tum Episcopos, tum probatissimos utriusque Cleri Viros in vincula conicere, Religiosas Familias e propriis Coenobiis expellere, Ecclesiae bona diripere, et civilem huius Sanctae Sedis principatum vastare. Scilicet moralis ordinis principia ab iis restituentur, qui publicas cuiusque falsae doctrinae scholas, et meretricias etiam domos constituunt, quique abominandis scriptis et scenicis spectaculis pudorem, pudicitiam, honestatem, viriutem offendere, eliminare, et sacrosancta divinae nostrae religionis mysteria, sacramenta, praecepta, et instituta, sacrosque ministros, ritus, caeremonias irridere, contemnere, omnemque iustitiae rationem de medio tollere, ac tum religionis tum civilis societatis fundamenta labefactare et evertere connituntur<sup>1)</sup>!

In hac igitur tam iniusta, tam hostili et horrenda civilis Nostri et huius Sanctae Sedis principatus aggressionem et occupationem, a Subalpino Rege, eiusque Gubernio contra omnes iustitiae leges et universale gentium ius peracta, Nostri officii probe memores in hoc amplissimo Vestro consensu, et coram universo Catholico Orbe Nostram vocem denuo vehementer attollimus, ac omnes nefarios sacrilegosque eiusdem Regis et Gubernii ausus reprobamus, penitusque damnamus, omnesque actus plane nullos et irritos declaramus, decernimus, ac civilis, quo Romana pollet Ecclesia, principatus integritatem, eiusque iura, quae ad omnes catholicos pertinent, etiam atque etiam reclamamus, et reclamare nunquam desistemus.

Verum dissimulare non possumus, Venerabiles Fratres, summa Nos opprimi amaritudine, cum in tam scelestam et nunquam satis execranda aggressionem alieni auxilii opem, variis exortis difficultatibus, adhuc desideremus. Equidem notissimae Vobis sunt iteratae declarationes Nobis factae ab uno ex potentissimis Europae Principibus. Attamen dum illarum iamdiu expectamus effectum, non possumus non vehementer angere ac perturbari, cum inspiciamus nefandae usurpationis auctores fautoresque audacter insolenterque in nefario suo proposito persistere ac progredi, tanquam certo confidentes neminem sibi reapse adversari.

Haec autem perversitas eo pervenit, ut hostilibus Subalpini exercitus copiis ad moenia fere huius almae Nostrae urbis inmissis, quaecumque fuerit implicata communicatio, publicae privataeque rationes in discrimen adductae, commeatus intercepti, et, quod gravissimum est, Summus totius Ecclesiae Pontifex in molestam redactus difficultatem Ecclesiae ipsius negotiis, prout res postulat, consulendi, proptereaquod maxime coarctetur via cum variis orbis partibus communicandi. Quamobrem in tantis Nostris angustiis, tantoque rerum discrimine, vel facile intelligitis, Venerabiles Fratres, Nos tristi necessitate eo iam ferme impelli, ut vel inviti cogitare debeamus de opportuno suscipiendo consilio ad Nostram dignitatem tuendam.

Interim abstinere non possumus, quin praeter alia depleamus funestum ac perniciosum principium, quod vocant de *non Interventu*, a quibusdam Guberniis haud ita pridem, ceteris tolerantibus, proclamatum, et adhibitum etiam cum de iniusta alicuius Gubernii contra aliud aggressionem agatur<sup>2)</sup>: ita ut quaedam veluti impunitas ac licentia impetendi ac diripiendi aliena iura, proprietates, ac ditiones ipsas contra divinas humanasque leges sanciri videatur; quemadmodum luctuosa hac tempestate cernimus evenire. Et mirandum profecto, quod uni Subalpino Gubernio impune liceat eiusmodi principium despiciere ac violare, cum videamus ipsum hostilibus suis copiis, universa Europa inspectante, in alienas ditiones irrumpere, legitimosque ex illis Principes exturbare: ex quo perniciosa consequitur absurditas, alienum nempe interventum dumtaxat admitti ad rebellionem suscitandam atque fovendam.

<sup>1)</sup> *Huc ref. prop.* 80.

<sup>2)</sup> *Huc ref. prop.* 62.

Hinc autem opportuna Nobis oritur occasio excitandi omnes Europae Principes, ut pro spectata ipsorum consilii gravitate et sapientia serio perpendant quae quantaque mala in detestabili, quem lamentamur, eventu cumulentur. Agitur enim de immani violatione, quae contra universale gentium ius nequiter est patrata, quaeque nisi omnino coerceatur, nulla deinceps legitimi cuiusque iuris firmitas ac securitas poterit consistere. Agitur de rebellionis principio<sup>1)</sup>, cui Subalpinum Gubernium turpiter inservit, et ex quo primum est intelligere, quantum cuicumque Gubernio discrimen in dies comparetur, et quanta in universam civilem societatem redundet perniciēs, cum ita fatali *Communismo* aditus aperiatur. Agitur de violatis solemnibus Conventionibus, quae uti aliorum in Europa Principatuum, ita etiam civilis Pontificiae ditionis integritatem sartam tectamque servari omnino postulant. Agitur de violenta direptione illius Principatus, qui singulari divinae providentiae consilio Romano Pontifici datus est ad Apostolicum suum Ministerium in universam Ecclesiam plenissima libertate exercendum. Quae profecto libertas summae omnibus Principibus curae esse debet, ut Pontifex ipse nullius civilis potestatis impulsui subiaceat, atque ita spiritali pariter catholicorum in eorundem Principum dominiis degentium tranquillitati cautum sit<sup>2)</sup>.

Itaque omnibus Supremis Principibus persuasum esse debet, Nostram cum Ipsorum causa plane esse coniunctam, eosque suum Nobis auxilium afferentes Nostrorum aequae ac suorum iurium incolumitati esse prospecturos. Maxima proinde cum fiducia ipsos hortamur et obsecramus, ut opem Nobis, pro sua quisque conditione et opportunitate, velint impendere. Non dubitamus autem, quin catholici praesertim Principes ac Populi omnem eorum curam et operam studiosissime conferant, ut pro communi eorum officio universi Dominici gregis Patrem et Pastorem, parricidalibus degeneris filii armis oppugnatum, modis omnibus adiuvere, tueri et defendere properent atque festinent.

Cum autem apprime sciatis, Venerabiles Fratres, omnem spem nostram in Deo esse collocandam, qui adiutor et refugium est nostrum in tribulationibus nostris, quique vulnerat et medetur, percutit et sanat, mortificat et vivificat, deducit ad inferos et reducit; iccirco in omni fide et humilitate cordis nostri assiduas ferventissimasque ad Ipsum, adhibito in primis efficacissimo Immaculae Sanctissimaeque Deiparae Virginis Mariae patrocinio, ac suffragio Beatorum Petri et Pauli, preces effundere non intermittamus, ut faciens potentiam in brachio suo inimicorum suorum superbiam elidat, et expugnet impugnantes nos, omnesque Ecclesiae suae sanctae hostes humiliet et conterat; atque omnipotenti suae gratiae virtute efficiat, ut omnium praevaricantium corda respiciant, deque optatissima illorum conversione sancta mater Ecclesia quam primum laetetur.

## Allocutio

habita in consistorio secreto die XVII. decembris anni MDCCCLX<sup>3)</sup>.

### Venerabiles Fratres.

Multis gravibusque vel ab ipso sui exordio iactata procellis Ecclesia miserrima hac nostra aetate tot tantisque hostium aggressionibus petita est, ut conceptum iampridem ab ipsis odium omnisque furoris maturitas in Nostri Pontificatus tempus erupisse videatur. Neque vero persequamur singula necesse est, Venerabiles Fratres, quae haud ita longo annorum intervallo acerba et gravia contigerunt, quorum memoria Nostrum aequae Vestrumque animum non levi moerore perfundat. Illud vero dissimulare non possumus, pro arcano Dei iudicio, nullum adhuc fuisse impositum tam multis calamitatibus modum: novas quippe dolemus ingruere tum ex fautoribus perversae doctrinae, quae a funestissimae Reformationis principiis orta publici veluti

<sup>1)</sup> *Huc ref. prop. 63.*

<sup>2)</sup> *Huc ref. nota ad §. IX.*

<sup>3)</sup> *Huc referuntur Syllabi Propositiones 19, 37, 43, 73.*

iuris robur alicubi obtinuit; tum ex impiorum hominum pravitare, qui Catholicae Ecclesiae se filios praedicant, appellandi vero sunt filii tenebrarum; tum denique ex ethnicorum furore, qui per Orientis regiones in caedem exitumque fidelium vehementius efferbuit.

Et sane maxime est deplorandum, in quampluribus Europae partibus de Ecclesiae potestate ac iuribus perniciosissimos errores invaluisse: hinc adhibitum assidue studium ad vim omnem abiudicandam initis cum Apostolica Sede de re sacra conventionibus, hinc omnis impensa cura, ut ne conventiones aliae contrahantur in posterum ad componenda Ecclesiae negotia, utque iis componendis moderandisque civilis dumtaxat accedat auctoritas.

Quod quidem non sine gravi animi Nostri molestia experti nuper sumus, Venerabiles Fratres. Pro Apostolici enim muneris officio ad relevandas in Magno Badarum Ducatu Catholicae Ecclesiae res, et extinguenda illic exorta cum civili potestate dissidia, superiore, ut scitis, anno cum Celssissimo illo Duce conventionem inivimus, quae quum rata fuisset habita, et vero etiam in vulgus emissa, eiusdem executionem, ut par erat, praestolabamur. Verumtamen, refragante huic rei publico illius ditionis Consilio, a Magno Duce decretum fuit editum, quo conventioni vis omnis adimitur, in eiusque locum rogata lex est Ecclesiae libertati vel maxime adversa. Id porro ex falsa protestantium doctrina derivatum intelligimus, qui autumant Ecclesiam in civili Imperio quoddam veluti Collegium existere, nullisque proinde pollere iuribus, praeter ea quae concessa illi sint atque attributa a civili potestate<sup>1)</sup>. Id autem quantopere abhorreat a veritate, equis non intelligat? Ecclesia nempe ut vera et perfecta societas a divino auctore suo fuit instituta, quae nullis circumscripta regionum finibus, nullo etiam civili subdatur imperio, suamque potestatem ac iura ubique terrarum in hominum salutem libere exercent. Nec sane aliter indicant solemnissima illa Christi Domini ad Apostolos verba: «Data est mihi omnis potestas in caelo et in terra; «ite, docete omnes gentes . . . docentes eos servare omnia quaecumque mandavi vobis.» Quibus excitati vocibus Evangelii praefatos Apostoli, repugnantes et regibus et principibus, nullisque seu minis seu suppliciis deterriti demandatum sibi ministerium alacriter sunt executi. Nos itaque de salutaribus Ecclesiae iuribus tutandis vehementer solliciti, vix dum cogitari atque agi audivimus de eadem conventionem infirmam, Nostras continuo Magno Duci dedimus litteras ad malum hoc avertendum, atque adeo per Cardinalem publicis negotiis praepositum apud Gubernium illud instandum curavimus, ut debitae executioni conventio mandaretur. Sed enim quum impensa omnia studia curaeque in irritum cesserint, quod Nostri officii est, abrogatam contra omnes iustitiae regulas sine alterius partis consensu solemnem conventionem, Vestro in coetu, Venerabiles Fratres, palam conquerimur, et Catholicae Ecclesiae, sanctaeque Sedis iura violata, pessumdata vehementiori, quo possumus, studio reclamamus<sup>2)</sup>. Quae Nostrae expostulationes ut ad Badense Gubernium transmittantur mandavimus, simulque declararetur Archiepiscopo Friburgensi agendi ratio tantis in difficultatibus adhibenda; cuius praeclari Antistitis eiusque etiam Cleri commendare satis non possumus in Ecclesiae libertate tuenda constantiam, a qua nunquam ipsos vel in summo rerum discrimine discessuros plane confidimus.

Jam vero quum ob turbatas iterum in Magno Badarum Ducatu sacras res, expositamque illic novis iactationibus Ecclesiam doleremus, alia Nobis accessit molestiae causa ex nequissimo libello nuper Parisiis edito, in quem tam multa prorsus a veritate aliena, tam multa etiam absurda atque inter se pugnantia auctor congressit, ut respiciendus potius atque aspernandus, quam refutandus videatur. Illud tamen non est ferendum, quod eo audaciae atque impietatis devenerit, ut posteaquam sacrum civilemque Ecclesiae Romanae principatum impetere non sit veritus<sup>3)</sup>, peculiarem quandam novique generis sibi fingat Ecclesiam in Galliarum Imperio ex illius sententia excitandam, quae ab auctoritate Romani Pontificis subducta sit planeque divisa<sup>4)</sup>. Id porro quid est aliud, quam distrahere, ac proscindere Catholicae Ecclesiae unitatem? De qua quidem necessaria unitate ita Christus Dominus ad

<sup>1)</sup> *Huc ref. prop.* 19.

<sup>3)</sup> " " " 34, 76.

<sup>2)</sup> *Huc ref. prop.* 43.

<sup>4)</sup> " " " 37.



Patrem: «Non pro eis rogo tantum, sed pro eis etiam, qui credituri sunt <per verbum eorum in me, ut omnes unum sint, sicut tu, Pater, in me es <et ego in te.> Atqui huius unitatis vis et ratio omnino postulat, ut tamquam membra cum capite, sic universi per orbem fideles cum Romano Pontifice, qui Christi in terris Vicarius est, coniungantur et coalescant. Quamobrem ad Praedecessorem Nostrum sanctae memoriae Damasum scribebat Ecclesiae doctor Hieronymus: «Beatitudini tuae, hoc est Petri Cathedrae, <communione consocior, supra illam Petram aedificatam Ecclesiam scio, quicunque extra hanc domum agnum comederit, profanus est.> Quantam vero memorati libelli auctor infert iniuriam perillustri Galliarum genti, utpote quam Catholicae unitatis retinentissimam schismaticis putat erroribus posse implicari! Quanta illius temeritas est, quod ab obsequio ac fide erga Apostolicam Sedem abstrahendum fore confidat Clerum illum et spectatissimos praesertim Antistites, qui Praedecessores inter suos Irenaeum recenseant Lugdunensis Ecclesiae Pastorem, praeclara ista scribentem: «Ad Romanam <Ecclesiam propter potiorum principalitatem necesse est omnem convenire <Ecclesiam, hoc est eos, qui sunt undique fideles:> qui nullo fracti metu, nullo retardati periculo, tum voce tum scriptis Nostra Sanctaeque Sedis iura vindicare certaverint, Nobisque exhibere nunquam intermiserint certissima devotionis argumenta! Quorum Nos, aliorumque per orbem Antistitem dum meritis ornatus praeconiis pastorem curam, vigilantiam, firmitatem, ipsos licet sponte sua incensos erectosque ad Catholicae fidei defensionem, hortari tamen atque excitare pro hac temporum iniquitate non praetermittimus, ut quo validiores quotidie hostiles impetus fiant, eo firmiori animo sustinendos ac frangendos eurent, atque adeo commissos suae curae fideles de fallaciis insidiisque admonere non desinant, quibus avellere ipsos a Matris Ecclesiae gremio vaferrimi homines conitantur.

Jam vero ex damnando illo libello, quae tandem sint auctoris et ceterorum omnium consilia, qui civilem Sanctae Sedi principatum extorquere conantur, detracta veluti larva manifeste deprehendimus. Scilicet nihil aliud intendunt ac moluntur, quam ut Sanctissimae Religionis fundamenta subvertant. Id sane per provincias a civili Nostra dominatione iniuste subreptas, id per reliquas Italiae regiones perfidissimis quibusque artibus studiosè curari et videmus et ingemiscimus. Huc spectant disseminatae quaquaversus perversae sacrorum librorum interpretationes ad fidem corrumpendam, diffusa ad contaminandos iuventutis mores turpissimorum libellorum colluvies, invecta quocumque effraenis vivendi licentia, despecta, proculcata Ecclesiae potestas, sacra immunitas violata, subducta ab auctoritate et vigilantia Episcoporum publica iuventutis institutio, omnisque doctrinae morumque disciplina, praepositi docendo homines de religione prave sentientes, evulgatum in Umbria decretum de cunctis ferme religiosis familiis e claustro exturbandis, de extinguendis Collegiatis Capitulis, delendisque simplicibus cuiusvis generis Beneficiis, piisque Sodalitibus eorumque bonis per summam iniuriam occupandis<sup>1)</sup>; huc spectant coniecti in vincula ecclesiastici viri, ipsique sacri Antistites, quos inter Venerabilis Frater Archiepiscopus Urbinas, nuper septus armis in custodiam traditus, et Cardinalitia etiam dignitate fulgens Venerabilis Frater Firmanus Antistes per vim abreptus a Sede sua, alioque relegatus, et ab omni commissi gregis curatione prohibitus, ac plures etiam Antistites et Sacerdotes e Regno Neapolitano vel in carcerem missi, vel ad fugam coacti; huc spectant (nec sine acerbissimo doloris sensu memoramus) patefacta per nonnullas Italiae civitates protestantibus templa, et publicae etiam scholae institutae, ubi in perniciem Catholicae Religionis quaelibet impune tradatur doctrinae perversitas; denique promulgatum in Umbria decretum, quo matrimonium, nuncupatum ab Apostolo magnum Sacramentum, peculiaribus civilibus disciplinis illigatur, ac ferme subtrahitur ab Ecclesiae potestate, eo fortasse consilio ut postea civilibus duntaxat subdatur legibus, eaque ratione, quod Deus avertat, legalis invehatur concubitus cum extremo animarum detrimento<sup>2)</sup>. Atque hic, uti Apostolici Nostri muneris ratio postulat, quidquid contra Ecclesiae iura et patrimonium, contra religiosas personas earumque bona actum hucusque est, vel peragatur

<sup>1)</sup> *Huc ref. prop. 47, 53, 79.*

<sup>2)</sup> *Huc ref. prop. 73.*

in posterum, damnamus, reprobamus, ac nullius vis et roboris, ac prorsus irritum palam edicimus.

Quanta vero ubique sit rerum omnium tum publicarum tum privatarum perturbatio, quantus in Europa motus, quantis dissidiis flagret Italia, equis non videat ac Nobiscum non maxime doleat? Tam multa tamque gravia rei sacrae et civili inflicta vulnera considerantes exclamare cogimur cum Propheta: «Infecta est terra ab habitatoribus suis, quia transgressi sunt leges, mutaverunt ius, dissipaverunt foedus sempiternum.»

Haec autem malorum congeries ab iis maxime repetenda, qui, ut suam per Italiae fines ditionem extendant, humana quaeque iura ac divina audacter pervertunt, qui publicae se felicitatis auctores iactant ac praedicant, quocumque tamen pervaserint, ibidem saevissimae veluti tempestates impressa relinquunt furoris, excidiique vestigia. Utinam aliquando redeant insipientes ad cor, nimirum intelligant, Religione sublata, nullum humanae societati superesse praesidium tum ad stabilitatem tum ad quietem! Utinam sibi aliquando persuadeant, unam esse Catholicam Religionem veritatis magistram, virtutum omnium altricem, in qua civitatum, regnorum incolumitas, salusque nitatur! Meminerint aliquando, Apostolicam hanc Sedem nedom adversatam nunquam fuisse verae ac solidae populi felicitati<sup>1)</sup>, quin etiam quovis tempore de universo hominum genere fuisse egregie promeritam; per illam namque traductae ad humanitatem barbarae gentes, veraeque religionis praeceptis institutae, sedati bellorum tumultus, provectae modis omnibus bonae artes ac disciplinae, calamitosis aegrisque recreandis publica caritatis excitata domicilia, asserta, promulgata et principibus et populis vel in maximis perturbationibus iustitiae atque honestatis principia. Haec atque alia quamplura per Apostolicam Sedem in bonum humanae societatis provide sapienterque peracta, multis eximisque testata monumentis, ad omnis praedicationem temporis celebrabit historia.

Sed iam paternum animum Nostrum ad se revocat plurimis afflicta malis per Orientem Ecclesia, quae tamen cruentis martyrum palmis nobilitari ornarique non desinit. Loquimur nempe, Venerabiles Fratres, de regno Chorea, de Sinensi Imperio, regnisque finitimis, ubi neque atrocissimis cruciatibus, nec dirissimo quovis mortis genere debilitata aut victa est Christianorum in fide constantia; loquimur de Cochinchinae ac Tonchini regionibus, in quibus ad extinctionem prorsus christiani nominis acerbissime reerudit ethnicorum immanitas. Quid enim memorabimus collegia, coenobia, templa, publicas privatasque aedes vel solo eversas, vel flammis absumptas? Quid Christifideles referemus cuiusque aetatis, conditionis, ordinis partim saevissime exagitatos, nudatosque rebus omnibus, hac illac errantes vitam trahere coactos quovis supplicio acerbiolem, partim in carcerem detrusos, oninque tormentorum genere excruciatos, qui tamen in ferendis pro Christo supplicii ac morte obeunda veterum Ecclesiae Martyrum fortitudinem retulerunt? Neque minus Nos tangit ac movet miserrima Christianorum per Syriam conditio, qui, licet a crudelissimae caedis perpassione quieverint, assiduo turbantur metu, ne compressus tantisper militaribus Europae copiis infidelium impetus in rapinas iterum caedesque furentius erumpat. Illorum Nos relevandis infortuniis, sin minus paternis desideriis parem, aliquam tamen pro angustis Nostris rebus pecuniae partem transmittendam curavimus, quam offerre Nobis nunquam intermisit pia Catholicarum gentium liberalitas. Quarum etiam non sine laude commemoratum volumus egregium caritatis exemplum in recreandis subsidiorum largitate afflictis per Syriam fidelibus, atque adeo maximopere lactamur, nunquam languescere in Ecclesia virtutem illam, quam divinus Reparator praecipuum esse signum voluit Christianae Religionis.

Hic, quem hactenus exposuimus, sacrarum rerum et publicarum status, deplorandus quidem ac luctuosus, Nos vehementer angit atque perturbat, et gravi etiam moerore complet, Venerabiles Fratres; Vosque in partem vocatos procurationis Nostrae, in partem etiam doloris venire non dubitamus. Sed tamen non concidamus animo, atque iteratis quotidie precibus levemus oculos nostros in montem, unde in tantis rerum asperitatibus opportunum

<sup>1)</sup> *Huc ref. prop. 40, 80.*

expectemus auxilium. Aderit Ecclesiae suae Deus, aderit numilitati Nostrae, Eiusque Nos virtute roboratos ab officio et constantia Apostolici Ministerii nullus plane periculi metus, nulla deterrebit adversitas. Innocens Christia-  
norum sanguis, quo perfusa Orientalis terra est, in odorem suavitatis ascendat ad Dominum, illoque salutare velut sacrificio placatus gravissimas, quibus premimur, quaeque impendent, calamitates propitius avertat; atque accedente Sanctissimae Genitricis Dei ab origine Immaculatae patrocinio, et beatissimis Apostolis Petro et Paulo suffragantibus, concedat Ecclesiae suae de acer-  
bissimis inimicis referre victoriam. Exsurgat aliquando in iudicium Deus, hostesque sui nominis religionis excidium anhelantes, multa et nefaria in Ecclesiam molientes, in fortitudine brachii sui disperdat et conterat, vel, quod potius et optamus et poscimus, divinae gratiae lumine collustratos in viam iustitiae et veritatis dives in misericordia clementissime traducat

## Allocutio

habita in consistorio secreto die XVIII. martii anni MDCCCLXI<sup>1)</sup>.

### Venerabiles Fratres

Jamdudum cernimus, Venerabiles Fratres, quo misero sane conflictu ob invicem pugnancia inter veritatem et errorem, inter virtutem et vitium, inter lucem et tenebras principia, hac miserrima nostra praesertim aetate civilis exagitetur societas. Namque alii ex una parte tuentur quaedam moderna, uti appellant, civilitatis placita, alii ex altera iustitiae sanctissimae-  
que nostrae Religionis iura propugnant. Ac primi postulant, ut Romanus Pontifex cum *Progressu*, cum *Liberalismo*, uti vocant, ac recenti civilitate se reconciliet et componat<sup>2)</sup>. Alteri vero merito efflagitant, ut immobilia et inconcussa aeternae iustitiae principia integra et inviolata custodiantur, et saluberrima divinae nostrae Religionis vis omnino servetur, quae et Dei gloriam amplificat, et opportuna tot malis, quibus humanum genus affligitur, affert remedia, quaeque est unica, veraque norma, qua filii hominum in hac mortali vita omni virtute instituti ad beatae aeternitatis portum perducuntur.

Sed hodiernae civilitatis patroni huiusmodi haud acquiescunt, quando-  
quidem sese veros et sinceros Religionis amicos affirmant. Ac Nos fidem eis adhibere vellemus, nisi tristissima sane facta, quae ante omnium oculos quotidie versantur, contrarium prorsus ostenderent. Et quidem una est vera ac sancta super terram religio, ab ipso Christo Domino fundata et instituta, quae virtutum omnium foecunda parens et altrix, ac vitiorum expultrix, et animorum liberatrix, veraeque felicitatis index, appellatur Catholica, Apo-  
stolica, Romana. Quid autem sentiendum de iis, qui extra hanc salutis arcam vivunt, iam alias declaravimus in Consistoriali Nostra Allocutione diei 9. Decembris anni millesimi octingentesimi quinquagesimi quarti<sup>3)</sup>, atque hic eandem doctrinam confirmamus. Jam vero ab iis, qui pro Religionis bono Nos ad hodiernae civilitati dexteram porrigendam invitant, quaerimus utrum facta talia sint, quae Christi hic in terris Vicarium ab Ipso ad caelestis suae doctrinae puritatem tuendam, atque ad agnos ovesque eadem doctrina pascendas et confirmandas divinitus constitutum possint inducere, ut sine gravissimo conscientiae piaculo, et maximo omnium scandalo se cum ho-  
dierna civilitate consociet, cuius opera tot nunquam satis deploranda eveniunt mala, tot terrimae opiniones, errores et principia promulgantur, quae catho-  
licae Religionis eiusque doctrinae omnino adversantur.

Atque inter haec facta nemo ignorat quomodo vel ipsae solennes con-  
ventiones inter hanc Apostolicam Sedem et Regios Principes rite initae penitus destruantur, veluti nuper Neapoli accidit. Qua quidem de re in hoc amplissimo vestro consessu etiam atque etiam querimus, Venerabiles Fratres,

<sup>1)</sup> *Huc referuntur Syllabi Propositiones 37, 61, 76, 80*

<sup>2)</sup> *Huc ref. prop. 80, coll. 40.*

<sup>3)</sup> *Supra, pag. 78, 80. Huc ref. prop 16, 17*

et summopere reclamamus eo prorsus modo, quo contra similes ausus et violationes alias protestati sumus.

Haec autem moderna civitas dum cuique acatholico cultui favet, ipsosque infideles a publicis muneribus obcundis minime prohibet, et catholicas scholas illorum filiis recludit, irascitur adversus Religiosas Familias, adversus Instituta catholicis scholis moderandis fundata, adversus quamplurimos cuiusque gradus ecclesiasticos Viros, amplissima etiam dignitate insignitos, quorum non pauci vitam in exilio incerto aut in vinculis misere agunt, et adversus etiam spectatos laicos viros, qui Nobis et huic Sanctae Sedi addicti Religionis iustitiaeque causam alacriter defendunt. Haec civitas dum acatholicis institutis ac personis subsidia largitur, catholicam Ecclesiam iustissimis suis possessionibus spoliatur, et omnia adhibet consilia ac studia ad salutarem ipsius Ecclesiae efficaciam imminuendam. Insuper dum omnem tribuit libertatem quibusque verbis et scriptis, quae Ecclesiam, omnesque ipsi ex corde devotos aversantur, ac dum licentiam animat, alit et fovet, eodem tempore se omnino cautam moderatamque exhibet in reprehendenda violenta et immiti interdum agendi ratione contra eos adhibita, qui optima vulgant scripta; et omnem in puniendo exercet severitatem, si ab his moderationis fines vel leviter praeteriri arbitretur.

Huiusmodi igitur civitati posset ne unquam Romanus Pontifex amicam protendere dexteram, et cum ea foedus concordiamque ex animo inire? Vera rebus vocabula restituantur, et haec Sancta Sedes sibi semper constabit. Siquidem ipsa verae civilitatis continenter fuit patrona et altrix; atque historiae monumenta eloquentissime testantur ac probant, omnibus aetatibus ab eadem Sancta Sede in disiunctissimas quasque et barbaras terrarum orbis regiones veram rectamque fuisse invectam morum humanitatem, disciplinam, sapientiam. At cum civilitatis nomine velit intelligi systema appositae comparatum ad debilitandam ac fortasse etiam delendam Christi Ecclesiam, nunquam certe quidem haec Sancta Sedes et Romanus Pontifex poterunt cum huiusmodi civilitate convenire. *Quae enim, uti sapientissime clamat Apostolus, participatio iustitiae cum iniquitate, aut quae societas luci ad tenebras? Quae autem conventio Christi ad Belial?* <sup>1)</sup>

Qua igitur probitate perturbatores, et seditionis patroni suam vocem attollunt ad exaggerandos conatus frustra ab ipsis adhibitos, ut se cum Romano Pontifice component? Hic enim, qui suam omnem vim haurit ex aeternae iustitiae principiis, quonam pacto posset illa unquam descrere, ut sanctissima debilitetur fides, atque adeo Italia in discrimen adducatur amittendi maximum suum splendorem et gloriam, qua undeviginti ab hinc saeculis refulget ob centrum et sedem, qua praestat, catholicae veritatis?

Neque obiici potest, hanc Apostolicam Sedem in rebus civilis principatus clausas habuisse aures illorum postulationibus, qui liberiores administrationem exoptare significarunt. Ut vetera omittamus exempla, de hac nostra infelici aetate loquemur. Ubi enim Italia a legitimis suis Principibus liberiores institutiones obtinuit, Nos paternum animum gerentes filiorum partem Pontificiae Nostrae ditionis in civilem administrationem cooptavimus, et opportunas dedimus concessionem, propriis tamen prudentiae modis ordinatas, ne munus paterno animo concessum per malorum hominum operam veneno inficeretur. At vero quid inde factum est? Effraena licentia innocua Nostra largitate potita est, et Aulae, quo publici Ministri ac Deputati convenerant, limina sanguine respersa, et impia manus in eum sacrilege conversa qui beneficium concesserat. Quod si recentissimis hisce temporibus consilia circa civilem procuratorem Nobis data fuerunt, haud ignoratis. Venerabiles Fratres, illa a Nobis admissa fuisse, eo tamen excepto ac reiecto, quod non ad civilem administrationem respiciebat, sed eo spectabat, ut spoliationis parti iam patratae assentiremur. Nihil vero est cur de consiliis bene acceptis, deque Nostris sinceris ad illa exsequenda promissis loquamur, cum usurpationum moderatores alta voce profiterentur, se non quidem reformationes, sed absolutam rebellionem, omnemque a legitimo Principe seijunctionem omnino velle <sup>2)</sup>. Atque ipsi erant gravissimi facinoris auctores et

<sup>1)</sup> Epist. II. ad Corinth. VI. 14, 15

<sup>2)</sup> *Huc ref. prop. 76, et nota ad §. IX*

antesignani, qui suis clamoribus omnia replebant, non vero populus, ut de illis merito dici possit, quod Venerabilis Beda de Pharisaeis et Scribis Christi inimicis aiebat<sup>1)</sup>: *Non haec aliqui de turba, sed Pharisaei calumniabantur et Scribae, sicut Evangelistae testantur.*

Sed Romani Pontificatus oppugnatio non solum eo spectat, ut haec Sancta Sedes et Romanus Pontifex legitimo suo civili principatu omnino privetur, sed eo etiam tendit, ut infirmetur, et, si fieri unquam posset, plane tollatur salutaris catholicae religionis virtus: ac propterea impetit Dei ipsius opus, redemptionis fructum, et sanctissimam illam fidem, quae pretiosissima est haereditas in nos derivata ex incalculabili sacrificio, quod in Golgotha consummatum est. Atque ita se rem habere satis superque demonstrant tum commemorata iam facta, tum ea quae in dies evenire videmus. Quot enim in Italia Dioeceses ob illata impedimenta suis Episcopis orbatae, plaudentibus modernae civilitatis patronis, qui tot christianos populos sine pastoribus derelinquant, et illorum bonis potiuntur, ut ea in pravae etiam usus convertant! Quot sacrorum Antistites in exilio versantur! Quot (cum incredibili animi Nostri dolore dicimus) apostatae, qui non Dei, sed Satanae nomine loquentes, ac impunitate ipsis a fatali regiminis systemate concessa fidentes, et conscientias exagitant, et infirmos ad praevericandum impellunt, et misere lapsos in turpissimis quibusque doctrinis obfirmant, et Christi vestem lace-rare contendunt, cum minime reformident Nationales, uti dicunt, Ecclesias, aliasque id genus impietates proponere ac suadere<sup>2)</sup>! Postquam vero ita religioni insultaverint, quam per hypocrisim invitant ut cum hodierna civi-litate conveniat, non dubitant pari cum hypocrisi Nos excitare ut cum Italia reconciliemur. Scilicet cum omni fere civili Nostro principatu spoliati gra-vissima Pontificis et Principis onera sustineamus piis Catholicae Ecclesiae filiorum largitionibus quotidie amantissime ad Nos missis, cumque gratis in-viviae et odii signum facti sinus eorum ipsorum opera, qui conciliationem a Nobis postulant; id vellent praeterea, ut palam declararem, usurpatae Pontificiae Nostrae ditionis Provincias in liberam usurpatorum proprietatem cedere. Qua sane audaci et hactenus inaudita postulatione quaererent, ut ab hac Apostolica Sede, quae semper fuit et erit veritatis iustitiaeque propu-gnaculum, sanciretur, rem iniuste violenterque directam posse tranquille honesteque possideri ab iniquo aggressore; utque ita falsum constitueretur principium, fortunatam nempe facti iniustitiam nullum iuris sanctitati detri-mentum afferre<sup>3)</sup>. Quae postulatio iis etiam repugnat solemnibus verbis, qui in magno et illustri Senatu<sup>4)</sup> nuperrimis hisce diebus declaratum est: *Romanum Pontificem esse Repraesentatorem praecipuae vis moralis in hu-mana societate.* Ex quo illud consequitur, eum nullo modo posse vandalicae spoliationi consentire, quin fundamentum violet illius moralis disciplinae, cuius ipse veluti prima forma et imago dignoscitur.

Jam vero quicumque vel errore deceptus vel timore perculsus prae-bere velit consilia iniustis perturbatorum civilis societatis votis consentanea, necesse est ut hisce potissimum temporibus sibi omnino persuadeat, illos nunquam contentos fore, nisi viderint omne auctoritatis principium, omne religionis frenum, omnemque iuris iustitiaeque regulam de medio tolli. Atque huiusmodi subversores in civilis societatis calamitatem illud iam tum voce tum scriptis assequuti sunt, ut humanas mentes perverterint, moralem sen-sum debilitaverint, et iniustitiae horrorem eriperint; atque omnia conantur ut cunctis persuadeant, ius ab honestis gentibus invocatum nihil aliud esse, nisi iniustam voluntatem quae debeat omnino contemni<sup>5)</sup>. Heu! vere *lux et defluxit terra, et infirmata est; defluxit orbis, infirmata est altitudo populi terrae. Et terra infecta est ab habitatoribus suis: quia transgressi sunt leges, mutaverunt ius, dissipaverunt foedus sempiternum*<sup>6)</sup>

Verum in tanta tenebrarum obscuritate, qua Deus inscrutabili suo iudicio gentes sinit offundi, Nos omnem Nostram spem fiduciamque plane collocamus in ipso clementissimo misericordiarum Patre et Deo totius con-solationis, qui Nos consolatur in omni tribulatione Nostra. Ipse namque est,

<sup>1)</sup> Lib. I. c. 48. in c. XI. Lucae.

<sup>2)</sup> *Huc ref. prop.* 61.

<sup>3)</sup> *Huc ref.* §. VII. *Syllabi.*

<sup>4)</sup> *Huc ref. prop.* 37.

<sup>5)</sup> Gallico videlicet. *Nota ed.*

<sup>6)</sup> Isai. XIV. 4, 5.

qui Vobis, Venerabiles Fratres, concordiae et unanimittis inter Vos spiritum ingerit, et quotidie magis ingeret, ut Nobiscum arcissime aequae ac concordissime coniuncti parati sitis una Nobiscum sortem illam subire, quae arcano divinae suae providentiae consilio cuique nostrum reservata sit. Ipse est, qui caritatis vinculo inter se, et cum hoc catholicae veritatis et unitatis centro coniungit Sacrorum christiani orbis Antistites, qui fideles sibi commissos evangelicae veritatis doctrina instituunt, et isque iter in tanta caligine tuto sequendum monstrant, nuntiantes virtute prudentiae populis sanctissima verba. Ipse super omnes catholicas gentes effundit spiritum precum, et a catholicis acquitatis senum inspirat, ut rectum de hodiernis eventibus ferant iudicium. Haec autem tam mira in universo catholico orbe precum consensus, tamque unanimes erga Nos amoris significationes, tot sane variisque modis expressae (quod in anteaetis aetatibus haud facile queat inveniri) manifestissime ostendunt, quemadmodum hominibus recte animatis opus omnino sit tendere ad hanc Beatissimi Principis Apostolorum Cathedram, lucem terrarum orbis, quae magistra veritatis et nuntia salutis semper docuit, et usque ad consummationem saeculi immutabiles aeternae iustitiae leges docere nunquam desinet. Tantum vero abest, ut Italiae populi ab hisce luculentissimis filialis erga Apostolicam hanc Sedem amoris et observantiae testimoniis abstinuerint, ut immo quamplura centena ipsorum millia Nos amantissimis litteris adiverint, non eo quidem consilio ut conclamata a veteratoribus reconciliationem peterent, sed ut Nostras molestias, poenas, angores summopere dolerent, suumque erga Nos affectum omnimode confirmarent, et nefariam, sacrilegamque civilis Nostrae, eiusdemque Sedis principatus spoliationem etiam atque etiam detestarentur.

Cum porro ita se res habeant, antequam loquendi finem faciamus, coram Deo et hominibus clare aperteque declaramus, nullam prorsus adesse causam quare cum quopiam Nos reconciliari debeamus. Quoniam vero, licet immerentes, Illius hic in terris vice fungimur, qui pro transgressoribus rogavit, veniamque petiit, probe sentimus a Nobis parcendum iis qui Nos oderunt, ac pro ipsis orandum, ut divinae gratiae auxilio resipiscant, atque ita illius, qui Christi hic in terris vicariam gerit operam, benedictionem promereantur. Libenter utique pro illis oramus, iisque, statim ac resipuerint, ignoscere ac benedicere parati sumus. Interim tamen non possumus inertes haerere, veluti qui nullam de humanis calamitatibus curam capiunt; non possumus non vehementer commoveri et angere, ac uti Nostra non reputare maxima damna et mala iis nequiter illata, qui persecutionem patiuntur propter iustitiam. Quocirca dum intimo moerore conficimur, Deumque obsecramus, gravissimum supremi Nostrae Apostolatus munus implemus loquendi, docendi et damnandi quaecumque Deus Eiusque Ecclesia docet et damnat, ut ita cursum Nostrum consummemus, et ministerium verbi, quod accepimus a Domino Jesu, testificari Evangelium gratiae Dei.

Itaque si iniusta a Nobis petantur, praestare non possumus, si vero postuletur venia, illam ultro libenterque, uti nuper declaravimus, impertiemur. Ut autem huiusce veniae verbum eo proferamus modo, qui Pontificiae Nostrae dignitatis sanctitatem omnino decet, flectimus ante Deum genua, et triumphale nostrae redemptionis amplectentes vexillum, Christum Jesum humillime deprecamur, ut Nos eadem sua repleat caritate, ut eo prorsus modo ignoscamus quo Ipso suis peperit inimicis, antequam sanctissimum suum spiritum in aeterni Patris Sui traderet manus. Atque ab Ipso impensissime exposcimus, ut quemadmodum post veniam ab Eo tributam, inter densas tenebras, quibus universa terra fuit obducta, inimicorum suorum mentes illustravit, qui horrendi facinoris poenitentes revertebantur percutientes pectora sua, ita in hac tanta nostrae aetatis caligine velit ex inexhaustis infinitae suae misericordiae thesauris caelestis ac triumphatricis suae gratiae effundere dona, quibus omnes errantes ad unicum suum ovile redeant. Quaecumque autem futura sint investigabilia divinae suae providentiae consilia, ipsum Christum Jesum Ecclesiae suae nomine rogamus, ut Vicarii sui causam, quae Ecclesiae suae causa est, iudicet, eamque contra hostium suorum conatus defendat, ac gloriosa victoria exornet et augeat. Ipsum item exoramus, ut perturbatae societati ordinem tranquillitatemque restituat, et optatissimam pacem tribuat ad iustitiae triumphum, quem ab Eo unice exspe-

etamus. In tanta enim trepidatione Europae, totiusque terrarum orbis, et eorum, qui arduo funguntur munere moderandi populorum sortes, Deus unus est, qui Nobiscum et pro Nobis pugnare possit. *Judica nos, Deus, et discerne causam nostram de gente non sancta: da pacem, Domine, in diebus nostris, quia non est alius qui pugnet pro nobis, nisi tu, Deus noster.*

## Allocutio

habita in consistorio secreto die XXX. septembris anni MDCCCLXI <sup>1)</sup>.

### Venerabiles Fratres.

Meminit unusquisque vestrum, Venerabiles Fratres, quanto animi Nostri dolore in hoc amplissimo vestro consensu saepissime lamentati simus gravissima et nunquam satis deploranda damna, catholicae Ecclesiae, huic Apostolicae Sedi, Nobisque cum maximo ipsius civilis societatis detrimento illata a Subalpino Gubernio, atque a funestissimae rebellionis auctoribus et fautoribus in miseris praesertim Italiae regionibus, quas idem Gubernium iniuste aequae ac violenter usurpavit. Nunc vero inter alia innumera et semper graviora vulnera sanctissimae nostrae religioni ab ipso Gubernio, et nefariae conspirationis hominibus indesinenter inflicta, dolere cogimur, Dilectum Filium Nostrum clarissimum vestrum Collegam, ac vigilantissimum Neapolitanam Ecclesiae Archiepiscopum, pietate ac virtute conspicuum, quem hic praesentem intuemini, militari manu fuisse comprehensum, et a proprio grege cum ingenti bonorum omnium luctu avulsum. Omnes autem norunt, quomodo eiusdem Gubernii et rebellionis satellites, omni dolo et fallacia pleni, atque abominabiles facti in viis suis, veterum haeticorum molitiones et furores renovantes, et contra sacra omnia debacchantes, Dei Ecclesiam, si fieri unquam posset, funditus evertere, et catholicam religionem, eiusque salutarem doctrinam ex omnium animis radicibus exstirpare, et pravas quasque cupiditates excitare et inflammare conitantur<sup>2)</sup>. Hinc, omnibus divinis humanisque proculcatis iuribus, et ecclesiasticis censuris omnino spretis, Sacrorum Antistites audacius in dies a propriis Dioecesibus expulsi, atque etiam in carcerem missi, et quamplurimi fideles populi suis orbatu pastoribus, et utriusque Cleri viri miserandum in modum divexati, omnibusque iniuriis exagitati, et Religiosae Familiae extinctae, earumque Sodales e suis Coenobiis eiecti, ad rerum omnium inopiam redacti, et Virgines Deo sacrae panem emendicare coactae, et religiosissima Dei Tempia spoliata, polluta, et in latronum speluncas conversa, et sacra bona direpta, et ecclesiastica potestas, ac iurisdictio violata, usurpata, et Ecclesiae leges despectae et conculcatae<sup>3)</sup>. Hinc publicae depravatarum doctrinarum scholae constitutae, et pestiferi libelli et ephemerides e tenebris emissae, ac late per omnia loca immanibus huius scelestae coniurationis sumptibus dissipatae. Quibus perniciosissimis et abominandis scriptis sanctissima fides, religio, pietas, honestas, pudicitia, pudor, omnisque virtus oppugnantur, ac vera et inconcussa aeternae naturalisque legis, ac publici privatique iuris principia, praecepta evertuntur, et legitima cuiusque libertas, proprietates impetitur, ac domesticae cuiusque familiae et civilis societatis fundamenta labefactantur, omniumque bonorum fama falsis criminationibus, maximisque laceratur conviciis, et effraenis vivendi, et quidlibet audendi licentia, omniumque vitiorum et errorum impunitas maiorem in modum fovetur, propagatur, ac promovetur<sup>4)</sup>.

Nemo vero non videt quam luctuosa omnium calamitatum, scelerum, et exitiorum series ex hoc tanto impiac rebellionis incendio in miseram praesertim Italiam redundaverit. Etenim, ut Prophetarum verbis utamur: „*Maledictum, et mendacium, et homicidium, et furtum, et adulterium inundaverunt, et sanguis sanguinem tetigit*“<sup>5)</sup>. Horret quidem refugitque dolore animus, et commemorare reformidat, plura in Neapolitano Regno

<sup>1)</sup> Huc refertur Syllabi Propositio 20.

<sup>2)</sup> Huc ref. prop. 53.

<sup>3)</sup> „ „ „ 79.

<sup>4)</sup> Huc ref. prop. 53.

<sup>5)</sup> Oseas IV. 2.

oppida incensa et solo aequata, et innumerabiles prope, integerrimosque Sacerdotes, religiososque viros, et cuiusque aetatis, sexus et conditionis cives, ac vel ipsos aegrotantes indignissimis contumellis affectos, et, indicta etiam causa, aut in carcerem detrusos, aut crudelissime necatos. Ecquis non acerbissimo conficiatur moerore videns, a furentibus rebellionis hominibus, nullam sacris Ministris, nullam Episcopali et Cardinalitiae dignitati, nullam Nobis, et huic Apostolicae Sedi, nullam sacris templis et rebus, nullam iustitiae, nullam humanitati reverentiam haberi, sed omnia excidiis et vastationibus compleri? Haec autem ab iis patrantur, qui minime erubescunt summa impudentia asserere, se velle Ecclesiae libertatem dare, et moralem sensum Italiae restituere. Neque illos pudet a Romano Pontifice postulare, ut iniustus eorum desideriis annuere velit, ne maiora in Ecclesiam damna redundent<sup>1)</sup>.

Atque illud quoque vel maxime dolendum, Venerabiles Fratres, quod nonnulli ex utroque Clero in Italia viri, ecclesiastica etiam dignitate ornat, tam funesto aberrationis et rebellionis spiritu misere abrepti, ac propriae vocationis et officii omnino obliti, a veritatis tramite declinaverint, et pravis impiorum hominum consiliis faventes cum incredibili bonorum omnium luctu facti sint lapis offensionis et petra scandali.

Ad haec autem, quae deploramus, mala illud etiam permolestum accedit, quod haud ita pridem in Mexicana ditione eiusdem generis homines, simili contra catholicam Ecclesiam odio incensi, non extimuerunt iniquissimas leges eiusdem Ecclesiae potestati, iuribus, doctrinae plane adversas promulgare, ecclesiastica bona praedari, sacras aedes spoliare, in ecclesiasticos religiososque viros saevire, virgines Deo devotas divexare, Episcopos variis oppressos iniuriis a suis gregibus distrahere, et in exilium pellere, qui fere omnes in hanc almam Urbem Nostram venerunt, et non levi Nobis solatio fuere propter egregias virtutes, quibus tantopere praestant.

Neque id satis; nam in alia Americae parte, scilicet in Neogranatensi ditione, recentissimis hisce diebus rerum civilium perturbatores suprema auctoritate potiti infandum protulere decretum, quo ecclesiastica potestas suam auctoritatem exercere prohibetur absque civili gubernii venia et assensu<sup>2)</sup>; et inelytae Societatis Jesu Sodales, de re christiana et civili optime meritos, exturbarunt, atque insuper Nostrum Sanctaeque huius Sedis Delegatum a ditionis finibus triduo abire coegerunt.

Enimvero in hac tanta tamque tristi omnium divinarum humanarumque rerum perturbatione vel facile intelligitis, Venerabiles Fratres, quanta afflictemur amaritudine. In maximis vero curis et angustiis, quas, sine peculiari Dei auxilio, ferre nullo modo possumus, summae certe consolationi Nobis est eximia Venerabilium Fratrum tum Italiae, tum universi catholici orbis Sacrorum Antistitum religio, virtus ac fortitudo. Namque iidem Venerabiles Fratres arctissimo fidei, caritatis et observantiae vinculo Nobis et huic Petri Cathedrae mirifice obstricti, nullisque periculis deterriti, cum immortalis sui nominis et ordinis laude proprium ministerium implentes, non desinunt, tum voce, tum sapientissimis scriptis, Dei Eiusque sanctae Ecclesiae, et huius Apostolicae Sedis causam, iura, doctrinam, et iustitiae atque humanitatis rationes impavide defendere, propriique gregis incolumitati diligenter consulere, ac falsas et erroneas inimicorum hominum doctrinas refellere, et impiis illorum conatibus viriliter constanterque obistere. Nec minori quidem iucunditate verfundimur, cum videamus quot splendidis sane modis ecclesiastici tum cuiusque Italiae regionis, tum totius christiani orbis viri, et fideles populi, illustria suorum Antistitum vestigia sectantes singularem suum erga Nos et hanc Apostolicam Sedem amorem, venerationemque, et egregium in sanctissima nostra religione profitenda ac tutanda studium magis in dies ostendere ac declarare gloriantur. Cum autem iidem Venerabiles Fratres, eorumque Clerus et fideles populi summopere doleant, Nos fere omni civili Nostro, et huius Sanctae Sedis principatu spoliatos in angustiis rebus versari. ideoque nihil sibi gratius, nihil gloriosius, nihil religiosius esse existimant, quam ut piis ac spontaneis suis largitionibus gravissimas Nostras, et huius Sanctae Sedis omni studio amantissime sublevant angustias.

<sup>1)</sup> *Huc ref. prop. 80.*

<sup>2)</sup> *Huc ref. prop. 20.*



Quocirca dum in humilitate cordis Nostri maximas Deo totius consolationis agimus gratias, qui tam insigni Episcoporum et populorum fidelium pietate ac largitate acerbissimas Nostras inolestias et aerumnas lenire, solari ac sustentare dignatur, gratissimi animi Nostri sensus eisdem Episcopis populisque fidelibus iterum palam publiceque testari et confirmare lactamur, quandoquidem eorum dumtaxat ope auxilioque maximis et in dies crescentibus Nostris et huius Sanctae Sedis indigentis occurrere possumus.

Atque hic, Venerabiles Fratres, silentio praeterire non possumus assiduas impensi amoris, firmissimae fidelitatis, devotissimi obsequii, et munificae liberalitatis significationes, quibus Romanus hic populus ostendere et probare studet ac gestit, nihil sibi potius esse quam ut Nobis et huic Apostolicae Sedi, ac legitimo Nostro eiusdemque Sedis civili imperio constantissime adhaereat, omnesque nefarios perturbatorum et insidiantium hominum motus conatusque repellat, et ex animo adversetur ac detestetur. Vos ipsi, Venerabiles Fratres, locupletissimi testes estis, quibus sinceris, publicis ac locupletissimis declarationibus idem Romanus Populus Nobis carissimus huiusmodi egregios avitae suae fidei sensus, amplissimis laudibus omnino dignos, profiteri et in medium proferre non intermittat.

Jam vero cum divinum promissum habeamus, Christum Dominum usque ad consummationem saeculi cum Ecclesia sua futuram, et inferi portas contra eam numquam esse praevalituras, certi sumus, divinis suis promissis non defuturum Deum, qui faciens mirabilia ostendit aliquando, tantam tempestatem non ad Ecclesiae navem demergendam. sed ad eam altius attolendam fuisse excitatam. Interim non desistamus, Venerabiles Fratres, potentissimum Immaculae sanctissimaeque Dei Genitricis Virginis Mariae patrocinium enixe et assidue implorare, ac ferventissimis precibus dies noctesque ipsum clementissimum Deum, cuius natura bonitas, cuius voluntas potentia, cuius opus misericordia est, orare et obtestari, ut velit cito abbreviare dies tentationis, christianae civilique reipublicae tam vehementer afflictatae auxiliariam suam porrigere dexteram, utque divinae suae gratiae et misericordiae divitias super omnes propitius effundens, omnes Ecclesiae et huius Sanctae Sedis hostes convertat, et ad iustitiae semitas reducat, atque omnipotenti sua virtute efficiat, ut, omnibus depulsis erroribus, omnibusque de medio sublatis impietatibus, sanctissima sua religio, qua temporalis quoque populorum felicitas et tranquillitas vel maxime continetur, ubique terrarum magis in dies vigeat, floreat ac dominetur.

## Allocutio

habita in consistorio secreto die IX. iunii anni MDCCCLXII <sup>1)</sup>).

*Adstantibus etiam Patriarchis, Primatibus, Archiepiscopis, Episcopis, solemniter sanctorum Martyrum in Japonia et Michaelis De Sanctis canonizationis causa Romae congregatis.*

### Venerabiles Fratres.

Maxima quidem laetitia affecti fuimus, Venerabiles Fratres, cum Sanctorum honores et cultum, Deo bene iuvante, septem et viginti invictissimis divinae nostrae religionis heroibus hesterno die decernere potuerimus, Vobis lateri Nostro adstantibus, qui egregia pietate ac virtute praediti, et in sollicitudinis Nostrae partem vocati in hac tanta temporum asperitate strenue dimicantes pro Domo Israel summo Nobis solatio et consolationi estis. Utinam vero dum huiusmodi perfundimur gaudio, nulla moeroris luctusque causa Nos aliunde contristaret. Non possumus enim non vehementer dolere et angere, cum videamus tristissima, et nunquam satis deploranda mala ac damna, quibus cum permagno animarum detrimento catholica nunc Ecclesia, et ipsa civilis societas miserandum in modum premitur ac divexatur.

<sup>1)</sup> *Huc referuntur Syllabi Propositiones 1, 2, 3, 4, 5, 6, 7, 15, 19, 27, 39, 44, 49, 56, 57, 58, 59, 60, 76.*

Optime enim noscitis, Venerabiles Fratres, teterrimum sane bellum contra rem catholicam universam ab iis hominibus conflatum, qui inimici Crucis Christi sanam non sustinentes doctrinam, ac nefaria inter se societate coniuncti quaecumque ignorant, blasphemant, ac pravis cuiusque generis artibus sanctissimae nostrae religionis, et humanae societatis fundamenta labefactare, immo, si fieri unquam posset, penitus evertere, omniumque animos mentesque perniciosissimis quibusque erroribus imbuere, corrumpere, et a catholica religione avellere moluntur. Nimirum callidissimi isti fraudum artifices, et fabricatores mendacii non cessant monstrosa quaeque veterum errorum portenta iam sapientissimis scriptis toties profligata ac depulsa, gravissimoque Ecclesiae iudicio damnata, e tenebris excitare, eaque novis, variis ac fallacissimis formis verbisque expressa exaggerare, et modis omnibus usquequaque disseminare. Hac funestissima ac diabolica prorsus arte rerum omnium scientiam contaminant, deturpant, mortiferum ad animarum perniciem virus diffundunt, effraenatam vivendi licentiam, et pravas quasque cupiditates foveant, religiosum ac socialem ordinem invertunt, et omnem iustitiae, veritatis, iuris, honestatis ac religionis ideam extinguere conantur, et sanctissima Christi dogmata, doctrinam irrident, contemnunt, oppugnant. Horret quidem, refugitque animus, ac reformidat, vel leviter attingere praecipuos tantum pestiferosque errores, quibus huiusmodi homines miserrimis hisce temporibus divina et humana cuncta permiscunt.

Nemo Vestrum ignorat, Venerabiles Fratres, ab huiusmodi hominibus plane destrui necessariam illam cohaerentiam, quae Dei voluntate intercedit inter utrumque ordinem, qui tum in natura, tum supra naturam est; itemque ab ipsis omnino immutari, subverti, deleri propriam, veram, germanamque divinae revelationis indolem, auctoritatem, Ecclesiaeque constitutionem et potestatem. Atque eo opinandi temeritate progrediuntur, ut omnem veritatem, omnemque legem, potestatem et ius divinae originis audacissime denegare non metuant. Siquidem haud erubescunt asserere, philosophicarum rerum, morumque scientiam, itemque civiles leges posse ac debere a divina revelatione, et Ecclesiae auctoritate declinare<sup>1)</sup>; et Ecclesiam non esse veram perfectamque societatem plane liberam, nec pollere suis propriis et constantibus iuribus sibi a divino suo Fundatore collatis, sed civilis potestatis esse definire, quae sint Ecclesiae iura et limites, intra quos eadem iura exercere queat<sup>2)</sup>. Hinc perverse comminiscuntur, civilem potestatem posse se immiscere rebus, quae ad religionem, mores, et regimen spirituale pertinent<sup>3)</sup>, atque etiam impedire, quominus Sacrorum Antistites et fideles populi cum Romano Pontifice, supremo totius Ecclesiae Pastore divinitus constituto, libere ac mutuo communicent<sup>4)</sup>, ut plane dissolvatur necessaria et arctissima illa coniunctio, quae inter membra mystici corporis Christi, et adspectabile suum Caput ex divina ipsius Christi Domini institutione esse omnino debet. Nihil vero timent omni fallacia ac dolo in vulgus proferre, sacros Ecclesiae ministros, Romanumque Pontificem ab omni rerum temporalium iure ac dominio esse omnino excludendos<sup>5)</sup>.

Summa praeterea impudentia asserere non dubitant, divinam revelationem non solum nihil prodesse, verum etiam nocere hominis perfectioni<sup>6)</sup>; ipsamque divinam revelationem esse imperfectam, et ideoque subiectam continuo et indefinito progressui, qui humanae rationis progressioni respondeat<sup>7)</sup>. Nec verentur proinde lactare, prophetias et miracula in sacris Litteris exposita et narrata esse poctarum commenta, et sacrosancta divinae fidei nostrae mysteria philosophicarum investigationum summam, ac divinis utriusque Testamenti libris mythica contineri inventa, et ipsum Dominum nostrum Jesum Christum, horribile dictu! mythicam esse fictionem<sup>8)</sup>. Quare hi turbulentissimi perversorum dogmatum cultores blaterant, morum leges divina haud egere sanctione, et minime opus esse, ut humanae leges ad naturae ius conformentur, aut obligandi vim a Deo accipiant<sup>9)</sup>, ac propterea

<sup>1)</sup> *Huc ref. prop. 57.*

<sup>2)</sup> " " " 44.

<sup>3)</sup> " " " 27.

<sup>4)</sup> " " " 5.

<sup>5)</sup> " " " 56.

<sup>2)</sup> *Huc ref. prop. 19.*

<sup>4)</sup> " " " 49.

<sup>6)</sup> " " " 6.

<sup>8)</sup> " " " 7.

asserunt, nullam divinam existere legem <sup>1)</sup>). Insuper inficiari audent omnem Dei in homines mundumque actionem <sup>2)</sup>), ac temere affirmant, humanam rationem, nullo prorsus Dei respectu habito, unicum esse veri et falsi, boni et mali arbitrum, eandem humanam rationem sibi ipsi esse legem, ac naturalibus suis viribus ad hominum ac populorum bonum curandum sufficere <sup>3)</sup>). Cum autem omnes religionis veritates ex nativa humanae rationis vi perverse derivare audeant <sup>4)</sup>), tum cuique homini quoddam veluti primum ius tribuunt, ex quo possit libere de religione cogitare et loqui, eumque Deo honorem et cultum exhibere, quem pro suo libito meliorem existimat <sup>5)</sup>).

At vero eo impietatis et impudentiae deveniunt, ut caelum petere, ac Deum ipsum de medio tollere conentur. Insigni enim improbitate ac parva stultitia haud timent asserere, nullum supremum sapientissimumque Numen divinum existere ab hac rerum universitate distinctum, ac Deum idem esse ac rerum naturam, et ideoque immutationibus obnoxium, Deumque reapse fieri in homine et mundo, atque omnia Deum esse, et ipsissimum Dei habere substantiam, ac unam eandemque rem esse Deum cum mundo, ac proinde spiritum cum materia, necessitatem cum libertate, verum cum falso, bonum cum malo, et iustum cum iniusto <sup>6)</sup>). Quo certe nihil dementius, nihil magis impium, nihil contra ipsam rationem magis repugnans fingi et excogitari unquam potest. De auctoritate autem et iure ita temere effutunt, ut impudenter dicant, auctoritatem nihil aliud esse, nisi numeri, et materialium virium summam <sup>7)</sup>), ac ius in materiali facto consistere, et omnia humana facta iuris vim habere <sup>8)</sup>).

Jam porro commenta commentis, deliramenta deliramentis cumulantes, et omnem legitimam auctoritatem, atque omnia legitima iura, obligationes, officia conculcantes, nihil dubitant in veri legitimumque iuris locum substituere falsa ac mentita virium iura, ac morum ordinem rerum materialium ordini subicere. Neque alias vires agnoscunt, nisi illas, quae in materia positae sunt, et omnem morum disciplinam honestatemque collocant in cumulandis et augendis quovis modo divitiis, et in pravis quibusque voluptatibus explendis <sup>9)</sup>). Atque hisce nefariis abominandisque principiis reprobum carnis spiritui rebellis sensum tuentur, foveant, extollunt, illique naturales dotes ac iura tribuunt, quae per catholicam doctrinam conculcari dicunt <sup>10)</sup>), omnino despicientes monitum Apostoli clamantis: «Si secundum carnem vixeritis, moriemini, si autem spiritu facta carnis mortificaveritis, vivetis <sup>11)</sup>».» Omnia praeterea legitimae cuiusque proprietatis iura invadere, destruere contendunt, ac perperam animo et cogitatione confingunt et imaginantur ius quoddam *nullis circumscriptum limitibus*, quo reipublicae statum pollere existimant, quem omnium iurium originem et fontem esse temere arbitrantur <sup>12)</sup>).

Dum vero hos praecipuos infelicissimae nostrae aetatis errores dolenter ac raptim perstringimus, recensere omittimus. Venerabiles Fratres, tot alias fere innumerabiles falsitates et fraudes Vobis apprimae notas ac perspectas, quibus Dei hominumque hostes rem tum sacram tum publicam perturbare et convellere connituntur. Ac silentio praetermittimus multiplices gravissimasque iniurias, calumnias, convicia, quibus sacros Ecclesiae ministros, et hanc Apocriticam Sedem dilacerare et insectari non desinunt. Nihil loquimur de iniqua sane hypocrisi, qua funestissimae in Italia praesertim perturbationis ac rebellionis duces et satellites dictitant, se velle, Ecclesiam suam gaudere libertate, dum sacrilego prorsus ausu omnia ipsius Ecclesiae iura et leges quotidie magis proculcant, eiusque bona diripiunt, et Sacrorum Antistites, ecclesiasticosque viros, suo munere praeclare fungentes, quoquo modo divexant, et in carcerem detrudunt, et Religiosorum Ordinum alumnos, ac virgines Deo sacras e suis coenobiis violenter exturbant, suisque propriis bonis spoliunt, nihilque intentatum relinquunt, ut ipsam Ecclesiam in tur-

<sup>1)</sup> *Huc ref. §. VII. Syllabi.*

<sup>2)</sup> *Huc ref. prop. 3.*

<sup>3)</sup> „ „ „ 15.

<sup>4)</sup> „ „ „ 60.

<sup>5)</sup> „ „ „ 58.

<sup>11)</sup> *Ad Rom. VIII. 13.*

<sup>2)</sup> *Huc ref. prop. 2.*

<sup>4)</sup> „ „ „ 4.

<sup>6)</sup> „ „ „ 1.

<sup>8)</sup> „ „ „ 59.

<sup>10)</sup> „ „ „ 6, 40.

<sup>12)</sup> „ „ „ 39.

pissimam redigant servitutem, et opprimant<sup>1)</sup>. Ac dum singularem certe ex optatissima Vestra praesentia voluptatem percipimus, Vos ipsi videtis, quam libertatem nunc habeant Venerabiles Fratres Sacrorum in Italia Antistites, qui strenue constanterque praeliantes praelia Domini minime potuerunt cum summo animi Nostri dolore, adversantium opera, ad Nos venire, et inter Vos versari, atque huic adesse conventui, quod summopere optavissent, quemadmodum infelicis Italiae Archiepiscopi et Episcopi suis Litteris summi erga Nos et hanc Sanctam Sedem amoris et obsequii plenissimis significarunt. Neminem etiam ex Sacrorum in Lusitania Antistitibus hic adesse cernitis, ac non parum dolemus, inspecta difficultatum natura, quae obstiterunt, quominus ipsi romanum iter aggredi possent.

Recensere autem omittimus tot alia sane tristia et horrenda, quae ab hisce perversarum doctrinarum cultoribus cum incredibili Nostro ac Vestro, et omnium bonorum luctu patrantur. Nihil item dicimus de impia conspiratione, et pravis cuiusque generis molitionibus ac fallaciis, quibus civilem huius Apostolicae Sedis principatum omnino evertere ac destruere volunt. Juvat potius hac de re commemorare miram prorsus consensionem, qua Vos ipsi una cum aliis Venerabilibus Fratribus universi catholici orbis Sacrorum Antistites numquam intermisistis et epistolis ad Nos datis, et pastoralibus litteris ad fideles scriptis huiusmodi fallacias detegere, refutare, ac simul docere, hunc civilem Sanctae Sedis principatum Romano Pontifici fuisse singulari divinae providentiae consilio datum, illumque necessarium esse, ut idem Romanus Pontifex nulli unquam Principi aut civili potestati subiectus supremam universi Dominici gregis pascendi regendique potestatem auctoritatemque ab ipso Christo Domino divinitus acceptam per universam Ecclesiam plenissima libertate exercere, ac maiori eiusdem Ecclesiae et fidelium bono, utilitati et indigentis consulere possit<sup>2)</sup>.

Quae hactenus lamentati sumus, Venerabiles Fratres, luctuosum plane exhibent spectaculum. Quis enim non videt tot pravorum dogmatum iniquitate, ac tot nequissimis deliramentis et machinationibus magis in dies christianum populum misere corrumpi, et ad exitium impelli, et catholicam Ecclesiam, eiusque salutarem doctrinam ac veneranda iura et leges, sacrosque ministros oppugnari, et iccirco omnia vitia et scelera invalescere ac propagari, et ipsam civilem societatem exagitari?

Nos itaque Apostolici Nostri ministerii probe memores, ac de spirituali omnium populorum bono et salute Nobis divinitus commissa vel maxime solliciti, cum «aliter» ut sanctissimi Decessoris Nostri Leonis verbis utamur, «Nobis commissos regere non possimus, nisi hos, qui sunt perditores et sunt perdit, zelo fidei Dominicae persequamur, et a sanis mentibus, ne pestis haec latius divulgetur, severitate, qua possumus, abscindamus<sup>3)</sup>,» in hoc amplissimo vestro consensu Apostolicam Nostram attollentes vocem omnes commemoratos praesertim errores non solum catholicae fidei ac doctrinae, divinis ecclesiasticisque legibus, verum etiam ipsi sempiternae ac naturali legi et iustitiae, rectaeque rationi omnino repugnantes et summopere adversos reprobamus, proscribimus atque damnamus.

Vos autem, Venerabiles Fratres, qui estis sal terrae, et Dominici gregis Custodes ac Pastores, etiam atque etiam excitamus et obtestamur, ut pro eximia Vestra religione et episcopali zelo pergatis, veluti adhuc cum summa Vestri Ordinis laude fecistis, omni cura, sedulitate et studio fideles Vobis traditis ab hisce venenatis pascuis arcere, et qua voce, qua opportunis scriptis tot perversarum opinionum monstra refellere et profligare. Optime enim scitis de summa re agi, cum agatur de sanctissimae fidei nostrae, ac de catholicae Ecclesiae, eiusque doctrinae causa, de populorum salute, et humanae societatis bono ac tranquillitate. Itaque, quantum in Vobis est, ne desinatis unquam a fidelibus avertere tam dirae pestis contagia, id est ab eorum oculis manibusque perniciosos libros et epheMERIDES eripere, ipsosque fideles sanctissimis augustae nostrae religionis praeceptionibus assidue imbui et erudire, ac monere et exhortari, ut ab hisce iniquitatis magistris, tamquam a facie colubri, effugiant. Pergite Vestras omnes curas cogitatio-

<sup>1)</sup> *Huc ref. prop.* 80.

<sup>2)</sup> *Huc ref. nota ad §. IX. Syllabi.*

<sup>3)</sup> S. Leo Epist. VII. ad Episc. per Ital. c. 2. Edit. Baller.

nesque in id potissimum conferre, ut Clerus sancte scienterque instituatur, omnibusque virtutibus fulgeat, ut utriusque sexus iuventus ad morum honestatem, pietatem, omnemque virtutem sedulo formetur, ut salutaris sit studiorum ratio. Ac diligentissime advigilate et prospicite, ne in humaniores litteras, severioresque disciplinas tradendas aliquid unquam irrepat quod fidei, religioni, bonisque moribus adversetur. Viriliter agite, Venerabiles Fratres, et ne animo unquam concidatis in hac tanta temporum perturbatione et iniquitate, sed divino auxilio omnino freti, ac *sauentes in omnibus scutum inexpugnabile aequitatis et fidei, atque assumentes y adium spiritus, quod est verbum Dei*, ne intermittatis omni in catholicae Ecclesiae, et huius Apostolicae Sedis hostium conatibus obsistere. eorumque tela retundere et impetus frangere.

Interim vero dies noctesque, sublatis ad caelum oculis, non desistamus, Venerabiles Fratres, clementissimum misericordiarum Patrem, et Deum totius consolationis, qui de tenebris facit lucem splendescere, quique potens est de lapidibus suscitare filios Abrahæ, in humilitate cordis nostri ferventissimis precibus indesinenter orare et obsecrare, ut per merita Unigeniti Filii Sui Domini nostri Jesu Christi velit christianæ et civili reipublicæ auxiliariam porrigere dexteram, omnesque disperdere errores et impietates, ac divinae suae gratiae lumine omnium errantium mentes illustrare, illosque ad se convertere et revocare, quo Ecclesia sua sancta optatissimam assequatur pacem, et ubique terrarum maiora in dies incrementa suscipiat, ac prospere vigeat et efflorescat. Ut autem quæ petimus et quaerimus facilius consequi possimus, ne cessemus adhibere primum deprecatricem apud Deum Immaculatam Sanctissimamque Deiparam Virginem Mariam, quæ misericordissima, et omnium nostrum amantissima mater cunctas semper interemit haereses, et cuius nullum apud Deum praesentius patrocinium. Petamus quoque suffragium sancti eiusdem Virginis Sponsi Iosephi, tum sanctorum Apostolorum Petri et Pauli, omniumque Caelitum, et illorum praesertim, quos nuper Sanctorum fastis adscriptos colimus et veneramus.

Antequam vero dicendi finem faciamus, Nobis temperare non possumus, quin iterum testemur et confirmemus, summa Nos uti consolatione, dum iucundissimo Vestrum omnium conspectu fruimur, Venerabiles Fratres, qui tanta fide, pietate et observantia Nobis et huic Petri Cathedrae firmiter obstricti, ac ministerium Vestrum implentes maiorem Dei gloriam, et animarum salutem omni studio procurare gloriamini, quique concordissimis animis, atque admirabili sane cura et amore una cum aliis Venerabilibus Fratribus totius catholici orbis Episcopis et fidelibus Vestrae et illorum curae commissis gravissimas Nostras angustias et acerbitates modis omnibus lenire et sublevare non desinitis. Quocirca hac etiam occasione amantissimi aequæ ac gratissimi animi Nostri sensus erga Vos, et alios omnes Venerabiles Fratres, et ipsos fideles amplissimis verbis palam publiceque profitemur. A Vobis autem exposcimus, ut cum ad Vestras redieritis Dioeceses, velitis eisdem fidelibus Vestrae vigilantiae conceditis hos animi Nostri sensus Nostro nomine nuntiare, illosque certiores facere de paterna Nostra in illos caritate, deque Apostolica Benedictione, quam ex intimo corde profectam, et cum omni verae felicitatis voto coniunctam Vobis ipsis, Venerabiles Fratres, et eisdem fidelibus impertire vehementer laetamur.

## Litterae

Venerabili Fratri Gregorio Archiepiscopo Monacensi et Frisingensi die  
XI. decembris anni MDCCCLXII<sup>1)</sup>.

Pius PP. IX.

Venerabilis Frater, Salutem et Apostolicam Benedictionem.

Gravissimas inter acerbitates, quibus undique premimur in hac tanta temporum perturbatione et iniquitate, vehementer dolemus, cum noscamus,

<sup>1)</sup> Huc referuntur Syllabi Propositiones 9, 10, 11

in variis Germaniae regionibus reperiri nonnullos catholicos etiam viros, qui Sacram Theologiam ac Philosophiam tradentes minime dubitant, quamdam inauditam adhuc in Ecclesia docendi scribendique libertatem inducere, novasque et omnino improbandas opiniones palam publiceque profiteri et in vulgus disseminare. Hinc non levi moerore affecti fuimus, Venerabilis Frater, ubi tristissimus ad Nos venit nuntius, Presbyterum Jacobum Frohschammer in ista Monacensi Academia Philosophiae Doctorem huiusmodi docendi scribendique licentiam prae ceteris adhibere, eumque suis operibus in lucem editis perniciosissimos tueri errores. Nulla igitur interposita mora, Nostrae Congregationi libris notandis praepositae mandavimus, ut praecipua volumina, quae eiusdem Presbyteri Frohschammer nomine circumferuntur, cum maxima diligentia sedulo perpenderet, et omnia ad Nos referret. Quae volumina germanice scripta titulum habent: «Introductio in philosophiam:» «De libertate scientiae,» «Athenaeum;» quorum primum anno 1858, alterum anno 1861, tertium vero vertente hoc anno 1862 istis Monacensibus typis in lucem est editum.

Itaque eadem Congregatio Nostris mandatis diligenter obsequens summo studio accuratissimum examen instituit, omnibusque semel iterumque serio ac mature ex more discussis et perpensis iudicavit, Auctorem in pluribus non recte sentire, eiusque doctrinam a veritate catholica aberrare.

Atque id ex duplici praesertim parte: et primo quidem propterea quod Auctor tales humanae rationi tribuat vires, quae rationi ipsi minime competunt; secundo vero, quod eam omnia opinandi, et quidquid semper audendi libertatem eidem rationi concedat, ut ipsius Ecclesiae iura, officium, et auctoritas de medio omnino tollantur.

Namque Auctor in primis edocet, philosophiam, si recta eius habeatur notio, posse non solum percipere et intelligere ea christiana dogmata, quae naturalis ratio cum fide habet communia (tamquam commune scilicet perceptionis obiectum), verum etiam ea quae christianam religionem, fidemque maxime et proprie efficiunt, ipsumque scilicet supernaturalem hominis finem, et ea omnia, quae ad ipsum spectant, atque sacratissimum Dominicae Incarnationis mysterium ad humanae rationis et philosophiae provinciam pertinere, rationemque, dato hoc obiecto, suis propriis principiis scienter ad ea posse pervenire<sup>1)</sup>. Etsi vero aliquam inter haec et illa dogmata distinctionem Auctor inducat. et haec ultima minori iure rationi adtribuat, tamen clare aperteque docet, etiam haec contineri inter illa, quae veram propriamque scientiae seu philosophiae materiam constituunt. Quocirca ex eiusdem Auctoris sententia concludi omnino possit ac debeat, rationem in additissimis etiam Divinae Sapientiae ac Bonitatis, immo etiam et liberae eius voluntatis mysteriis, licet posito revelationis obiecto, posse ex seipsa, non iam ex divinae auctoritatis principio, sed ex naturalibus suis principiis et viribus ad scientiam seu certitudinem pervenire.

Quae Auctoris doctrina quam falsa sit et erronea, nemo est qui christianae doctrinae rudimentis vel leviter imbutus, non illico videat, planeque sentiat. Namque si isti philosophiae cultores vera ac sola rationis et philosophicae disciplinae tuerentur principia et iura, debitis certe laudibus essent prosequendi. Siquidem vera ac sana philosophia nobilissimum suum locum habet, cum eiusdem philosophiae sit, veritatem diligenter inquirere, humanamque rationem, licet primi hominis culpa obtenebratam, nullo tamen modo extinctam, recte ac sedulo excolere, illustrare, eiusque cognitionis obiectum, ac permultas veritates percipere, bene intelligere, promovere, earumque plurimas, uti Dei existentiam, naturam, attributa, quae etiam fides credenda proponit, per argumenta ex suis principiis petita demonstrare, vindicare, defendere, atque hoc modo viam munire ad haec dogmata fide rectius tenenda, et ad illa etiam reconditiora dogmata, quae sola fide percipi primum possunt, ut illa aliquo modo a ratione intelligantur. Haec quidem agere, atque in his versari debet severa et pulcherrima verae philosophiae scientia<sup>2)</sup>. Ad quae praestanda si viri docti in Germaniae Accademiis enitantur pro singulari inclytae illius Nationis ad severiores graviusque disciplinas excolendas propensione, eorum studium a Nobis comprobatur et

<sup>1)</sup> *Huc ref. prop. 9.*

<sup>2)</sup> *Supra, pag. 20.*

commendatur, cum in sacrarum rerum utilitatem profectumque convertant, quae illi ad suos usus invenerint.

At vero in hoc gravissimo sane negotio tolerare nunquam possumus, ut omnia temere permisceantur, atque ratio illas etiam res, quae ad fidem pertinent, occupet atque perturbet, cum certissimi, omnibusque notissimi sint fines, ultra quos ratio nunquam suo iure est progressa, vel progredi potest. Atque ad huiusmodi dogmata ea omnia maxime et apertissime spectant, quae supernaturalem hominis elevationem, ac supernaturale eius cum Deo commercium respiciunt, atque ad hunc finem revelata noscuntur. Et sane cum haec dogmata sint supra naturam, iccirco naturali ratione, ac naturalibus principiis attingi non possunt. Nunquam siquidem ratio suis naturalibus principiis ad huiusmodi dogmata scienter tractanda effici potest idonea.

Quod si haec isti temere asseverare audeant, sciant, se certe non a quorumlibet Doctorum opinione, sed a communi et nunquam immutata Ecclesiae doctrina recedere. Ex divinis enim Litteris, et sanctorum Patrum traditione constat, Dei quidem existentiam, multasque alias veritates, ab iis etiam, qui fidei nondum susceperunt, naturali rationis lumine cognosci, sed illa reconditiora dogmata Deum solum manifestasse, dum notum facere voluit *mysterium, quod absconditum fuit a saeculis et generationibus* <sup>1)</sup>, *et ita quidem, ut postquam multifariam multisque modis olim locutus esset patribus in prophetis, novissime nobis locutus est in Filio, per quem fecit et saecula* <sup>2)</sup>. . . . . *Deum enim nemo vidit unquam. Unigenitus Filius, qui est in sinu Patris, ipse enarravit* <sup>3)</sup>. Quapropter Apostolus, qui gentes Deum per ea, quae facta sunt, cognovisse testatur, disserens *de gratia et veritate, quae per Jesum Christum facta est* <sup>4)</sup>, loquimur, inquit, *Dei sapientiam in mysterio, quae abscondita est . . . . . quam nemo principum huius saeculi cognovit. . . . . Nobis autem revelavit Deus per Spiritum Suum. . . . . Spiritus enim omnia scrutatur, etiam profunda Dei. Quis enim hominum scit quae sunt hominis, nisi spiritus hominis, qui in ipso est? Ita et quae Dei sunt, nemo cognovit, nisi Spiritus Dei* <sup>5)</sup>.

Hisc aliisque fere innumeris divinis eloquiis inhaerentes Ss. Patres in Ecclesiae doctrina tradenda continenter distinguere curarunt rerum divinarum notionem, quae naturalis intelligentiae vi omnibus est communis, ab illarum rerum notitia, quae per Spiritum Sanctum fide suscipitur; et constanter docuerunt, per hanc ea nobis in Christo revelari mysteria, quae non solum humanam philosophiam, verum etiam Angelicam naturalem intelligentiam transcendunt, quaeque etiamsi divina revelatione innotuerint, et ipsa fide fuerint suscepta, tamen sacro adhuc ipsius fidei velo tecta et obscura caligine obvoluta permanent, quamdiu in hac mortali vita peregrinamur a Domino <sup>6)</sup>.

Ex his omnibus patet, alienam omnino esse a catholicae Ecclesiae doctrina sententiam, qua idem Frohschammer asserere non dubitat, omnia indiscriminatim christianae Religionis dogmata esse obiectum naturalis scientiae, seu philosophiae, et humanam rationem historice tantum excultam, modo haec dogmata ipsi rationi tamquam obiectum proposita fuerint, posse ex suis naturalibus viribus et principio ad veram de omnibus etiam reconditiore dogmatibus scientiam pervenire <sup>7)</sup>.

Nunc vero in memoratis eiusdem Auctoris scriptis alia dominatur sententia, quae catholicae Ecclesiae doctrinae, ac sensui plane adversatur. Etenim eam philosophiae tribuit libertatem, quae non scientiae libertas, sed omnino reprobanda et intoleranda philosophiae licentia sit appellanda. Quadam enim distinctione inter philosophum et philosophiam facta, tribuit philosopho ius et officium se submitteendi auctoritati, quam veram ipse pro-

<sup>1)</sup> Col. I. 26.

<sup>2)</sup> Hebr. II. 12.

<sup>3)</sup> Joan. I. 18.

<sup>4)</sup> Joan. I. 17.

<sup>5)</sup> I. Cor. II. 7, 8, 10, 11.

<sup>6)</sup> S. Joann. Chrys. Homil. 7. (9) in I. Cor.; s. Ambros. de Fide ad Grat. I. 10.; s. Leo de Nativ. Domini, Sermon. 9.; s. Cyrill. Alexandr. contra Nest. lib. 3. initio, in Joann. I. 9.; s. Joann. Damasc. de Fide, orat. II. 1. 2. in I. Cor. c. 2.; s. Hieron. in Gal. III. 2.

<sup>7)</sup> *Huc ref. prop. 9.*

baverit, sed utrumque philosophiae ita denegat, ut nulla doctrinae revelatae ratione habita, asserat, ipsam numquam debere, ac posse auctoritati se submittere <sup>1)</sup>. Quod esset tolerandum et forte admittendum, si haec dicerentur de iure tantum, quod habet philosophia suis principiis, seu methodo, ac suis conclusionibus uti, sicut et aliae scientiae, ac si eius libertas consisteret in hoc suo iure utendo, ita ut nihil in se admitteret, quod non fuerit ab ipsa suis conditionibus acquisitum, aut fuerit ipsi alienum. Sed haec iusta philosophiae libertas suos limites noscere et experiri debet. Nunquam enim non solum philosopho, verum etiam philosophiae licebit, aut aliquid contrarium dicere iis quae divina revelatio, et Ecclesia docet, aut aliquid ex eisdem in dubium vocare, proptereaquod non intelligit, aut iudicium non suscipere, quod Ecclesiae auctoritas de aliqua philosophiae conclusione, quae hucusque libera erat, proferre constituit.

Accedit etiam, ut idem Auctor philosophiae libertatem, seu potius effraenatam licentiam tam acriter, tam temere propugnet, ut minime vereatur asserere, Ecclesiam non solum non debere in philosophiam unquam animadvertere, verum etiam debere ipsius philosophiae tolerare errores, eique relinquere ut ipsa se corrigat <sup>2)</sup>, ex quo evenit, ut philosophi hanc philosophiae libertatem necessario participant, atque ita etiam ipsi ab omni lege solvantur. Equis non videt quam vehementer sit reiicienda, reprobanda, et omnino damnanda huiusmodi Frohschammer sententia atque doctrina? Etenim Ecclesia ex divina sua institutione et divinae fidei depositum integrum inviolatumque diligentissime custodire, et animarum saluti summo studio debet continenter advigilare, ac summa cura ea omnia amovere et eliminare, quae vel fidei adversari, vel animarum salutem quovis modo in discri-men adducere possunt. Quocirca Ecclesia ex potestate sibi a divino Auctore commissa non solum ius, sed officium praesertim habet non tolerandi, sed proscribendi ac damnandi omnes errores, si ita fidei integritas, et animarum salus postula-verint; et omni philosopho, qui Ecclesiae filius esse velit, ac etiam philosophiae officium incumbit, nihil unquam dicere contra ea, quae Ecclesia docet, et ea retractare, de quibus eos Ecclesia monuerit. Sententiam autem, quae contrarium edocet, omnino erroneam et ipsi fidei Ecclesiae, eiusque auctoritati vel maxime iniuriosam esse edicimus et declaramus.

Quibus omnibus accurate perpensis, de eorumdem VV. FF. NN. S. R. E. Cardinalium Congregationis libris notandis praepositae consilio, ac motu proprio et certa scientia, matura deliberatione Nostra, deque Apostolicae Nostrae potestatis plenitudine praedictos libros Presbyteri Frohschammer tamquam continentes propositiones, et doctrinas respective falsas, erroneas, Ecclesiae, eiusque auctoritati ac iuribus iniuriosas reprobamus, damnamus, ac pro reprobatis et damnatis ab omnibus haberi volumus, atque eidem Congregationi mandamus, ut eosdem libros in Indicem prohibitorum librorum referat.

Dum vero haec Tibi significamus. Venerabilis Frater, non possumus non exprimere magnum animi Nostri dolorem, cum videamus hunc filium, eorumdem librorum auctorem, qui ceteroquin de Ecclesia benemereri potuisset, infelici quodam cordis impetu misere abreptum in vias abire, quae ad salutem non ducunt, ac magis magisque a recto tramite aberrare. Cum enim alius eius liber de animarum origine prius fuisset damnatus, non solum se minime submisit, verum etiam non extimuit, eundem errorem in his etiam libris denuo docere, et Nostram Indicis Congregationem contumeliis cumulare, ac multa alia contra Ecclesiae agendi rationem temere mendaciterque prouinciare <sup>3)</sup>. Quae omnia talia sunt, ut iis merito, atque optimo iure indignari potuissemus. Sed nolimus adhuc paternae Nostrae caritatis viscera erga illum deponere, et ideo Te, Venerabilis Frater, excitamus, ut velis eidem manifestare cor Nostrum paternum, et acerbissimum dolorem, cuius ipse est causa, ac simul ipsum saluberrimis monitis hortari et monere, ut Nostram, quae communis est omnium Patris, vocem audiat, ac respiciat, quemadmodum catholicae Ecclesiae filium decet, et ita nos omnes laetitia afficiat, ac tandem ipse feliciter experiatur quam iucundum sit, non vana

<sup>1)</sup> *Huc ref. prop. 10, coll. 57.*

<sup>2)</sup> *Huc ref. prop. 11.*

<sup>3)</sup> " " " 12.



quadam et pernicioſa libertate gaudere, ſed Domino adhaerere, cuius iugum ſuave eſt, et onus leve, cuius eloquia caſta, igne examinata, cuius iudicia vera iuſtificata in ſemetipſa, et cuius univerſae viae miſericordia et veritas.

Denique hac etiam occasione libentiſſime utimur, ut iterum teſtemur et confirmemus praecipuam Noſtram in Te benevolentiam. Cuius quoque pignus eſſe volumus Apoſtolicam Benedictionem, quam intimo cordis affectu Tibi ipſi, Venerabilis Frater et gregi tuae curae commiſſo peramanter impertimus.

Datum Romae apud S. Petrum, die XI. Decembris anno MDCCCLXII. Pontificatus Noſtri Anno Decimoſeptimo.

## Epistoła Encyclica

d Cardinales, Archiepiscopos, et Episcopos Italiae <sup>1)</sup>)

### Pius PP. IX.

Dilecti Filii Noſtri ac Venerabiles Fratres, Salutem et Apoſtolicam Benedictionem.

Quanto conficiamur moerore ob ſaeviſſimum ſacrilegumque bellum in omnibus fere terrarum orbis regionibus catholicae Eccleſiae hiſce aſperrimis temporibus allatum, ac praesertim in infelici Italia ante Noſtros oculos a Subalpino Gubernio plures abhinc annos indictum, et magis in dies excitatum, quiſque Veſtrum vel facile cogitatione aſſequi poſſet, Dilecti Filii Noſtri ac Venerabiles Fratres. Verum inter graviſſimas Noſtras anguſtias, dum Vos intuemur, maximo afficimur ſolatio et conſolatione. Siquidem Vos, quamvis omnibus iniuſtiſſimis violentiſque modis miſerandum in modum vexati, et a proprio grege avulſi, in exilium eiecti, atque etiam in carcerem detrui, tamen virtute ex alto induiti nunquam intermiſiſtiſti qua voce, qua ſalutaribus ſcriptis, Dei euſque Eccleſiae, et Apoſtolicae huius Sedis cauſam, iura, doctrinam ſtrenue tueri, veſtrique gregis incolumitati conſulere. Itaque Vobis ex animo gratulamur, quod vehementer laetamini pro nomine Jeſu contumeliam pati, ac meritis Vos laudibus efferimus utentes Sanctiſſimi Noſtri Deceſſoris Leonis verbis: «Licet laboribus dilectionis veſtrae, quos «pro obſervantia catholicae fidei ſuſcepisti, toto corde compatiar, et ea «quae Vobis . . . illata ſunt, non aliter accipiam, quam ſi ipſe pertulerim, «intelligo tamen magis eſſe gaudii, quam moeroris, quod, confortante Vos «Domino Jeſu Chriſto, in evangelica apoſtolicaque doctrina inſuperabiles «perſtiſtiſti. . . Et cum Vos inimici fidei chriſtianae ab Eccleſiarum veſtra- «rum ſede divellerent, maluiſtiſti peregrinationis iniuriam pati quam ulla «impietatiſti ipſorum contagione violari.»

Atque utinam Vobis tantarum Eccleſiae calamitatum finem nuntiare poſſemus! Sed nunquam ſatis lugenda morum corruptela undique ingreſſa, et irreligioſis, nefandis, obſcoeniſque ſcriptis, ac ſcenicis ſpectaculis, et meretriciis domibus fere ubique conſtitutiſti, ac aliis pravis artibus promota, et monſtroſa omnium errorum portenta quaquaverſus diſſeminata, et abominanda vitiorum omniumque ſclerum increſcens colluvies, et mortiferum *incredulitatiſti* ac *indifferentiſmi* virus longe lateque diſfuſum, et eccleſiaſticae poſteſtatiſti, ac ſacrarum rerum, legumque contemptio, deſpicientia, et iniuſta ac violenta bonorum Eccleſiae depopulatio, et acerrima ac continua contra ſacros Miniſtros, ac Religioſarum Familiarum alumnos, virgineſque Deo devotas inſectatio, ac diabolicum prorsus adverſus Chriſtum, euſque Eccleſiam, doctrinam, et hanc Apoſtolicam Sedem odium, et innumera fere alia, quae ab infenſiſſimis rei catholicae hoſtibus patrantur, et quotidie lamentari cogimur, videntur optatiſſimum illud protrahere ac differre tempus, quo plenum ſanctiſſimae noſtrae religioniſti, iuſtitiae, ac veritatiſti triumphum videre poſſimus. Qui quidem triumphus deſſe non poterit, etiamſi Nobis datum non ſit noſcere tempus eidem triumpho ab omnipotenti

<sup>1)</sup> Huc referuntur Syllabi Propositiones 17, 53, et §. IV. Syl'abi.

<sup>2)</sup> S. Leo Epist. 154. ad Episcopos Aegyptios, edit. Baller.

Deo destinatum, qui omnia admirabili divina sua providentia regit ac moderatur, et ad nostram dirigit utilitatem.

Etsi vero caelestis Pater Ecclesiam suam sanctam in hac miserrima et mortali peregrinatione militantem, variis aerumnis et calamitatibus affligi et vexari permittit, tamen cum ipsa a Christo Domino supra immobilem et firmissimam petram sit fundata, non solum nulla vi nulloque impetu convelli et labefactari unquam potest, verum etiam ipsis «persecutionibus non minuitur, sed augetur, et semper dominicus ager segete ditiori vestitur, dum grana, quae singula cadunt, multiplicata nascuntur<sup>1)</sup>» Quod, Dilecti Filii Nostri et Venerabiles Fratres, luctuosissimis etiam hisce temporibus singulari Dei beneficio evenire conspiciamus. Nam quamvis immaculata Christi sponsa impiorum hominum opera in praesentia vehementer afflictetur, tamen de suis hostibus agit triumphum. Enimvero ipsa suos triumphat hostes, et mirifice splendescit tum singulari vestra, et aliorum Venerabilium Fratrum totius catholici orbis Sacrorum Antistitum erga Nos et hanc Petri Cathedram fide, amore, observantia et eximia constantia in catholica unitate tuenda, tum tot pientissimis religionis, et Christianae caritatis operibus, quae, Deo auxiliante, magis in dies multiplicantur in catholico orbe, tum sanctissimae fidei lumine, quo magis in dies tot illustrantur regiones, tum egregio Catholicorum erga ipsam Ecclesiam, ac Nos, et hanc Sanctam Sedem amore et studio, tum insigni et immortalis martyrii gloria. Nostis enim quomodo in Tunkin, et Cochinchinae praesertim regionibus Episcopi, Sacerdotes, laicique viri, ac vel ipsae imbelles mulieres, ac teneri adolescentuli et adolescentulae veterum martyrum exempla aemulantes animo invicto, heroica virtute crudelissimos quosque cruciatus despiciere, et exultantes pro Christo vitam profundere vehementer laetantur. Quae sane omnia non levi Nobis, Vobisque consolationi esse debent inter maximas, quibus premimur, acerbitates.

Verum cum Apostolici Nostri ministerii officium omnino postulet, ut Ecclesiae causam, Nobis ab ipso Christo Domino commissam, omni cura studioque defendamus, illosque omnes reprobemus, qui Ecclesiam ipsam, eiusque sacra iura, ministros et hanc Apostolicam Sedem oppugnare et concutere non dubitant, iccirco hisce Nostis Litteris denno ea omnia et singula confirmamus, declaramus, ac damnamus, quae in pluribus consistorialibus Allocutionibus, aliisque Nostis Litteris cum ingenti animi Nostri molestia lamentari, declarare, atque damnare coacti fuimus<sup>2)</sup>.

Atque hic, Dilecti Filii Nostri et Venerabiles Fratres, iterum commemorare et reprehendere oportet gravissimum errorem, in quo nonnulli catholici misere versantur, qui homines in erroribus viventes, et a vera fide atque a catholica unitate alienos ad aeternam vitam pervenire posse opinantur<sup>3)</sup>. Quod quidem catholicae doctrinae vel maxime adversatur. Notum Nobis Vobisque est, eos, qui invincibili circa sanctissimam nostram religionem ignorantia laborant, quique naturalem legem, eiusque praecepta in omnium cordibus a Deo insculpta sedulo servantes, ac Deo obedire parati, honestam rectamque vitam agunt, posse, divinae lucis et gratiae operante virtute, aeternam consequi vitam, cum Deus, qui omnium mentes, animos, cogitationes, habitusque plane intuetur, scrutatur et noscit, pro summa sua bonitate et clementia minime patiatur quempiam aeternis puniri suppliciis, qui voluntariae culpa reatum non habeat. Sed notissimum quoque est catholicum dogma, neminem scilicet extra catholicam Ecclesiam posse salvari, et contumaces adversus eiusdem Ecclesiae auctoritatem, definitiones, et ab ipsius Ecclesiae unitate, atque a Petri Successore Romano Pontifice, cui *vinea custodia a Salvatore est commissae*<sup>4)</sup>, pertinaciter divisos, aeternam non

<sup>1)</sup> S. Leo Serm. 82. in natal. Apost. Petri et Pauli.

<sup>2)</sup> Allocut. 20. Junii 1859 (pag. 108); 26. Septemb. 1859 (p. 110); 13. Julii 1860 (p. 119); 28. Septemb. 1860 (p. 122); 17. Decemb. 1860 (p. 125); 18. Martii 1861 (p. 129); 30. Septemb. 1861 (p. 133); 9. Junii 1862 (p. 135); Epist. Encycl. 18. Junii 1859 (p. 107); 19. Januarii 1860 (p. 112); Apost. Litt. 26. Martii 1860 (p. 114).

<sup>3)</sup> *Huc ref. prop. 17; cf. supra, pag. 80.*

<sup>4)</sup> Concil. Oecum. Chalcedonen. in Relat. ad Leonem Papam.

posse obtinere salutem. Clarissima enim sunt Christi Domini verba: «Si Ecclesiam non audierit, sit tibi sicut ethnicus, et publicanus<sup>1)</sup>. Qui vos audit, me audit, et qui vos spernit, me spernit, qui autem me spernit, spernit eum, qui misit me<sup>2)</sup>. Qui non crediderit, condemnabitur<sup>3)</sup>. Qui non credit, iam iudicatus est<sup>4)</sup>. Qui non est mecum, contra me est, qui non colligit mecum, dispergit<sup>5)</sup>.» Hinc Apostolus Paulus huiusmodi homines dicit *subversos, et proprio iudicio condemnatos<sup>6)</sup>*; et Apostolorum Princeps illos appellat «magistros mendaces, qui introducunt sectas perditionis, Dominum negant, superducentes sibi celerem perditionem<sup>7)</sup>.»

Absit vero, ut catholicae Ecclesiae filii ullo unquam modo inimici sint iis, qui eisdem fidei caritatisque vinculis nobiscum minime sunt coniuncti; quin immo illos sive pauperes, sive aegrotantes, sive aliis quibusque aerumnis afflictos omnibus christianae caritatis officiis prosequi, adiuvere semper studeant, et in primis ab errorum tenebris, in quibus misere iacent, eripere, atque ad catholicam veritatem, et ad amantissimam Matrem Ecclesiam reducere contendant, quae maternas suas manus ad illos amanter tendere, eosque ad suum sinum revocare nunquam desinit, ut in fide, spe et caritate fundati ac stabiles, et in omni opere bono fructificantes, aeternam assequantur salutem.

Nunc autem, Dilecti Filii Nostri ac Venerabiles Fratres, silentio praetere non possumus alium perniciosissimum errorem et malum, quo hac nostra infelicissima aetate hominum mentes animique misere abripiuntur, ac perturbantur. Loquimur nempe de effraenato ac damno illo proprio amore et studio, quo non pauci homines, nulla plane proximi sui ratione habita, proprias utilitates et commoda unice spectant et quaerunt; loquimur de insatiabili illa dominandi et acquirendi cupiditate, qua, honestatis iustitiaeque regulis omnino posthabitis, divitias quovis modo cupidissime congerere, et cumulare non desinunt, ac terrenis tantum rebus assidue intenti, et Dei, religionis, animaeque suae immemores suam omnem felicitatem in comparandis divitiis et pecuniae thesauris perperam collocant<sup>8)</sup>. Meminerint huiusmodi homines, ac serio meditentur gravissima illa Christi Domini verba: «Quid prodest homini si mundum universum lucretur, animae vero suae detrimentum patiat<sup>9)</sup>?» et animo sedulo reputent quae Apostolus Paulus docet: «Qui volunt divites fieri, incidunt in tentationem et in laqueum diaboli, et desideria multa inutilia, et nociva, quae mergunt homines in interitum et perditionem. Radix enim omnium malorum est cupiditas, quam quidam appetentes, erraverunt a fide, et inseruerunt se doloribus multis<sup>10)</sup>.»

Equidem homines iuxta propriam ac diversam cuiusque conditionem suis laboribus necessaria vitae praesidia sibi comparare debent, seu in litteris ac scientiis excolendis, seu in artibus tum ingenuis, tum vulgaribus exercendis, seu in publicis privatisque muneribus obeundis, seu in rerum commercio habendo; sed omnino oportet, ut omnia cum honestate, iustitia, integritate et caritate agant, et Deum prae oculis semper habeant, eiusque mandata ac praecepta diligentissime observent.

Jam vero dissimulare non possumus, acerbissimo Nos angere dolore, cum in Italia nonnulli ex utroque Clero reperiantur viri, qui adeo sanctae suae vocationis sunt obliti, ut minime erubescant extimalibus etiam scriptis falsas disseminare doctrinas, ac populorum animos contra Nos et hanc Apostolicam Sedem excitare, ac civilem Nostrum et ipsius Sedis principatum oppugnare, et nequissimis catholicae Ecclesiae, eiusdemque Sedis hostibus omni opera studioque impudenter favere. Qui ecclesiastici viri a suis Antistitibus, et a Nobis, atque ab hac Sancta Sede desciscentes, et Subalpini Gubernii, eiusque Magistratum favore et auxilio freti, eo temeritatis devenerunt, ut, ecclesiasticis censuris et poenis plane spretis, minime extimuerint, quasdam omnino improbandas Societates *Clerico-liberali, Di mutuo soccorso, Eman-*

<sup>1)</sup> Matth. XVIII. 17.

<sup>2)</sup> Marc. XVI. 16.

<sup>3)</sup> Luc. XI. 23.

<sup>4)</sup> II. Petr. II. 1.

<sup>5)</sup> Matth. XVI. 26.

<sup>2)</sup> Luc. X. 16.

<sup>4)</sup> Joann. III. 18.

<sup>6)</sup> Ad Tit. III. 11.

<sup>8)</sup> *Huc ref. prop.* 58.

<sup>10)</sup> Epist. I. ad Timoth. VI. 9, 10.

*cipatrice del Clero italiano* vulgo appellatas<sup>1)</sup>, aliasque eodem pravo spiritu animatas constituere, et quamvis a propriis Antistitibus merito interdicti a sacro ministerio obeundo, tamen minime pavent illud, veluti intrusi, in pluribus Templis perperam et illicite exercere. Quapropter et commemoratas detestandas Societates, et improbam eorumdem ecclesiasticorum hominum agendi rationem reprobamus, damnamus. Atque eodem tempore hos infelices ecclesiasticos viros etiam atque etiam monemus, hortamur, ut resipiscant, et redeant ad cor, propriaeque saluti consulant, serio considerantes, quod «nullum ab aliis magis praeiudicium, quam a Sacerdotibus tolerat Deus, «quando eos, quos ad aliorum correctionem posuit, dare de se exempla pravitatis cernit<sup>2)</sup>,» ac diligenter meditantés, districtam ante tribunal Christi rationem aliquando esse reddendam. Faxit Deus, ut hi miseri ecclesiastici homines paternis Nostri monitis obtemperantes velint Nobis eam adhibere consolationem, quam Nobis afferunt illi utriusque Cleri viri, qui misere decepti, et in errorem inducti ad Nos in singulos dies confugiunt poenitentes, ac supplici prece errati veniam et a censuris ecclesiasticis absolutionem humiliter enixeque implorantes.

Optime autem noscitis, Dilecti Filii Nostri ac Venerabiles Fratres, impia omnis generis scripta e tenebris emissa, ac dolis, mendaciis, calumniis et blasphemis plena, et scholas acatholicis magistris traditas, et templa acatholico cultui destinata, ac multiplices alias diabolicas sane insidias, artes, conatus, quibus Dei hominumque hostes in misera Italia catholicam Ecclesiam, si fieri unquam posset, funditus evertere, ac populos, et improvidam praesertim iuventutem quotidie magis depravare, corrumpere, et ex omnium animis sanctissimam nostram fidem religionemque radicitus extirpare conuntur<sup>3)</sup>. Itaque nihil dubitamus, quin Vos, Dilecti Filii Nostri ac Venerabiles Fratres, confortati in gratia Domini nostri Jesu Christi, pro egregio vestro episcopali zelo pergatis, ut adhuc cum maxima vestri nominis laude fecistis, concordissimis animis et ingeminatis studiis constanter opponere murum pro Domo Israel, et certare bonum certamen fidei, et ab adversariorum insidiis fideles curae vestrae commissos defendere, illosque assidue monere et exhortari, ut sanctissimam fidem, sine qua impossibile est placere Deo, et quam a Christo Domino per Apostolos tenet ac docet catholica Ecclesia, constantissime teneant, ac stabiles et immoti permaneant in divina nostra religione, quae una est vera, aeternamque parat salutem, ac civilem etiam societatem vel maxime sospitat atque fortunat<sup>4)</sup>. Quapropter ne desinatis, per parochos praesertim, aliosque ecclesiasticos viros vitae integritate, morum gravitate, ac sana solidaque doctrina spectatos, tum divini verbi praedicatione, tum catechesi populos curae vestrae traditos veneranda augustae nostrae religionis mysteria, doctrinam, praecepta, disciplinam continenter et accurate docere. Etenim apprime scitis, ingentem malorum partem ex divinarum rerum, quae ad salutem necessariae sunt, inscitia plerumque oriri, ac propterea probe intelligitis, omnem curam industriamque esse adhibendam, ut huiusmodi malum a populis depellatur.

Antequam vero huic Nostrae Epistolae finem faciamus, Nobis temperare non possumus, quin meritas Italiae Clero laudes tribuamus, qui ex parte longe maxima Nobis et huic Petri Cathedrae, ac suis Antistitibus ex animo adhaerens, a recta via minime declinavit, sed illustria suorum Antistitum exempla sequens, et asperrima quaeque patientissime perferens munere suo egregie perfungitur. Ea profecto spe nititur fore, ut Clerus idem, divina auxiliante gratia, digne ambulans vocatione, qua vocatus est, splendidae suae pietatis ac virtutis specimina exhibere semper contendat.

Debito quoque laudum praeconio prosequimur tot virgines Deo sacras, quae a propriis Monasteriis violenter exturbatae, ac suis redditibus spoliatae, et ad mendicitatem redactae, haud tamen frugerunt fidem, quam Sponso dederunt, sed omni constantia tristissimam suam conditionem tolerantes non cessant diurnis nocturnisque precibus levare manus suas in Sancta, Deum

<sup>1)</sup> Societates clerico-liberales, mutui auxilii, emancipatrices cleri italici. *Huc ref.* §. IV. *Syllabi*.

<sup>2)</sup> S. Gregor. M. Homil. 17. in Evangel.

<sup>3)</sup> *Huc ref. prop.* 47, 79.

<sup>4)</sup> *Huc ref. prop.* 16, 21, 40.

pro omnium et suorum etiam persecutorum salute obsecrantes, et misericordiam a Domino patienter expectantes.

Meritum etiam laudibus Italiae populos ornare gaudemus, qui catholicis sensibus egregie animati tot impias contra Ecclesiam molitiones detestantur, et filiali Nos, et hanc Sanctam Sedem, ac suos Antistites pietate, observantia et obedientia prosequi vehementer gloriantur, quique gravissimis licet difficultatibus ac periculis praepediti, singularis sui erga Nos amoris, studii-que significationes modis omnibus quotidie exhibere, et maximas Nostras, et Apostolicae huius Sedis angustias tum collatitia pecunia, tum aliis largitionibus sublevare non desistunt.

In tantis autem acerbitatibus, tantaque contra Ecclesiam excitata tempestate, ne despondeamus unquam animum, Dilecti Filii Nostri ac Venerabiles Fratres, cum «consilium nostrum, et fortitudo sit Christus, ac sine quo nihil possumus, per ipsum cuncta possumus, qui confirmans praedicatorum Evangelii, et Sacramentorum ministros, ecce ego, inquit, vobiscum sum omnibus diebus usque ad consummationem saeculi»<sup>1)</sup>; et cum certo sciamus, inferi portas nunquam esse praevalituras adversus Ecclesiam, quae semper stetit, stabitque immota, custode et vindice Christo Jesu Domino nostro, qui eam aedificavit, et qui fuit *heri, et hodie, ipse et in saecula*<sup>2)</sup>).

Ne desinamus autem, Dilecti Filii Nostri ac Venerabiles Fratres, ardentiore usque studio in humilitate cordis nostri orationes et postulationes Deo per Jesum Christum dies noctesque offerre, ut, hac turbulentissima tempestate depulsa, Ecclesia sua sancta a tantis calamitatibus respiret, et ubique terrarum optatissima pace ac libertate fruatur, et novos ac splendidiore de suis inimicis agat triumphos, utque omnes errantes divinae suae gratiae lumine perfusi ab erroris via ad veritatis iustitiaeque iter revertantur, ac dignum poenitentiae fructum facientes perpetuum sancti sui nominis amorem et timorem habeant. Ut autem dives in misericordia Deus ferventissimis nostris precibus facilius annuat, invocemus potentissimum Immaculatae Sanctissimaeque Dei Genitricis Virginis Mariae patrocinium, ac suffragia petamus Sanctorum Apostolorum Petri et Pauli, omniumque Beatorum Coelitum, ut validis suis apud Deum deprecationibus implorent omnibus misericordiam et gratiam in auxilio opportuno, et omnes calamitates et pericula, quibus Ecclesia ubique, ac potissimum in Italia, affligitur, potenter avertant.

Denique certissimum singularis Nostrae in Vos benevolentiae pignus Apostolicam Benedictionem ex intimo corde profectam Vobis ipsis, Dilecti Filii Nostri ac Venerabiles Fratres, et gregi curae vestrae commisso peramanter impertimus.

Datum Romae apud S. Petrum, die X Augusti anno MDCCCLXIII. Pontificatus Nostri Anno Decimoctavo

## Epistola Encyclica

ad Archiepiscopum et Episcopos Neogranatensis reipublicae<sup>3)</sup>.

*Venerabilibus Fratribus Antonio Archiepiscopo S. Fidei De Bogota, et Episcopis eius Suffraganeis in Neogranatensi Republica.*

Pius PP. IX.

Venerabiles Fratres, Salutem et Apostolicam Benedictionem

Incredibili afflictamur dolore, et una Vobiscum ingemiscimus, Venerabiles Fratres, cum noscamus quibus nefariis, dirisque modis a Neogranatensis Reipublicae Gubernio catholica impetitur, perturbatur, ac dilaceratur Ecclesia. Equidem verbis satis exprimere haud possumus multiplices, sacrilegosque ausus, quibus Gubernium idem gravissimas Nobis, et huic Aposto-

<sup>1)</sup> S. Leo Epist. 167. ad Rustic. Narbon. Episcop.

<sup>2)</sup> S. Paul. Epist. ad Hebr. XIII. 8.

<sup>3)</sup> *Huc refertur Syllabi Propositio 26.*

licae Sedi iniurias afferens, sanctissimam nostram religionem, eiusque veneranda iura, doctrinam, cultum, sacrosque Ministros conculcare ac destruere contendit. Namque idem Gubernium duos praesertim ab hinc annos infandas edidit leges et decreta, quae catholicae Ecclesiae, eiusque doctrinae, auctoritati, iuribusque vel maxime adversantur. Hisce enim iniquissimis legibus ac decretis inter alia, sacri ministri prohibiti sunt ecclesiasticum ministerium exercere sine civilis potestatis venia<sup>1)</sup>, et omnia Ecclesiae bona usurpata, divendita, ac propterea parochiae, et Religiosae utriusque sexus Familiae et Clerus, ac Valetudinaria, Domusque Refugii, piaque Sodalitates, Beneficia, et Capellaniae etiam iuris patronatus suis redditibus spoliatae. Atque per easdem iniustissimas leges, et decreta legitimum Ecclesiae acquirendi, ac possidendi ius omnino oppugnatum<sup>2)</sup>, et cuiusque acatholici cultus libertas sancita<sup>3)</sup>, et omnes utriusque sexus Religiosae Familiae in Neogranatensi territorio morantes de medio sublatae, earumque existentia plane interdicta<sup>4)</sup>, et vetita etiam omnium Litterarum, et cuiusque Apostolicae huius Sedis Rescripti promulgatio<sup>5)</sup>, et exilii poena ecclesiasticis viris, laicis vero multae et carceris indicta, si huic ordinationi obedire recusaverint. Insuper eisdem detestandis legibus ac decretis statuitur, ut utriusque Cleri viri exilii poena afficiantur, qui legi circa bonorum Ecclesiae spoliationem obtemperare detrectaverint, utque omnes ecclesiastici homines sacri ministerii munia obire minime queant<sup>6)</sup>, nisi primum iuraverint, se Neogranatensis Reipublicae Constitutioni, cunctisque illius legibus Ecclesiae tantopere adversis iam editis, et in posterum edendis obsequi; ac simul exilii poena iis omnibus infligitur, qui huiusmodi impium, illicitumque iusiurandum praestare minime voluerint. Haec et alia multa omnino iniusta et impia, quae singillatim commemorare taedet, contra Ecclesiam a Neogranatensis Reipublicae Gubernio, proculcatis omnibus divinis humanisque iuribus, sunt constituta.

Cum autem vos, Venerabiles Fratres, pro egregia vestra religione et virtute haud omiseritis tum voce, tum scriptis constanter obistere tot iniquis sacrilegisque eiusdem Gubernii ausibus et decretis, atque Ecclesiae causam et iura impavide propugnare, tum eiusdem Gubernii furor in Vos, omnesque ecclesiasticos viros Vobis addictos, ac proprii officii et vocationis memores, et in omnia, quae ad Ecclesiam pertinent, saevire non destitit. Quapropter Vos fere omnes miserandum in modum afflicti, ac militari manu comprehensi, a vestro grege violenter distracti, in vincula coniecti, in exilium pulsi, et in pestiferi aëris regiones amandati, et ecclesiastici viri, ac Religiosarum Familiarum alumni pravis Gubernii ordinationibus merito obstantes vel in carcerem detrusi, vel exilio multati mortem occubuerunt, vel in silvis vitam agere coacti sunt. Cum vero omnes virgines Deo devotae ab ipso Gubernio furenter, crudeliterque a propriis Monasteriis expulsae, et ad rerum omnium inopiam redactae, fuerint a piis fidelibus, tristissima illarum conditione vehementer commotis, humaniter in proprias domos receptae et admissae, id aegerrime ferens Gubernium minitatur, velle illas ex eorumdem fidelium domibus expellere ac disperdere. Hinc sacra Tempia et Coenobia nudata, spoliata, polluta, et in militarium stationum usum commutata, eorumque sacra suppellex, et ornamenta direpta, hinc sacrorum cultus sublatus, et christianus populus legitimis suis pastoribus orbatus, omnibusque divinae nostrae religionis praesidiis misere destitutus, cum summa Nostra, Vestraque aegritudine in maximo aeternae salutis discrimine versatur. Ecquies catholicis, humanisque sensibus animatus non vehementer ingemiscet, cum videat a Neogranatensi Gubernio tam gravi, tamque crudeli persecutione catholicam Ecclesiam, eiusque doctrinam, auctoritatem, sacrasque personas oppugnari, ac tantas ab ipso supremas Nostrae, et Apostolicae huius Sedis auctoritati iniurias et contumelias inferri?

Atque illud vel maxime dolendum, Venerabiles Fratres, quod nonnulli ecclesiastici homines existere potuerint, qui pravis ipsius Gubernii legibus et consiliis obsequi, favere, et commemoratum illicitum obedientiae iura-

<sup>1)</sup> *Huc ref. prop.* 20.

<sup>2)</sup> " " " 78, 79.

<sup>3)</sup> " " " 28, 41.

<sup>4)</sup> *Huc ref. prop.* 26.

<sup>5)</sup> " " " 53.

<sup>6)</sup> " " " 41, 44, 51.

mentum praestare non dubitarunt cum maximo Nostro, vestroque moerore, et bonorum omnium admiratione ac luctu.

In hac igitur tanta rei catholicae clade, tantaque animarum pernicie Apostolici Nostri officii probe memores, ac de omnium Ecclesiarum bono vel maxime solliciti, et Nobis, uti olim Prophetæ, indictum existimantes: «Clama, ne cesses, quasi tuba exalta vocem tuam, et annuncia populo meo scelera eorum, et domui Jacob peccata eorum<sup>1)</sup>», hisce Litteris Apostolicam Nostram attollentes vocem, omnia gravissima damna et iniurias a Neogranatensi Gubernio Ecclesiae, eiusque sacris personis ac rebus, et huic Sanctae Sedi illatas incessanter querimus, et gravissime exprobramus. Atque omnia et singula, quae sive in his, sive in aliis rebus ad Ecclesiam, eiusque ius spectantibus ab eodem Neogranatensi Gubernio, et ab inferioribus quibusque illius Magistratibus decreta, gesta, seu quomodolibet attentata sunt, auctoritate Nostra Apostolica reprobamus, damnamus, et leges ac decreta ipsa cum omnibus inde sequutis eadem Nostra auctoritate abrogamus, et irrita prorsus, ac nullius roboris fuisse et fore, declaramus. Ipsos autem illorum auctores etiam atque etiam in Domino obtestamur, ut tandem aliquando suos oculos aperiant super gravissima vulnera Ecclesiae imposita, ac simul recordentes, serioque considerent censuras et poenas, quas Apostolicae Constitutiones, et Generalium Conciliorum Decreta contra Ecclesiae iurium invasores facto ipso incurrendas infligunt, et iccirco animae suae misereantur, prae oculis habentes: «Quoniam durissimum iis, qui praesunt, fiet iudicium<sup>2)</sup>». Atque etiam omni studio illos ecclesiasticos viros, qui Gubernio faventes a proprio officio misere declinarunt, monemus, et exhortamur, ut sanctam suam vocationem animo reputantes in iustitiae, veritatisque viam redire properent, et illorum ecclesiasticorum hominum exempla aemulentur, qui etiamsi infeliciter lapsi praescriptum a Gubernio obedientiae iuramentum praestiterunt, tamen cum ingenti Nostro, ac suorum Antistitum gaudio idem iusiurandum retractare, ac damnare gloriati sunt.

Interim vero amplissimas meritasque Vobis tribuimus laudes, Venerabiles Fratres, qui laborantes sicut boni milites Christi Jesu, ac strenue in agone certantes singulari constantia et fortitudine, quoad per Vos fieri potuit, seu voce, seu litteris Ecclesiae causam, eiusque doctrinam, iura, libertatem defendere, vestrique gregis saluti accurate consulere, eumque contra impias inimicorum hominum molitiones, et circumstantia Religionis pericula praevenire haud omiseritis, gravissimas omnes iniurias, molestias, et asperima quaeque episcopali robore tolerantes. Itaque dubitare non possumus, quin pari studio et contentione, quantum in Vobis est, pergatis, ut adhuc cum maxima vestri nominis laude fecistis, divinae nostrae religionis causam propugnare, et fidelium saluti prospicere.

Debitas quoque laudes deferimus fideli Neogranatensis Reipublicae, Clero, qui suae vocationis servantissimus, et Nobis, atque huic Petri Cathedrae, suisque Antistitibus addictus propter Ecclesiam, veritatem et iustitiam tam vehementer exagitatus, immanem omnis generis iusectationem patientissime est perpassus et patitur.

Non possumus quin admiremur et laudemus tot virgines Deo sacras, quae etiamsi a suis monasteriis violenter expulsae, et ad tristem egestatem redactae, tamen caelesti Sponso firmiter adhaerentes, ac miserrimam, in qua versantur, conditionem christiana virtute perferentes, non cessant dies noctesque effundere corda sua coram Deo, Eumque humiliter enixeque pro omnium, ac suorum etiam persecutorum salute exorare. Collaudamus item catholicum Neogranatensis Reipublicae populum, qui ex parte longe maxima in veteri suo erga catholicam Ecclesiam, ac Nos, et hanc Apostolicam Sedem, et erga suos Antistites amore, fide, reverentia et obedientia perseverat.

Ne cessemus autem, Venerabiles Fratres, adire cum fiducia ad thronum gratiae, et humillimis ac ferventissimis precibus misericordiarum Patrem ac Deum totius consolationis sine intermissione orare et obsecrare, ut exurgat et iudicet causam suam, et Ecclesiam suam sanctam a tantis, quibus istic et ubique fere orbis premitur, calamitatibus eripiat, eamque opportuno

<sup>1)</sup> Isaiae LVIII. 1.

<sup>2)</sup> Sap. VI. 6.



auxilio soletur, et optatissimam diu in tot, tantisque adversis serenitatem, et pacem clementissime largiatur, omniumque misereatur secundum magnam misericordiam suam, atque omnipotenti sua virtute efficiat, ut omnes populi, gentes, nationes Ipsum, et Unigenitum Filium suum Dominum nostrum Jesum Christum una cum Sancto Spiritu agnoscant, adorent, timeant, ac ex toto corde, anima ac mente diligant, et omnia divina mandata ac praecepta religiose observantes, ut filii lucis ambulent in omni bonitate, iustitia et veritate.

Demum omnium caelestium munerum auspiciem, et certissimum praecipuae Nostrae in Vos benevolentiae pignus Apostolicam Benedictionem ex imo corde depromptam Vobis ipsis, Venerabiles Fratres, et gregi vestrae vigilantiae concredito peramanter impertimus.

Datum Romae apud Sanctum Petrum, die XVII. Septembris anno MDCCCLXIII. Pontificatus Nostri Anno Decimoctavo.

## Litterae

Venerabili Fratri Gregorio Archiepiscopo Monacensi et Frisingensi die XXI. decembris anni MDCCCLXIII <sup>1)</sup>).

### Pius PP. IX.

Venerabilis Frater, Salutem et Apostolicam Benedictionem.

Tuas libenter accepimus Litteras, die 7. proxime elapsi mensis Octobris datas, ut Nos certiores faceres de Conventu in ista Monacensi civitate proximo mense Septembri a nonnullis Germaniae Theologis, doctisque catholicis viris habito de variis argumentis, quae ad theologicas praesertim ac philosophicas tradendas disciplinas pertinent. Ex Litteris Tibi Nostro iussu scriptis a Venerabili Fratre Matthaeo Archiepiscopo Neocaesariensi, Nostro et Apostolicae huius Sedis apud istam Regiam Aulam Nuntio, vel facile noscere potuisti, Venerabilis Frater, quibus Nos sensibus affecti fuerimus, ubi primum de hoc proposito Conventu nuntium accepimus, et postquam agnovimus quomodo commemorati Theologi et viri ad huiusmodi Conventum invitati et congregati fuere. Nihil certe dubitare volebamus de laudabili fine, quo huius Conventus auctores, fautoresque permoti fuere, ut scilicet omnes Catholici viri doctrina praestantes, collatis consiliis, coniunctisque viribus, germanam catholicam Ecclesiae scientiam promoverent, eamque a nefariis, ac perniciosissimis tot adversariorum opinionibus, conatibusque vindicarent ac defenderent. Sed in hac sublimi Principis Apostolorum Cathedrala, licet immerentes, collocati asperrimis hisce temporibus, quibus Sacrorum Antistitum auctoritas, si unquam alias, ad unitatem et integritatem catholicae doctrinae custodiendam, vel maxime est necessaria, et ab omnibus sarta tecta servari debet, non potuimus non vehementer mirari videntes memorati Conventus invitationem privato nomine factam et promulgatam, quin ullo modo intercederet impulsus, auctoritas et missio ecclesiasticae potestatis, ad quam proprio, ac nativo iure unice pertinet advigilare ac dirigere theologiarum praesertim rerum doctrinam. Quae sane res, ut optime noscis, omnino nova, ac prorsus inusitata in Ecclesia est. Atque iccirco volumus, Te, Venerabilis Frater, noscere hanc Nostram fuisse sententiam, ut cum a Te, tum ab aliis Venerabilibus Fratribus Sacrorum in Germania Antistitibus probe iudicari posset de scopo per Conventus programma enuntiato, si nempe talis esset, ut veram Ecclesiae utilitatem afferret. Eodem autem tempore certi eramus, Te, Venerabilis Frater, pro pastoralis Tua sollicitudine ac zelo omnia consilia et studia esse adhibiturum, ne in eodem Conventu tum catholicae fidei ac doctrinae integritas, tum obedientia, quam omnes cuiusque classis et conditionis catholici homines Ecclesiae auctoritati ac magisterio praestare omnino debent, vel minimum detrimentum caperent. Ac dissimulare non possumus, non levibus Nos angustiis affectos fuisse, quandoquidem verebamus, ne huiusmodi Conventu sine ecclesiastica auctoritate congregato exemplum praeberetur sensim usurpandi aliquid ex

<sup>1)</sup> Huc referuntur Syllabi Propositiones 9, 10, 12, 13, 14, 22, 33.



iure ecclesiastici regiminis et authentici magisterii, quod divina institutione proprium est Romano Pontifici, et Episcopis in unione et consensione cum ipso S. Petri Successore; atque ita, ecclesiastico ordine perturbato, aliquando unitas, obedientia fidei apud aliquos labefacteretur <sup>1)</sup>). Atque etiam timebamus, ne in ipso Conventu quaedam enunciarentur, ac tenerentur opiniones et placita, quae in vulgus praesertim emissa et catholicae doctrinae puritatem, et debitam subiectionem in periculum ac discrimen vocarent.

Summo enim animi Nostri dolore recordabamur, Venerabilis Frater, hanc Apostolicam Sedem pro gravissimi sui muneris officio debuisse, ultimis hisce temporibus, censura notare, ac prohibere nonnullorum Germaniae scriptorum opera, qui cum nescirent decedere ab aliquo principio, seu methodo falsae scientiae, aut hodiernae fallacis philosophiae, praeter voluntatem, uti confidimus, inducti fuere ad proferendas ac docendas doctrinas dissentientes a vero nonnullorum sanctissimae fidei nostrae dogmatum sensu et interpretatione, quique errores ab Ecclesia iam damnatos e tenebris excitarunt, et propriam divinae revelationis et fidei indolem et naturam in alienum omnino sensum explicaverunt <sup>2)</sup>). Noscebamus etiam, Venerabilis Frater, nonnullos ex catholicis, qui severioris disciplinis excolendis operam navant, humani ingenii viribus nimium fidentes errorum periculis haud fuisse absterritos, ne in asseranda fallaci, et minime sincera scientiae libertate abriperentur ultra limites, quos praetergredi non sinit obedientia debita erga magisterium Ecclesiae ad totius revelatae veritatis integritatem servandam divinitus institutum <sup>3)</sup>). Ex quo evenit, ut huiusmodi catholici misere decepti et iis saepe consentiant, qui contra huius Apostolicae Sedis, ac Nostrarum Congregationum decreta declamant ac blaterant, ea liberum scientiae progressum impedire <sup>4)</sup>), et periculo se exponant sacra illa frangendi obedientiae vincula, quibus ex Dei voluntate eidem Apostolicae huic obstringuntur Sedi, quae a Deo ipso veritatis magistra, et vindex fuit constituta <sup>5)</sup>).

Neque ignorabamus, in Germania etiam falsam invaluisse opinionem adversus veterem scholam, et adversus doctrinam summorum illorum Doctorum, quos propter admirabilem eorum sapientiam, et vitae sanctitatem universalis venerat Ecclesia. Qua falsa opinione ipsius Ecclesiae auctoritas in discrimen vocatur, quandoquidem ipsa Ecclesia non solum per tot continentia saecula permisit, ut ex eorumdem Doctorum methodo, et ex principii communi omnium catholicarum scholarum consensu sanctitis theologica excoleretur scientia, verum etiam saepissime summis laudibus theologicam eorum doctrinam extulit, illamque veluti fortissimum fidei propugnaculum et formidanda contra suos inimicos arma vehementer commendavit <sup>6)</sup>). Haec sane omnia pro gravissimi supremi Nostri Apostolici ministerii munere, ac pro singulari illo amore, quo omnes Germaniae catholicos carissimam Dominici gregis partem prosequimur, Nostrum sollicitabant et angebant animum tot aliis pressum angustiis, ubi, accepto memorati Conventus nuntio, res supra expositas Tibi significandas curavimus. Postquam vero per brevissimum nuntium ad Nos relatum fuit, Te, Venerabilis Frater, huiusce Conventus auctorum precibus annuentem tribuisse veniam celebrandi eundem Conventum, ac sacrum solemnem ritu peregis, et consultationes in eodem Conventu iuxta catholicae Ecclesiae doctrinam habitas fuisse, et postquam ipsius Conventus viri per eundem nuntium Apostolicam Nostram imploraverunt Benedictionem, nulla interposita mora, piis illorum votis obsecundavimus.

Summa vero anxietate Tuas exspectabamus Litteras, ut a Te, Venerabilis Frater, accuratissime noscere possemus ea omnia, quae ad eundem Conventum quovis modo possent pertinere. Nunc autem cum a Te acceperimus, quae scire vel maxime cupiebamus, ea spe nitimur fore, ut huiusmodi negotium, quemadmodum asseris, Deo auxiliante, in maiorem catholicae in Germania Ecclesiae utilitatem cedat. Equidem cum omnes eiusdem Conventus viri, veluti scribis, asseruerint, scientiarum progressum, et felicem exitum in devitandis ac refutandis miserrimae nostrae aetatis erroribus

<sup>1)</sup> Huc ref. prop. 33.

<sup>2)</sup> Supra, pag. 139.

<sup>3)</sup> Huc ref. §. II. Syll. et prop. 33.

<sup>4)</sup> Huc ref. prop. 14.

<sup>5)</sup> " " " 12.

<sup>6)</sup> " " " 13.

omnino pendere ab intima erga veritates revelatas adhaesione, quas catholica docet Ecclesia, ipsi noverunt ac professi sunt illam veritatem, quam veri catholici scientiis excolendis et evolvendis dediti semper tenuere, ac traderunt. Atque hac veritate innixi potuerunt ipsi sapientes, ac veri catholici viri scientias easdem tuto excolere, explanare, easque utiles certasque reddere. Quod quidem obtineri non potest, si humanae rationis lumen finibus circumscriptum eas quoque veritates investigando, quas propriis viribus et facultatibus assequi potest, non veneretur maxime, ut par est, infallibile et increatum Divini intellectus lumen, quod in christiana revelatione undique mirifice elucet. Quamvis enim naturales illae disciplinae suis propriis ratione cognitis principiis nitantur, catholici tamen earum cultores divinam revelationem veluti rectricem stellam prae oculis habeant oportet, qua prae-lucente sibi a syrtibus et erroribus caveant, ubi in suis investigationibus, et commentationibus animadvertant, posse se illis adduci, ut saepissime accidit, ad ea proferenda, quae plus minusve adversentur infallibili rerum veritati, quae a Deo revelatae fuere. Hinc dubitare nolumus, quin ipsius Conventus viri commemoratam veritatem noscentes ac profitentes, uno eodemque tempore plane reiicere ac reprobare voluerint recentem illam ac praeposteram philosophandi rationem, quae etiamsi divinam revelationem veluti historicum factum admittat, tamen ineffabiles veritates ab ipsa divina revelatione propositas humanae rationis investigationibus supponit, perinde ac si illae veritates rationi subiectae essent, vel ratio suis viribus et principiis posset consequi intelligentiam et scientiam omnium superiorum sanctissimae fidei nostrae veritatum, et mysteriorum, quae ita supra humanam rationem sunt, ut haec nunquam effici possit idonea ad illa suis viribus, et ex naturalibus suis principiis intelligenda, aut demonstranda <sup>1)</sup>.

Eiusdem vero Conventus viros debitis prosequimur laudibus, propterea quod reiicientes, uti existimamus, falsam inter philosophum et philosophiam distinctionem, de qua in alijs Nostris Litteris ad Te scriptis loquuti sumus <sup>2)</sup>, noverunt, et asseruerunt, omnes catholicos in doctis suis commentationibus debere ex conscientia dogmaticis infallibilis catholicae Ecclesiae obedire decretis. Dum vero debitas illis deferimus laudes, quod professi sint veritatem, quae ex catholicae fidei obligatione necessario oritur, persuadere Nobis volumus, noluisse obligationem, qua catholici magistri, ac scriptores omnino adstringuntur, coarctare in iis tantum, quae ab infallibili Ecclesiae iudicio, veluti fidei dogmata ab omnibus credenda proponuntur <sup>3)</sup>. Atque etiam Nobis persuademus, ipsos noluisse declarare, perfectam illam erga revelatas veritates adhaesione, quam agnoverunt necessariam omnino esse ad verum scientiarum progressum assequendum, et ad errores confutandos, obtineri posse, si dumtaxat dogmatibus, ab Ecclesia expresse definitis, fides et obsequium adhibeatur.

Namque etiamsi ageretur de illa subiectione, quae *fidei divinae actu* est praestanda, limitanda tamen non esset ad ea, quae expressis oecumenicorum Conciliorum aut Romanorum Pontificum, huiusque Sedis decretis definita sunt, sed ad ea quoque extendenda, quae ordinario totius Ecclesiae per orbem dispersae magisterio tamquam divinitus revelata traduntur, ideoque universali et constanti consensu a catholicis Theologis ad fidem pertinere retinentur. Sed cum agatur de illa subiectione, qua *ex conscientia* ii omnes catholici obstringuntur, qui in contemplatrices scientias incumbunt, ut novas suis scriptis Ecclesiae afferant utilitates, ideoque eiusdem Conventus viri recognoscere debent, sapientibus catholicis haud satis esse, ut praefata Ecclesiae dogmata recipiant ac venerentur, verum etiam opus esse, ut se subiciant tum decisionibus, quae ad doctrinam pertinentes a Pontificiis Congregationibus proferuntur, tum iis doctrinae capitibus, quae communi et constanti Catholicorum consensu retinentur, ut theologicae veritates et conclusiones ita certae, ut opiniones eisdem doctrinae capitibus adversae, quamquam haereticae dici nequeant, tamen aliam theologiam mereantur censuram.

<sup>1)</sup> *Huc ref. prop. 9.*

<sup>2)</sup> *Supra, pag. 139, 141, 142. Huc ref. prop. 10*

<sup>3)</sup> *Huc ref. prop. 22.*

Itaque haud existimamus viros, qui commemorato Monacensi interfuisse Conventui, ullo modo potuisse, aut voluisse ob stare doctrinae nuper expositae, quae ex verae theologiae principiis in Ecclesia retinetur; quin immo ea fiducia sustentamur fore, ut ipsi in severioribus excolendis disciplinis velint ad enunciatae doctrinae normam se diligenter conformare. Quae Nostra fiducia praesertim nititur iis Litteris, quas per Te, Venerabilis Frater, Nobis miserunt. Siquidem eisdem Litteris cum summa animi Nostri consolatione ipsi profitentur, sibi in cogendo Conventu mentem nunquam fuisse vel minimam sibi arrogare auctoritatem, quae ad Ecclesiam omnino pertinet, ac simul testantur, noluisse eundem dimittere Conventum, quin primum declararent summam observantiam, obedientiam, ac filialem pietatem, qua Nos et hanc Petri cathedram catholicae unitatis centrum prosequuntur. Cum igitur hisce sensibus supremam Nostram, et Apostolicam huius Sedis potestatem, auctoritatemque ipsi recognoscant, ac simul intelligant gravissimum officium Nobis ab ipso Christo Domino commissum regendi, ac moderandi universam suam Ecclesiam, ac pascendi omnem suum gregem salutaris doctrinae pascuis, et continenter advigilandi, ne sanctissima fides, eiusque doctrina ullum unquam detrimentum patiatur, dubitare non possumus, quin ipsi severioribus disciplinis excolendis, tradendis, sanaeque doctrinae tuendae operam navantes uno, eodemque tempore agnoscant, se debere et religiose exsequi regulas ab Ecclesia semper servatas, et obedire omnibus decretis, quae circa doctrinam a Suprema Nostra Pontificia auctoritate eduntur.

Haec autem omnia Tibi communicavimus, ac summopere optamus, ut ea iis omnibus significes viris, qui in memorato Conventu fuere, dum si opportunum esse censerimus, haud omitemus alia Tibi, et Venerabilibus Fratribus Germaniae Sacrorum Antistitibus hac super re significare, postquam Tuam, et eorundem Antistitum sententiam intellexerimus de huiusmodi Conventuum opportunitate.

Demum pastorem Tuam sollicitudinem, ac vigilantiam iterum vehementer excitamus, ut una cum aliis Venerabilibus Fratribus Sacrorum in Germania Antistitibus curas omnes, cogitationesque in tuendam et progandam sanam doctrinam assidue conferas. Neque omittas omnibus inculcare, ut profanas omnes novitates diligenter devitent, neque ab illis se decipi unquam patiantur, qui falsam scientiae libertatem, eiusque non solum verum profectum, sed etiam errores tamquam progressus impudenter iactant<sup>1)</sup>. Atque pari studio et contentione ne desinas omnes hortari, ut maxima cura et industria in veram christianam et catholicam sapientiam incumbant, atque, uti par est, in summo pretio habeant veros solidosque scientiae progressus, qui sanctissima ac divina fide duce, et magistra, in catholicis scholis habiti fuerunt, utque theologicas praesertim disciplinas excolant secundum principia, et constantes doctrinas, quibus unanimiter innixi sapientissimi Doctores immortalem sibi nominis laudem, et maximam Ecclesiae, et scientiae utilitatem, ac splendorem pepererunt<sup>2)</sup>. Hoc sane modò catholici viri in scientiis excolendis poterunt, Deo auxiliante, magis in dies, quantum homini fas est, noscere, evolvere, et explanare veritatum thesaurum, quas in naturae et gratiae operibus Deus posuit, ut homo postquam illas rationis et fidei lumine noverit, suamque vitam ad eas sedulo conformaverit, possit in aeternae gloriae claritate summam veritatem, Deum scilicet, sine ullo velamine in-  
tueri, Eoque felicissime in aeternum perfrui et gaudere.

Hanc autem occasionem libentissimo animo amplectimur, ut denuo testemur et confirmemus praecipuam Nostram in Te caritatem, cuius quoque pignus esse volumus Apostolicam Benedictionem, quam effuso cordis affectu Tibi ipsi, Venerabilis Frater, et gregi Tuae curae commisso peramanter impertimus.

Datum Romae apud S. Petrum, die XXI. Decembris anno MDCCCLXIII. Pontificatus Nostri Anno Decimotavo.

<sup>1)</sup> *Huc ref. prop. 5.*

<sup>2)</sup> *Huc ref. prop. 13.*

## Litterae

Venerabili Fratri Hermanno Archiepiscopo Friburgensi in Brisgovia  
die XIV. iulii anni MDCCLXIV<sup>1)</sup>.

\* Pius PP. IX.

Venerabilis Frater, Salutem et Apostolicam Benedictionem.

Quum non sine maxima animi Nostri aegritudine ex pluribus nunciis accepimus, in magno isto Badensi Ducatu de novo popularium scholarum regimine parari ordinationes, quae variis modis christianam iuventutis institutionem, et educationem in magnum adducunt discrimen, proptereaquod illas a salutari catholicae Ecclesiae magisterio ac vigilantia quotidie magis amoveant, nihil dubitavimus, quin Tu, Venerabilis Frater, pro eximio Tuo in animarum salute curanda studio, ac pro perspecta Tua in Ecclesiae libertate, eiusque iuribus tuendis constantia fortiter iis omnibus obsisteres, quae vel minimum animarum saluti damnum afferre, vel quovis modo episcopalis Tui ministerii liberam auctoritatem coarctare possent. Quod autem pro certo habebamus, id luculenter confirmarunt Tuae Litterae super hoc tanti momenti negotio ad Nos datae, et commentarius eisdem adiectus. Ac vehementer laetamur, cum videamus, Te, Venerabilis Frater, licet aetate gravem, pro Ecclesia strenue pugnare eadem illa fortitudine, qua in episcopalis Tui ministerii decursu summopere praestitisti, ac Nostras, et huius Sanctae Sedis laudes merito, optimoque iure Tibi comparasti. Equidem inter maximas, quibus affligimur, acerbitates, summa utimur consolatione, noscentes quomodo dives in misericordia Deus Sacrorum Antistites eo maiore divinae suae gratiae auxilio roboret ad Christi Jesu gregem tuendum, quo graviora in ipsum gregem luctuosissimis hisce temporibus damna inimicorum hominum opera irruunt et invadunt.

Nemo certe ignorare potest, tristissimam ac deplorandam conditionem, in quam hodierna societas magis in dies prolabitur, derivare ex tot funestissimis machinationibus, quae adhibentur, ut a publicis Institutionibus, ac domesticis familiis quotidie magis sanctissima Christi fides, religio, eiusque salutaris doctrina amoveatur, et saluberrima eius vis coangustetur, ac praepediatur. Quae perniciosissimae machinationes ex tot pravis doctrinis necessario originem habent, quas hac miserrima nostra aetate cum maximo christianae civilisque reipublicae damno undique maiorem in modum invalescere, et caput altius extollere vehementer dolemus. Et sane cum veritates a Deo revelatae impudenter denegentur, vel humanae rationis examini subiiciantur, evenit, ut illa naturalium rerum plane tollitur subiectio, quae supernaturali ordini omnino debetur<sup>2)</sup>, utque homines ab aeterno suo fine arceantur, eorumque cogitationes actionesque ad materialium, fugaciumque huius mundi rerum limites redigantur<sup>3)</sup>. Et quoniam Ecclesia, quae columna et firmamentum veritatis, a Divino suo Auctore fuit constituta, ut omnes homines divinam edoceat fidem, eiusque depositum sibi traditum integrum inviolatumque custodiat, ac homines, eorumque consortia et actiones ad morum honestatem, vitaeque integritatem iuxta revelatae doctrinae normam dirigat et fingat. iccirco pravarum doctrinarum fautores et propagatores omnia conantur, ut ecclesiasticam potestatem sua erga humanam societatem auctoritate spolient. Quamobrem nihil intentatum, nihilque inexpertum relinquunt, ut omnem Ecclesiae potestatem, eiusque salutarem vim, quam ipsa Ecclesia ex divina sua institutione semper exercuit, et in humanae societatis Instituta exercere debet, vel magis in dies coarctent, vel ab eisdem Institutis arceant, et ipsa Instituta pleno civilis, politicaeque auctoritatis arbitrio subiiciant ad impetrantium placita, et ad volubiliū aetatis opinionum rationem<sup>4)</sup>.

Nihil vero mirum si huiusmodi funestissimi sane conatus in publicam iuventutis institutionem educationemque in primis comparentur, nihilque dubitandum, quin humana societas gravissimis repleatur et vexetur damnis,

<sup>1)</sup> *Huc referuntur Syllabi Propositiones 47, 48.*

<sup>2)</sup> *Huc ref. prop. 3, 4, 8, 14.*      <sup>3)</sup> *Huc ref. prop. 58.*

<sup>4)</sup>    "        "        "        47, 57.

ubi a publica et privata iuventutis institutione, qua rei cum sacrae, tum publicae felicitas tantopere continetur, fuerit moderatrix Ecclesiae auctoritas, eiusque salutifera vis amota. Hoc enim modo humana societas vero illo christiano spiritu sensim privatur, qui unus potest et publici ordinis, tranquillitatisque fundamenta stabiliter servare, ac verum utilemque civilitatis progressum efficere ac moderari, et ea omnia hominibus praebere subsidia, quae ad ultimum suum post mortalis huiusce vitae statutum finem assequendum, scilicet ad aeternam salutem obtinendam sunt necessaria<sup>1)</sup>. Et sane institutio, quae non solum rerum duntaxat naturalium scientiam, ac terrenae socialis vitae fines spectat, verum etiam a veritatibus a Deo revelatis decedit, in erroris mendacique spiritum prolabatur oportet, et educatio, quae sine christianae doctrinae, morumque disciplinae auxilio teneras adolescentium mentes, eorumque cerea in vitium flecti corda informat, non potest non parere progeniem, quae pravis cupiditatibus propriisque rationibus tantum permota et impulsu maximas tum privatis familiis, tum reipublicae affert calamitates<sup>2)</sup>.

At vero cum huiusmodi perniciosissima docendi ratio seiuncta a catholica fide et ab Ecclesiae potestate maximo sit hominibus et societati damno, dum agitur de litteris severioribusque disciplinis tradendis, ac de educatione curanda in scholis publicisque Institutis, quae honestioribus societatis classibus sunt destinata, equis non videt, multo graviora mala et damna ex hac methodo derivare, si eadem in populares inducatur scholas? Etenim in hisce potissimum scholis omnes cuiusque e populo classis pueri vel a teneris annis sanctissimae nostrae Religionis mysteriis, ac praeceptionibus sedulo sunt erudiendi, et ad pietatem, morumque honestatem, et ad religionem, civilemque vivendi rationem accurate formandi. Atque in eisdem scholis religiosa praesertim doctrina ita primum in institutione et educatione locum habere, ac dominari debet, ut aliarum rerum cognitiones, quibus iuventus ibi imbuatur, veluti adventiciae appareant. Quapropter iuventus maximis exponitur periculis, nisi eius in memoratis scholis institutio arctissimo cum religiosa doctrina vinculo consocietur. Cum igitur populares scholae ad populum religiose formandum, eiusque pietatem et christianam morum disciplinam fovendam sint praesertim statutae, iccirco omnem Ecclesiae curam, sollicitudinem et vigilantiam prae ceteris educationis Institutis sibi merito atque optimo iure semper vindicarunt. Ac propterea consilia conatusque arcendi a popularibus scholis Ecclesiae potestatem, proficiscuntur ex animo eidem Ecclesiae summopere adverso, atque ex studio extinguendi in populis divinum sanctissimae fidei nostrae lumen. Quocirca Ecclesia, quae easdem fundavit scholas, summa cura studioque eas semper est prosequuta, illasque veluti potiore ecclesiasticae suae auctoritatis ac regiminis partem consideravit, et quaecumque earum ab Ecclesia seiunctio maximum eidem Ecclesiae, ipsisque scholis affert detrimentum. Ii autem omnes, qui perperam contendunt, Ecclesiam debere salutarem suam moderatricem vim erga populares scholas deponere, aut intermittere, iidem nihil aliud profecto vellent, quam ut Ecclesia contra divini sui Auctoris mandata ageret, et gravissimo officio curandi omnium hominum salutem, sibi divinitus commissio, deesset. Certe quidem ubi in quibusque locis regionibusque perniciosissimum huiusmodi vel susciperetur, vel ad exitum perduceretur consilium expellendi a scholis Ecclesiae auctoritatem<sup>3)</sup>, et iuventus misere exoneretur damno circa fidem, tunc Ecclesia non solum deberet intentissimo studio omnia conari, nullisque curis unquam parcere, ut eadem iuventus necessariam christianam institutionem et educationem habeat, verum etiam cogeretur omnes fideles monere, eisque declarare, eiusmodi scholas catholicae Ecclesiae adversas haud posse in conscientia frequentari.

Tibi autem, Venerabilis Frater, summopere gratulamur, quod catholicae Ecclesiae doctrinae quoad iuventutis institutionem educationemque firmiter inhaerens, Tuo commentario omnibus opinionibus ordinationibusque sapienter et constanter obstitisti, quae ab isto Magno Badarum Ducatu propositae fuere circa popularium scholarum reformationem, quaeque maximam

<sup>1)</sup> *Huc ref. prop. 5, 6, 40.*

<sup>2)</sup> *Huc ref. prop. 48.*

<sup>3)</sup> \* " " " 45.

christianae educationi perniciem afferunt, et veneranda Ecclesiae in tanto negotio iura omnino destruunt. Ac persuasissimum Nobis est, Te nihil umquam inexpertum esse relicturum, ut eiusdem Ecclesiae iura impavide defendas, utque ab adolescentium institutione et educatione diligentissime removeas quicquid fidei firmitatem vel leviter turbare, labefactare, aut religiosam eorumdem conscientiam corrumpere, morumque honestatem contaminare possit, quae unice a fide nostra sanctissima producit, alitur et augeatur. Summo vero afficimur consolatione, cum istius Tuae Dioecesis Clerus, suae vocationis et officii probe memor, una Tecum suam omnem in Ecclesiae, eiusque catholici populi iuribus tutandis operam impendat. Nec minori gaudio perfundimur, protereaquod iste fidelis populus optime sentiens de catholica suae prolis educatione, nihil antiquius habeat, quam ut eadem proles omnino instituatur in scholis, quae a catholica dirigantur Ecclesia.

Jam vero levantes oculos Nostros ad Dominum Deum nostrum, ab Ipso humiliter enixeque exposcimus, ut in abundantia divinae suae gratiae Tibi, Venerabilis Frater, et isti Clero populoque fidei semper propitius adesse velit, quo omnes caelesti ope roborati pro Ecclesiae suae sanctae causa sub Tuo ductu strenue dimicare pergant. Atque superni huius praesidii auspicem, et peculiaris, qua Te in Domino complectimur, benevolentiae pignus Apostolicam Benedictionem ex intimo corde profectam Tibi ipsi, Venerabilis Frater, cunctisque Clericis laicisque fidelibus Tuae vigilantiae conceditis peramanter impertimus.

Datum Romae apud S. Petrum, die XIV. Julii anno MDCCCLXIV, Pontificatus Nostri Anno Decimonono.

## \* Epistola Encyclica.

Venerabilibus Fratribus Archiepiscopis et Episcopis, aliisque locorum Ordinariis in Poloniae Regno et Russici Imperii regionibus morantibus, gratiam et communionem cum Apostolica Sede habentibus.

### Pius PP. IV.

Venerabiles Fratres, Salutem et Apostolicam Benedictionem.

Ubi Urbaniano in Collegio christianae fidei propagandae huius almae Nostrae Urbis die 24. proximi mensis Aprilis, invicto Christi martyri S. Fidei a Sigmaringa sacro, vehementer lamentati sumus, Venerabiles Fratres, miseram et nunquam satis deplorandam Poloniae Regni conditionem, et male consultum motum ibi contra Potentissimum Principem excitatum, significavimus etiam, Nos in publicis ephemeridibus legisse severissima sane consilia a Russico Gubernio suscepta non solum ad eundem motum comprimendum, verum etiam ad catholicam religionem eodem in Regno sensim extirpandam. Atque eodem tempore manifestavimus, oportere huiusmodi tristissimos nuncios indubitato modo ac maiore auctoritate comprobari, quandoquidem publicis ephemeridibus plena fides adhiberi semper nequit. Nunc vero ex pluribus variisque fide dignis testimoniis ad Nos perlatis cum incredibili animi Nostri dolore agnovimus, Venerabiles Fratres, verissimas esse acerbitates, quibus a Russico Gubernio catholica Ecclesia, eiusque ministri et cultores magis in dies divexantur ac lacerantur. Etenim certo scivimus, idem Gubernium iamdiu catholicae Ecclesiae summo opere infensum, omnesque ad funestissimum schisma pertrahere exoptans, excitatae perturbationis praetextu sanctissimam nostram religionem, omnesque catholicos quibusque modis acriter insectari. Hinc, Conventionem cum Nobis et hac S. Sede inita nunquam plenae executioni mandata, ac publicis pactis de catholica religione in Poloniae Regno tuenda plane despectis, plurimisque editis legibus et decretis rei catholicae maxime adversis, Gubernium idem nunquam intermisit catholica scripta interdiceret, et libros, ephemeridesque catholicae doctrinae omnino repugnantes, et in Christi hic in terris Vicarium, et Apostolicam hanc Sedem summo opere iniurias, atque ad Polonum praesertim populum depravandum ac-

commodatas disseminare<sup>1)</sup>, et communicationem cum Nobis, et hac Apostolica Sede praepedire<sup>2)</sup>, et iuramentum divinis legibus contrarium praescribere, et populum contra catholicos sacerdotes excitare, et prohibere, ne praedicari ac doceri queat discrimen, quod inter catholicam veritatem et schisma intercedit, et gravissimis constitutis poenis impedire, quominus aliquis ex infelici schismate emergere et ad catholicae Ecclesiae sinum redire possit. Hinc Religiosi viri ex suis Coenobiis deturbati, eorumque monasteria militaribus stationibus destinata, et catholici Episcopi a sua Dioecesi abrepti et exilio multati, et innumeri fere catholici graeci ritus subdolis quibusque machinationibus iamdiu in schisma violenter tracti, et impediti ad redeundum in catholicae Ecclesiae gremium, veluti exoptarent, ac innumerabiles etiam latini ritus catholici per mixta praesertim matrimonia catholicae Ecclesiae erepti, et pueri catholicis parentibus orbati, sub tutelae praetexto, in longinquas regiones amandati, a catholico cultu avulsi, et in schismatis discrimen adducti. Hinc innumeri cuiusque generis, aetatis, sexus et conditionis catholici summopere afflicti, et in remotissimas terras transducti, et catholicorum templa direpta, polluta, ac in cultum acatholicum, vel in militares stationes conversa, et catholici sacerdotes miserandum in modum vexati, suisque bonis spoliati, ad tristem paupertatem redacti, ac vel in exilium pulsati, vel in carcerem detrusi vel etiam necati, proptereaquod in acie vulneratis, morientibusque sacri ministerii opem, auxiliumque ferre haud omiserunt. Accedit etiam, ut cum Presbyteri, tum laici in exilium missi omni sanctissimae nostrae religionis solatio, praesidioque carere debeant, utque Lithuaniae catholicis optio data fuerit vel exsules abeundi in disiunctissimas regiones, vel deficiendi a catholica religione. Haec et alia sane lugenda a Russico Gubernio contra catholicam Ecclesiam indesinenter patrantur. Equidem Nos immenso moerore confecti lacrymas continere non possumus, cum videamus, Vos, Venerabiles Fratres, ac dilectos filios fideles catholicos omnibus illis gravissimis insecutionibus obnoxios, quibus commemoratum Gubernium catholicam fidem et religionem tum in Poloniae Regno, tum in aliis praesertim illius Imperii regionibus ad ultimum discrimen adducere conatur.

At etiam in hoc acerrimo bello a Russico Gubernio catholicae Ecclesiae, eiusque sacris iuribus, ministris, rebusque illato, alium novum prorsus in Ecclesiae fastis, et ante hunc diem inauditum ausum lamentari et exprobrare cogimur, Venerabiles Fratres. Siquidem Gubernium idem non solum Venerabilem Fratrem Sigismundum, egregium, omnique laude dignum Varsaviensem Archiepiscopum, a suo grege divulsum in longinquas regiones amandavit, verum etiam non dubitavit decernere, eundem Venerabilem Fratrem episcopali in Varsaviensem Dioecesim auctoritate et iurisdictione esse privatum, et neminem e sua Dioecesi cum ipso posse communicare, et in eius locum sufficere, veluti Dioecesis administratorem, Dilectum Filium Paulum Rzewuski eius Vicarium Generalem, et Episcopum Prusensem in partibus infidelium iam a Nobis electum ac Suffraganeum eiusdem Varsaviensis Antistitis designatum. Verba quidem desunt, Venerabiles Fratres, ad huiusmodi factum reprobandum ac detestandum. Ecquis enim non vehementissime mirabitur, cum sciat eo devenisse Russicum Gubernium, ut perpetram autemet et audeat, Episcopos, quos Spiritus Sanctus posuit regere Ecclesiam Dei, sacra eorum auctoritate ipsis a Deo tradita, et nullo prorsus modo laicae potestati unquam obnoxia privare, eosque a propriae Dioecesis regimine et procuracione amovere<sup>3)</sup>? Dum autem haec reprobamus et damnamus, eodem tempore clare aperteque declaramus, neminem memoratae ordinationi posse obedire, omnesque Varsaviensis Dioeceseos fideles debere eidem Venerabili Fratri Sigismundo sedulo obtemperare, qui verus, legitimusque est Varsaviensis Antistes.

Nihil vero dubitamus, quin idem Dilectus Filius Paulus Rzewuski sui officii probe memor huiusmodi Russici Gubernii mandato minime obsequens pergat Vicarii Generalis munere fungi sibi commisso a Venerabili Fratre

<sup>1)</sup> *Huc ref. prop. 79.*

<sup>2)</sup> *Huc ref. prop. 49.*

<sup>3)</sup> " " " 51.



Sigismundo Archiepiscopo Varsaviensi suo legitimo Antistite, eique in omnibus diligentissime obedire.

Jam vero, Venerabiles Fratres, dum caelum ac terram testes invocando, de omnibus, quae in Poloniae Regno, aliisque Russici Imperii regionibus contra catholicam Ecclesiam, eiusque sacrorum Antistites, ministros, iura, patrimonium, ac dilectos ipsius Ecclesiae filios gesta sunt et geruntur, vehementer expostulamus, et etiam atque etiam querimur persecutionem, quam Russicum Gubernium contra Ecclesiam gerere non desinit, absit, ut ullo modo probare velimus male consulto motus in Polonia misere excitatos. Omnes enim norunt quanto studio catholica Ecclesia semper inculcaverit ac docuerit, omnem animam subditam esse potestatibus sublimioribus, omnesque civili auctoritati subiectos esse, debitamque obedientiam praestare omnino debere in iis omnibus, quae Dei, eiusque Ecclesiae legibus non adversantur<sup>1)</sup>. Equidem summopere dolendum, huiusmodi motus Russico Gubernio ansam dedisse ad catholicam quotidie magis divexandam et opprimendam Ecclesiam.

Dum autem eiusmodi christianae, civilique reipublicae funestissimos motus reprobamus ac damnamus, haud possumus, quin omnibus summis populorum Principibus vehementer inculcemus, ut quantum in ipsis est, omnia conentur, ne in eos gravissima illa cadant divinae Sapientiae ad reges verba: «Quoniam data est a Domino potestas vobis, et virtus ab Altissimo, qui interrogabit opera vestra, et cogitationes scrutabitur; quoniam cum essetis ministri regni illius, non recte iudicastis, nec custodistis legem iustitiae, neque secundum voluntatem Dei ambulastis; horrende et cito apparebit vobis, quoniam iudicium durissimum his, qui praesunt, fiet; exiguo enim conceditur misericordia, potentes autem potenter tormenta patientur<sup>2)</sup>». Atque etiam omnes summos Principes maiore, qua possumus, animi Nostri contentione hortamur et rogamus, ut aliquando intelligere, animadvertere ac noscere velint, quod populi, cum a sanctissima nostra religione, eiusque salutari doctrina, atque a debita erga Deum, eiusque Ecclesiam, et leges obedientia, et a libera cum hac S. Sede communicatione amoti fuerint, tum perniciosissimis quibusque erroribus, vitiisque depravantur<sup>3)</sup>; et ideo evenit, ut iidem populi timore et pietate erga Deum sublata, snavique religionis iugo exuto, et plane abiecta obedientia, quae Deo, eiusque Ecclesiae et legibus omnino debetur, in effrenatam vivendi, agendique licentiam misere prolabantur, et ambulantes secundum sua desideria in impietatibus dominationem spernant, maiestatem blasphemant, et contra Principes insurgant, eisque obedire recusant.

In summa vero animi Nostri moestitia ob tantam malorum congeriem, quae Vos, Venerabiles Fratres, et fideles curae vestrae commissos premit, non parum certe Nos reficit et consolatur egregia vestra in Ecclesia tuenda, tantisque in laboribus, aerumnisque propter catholicam fidem perferendis virtus et constantia. Et quoniam optime nostis, beatos esse, qui persecutionem patiuntur propter iustitiam, ac pulcherrimum et gloriosissimum esse pro nomine Jesu contumeliam pati, cumque salvum fieri, qui perseveravit usque in finem, ideo nihil dubitamus, quin Vos, Venerabiles Fratres, confortati in Domino, et in potentia virtutis eius pergatis animo invicto pro Dei, eiusque sanctae Ecclesiae defensione, animarumque salute fortiter dimicare, memoria repentes, «quod non sunt condignae passionis huius temporis ad futuram gloriam, quae revelabitur in nobis<sup>4)</sup>». Atque ideo has Vobis scribimus Litteras, quibus Episcopalem vestram in tantis tolerandis angustiis fortitudinem, et in græge vestrae curae concredito vigilantiam magis magisque in Domino excitamus, ut nullis curis, nullis consiliis, nullisque laboribus parcere unquam velitis, quo fideles Vobis commissi abstinentes se ab omni specie mali, nullisque deterriti periculis, in catholicae fidei et religionis professione quotidie magis stabiles et immoti permaneant, et nunquam ab eiusdem fidei, religionisque hostibus se decipi, et in errorem induci patiantur. Ac ipsos fideles Vobis concreditos, Nobisque carissimos omni paterni animi

<sup>1)</sup> *Huc ref. prop.* 63.

<sup>3)</sup> " " " 40.

<sup>2)</sup> Sap. VI. 4—7.

<sup>4)</sup> Rom. VIII. 18.



Nostri affectu et studio monemus, exhortamur, et obtestamur, ut catholicam fidem, religionem ac doctrinam, quam singulari Dei beneficio acceperunt, constantissime profitentes, et cetera omnia posteriora existimantes per semitas mandatorum Dei sedulo ambulent, iisque omnibus instent operibus, quae caritatem vel in Deum vel in proximum praeseferunt, quaeque catholicae Ecclesiae filios omnino decent.

Persuasissimum autem Vobis sit, Nos in humilitate cordis Nostri ferventissimas diu noctuque sine intermissione clementissimo misericordiarum Patri, et Deo totius consolationis offerre preces, ut Vos induat virtute ex alto, ac divina sua dextera protegat, custodiat, defendat, et exsurgens iudicet causam suam, et Ecclesiam suam sanctam a tantis, quibus istic divexatur, calamitatibus eripiat, et inimicorum suorum superbiam elidat, eorumque contumaciam omnipotenti sua virtute prosternat, et uberrima quaeque suae Bonitatis dona super Vos et fideles Vobis traditos propitius semper effundat. Atque horum auspice, et certissimum peculiaris, qua Vos in Domino complectimur, benevolentiae pignus Apostolicam Benedictionem ex intimo corde depromptam Vobis ipsis, Venerabiles Fratres, cunctisque Clericis Laicisque fidelibus vestrae vigilantiae conceditis peramanter impertimus.

Datum ex Arce Gandulphi die 30. Julii anno 1864. Pontificatus Nostri Anno Decimonono.

Pius PP. IX.

## Litterae

Venerabili Fratri Joanni Thomae Episcopo Montis Regalis die XXIX. septembris anni MDCCCLXIV<sup>1)</sup>.

Pius PP. IX.

Venerabilis Frater, Salutem et Apostolicam Benedictionem.

Singularis Nobisque iamdiu notissimus Tuus erga Nos amor, et pietas efficit, ut vehementer gratuleris de bona valetudine, qua inter maximas acerbitates, Deo auxiliante, fruimur, veluti significas amantissimis Tuis Litteris die 17. huius mensis datis, quae Nobis gratiae admodum fuere. Perlibenter autem accepimus duo opuscula a Te conscripta, typisque edita, quorum uno, Venerabilis Frater, oppugnas iniustissimam legem istic adversus religiosas praesertim Familias propositam<sup>2)</sup>, altero vero iniquissimam pariter legem istic quoque propositam de Clericis militiae adscribendis<sup>3)</sup>, quae infandae sane leges omnibus divinis, ecclesiasticis, humanisque iuribus vel maxime adversae omnino sunt reprobandae ac damnandae.

Vehementer autem gaudemus, Te, Venerabilis Frater, pro egregia Tua religione ac sacerdotali zelo tum commemoratis opusculis, tum aliis scriptis in lucem editis, sanctissimae nostrae religionis causam et doctrinam sine intermissione strenue defendere, et nefariis inimicorum hominum consiliis conatibusque constanter obsistere. Etenim si unquam alias, in hac potissimum tanta impiorum hominum contra catholicam Ecclesiam conspiratione Episcopi, veluti optime nosis, omni studio et contentione debent fortiter praeliari praelia Domini, eiusque Sanctae Ecclesiae causam impavide propugnare.

Jam vero ex eisdem Tuis Litteris non mediocri certe voluptate novimus, Tibi magnae consolationi fuisse ultimum Prosynodalem Conventum a Te habitum, in quem convenere Canonici istius cathedralis Tui Templi, et universus istius civitatis clerus, ac centum decem istius dioeceseos parochi. Namque eodem in Conventu omnia religiosissime peracta fuere, omnesque luculentissimis verbis professi sunt, nihil sibi gratius, nihil potius esse posse, quam sanctissimam Nostram fidem et catholicae Ecclesiae doctrinam defen-

<sup>1)</sup> Huc refertur *Syllabi Propositio* 32.

<sup>2)</sup> Huc ref. prop. 53.

<sup>3)</sup> Huc ref. prop. 32.

dere, et immobili fide et observantia Nobis et huic Petri Cathedrae firmiter adhaerere. Quod quidem non leve Nobis solatium laetitiamque attulit. Equidem ex huiusmodi Congressibus summa, Deo auxiliante, in Clerum, et in christianam plebem bona redundant, et iccirco omni laude sunt dignissimi sacrorum Antistites, qui Conventus ipsos hisce praesertim asperimis temporibus provide sapienterque habere curant. Perge, Venerabilis Frater, ut adhuc fecisti, omnes Tuas curas cogitationesque in Tui gregis salutem procurandam, in Dei eiusque sanctae Ecclesiae causam tuendam, atque in pravas impiorum hominum insidias detegendas, errores profigandos, conatusque reprimendos conferre. Tibi autem persuade, peculiarem esse, qua Te in Domino prosequimur, benevolentiam.

Cuius quoque certissimum pignus accipe Apostolicam Benedictionem, quam effuso cordis affectu Tibi ipsi, Venerabilis Frater, cunctisque Clericis Laicisque fidelibus Tuae vigilantiae commissis peramanter impertimus.

Datum Romae apud S. Petrum, die XXIX. Septemb. anno MDCCCLXIV. Pontificatus Nostri Anno Decimonono.

# Appendix.

## Epistola Encyclica

ad omnes Patriarchas, Primates, Archiepiscopos, et Episcopos, data die  
XV. augusti MDCCCXXXII.

Gregorius PP. XVI.

Venerabiles Fratres, Salutem et Apostolicam Benedictionem.

Mirari vos arbitramur, quod ab imposita Nostrae humilitati Ecclesiae universae procuracione nondum Litteras ad vos dederimus, prout et consuetudo vel a primis temporibus inducta, et benevolentia in vos Nostra postulasset. Erat id quidem Nobis maxime in votis. ut dilataremus illico super vos cor Nostrum, atque in communicatione spiritus ea vos adloqueremur voce, qua confirmare Fratres in persona Beati Petri iussi fuimus<sup>1)</sup>. Verum probe nostis, quam malorum aerumnarumque procella primis Pontificatus Nostri momentis in eam subito altitudinem maris acti fuerimus, in qua, nisi dextera Dei fecisset virtutem, ex teterrima impiorum conspiratione Nos congemissetis demersos. Refugit animus tristissima tot discriminum recensione susceptum inde moerorem refricare; Patrique potius omnis consolationis benedicimus, qui, disiectis perduellibus, praesenti Nos eripuit periculo, atque, turbulentissima sedata tempestate, dedit a metu respirare. Proposuimus illico vobiscum communicare consilia ad sanandas contritiones Israel; sed ingens curarum moles, quibus in concilianda publici ordinis restitutione obruti fuimus, moram tunc Nostrae huic obiecit voluntati.

Nova interim accessit causa silentii ob factiosorum insolentiam, qui signa perduellionis iterum attollere conati sunt. Nos quidem tantam hominum perviciaciam, quorum effrenatus furor impunitate diuturna, impensaeque Nostrae benignitatis indulgentia non deliniri, sed ali potius conspiciebatur, debuimus tandem, ingenti licet cum moerore, ex collata Nobis divinitus auctoritate virga composcere<sup>2)</sup>; ex quo, prout iam probe coniciere potestis, operosior in dies instantia nostra quotidiana facta est.

Ast cum, quod ipsum iisdem ex causis distuleramus, iam possessionem Pontificatus in Lateranensi Basilica ex more institutoque maiorum adiverimus, omni demum abiecta cunctatione, ad vos properamus, Venerabiles Fratres, testemque Nostrae erga vos voluntatis epistolam damus laetissimo hoc die, quo de Virginis Sanctissimae in Coelum Assumptae triumpho sollemnia festa peragimus, ut quam Patronam ac Sospitam inter maximas quasque calamitates persensimus, Ipsa et scribentibus ad vos Nobis adstet propitia, mentemque Nostram coelesti afflatu suo in ea inducat consilia, quae Christiano Gregi futura sint quam maxime salutaria.

Moerentes quidem, animoque tristitia confecto venimus ad vos, quos pro vestro in Religionem studio, ex tanta, in qua ipsa versatur, temporum acerbitate maxime anxios novimus. Vere enim dixerimus, horam nunc esse potestatis tenebrarum ad cribrandos, sicut triticum, filios electionis<sup>3)</sup>. Vere *luxit, et defluxit terra . . . infecta ab habitatoribus suis, quia transgressi sunt leges, mutaverunt ius, dissipaverunt foedus sempiternum*<sup>4)</sup>.

<sup>1)</sup> Luc. XXII. 32.

<sup>2)</sup> Luc. XXII. 53.

<sup>3)</sup> I. Corinth. IV. 21.

<sup>4)</sup> Isaiae XXIV. 5.

Loquimur, Venerabiles Fratres, quae vestris ipsi oculis conspiciatis, quae communibus idcirco lacrymis ingemiscimus. Alacris exultat improbitas, scientia impudens, dissoluta licentia. Despicitur sanctitas sacrorum, et quae magnam vim, magnamque necessitatem possidet, divini cultus maiestas ab hominibus nequam improbat, polluitur, habetur ludibrio. Sana hinc pervertitur doctrina, erroresque omnis generis disseminantur audacter. Non leges sacrorum, non iura, non instituta, non sanctiones quaelibet disciplinae turae sunt ab audacia loquentium iniqua. Vexatur acerrime Romana haec Nostra Beatissimi Petri Sedes, in qua posuit Christus Ecclesiae firmamentum; et vincula unitatis in dies magis labefactantur, abrumpuntur. Divina Ecclesiae auctoritas oppugnatur, ipsiusque iuribus convulsis, substernitur ipsa terrenis rationibus, ac per summam iniuriam odio populorum subiicitur, in turpem redacta servitutem. Debita Episcopis obedientia infringitur, eorumque iura conculcantur. Personant horrendum in modum Academiae ac Gymnasia novis opinionum monstris, quibus non occulte amplius et cuniculis petiur Catholica Fides, sed horridum ac nefarium ei bellum aperte iam et propalam inferitur. Instituti enim exemplo Praeceptorum, corruptis adolescentium animis, ingens Religionis clades, morumque perversitas teterrima percrebuit. Hinc porro freno Religionis sanctissimae proiecto, per quam unam Regna consistunt, dominatusque vis ac robur firmatur, conspiscimus ordinis publici exitium, labem principatus, omnisque legitimae potestatis conversionem invalescere. Quae quidem tanta calamitatum congeries ex illarum in primis conspiratione Societatum est rejctenda, in quas quidquid in haeresibus, et in sceleratissimis quibusque sectis sacrilegum, flagitiosum, ac blasphemum est, quasi in sentinam quandam, cum omnium sordium concrectione confluit).

Haec, Venerabiles Fratres, et alia complura, et fortassis etiam graviora, quae in praesens percrebere longum esset, ac vos probe nostis, in dolore esse Nos iubent, acerbis sane ac diuturnis, quos in Cathedra Principis Apostolorum constitutus zelus universae Domus Dei comedat prae caeteris, opus est. Verum cum eo Nos loci positos esse agnoscamus, quo deplorare dumtaxat innumera haec mala non sufficiat, nisi et ea convellere pro viribus conitamus; ad opem fidei vestrae confugimus, vestramque pro Catholici Gregis salute sollicitudinem advocamus, Venerabiles Fratres, quorum spectata virtus ac religio et singularis prudentia et sedula assiduitas animos Nobis addit, atque in tanta rerum asperitate afflictos consolatione sustentat periuicunda. Nostrarum quippe est partium, vocem tollere, omniaque conari, ne aper de silva demoliatur vineam, neve lupi mactent gregem: Nostrum

\*) *Huc ref. §. IV. Syllabi.* — His adde, quae legimus in Ep. Encycl. b. m. Pii VIII d. d. 24. Maii 1829: „Vestrarum est partium, Venerabiles Fratres, adversus occultas illas hominum factionum societates curas convertere, qui in Deum, et Principes infensi toti in eo sunt, ut Ecclesiae labem, Regnis perniciem, orbi universo perturbationem importent, viamque ad flagitia sternant, traeno verae fidei contracto. Qui quidem cum tenebrosissimis arcani religionis improbitatem suorum coetuum, susceperant in ipsis consilia celare aditantes, gravem hac ipsa ex causa earum turpitudinum suspensionem iniecerunt, quae deinceps pro temporum asperitate, veluti e puteo abyssi, in summam rei sacrae, et publicae iacturam eruperunt. . . . Hic porro de alia ex occultis hisce societatibus haud ita pridem constituta scribere ad Vos singulatum decrevimus, quae ad adolescentium animos corrumpendos coarctat, qui in Gymnasiis, ac Lyceis instituuntur. Pravos, et qui discipulos in vias Baal deducant per doctrinas, quae secundum Deum non sunt, magistros adscisci, praecipua ipsorum ac veteratoria curatio est, cum probe noscant, ex doctorum praeceptis mentes, moresque auditorum effingi. Quo fit, ut eo iam talium adolescentium licentiam pervasisse ingemiscamus, ut religionis metu proiecto, amota disciplina morum, doctrinae purioris sanctitate oppugnata, iribus sacrae, et civilis potestatis conculationis, nullius eos neque flagitii, neque erroris, neque ausus pudeat, apud quos, vere dicere possumus cum Leone Magno (Serm. V. de Jejun. X. mensis, c. 4.), *lex est mendacium, diabolus religio, sacrificium turpitudine*. Haec Vos mala ab vestris dioecesebus propellite, Fratres, et, qua valetis, auctoritate et gratia, contendite, ut viri non litterarum scientia dumtaxat, sed vitae etiam, ac pietatis commendatione spectati rectae iuvenum institutioni praeficiantur.“ — *Cf. prop. 45—48.*

est, oves in ea dumtaxat pabula compellere, quae salutaria iisdem sint, nec vel tenui suspicione pernicioſa. Absit, Carissimi, absit, ut, quando tanta premant mala, tanta impendeant discrimina, suo desint muneri pastores, et perculti metu dimittant oves, vel, abiecta cura gregis, otio torpeant ac desidia. Agamus idcirco in unitate spiritus communem Nostram, seu verius Dei causam, et contra communes hostes pro totius populi salute una omnium sit vigilantia, una contentio.

Id porro apprime praestabitis, si, quod vestri muneris ratio postulat, attendatis vobis, et doctrinae, illud assidue revolventes animo, *universalem Ecclesiam quacumque novitate pulsari* <sup>1)</sup>, atque ex S. Agathonis Pontificis monitu <sup>2)</sup> *nihil de iis, quae sunt regulariter definita, minui debere, nihil mutari, nihil adici, sed ea et verbis, et sensibus illibata esse custodienda*. Immuta inde consistet firmitas unitatis, quae hac B. Petri Cathedra suo veluti fundamento continetur, ut unde in Ecclesias omnes venerandae communionis iura dimanant, ibi *universis et murus sit, et securitas, et portus expers fluctuum, et bonorum thesaurus innumerabilium* <sup>3)</sup>. Ad eorum itaque retundendam audaciam, qui vel iura Sanctae huius Sedis infringere conantur, vel dirimere Ecclesiarum cum ipsa coniunctionem, qua una eadem nituntur et vigent, maximum fidei in eam ac venerationis sinceræ studium inculcate, inclamantes cum S. Cypriano <sup>4)</sup>, *falso confidere se esse in Ecclesia, qui Cathedram Petri deserat, super quam fundata est Ecclesia*.

In hoc ideo elaborandum vobis est, assidueque vigilandum, ut fidei depositum custodiatur in tanta hominum impiorum conspiratione, quam ad illud diripiendum perdendumque factam lamentamur. Meminerint omnes, iudicium de sana doctrina, qua populi imbuendi sunt, atque Ecclesiae universae regimen et administrationem penes Romanum Pontificem esse, cui *plena pascendi, regendi, et gubernandi universalem Ecclesiam potestas a Christo Domino tradita fuit*, uti Patres Florentini Concilii diserte declararunt <sup>5)</sup>. Est autem singulorum Episcoporum Cathedrae Petri fidelissime adherere, depositum sancte religioseque custodire, et pascere, qui in eis est, gregem Dei. Presbyteri vero subiecti sint, oportet, Episcopis, quos *uti animae parentes suscipiendos ab ipsis esse, monet Hieronymus* <sup>6)</sup>: nec unquam obliviscantur, se vetustis etiam canonibus vetari, quidpiam in suscepto ministerio agere, ac docendi et concionandi munus sibi sumere *sine sententia Episcopi, cuius fidei populus est creditus, et a quo pro animabus ratio exigitur* <sup>7)</sup>. Certum denique firmumque sit, eos omnes, qui adversus praestitutum hunc ordinem aliquid moliantur, statum Ecclesiae, quantum in ipsis est, perturbare <sup>8)</sup>.

Nefas porro esset, atque ab eo venerationis studio prorsus alienum, qua Ecclesiae leges sunt excipiendae, sancitae ab ipsa disciplinam, qua et sacrorum procuratio, et morum norma, et iurium Ecclesiae, Ministrorumque eius ratio continetur, vesana opinandi libidine improbari, vel ut certis iuris naturae principiis infestam notari <sup>9)</sup>, vel mancarn dici atque imperfectam <sup>10)</sup>, civilique auctoritati subiectam <sup>11)</sup>.

Cum autem, ut Tridentinorum Patrum verbis utamur, constet, Ecclesiam *eruditam fuisse a Christo Jesu, eiusque Apostolis, atque a Spiritu Sancto illi omnem veritatem in dies suggerente edoceri* <sup>12)</sup>, absurdum plane est, ac maxime in eam iniuriosum, *restorationem* ac *regenerationem* quamdam obtrudi, quasi necessariam, ut eius incolunitatis et incremento consulatur, perinde ac si censi ipsa possit vel defectui, vel obscuracioni, vel aliis huiuscemodi incommodis obnoxia <sup>13)</sup>; quo quidem molimine eo spectant nova-

<sup>1)</sup> S. Coelest. PP. Ep. 21. ad Episc. Galliar.

<sup>2)</sup> S. Agatho PP. Ep. ad Imp. apud Labb. Tom. 11 pag. 235. *Ed. Mansi.*

<sup>3)</sup> S. Innocent. PP. Ep. 11. apud Coustant.

<sup>4)</sup> S. Cyprian. de unitate Eccles. — *Huc ref. prop.* 36. 37.

<sup>5)</sup> Conc. Flor. Sess. 25. In definit. apud Labb. Tom. 18. col. 528. *Ed. Venet.*

<sup>6)</sup> S. Hieron. Ep. 2. ad Nepot. a 1. 24.

<sup>7)</sup> Ex Can. Ap. 38. apud Labb. Tom. 1. pag. 33. *Ed. Mansi.*

<sup>8)</sup> *Huc ref. prop.* 34.

<sup>9)</sup> *Huc ref. prop.* 6. 40.

<sup>10)</sup> " " 5.

<sup>11)</sup> " " " 20.

<sup>12)</sup> Conc. Trid. Sess. 13. dec. de Eucharist. in prooem.

tores, ut *recentis humanae institutionis iaciantur fundamenta*, illudque ipsum eveniat, quod detestatur Cyprianus, ut, quae divina res est, *humana fiat Ecclesia*<sup>1)</sup>. Perpendant vero, qui consilia id genus machinantur, uni Romano Pontifici ex S. Leonis testimonio *Canonum dispensationem esse creditam*, ipsiusque duntaxat esse, non vero privati hominis, *de patrum regulis sanctionum* quidpiam decernere, atque ita, quemadmodum scribit S. Gelasius<sup>2)</sup>, *decreta Canonum librare, decessorumque praecepta metiri, ut quae necessitas temporum restaurandis Ecclesiis relaxanda deposcit, adhibita consideratione diligenti, temperentur*.

Hic autem vestram volumus excitatam pro Religione constantiam adversus foedissimam in Clericalem coelibatum coniurationem, quam nostis effervescere in dies latius, connitentibus cum perditissimis nostri aevi philosophis nonnullis etiam ex ipso ecclesiastico ordine, qui personae obliiti, munerisque sui, ac blanditiis abrepti voluptatum, eo licentiae proruperunt, ut publicas etiam atque iteratas aliquibus in locis ausi sint adhibere Principibus postulationes ad disciplinam illam sanctissimam perfringendam. Sed piget de turpissimis hisce conatibus longo vos sermone distingere, vestraeque potius religioni fidentes committimus, ut legem maximi momenti, in quam lascivientium tela undique sunt intenta, sartam tectam custodiri, vindicari, defendi, ex sacrorum canonum praescripto, omni ope contendatis<sup>3)</sup>.

Honorabile deinde Christianorum connubium, quod *Sacramentum magnum* nuncupavit Paulus in Christo et Ecclesia<sup>4)</sup>, communes nostras curas effligat, ne quid adversus ipsius sanctitatem, ac de indissolubili eiusdem vinculo minus recte sentiat, vel tentetur induci. Impense id iam commendat suis ad vos litteris felicis recordationis Praedecessor Noster Pius VIII.; adhuc tamen infesta eidem molimina succrescunt. Docendi itaque sunt sedulo populi, matrimonium semel rite initum dirimi amplius non posse, nexisque connubio Deum indidisse perpetuam vitae societatem, nodumque necessitudinis, qui exsolvi, nisi morte, non possit. Memores, sacris illud rebus adnumerari, et Ecclesiae proinde subiici, praestitutas de ipso eiusdem Ecclesiae leges habeant ob oculos, iisque pareant sancte, accuratèque, ex quarum executione omnino pendet eiusdem connubii vis, robur, ac iusta consociatio. Caveant, ne quod sacrorum canonum placitis, Conciliorumque decretis officiat, ulla ratione admittant, probe gnari, exitus infelices illa habitura esse coniugia, quae vel adversus Ecclesiae disciplinam, vel non propitiato prius Deo, vel solo aestu libidinis iungantur, quin de sacramento, ac de mysteriis, quae illo significantur, ulla teneat sponso cogitatio<sup>5)</sup>.

<sup>1)</sup> S. Cyprian. Ep. 52. Edit. Baluz. — *Huc ref. prop.* 80.

<sup>2)</sup> S. Gelasius PP. in Ep. ad Episcop. Lucaniae. — *Huc ref. prop.* 34.

<sup>3)</sup> *Huc ref. nota ad §. VII. Syll.*

<sup>4)</sup> Eph. V. 32. Hebr. XIII. 4.

<sup>5)</sup> *Huc ref. §. VIII. Syll.* — Non minori sollicitudine monet b. m. Pius VIII. in Ep. Encycl. d. d. 24. Maii 1829: „At pro temporum, quae nacti sumus, ratione id insuper quam maxime vestro de animarum salute studio commendandum ducimus, ut nimirum de matrimonii sanctitate solliciti eam erga ipsum gregi vestro iniiciatis religionem, ut nihil plane, quod magni huius Sacramenti dignitati detrahat, nihil quod immaculatum thorum dedecet, nihil denique quod de perpetuo connubii vinculo dubium inferat. patrari unquam contingat: id porro fiet unice, si non humani tantum ex lege, sed ex Divina regi ipsum debere, ac non terrenis, sed sacris rebus ipsum accensendum esse, ideoque Ecclesiae omnino subiici, Christianus populus accurate educeatur. Quae enim maritalis coniunctio antea non alio spectabat, quam ut stirpem ex se gigneret, in aevumque proferret, ea nunc a Christo Domino Sacramenti dignitate aucta, et coelestibus ditata numeribus, gratia perficiente naturam, non tam procreare ex se sobolem gaudet, quam educare illam Deo, et divinae religioni, atque ita veri Numinis cultores propagare adnuitur. Constat enim, matrimonii hac coniunctione, cuius Deus auctor est, perpetuam, ac summam Christi Domini cum Ecclesia coniunctionem significari, et arctissimam hanc viri uxorisque societatem Sacramentum esse, id est sacrum signum immortalis amoris Christi erga suam Sponsam. Ha ergo populos instrui, opus est, et quae Ecclesiae regulis Conciliorumque decretis sancita, quaeque damnata sunt, explicari iisdem, ut quae ad vim Sacramenti pertinent, ea perficiant, nec quae Ecclesia detestata est,

Alteram nunc persequimur causam malorum uberrimam, quibus afflicti in praesens comploramus Ecclesiam, *indifferentismum* scilicet, seu pravam illam opinionem, quae improborum fraude ex omni parte percerebuit, qualibet fidei professione aeternam posse animae salutem comparari, si mores ad recti honestique normam exigantur<sup>1)</sup>. At facili sane negotio in re per-

audeant ipsi attentare; idque qua estis pietate, doctrina, ac diligentia praediti, ut praestetis, ab Vestra religione quantum possumus vehementissime exposcimus."

<sup>1)</sup> *Huc ref. prop.* 16, 17. — Juvat addere quae docet b. m. Leo XII. in Ep. Encyclica d. d. 3. Maii 1824: „At: quorsum haec? Secta quaedam. Vobis certe non ignota. Philosophiae nomen immerito sibi usurpans, inordinatas omnium propemodum errorum phalanges e cineribus excitavit. Haec siquidem blandam pietatis et liberalitatis speciem praesefrens *Tollerantismum* (sic enim aiunt) seu *Indifferentismum* profitetur, atque extollit non modo in rebus civilibus, de quo non est Nobis sermo. verum etiam in Religionis negotio, docens. amplam unicuique libertatem a Deo factam esse. ut quae cuique secta iuxta suum privatum iudicium, vel opinio arripserit. eam quicquid sine salutis periculo amplecti, vel adoptare valeat. Contra quam delirantium hominum impietatem sic nos monet Apostolus Paulus (Rom. XVI.): «Rogo autem vos, Fratres, ut observetis eos, qui dissensiones et offendicula praeter doctrinam, quam didicistis, faciunt, et declinate ab illis. Huiuscemodi enim Christo Domino Nostro non serviunt, sed suo ventri. et per dulces sermones, et benedictiones seducunt corda innocentium.» Equidem, non novus hic error, sed novo et audaciori modo nostris hisce temporibus adversus Catholicae Fidei firmitatem. et integritatem debacchatur. Refert namque ex Rhodone Eusebius (Lib. V. Hist. Eccl.), insaniam hanc iam prolatam fuisse ab Appelle quodam secundi saeculi haeretico asserente, «non esse omnino examinandam fidem, sed unumquemque in eo, quod semel imbibisset, perstare oportere. Quippe eos, qui in Crucifixo spem suam collocassent, servandos esse affirmabat (Appelles). dummodo in bonis operibus deprehenderentur.» Retorius quoque, teste Augustino (de Haeres. n. 72), omnes haereticos recte ambulare, et vera dicere effutiebatur. *Quod ita est absurdum*, subdit S. Pater, *ut mihi incredibile videatur*. Porro Indifferentismus iste adeo percerebuisse et grassare dignoscitur, ut non solum sectas omnes, quae extra Catholicam Ecclesiam sunt, et revelationem tanquam basim et fundamentum oretenus admittunt, sed illas etiam societates quae, spreta Divina revelatione, purum *Deismum*, imo purum *Naturalismum* profitentur, illas quoque omnes *recte ambulare* impudenter contendat. Res absurda certe, idque iure ac merito, Indifferentismus Retorii S. Augustino visus est, et tamen quibusdam limitibus continebatur. At quae Tollerantia ad Deismum etiam, et Naturalismum extenditur, quae antiquis quoque haeticis improbata fuit, probari ne unquam poterit ab homine ratione utente? Attamen (heu tempora! heu mendax philosophia!) ab huiusmodi pseudo-philosophis probatur, defenditur, commendatur. — Sane non defuerunt plures egregii Scriptores, qui veram philosophiam professi monstrum hoc data opera contereere invictis argumentis aggressi sunt. Sed res est adeo per se evidens, impossibile esse, Deum summe veracem, ipsam immo summam veritatem, optimum, ac sapientissimum Provisorem, bonorumque Remuneratorem sectas omnes falsa dogmata, et saepe inter se pugnantia, ac contradictoria dictantes approbare, easque profitentibus aeterna praemia largiri, ut supervacaneum sit de his plura contexere. Habemus enim *firmiorem propheticum sermonem*, vobisque scribentes *sapientiam loquimur inter perfectos; sapientiam vero non huius saeculi, sed Dei sapientiam in mysterio*, qua nempe doceamur, ac divina fide tenemus *unum Dominum, unam fidem, unum baptisma, nec aliud nomen sub caelo datum esse hominibus, praeter nomen Jesu Christi Nazareni*, in quo oporteat nos salvos fieri; quare et profitemur, *extra Ecclesiam non esse salutem*. — Verum: *Oh altitudo divitiarum sapientiae, et scientiae Dei! Oh incomprehensibilia iudicia eius!* Deus, qui perdit sapientiam sapientum (I. Cor. I.), Ecclesiae suae inimicos supernaturalem revelationem spernentes tradidisse videtur in reprobum sensum (Rom. I. 28), et in mysterium illud iniquitatis, quod scriptum erat in fronte procacis foeminae, de qua Joannes (Apoc. I. 5). Enimvero quae maior iniquitas, quam superbos eiusmodi non solum a vera Religione descivisse, sed etiam omnigeno cavillationum genere, verbis, et scriptis plenis omni dolo, velle incautos irretire? Exurgat Deus, et hanc loquendi, scribendi, scriptaque vulgandi effrenem licentiam cohibeat. *perdat*, et ad

spicua, planeque evidenti, errorem exitiosissimum a populis vestrae curae conceditis propelletis. Admonente enim Apostolo <sup>1)</sup>, *unum esse Deum, unum fidem, unum baptismum*, extimescant, qui e religione qualibet patere ad portum beatitudinis aditum comminiscuntur, reputentque animo ex ipsius Servatoris testimonio *esse se contra Christum, quia cum Christo non sunt* <sup>2)</sup> seque infeliciter dispergere, quia cum ipso non colligunt; ideoque *absque dubio aeternum esse perituros, nisi teneant Catholicam fidem, eamque integram, inviolatamque servaverint* <sup>3)</sup>. Hieronymum audiant, qui, cum in tres partes schismate scissa esset Ecclesia, narrat, se tenacem propositi, quando aliquis rapere ipsum ad se nitebatur, constanter clamitasse: *Si quis Cathedrae Petri ungitur, meus est* <sup>4)</sup>. Falso autem sibi quis blandiretur, quod et ipse in aqua sit regeneratus. Opportune enim responderet Augustinus <sup>5)</sup>: *Ipsam formam habet etiam sarmentum, quod praecisum est de vite: sed quid illi prodest forma, si non vivit de radice?*

Atque ex hoc putidissimo indifferentismi fonte absurda illa fluit ac erronea sententia, seu potius deliramentum, asserendam esse ac vindicandam cuilibet *libertatem conscientiae*. Cui quidem pestilentissimo errori viam sternit plena illa, atque immoderata libertas opinionum, quae in sacrae, et civilis rei labem late grassatur, dictitantibus per summam impudentiam nonnullis, aliquid ex ea commodi in Religionem promanare. At *quae peior mors animae, quam libertas erroris?* inquebat Augustinus <sup>6)</sup>. Freno quippe omni adempto, quo homines contineantur in semitis veritatis, prorupte iam in praiceps ipsorum natura ad malum inclinata, vere apertum dicimus *puteum abyssi* <sup>7)</sup>, e quo vidit Joannes ascendere fumum, quo obscuratus est sol, locustis ex eo prodeuntibus in vastitatem terrae. Inde enim animorum immutationes, inde adolescentium in deteriora corruptio, inde in populo sacrorum, rerumque ac legum sanctissimarum contemptus, inde uno verbo pestis rei publicae prae qualibet capitalior, cum experientia teste vel a prima antiquitate notum sit, civitates, quae opibus, imperio, gloria florere, hoc uno malo concidisse, libertate immoderata opinionum, licentia concionum, rerum novandarum cupiditate <sup>8)</sup>.

Huc spectat deterrima illa, ac numquam satis exsecranda et detestabilis libertas artis librariae ad scripta quaelibet edenda in vulgus, quam tanto convicio audent nonnulli efflagitare ac promovere <sup>9)</sup>. Perhorrescimus, Venerabiles Fratres, intuentes, quibus monstis doctrinarum, seu potius quibus errorum portentis obruamur, quae longe ac late ubique disseminantur

nihilum redigat. — Nec minori efficacia scribit b. m. Pius VIII. in Ep. Encyclicae d. d. 24. Mai 1829: „Huc spectat teterrima Sophistarum huius aetatis machinatio, qui nullum inter diversas fidei professiones discrimen admittunt, omnibusque aeternae salutis portum ex religione qualibet patere arbitrantur, ac levitatis idcirco, et stultitiae nota eos inurunt, qui religione, quam didicerant, abiecta, aliam qualemcumque, etiam Catholicam, amplectantur. Horrendum sane impietatis monstrum, quo eadem veritati et errori, virtuti et vitio, honestati et turpitudini laus, ac praerogativa iusti rectique adscribitur. Hoc nimirum lethale est de religionum *indifferentia* systema vel ipso naturalis rationis lumine explosum, qua admonemur, ex religionibus, quae simul haud convenient, si una vera sit, alteram necessario falsam esse, nullamque extare posse tenebrarum cum luce societatem. Adversus hosce veteratores edocendi sunt populi, Venerabiles Fratres, catholicae fidei professionem unice veram esse, adclamante Apostolo unum Dominum, unum baptismum (Ephes. IV. 5): profanum ideo esse, uti inquebat Hieronymus (ep. 37. ad Damas.), qui extra hanc domum agnum comedat, et peritum regnante diluvio, qui in arca Noe non fuerit. Neque enim praeter nomen Jesu aliud nomen hominibus datum est, in quo nos oporteat salvos fieri (Act. IV. 12); et qui crediderit, salvus erit; qui non crediderit, condemnabitur (Marc. XVI. 16).“

<sup>1)</sup> Ad Ephes. IV. 5.

<sup>2)</sup> Luc. XI. 23.

<sup>3)</sup> Symbol. S. Athanas.

<sup>4)</sup> S. Hieron. Ep. 58.

<sup>5)</sup> S. August. in Psalm. contra part. Donati.

<sup>6)</sup> S. Aug. Ep. 166. Cf. *supr.* pag. 2.

<sup>7)</sup> Apocalyp. IX. 3.

<sup>8)</sup> *Huc ref. prop.* 15, 77, 78.

<sup>9)</sup> *Huc ref. prop.* 79.



ingenti librorum multitudine, libellisque, et scriptis mole quidem exiguis, malitia tamen permagnis, e quibus maledictionem egressam ilacrymamur super faciem terrae. Sunt tamen, proh dolor! qui eo impudentiae abripiantur, ut asserant pugnaciter hanc errorum colluviem inde prorumpentem satis cumulate compensari ex libro aliquo, qui in hac tanta pravitate tempestate ad Religionem ac veritatem propugnandam edatur<sup>1)</sup>. Nefas profecto est, omnique iure improbatum, patrari data opera malum certum ac maius, quia spes sit, inde boni aliquid habitum iri. Numquid venena libere spargi, ac publice vendi, comportarique, imo et obbibere debere, sanus quis dixerit, quod remedii quidpiam habeatur, quo qui utuntur, eripi eos ex interitu identidem contingat?

Verum longe alia fuit Ecclesiae disciplina in excindenda malorum librorum peste vel ab Apostolorum aetate, quos legimus grandem librorum vim publice combussisse<sup>2)</sup>. Satis sit, leges in Concilio Lateranensi V. in eam rem datas perlegere, et Constitutionem, quae deinceps a Leone X. fel. rec. Praedecessore Nostro fuit edita, ne id quod ad fidei augmentum, ac bonarum artium propagationem salubriter est inventum, in contrarium convertatur, ac Christi fidelium salutis detrimentum pariat<sup>3)</sup>. Id quidem et Tridentinis Patribus maxime curae fuit, qui remedium tanto huic malo adhibuere, edito saluberrimo decreto de Indice librorum, quibus impura doctrina contineretur, conficiendo<sup>4)</sup>. *Pugnandum est acriter*, inquit Clemens XIII. fel. rec. Praedecessor Noster in suis de noxiorum librorum proscriptione encyclicis litteris<sup>5)</sup>, *pugnandum est acriter, quantum res ipsa exflagitat, et pro viribus tot librorum mortifera exterminanda perniciēs: nunquam enim materia subtrahatur erroris, nisi pravitate facinorosa elementa in flammis combusta depereant*. Ex hac itaque constanti omnium aetatum sollicitudine, qua semper Sancta haec Apostolica Sedes suspectos et noxios libros damnare, et de hominum manibus extorquere enisa est, patet luculentissime, quantopere falsa, temeraria, eidemque Apostolicae Sedi iniuriosa, et foecunda malorum in Christiano Populo ingentium sit illorum doctrina, qui nedum censuram librorum veluti gravem nimis, et onerosam reiiciunt, sed eo etiam improbitatis progrediuntur, ut eam praedicent a recti iuris principiis abhorrere, iusque illius decernendae, habendaeque audeant. Ecclesiae denegare.

Cum autem circumlatis in vulgus scriptis doctrinas quasdam promulgari acceperimus, quibus debita erga Principes fides atque submissio labefactatur, facesque perduellionis ubique incenduntur: cavendum maxime erit, ne populi inde decepti a recti semita abducantur<sup>6)</sup>. Animadvertant omnes, non esse, iuxta Apostoli monitum, *potestatem nisi a Deo: quae autem sunt, a Deo ordinatae sunt. Itaque qui resistit potestati, Dei ordinationi resistit, et qui resistunt, ipsi sibi damnationem acquirunt*<sup>7)</sup>. Quocirca et divina et humana iura in eos clamant, qui turpissimis perduellionis seditionumque machinationibus a fide in Principes desciscere, ipsosque ab imperio deturbare conantur.

Atque hac plane ex causa, ne tanta se turpitudine foedarent veteres Christiani, sacientibus licet persecutionibus, optime tamen eos de Imperatoribus, ac de Imperii incolumitate meritis fuisse constat, idque nedum fide in iis, quae sibi mandabantur Religioni non contraria, accurate promptaque perficiendis, sed et constantia, et effuso etiam in praeliis sanguine luculentissime comprobasse. *Milites Christiani*, ait S. Augustinus<sup>8)</sup>, *servierunt Imperatori infideli; ubi veniebat ad causam Christi, non agnoscebant, nisi illum, qui in coelis erat. Distinguebant Dominum aeternum a Domino temporali, et tamen subditi erant propter Dominum aeternum etiam Domino temporali*. Haec quidem sibi ob oculos proposuerat Mauritius Martyr invi-

<sup>1)</sup> Huc ref. prop. 11, 12.

<sup>2)</sup> Act. Apost. XIX.

<sup>3)</sup> Act. Conc. Lateran. V. sess. 10. ubi refertur Const. Leonis X. Legenda est, anterior Constitutio Alexandri VI. *Inter multiplicēs*, in qua multa ad rem.

<sup>4)</sup> Conc. Trid. Sess. 18. et 25.

<sup>5)</sup> Lit. Clementis XIII. *Christianae*. 25. Nov. 1766.

<sup>6)</sup> Huc ref. prop. 63.

<sup>7)</sup> Ad Rom. XIII. 1, 2

<sup>8)</sup> S. Aug. in Psalt. 124. n. 7.

ctus, Legionis Thebanæ Primicerius, quando, uti S. Eucherius refert, hæc respondit Imperatori<sup>1)</sup>: *Milites sumus, Imperator, tui, sed tamen servi, quod libere confitemur, Dei . . . Et nunc non nos hæc ultima vitæ necessitas in rebellionem coegit: tenemus ecce arma, et non resistimus, quia mori, quam occidere satius volumus.* Quæ quidem veterum Christianorum in Principes fides eo etiam illustrior effulget, si perpendatur cum Tertulliano<sup>2)</sup>, tunc temporis Christianis non defuisse vim numerorum, et copiarum, si hostes exertos agere voluissent. *Hesterni sumus, inquit ipse, et vestra omnia implevimus, Urbes, Insulas, Castella, Municipia, Conciliabula, Castra ipsa, Tribus, Decurias, Palatium, Senatum. Forum . . . Cui bello non idonei, non prompti fuissetus, etiam impares copiis, qui tam libenter trucidamur, si non apud istam disciplinam magis occidi liceret, quam occidere? . . . Si tanta vis hominum in aliquem Orbis remoti sinum abrupissemus a vobis, suffudisset utique pudore Dominationem vestram tot qualiumcumque amissio civium, immo et ipsa destituitioe punisset. Procul dubio expavissetis ad solitudinem vestram: . . . quaesissetis, quibus imperaretis: plures hostes, quam cives vobis remansissent: nunc autem pauciores hostes habetis præ multitudine Christianorum.*

Praeclara hæc immobilis subiectionis in Principes exempla, quæ ex sanctissimis Christianæ Religionis praeceptis necessario proficiscebantur, detestandam illorum insolentiam, et improbitatem condemnant, qui projecta, effrenataque procacis libertatis cupiditate aestuantes, toti in eo sunt, ut iura quæque Principatuum labefactent, atque convellant, servitutem sub libertatis specie populis illaturi. Huc sane scelestissima deliramenta, consiliaque conspirarunt Waldensium, Beguardorum, Wiclefistarum, aliorumque huiusmodi filiorum Belial, qui humani generis sordes, ac dedecora fuere, merito idcirco ab Apostolica hac Sede toties anathemate confixi. Nec alia profecto ex causa omnes vires intendunt veteratores isti, nisi ut cum Luthero ovantes gratulari sibi possint, *liberos se esse ab omnibus*: quod ut facilius celeriusque assequantur, flagitiosa quaelibet audacissime aggrediuntur.

Neque laetiora et Religioni, et Principatui ominari possemus ex eorum votis, qui Ecclesiam a Regno separari, mutuamque Imperii cum Sacerdotio concordiam abrumpi discipiunt<sup>3)</sup>. Constat quippe, pertimesci ab impudentissimæ libertatis amatoribus concordiam illam, quæ semper rei et sacrae et civili fausta extitit ac salutaris.

At ad ceteras acerbissimas causas, quibus solliciti sumus, et in communi discrimine dolore quodam angimur præcipuo, accessere consociationes quaedam, statique coetus, quibus, quasi agmine facto cum cuiuscumque etiam falsæ religionis ac cultus sectatoribus, simulata quidem in religionem pietate, vere tamen novitatis, seditionumque ubique promovendarum cupidine, libertas omnis generis prædicatur, perturbationes in sacram et civilem rem excitantur, sanctior quaelibet auctoritas discernitur<sup>4)</sup>.

Hæc perdolenti sane animo, fidentes tamen in Eo, qui imperat ventis et facit tranquillitatem, scribimus ad vos, Venerabiles Fratres, ut induti scutum fidei contentandis præliari strenue praelia Domini. Ad vos potissimum pertinet, stare pro muro contra omnem altitudinem extollentem se adversus scientiam Dei. Exerite gladium spiritus, quod est verbum Dei, habeantque a vobis panem, qui esuriunt iustitiam. Adsciti, ut sitis cultores navi in vinca Domini, id unum agite, in hoc simul laborate, ut radix quaelibet amaritudinis ex agro vobis commisso evellatur, omnique enecato semine vitiorum convalescat ibi seges laeta virtutum. Eos in primis affectu paterno complexi, qui ad sacras præsertim disciplinas, et ad philosophicas quaestiones animum appulser, hortatores, auctoresque iisdem sitis, ne solius ingenii sui viribus freti imprudenter a veritatis semita in viam abeant impiorum. Meminerint, Deum esse *sapientiae ducem, emendatorumque sapientium*<sup>5)</sup>, ac fieri non posse, ut sine Deo Deum discamus, qui per verbum docet ho-

<sup>1)</sup> S. Eucher. apud Ruinart. Act. SS. MM. de SS. Maurit. et Soc. n. 4.

<sup>2)</sup> Tertull. in Apologet. Cap. 37.

<sup>3)</sup> *Huc ref. prop. 55. Cf. supr. pag. 2.*

<sup>4)</sup> *Huc ref. §. IV. Syllabi. Cf. pag. 162.*

<sup>5)</sup> Sap. VII. 15.

mines scire Deum<sup>1)</sup>. Superbi, seu potius insipientis hominis est, fidei mysteria, quae exsuperant omnem sensum, humanis examinare ponderibus, nostraque mentis rationi confidere, quae naturae humanae conditione debilis est, et infirma<sup>2)</sup>.

Ceterum communibus hisce votis pro rei et sacrae, et publicae incolunitate Carissimi in Christo Filii Nostri Viri Principes sua faveant ope, et auctoritate, quam sibi collatam considerent non solum ad mundi regimen, sed maxime ad Ecclesiae praesidium. Animadvertant sedulo, pro illorum imperio et quiete geri, quidquid pro Ecclesiae salute laboratur; imo pluris sibi suadeant fidei causam esse debere, quam Regni, magnumque sibi esse perpendant, dicimus cum S. Leone Pontifice, *si ipsorum diademati de manu Domini etiam fidei addatur corona*. Positi quasi parentes, et tutores populorum, veram, constantem, opulentam iis quietem parient, et tranquillitatem, si in eam potissimum curam incumbant, ut incolumis sit Religio et pietas in Deum, qui habet scriptum in femore: *Rex Regum, et Dominus dominantium*.

Sed ut omnia haec prospere ac feliciter eveniant, levemus oculos manusque ad Sanctissimam Virginem Mariam, quae sola universas haereses interemit, Nostraeque maxima fiducia, imo tota ratio est spei Nostrae<sup>3)</sup>. Suo Ipsa patrocinio in tanta Dominici gregis necessitate studiis, consiliis, actionibusque Nostris exitus secundissimos imploret. Id et ab Apostolorum Principe Petro, et ab eius Coapostolo Paulo humili prece efflagitemus, ut stetis omnes pro muro, ne fundamentum aliud ponatur praeter id, quod positum est. Hac iucunda spe freti, confidimus, Auctorem consummatoremque fidei Jesum Christum consolaturum tandem esse nos omnes in tribulationibus, quae invenerunt Nos nimis, coelestisque auxilii auspicem Apostolicam Benedictionem, vobis, Venerabiles Fratres, et ovibus vestrae curae traditis peramanter impertimur.

Datum Romae apud S. Mariam Maiorem XVIII. Kalendas Septembris die sollemni Assumptionis eiusdem B. V. Mariae Anno Domini Incarnationis MDCCCXXXII. Pontificatus Nostri Anno II.

## Epistola Encyclica

ad omnes Patriarchas, Primates, Archiepiscopos, et Episcopos, data die XXV. iunii MDCCCXXXIV.

Gregorius PP. XVI.

Venerabiles Fratres, Salutem, et Apostolicam Benedictionem.

Singulari Nos affecerant gaudio illustria fidei, obedientiae, ac religionis testimonia, quae de exceptis ubique alacriter Encyclicis Nostris litteris datis die 15. Augusti anni 1832 perferebantur, quibus sanam, et quam sequi unice fas sit, doctrinam de propositis ibidem capitibus pro Nostri officii munere Catholico Gregi universo denunciavimus. Nostrum hoc gaudium auxerunt editae in eam rem declarationes a nonnullis ex iis, qui consilia illa, opinionumque commenta, de quibus querebamur, probaverant, et eorum fautores, defensoresque incaute se gesserant. Agnoscebamus quidem, nondum sublatum malum illud, quod adversus rem et sacram et civilem adhuc conflari, impudentissimi libelli in vulgus dispersi, et tenebrosae quaedam machinationes manifesto portendebant, quas ideo, missis mense Octobri ad Venerabilem Fratrem Episcopum Rhedonensem litteris, graviter improbavimus. At anxii Nobis, maximeque ea de re sollicitis pergratum sane, ac iucundum extitit, illum ipsum, a quo praecipue id nobis moeroris inferebatur, missa ad Nos declaratione die 11. Decembris anni superioris, diserte confirmasse, se doctrinam Nostris Encyclicis litteris traditam *unice et absolute* sequi, nihilque ab illa alienum aut scripturum se esse, aut probaturum. Dilatavimus illico viscera, paternae caritatis ad Filium, quem Nostris monitis permotum lucu-

<sup>1)</sup> S. Irenaeus Lib. 14. Cap. 10.

<sup>2)</sup> *Huc ref prop.* 8, 9.

<sup>3)</sup> Ex S. Bernardo Serm. de Nat. B. M. V. §. 7.

lentiora in dies documenta daturum fore confidere debueramus, quibus certius constaret, Nostro ipsum iudicio et voce et re paruisse.

Verum, quod vix credibile videbatur, quem tantae benignitatis affectu exceperamus, immemor ipse Nostrae indulgentiae cito et proposito defecit, bonaque illa spes, quae de *praeceptionis nostrae fructu* Nos tenuerat, in irritum cessit, ubi primum, celato quidem nomine, sed publicis patefacto monumentis, nuper traditum ab eodem typis, atque ubique pervulgatum novimus libellum Gallico idiomate, mole quidem exiguum, pravitate tamen ingentem, cui titulus „*l'avoies d'un Croquant*.”

Horruimus sane, VV. FF., vel ex primo oculorum obtutu, Auctorisque caecitatem miserati intelleximus, quoniam scientia prorumpat, quae non secundum Deum sit, sed secundum mundi elementa. Enimvero contra fidem sua illa declaratione solemniter datam, captiosissimis ipse ut plurimum verborum, fictionumque involucris oppugnandam, evertendamque suscepit catholicam doctrinam, quam memoratis Nostris litteris, tum de debita erga Potestates subiectione, tum de arcenda a populis exitiosa *Indifferentismi* contagione, deque frenis iniiciendis evaganti opinionum, sermonumque licentiae, tum demum de damnanda omnimoda conscientiae libertate, tetrerrimaque societatum, vel ex cuiuscumque falsae religionis cultoribus, in sacrae et publicae rei perniciem conflatarum conspiratione, pro auctoritate humilitati Nostrae tradita definivimus.

Refugit sane animus ea perlegere, quibus ibidem Auctor vinculum quodlibet fidelitatis subiectionisque erga Principes dirumpere conatur<sup>1)</sup>, face undequeque perduellionis immissa, qua publici ordinis clades, Magistratum contemptus, legum infractio grassetur, omniaque et sacrae et civilis potestatis elementa convellantur. Hinc novo et iniquo commento potestatem Principum, veluti divinae legi infestam, imo *opus peccati, et Satanæ potestatem* in calumniae portentum traducit, Praesidibusque Sacrorum easdem, ac Imperantibus turpitudinis notas inurit ob criminum molitionumque foedus, quo eos somniat inter se adversus Populorum iura coniunctos. Neque tanto hoc ausu contentus omnigenam insuper opinionum, sermonum, conscientiaeque libertatem obtrudit<sup>2)</sup>, militibusque ad eam a tyrannide, ut ait, liberandam dimicaturis fausta omnia ac felicia comprecatur, coetus, ac consociationes furiali aestu ex universo qua patet Orbe advocat, et in tam nefaria consilia urgens atque instans compellit, ut eo etiam ex capite monita praescriptaque Nostra proculcata ab ipso sentiamus.

Piget cuncta hic recensere, quae pessimo hoc impietatis et audaciae foetu ad divina humanae omnia perturbanda congeruntur. Sed illud praesertim indignationem excitat, religionique plane intolerandum est, divinas praescriptiones tantis erroribus adserendis ab Auctore afferri, et incautis venditari, eumque ad populos lege obedientiae solvendo, perinde ac si a Deo missus et inspiratus esset, postquam in sacratissimo Trinitatis Augustae nomine praefatus est, Sacras Scripturas ubique obtendere, ipsarumque verba, quae verba Dei sunt, ad prava huiusmodi deliramenta inculcanda callide audacterque detorquere, quo fidentius, uti inquit S. Bernardus, *pro luce tenebras offundat, et pro melle, vel potius in melle venenum propinet, novum cuedens populis evangelium, aliudque ponens fundamentum praeter id, quod positum est.*

Verum tantam hanc sanae doctrinae illatam perniciem silentio dissimulare ab Eo vetatur, qui speculatores Nos posuit in Israel, ut de errore illos moncamus, quos Auctor et Consummator fidei Jesus Nostrae curae concredidit.

Quare auditis nonnullis ex Venerabilibus Fratribus Nostris S. R. E. Cardinalibus, motu proprio, et ex certa scientia, deque Apostolicae potestatis plenitudine memoratum librum, cui titulus „*l'avoies d'un Croquant*,” quo per impium Verbi Dei abusum populi corrumpuntur ad omnis ordinis publici vincula dissolvenda, ad utramque auctoritatem labefactandam, ad seditiones in imperiis, tumultus, rebellionisque excitandas, fovendas, roborandas, librum ideo propositiones respective falsas, calumniosas, temerarias, inducentes in

<sup>1)</sup> *Huc ref. prop. 63.*

<sup>2)</sup> *Huc ref. prop. 79.*

anarchiam, contrarias Verbo Dei, impias, scandalosas, erronéas, iam ab Ecclesia praesertim in Waldensibus, Wiclefitis, Hussitis, aliisque id generis haereticis damnatas continentem, reprobamus, damnamus, ac pro reprobo et damnato in perpetuum haberi volumus, atque decernimus.

Vestrum nunc erit, Venerabiles Fratres, Nostri hisce mandatis, quae rei et sacrae et civilis salus et incolumitas necessario efflagitat, omni contentione obsecundare, ne scriptum istiusmodi e latebris ad exitum emissum eo fiat perniciosius, quo magis vesanae novitatis libidini velificatur, et late ut cancer serpit in populis. Muneris vestri sit, urgere sanam de tanto hoc negotio doctrinam, valritiemque novatorum patefacere, acriusque pro Christiani Gregis custodia vigilare, ut studium religionis, pietas actionum, pax publica floreat, et augeantur feliciter. Id sane a vestra fide, et ab impensa vestra pro communi bono instantia fidenter opperimur, ut Eo iuvante, qui Pater est luminum, gratulemur, (dicimus cum S. Cypriano) *fuisse intellectum errorem, et retusum, et ideo prostratum, quia agnitum, atque detectum.*

Ceterum legendum valde est, quonam prolabantur humanae rationis deliramenta, ubi quis novis rebus studeat, atque contra Apostoli monitum nitatur *plus sapere, quam oporteat sapere*, sibiue nimium praefidens veritatem quaerendam autemet extra Catholicam Ecclesiam, in qua absque vel levissimo erroris coeno ipsa invenitur, quaeque idcirco *columna ac firmamentum veritatis* appellatur et est<sup>1)</sup>. Probe autem intelligitis, Venerabiles Fratres, Nos hic loqui etiam de fallaci illo haud ita pridem invecto Philosophiae systemate plane improbando, quo ex proiecta et effrenata novitum cupiditate veritas, ubi certo consistit, non quaeritur, sanctisque et Apostolicis traditionibus posthabitis, doctrinae aliae inanes, futes, incertaeque, nec ab Ecclesia probatae adsciscuntur, quibus veritatem ipsam fulciri, ac sustineri vanissimi homines perperam arbitrantur<sup>2)</sup>.

Dum vero pro delata divinitus Nobis sanae doctrinae cognoscendae, decernendae, custodiendaeque cura ac sollicitudine haec scribimus, peracerbum ex Filii errore vulnus cordi Nostro inflictum ingemiscimus, neque in summo, quo inde conficimur, moerore spes ulla est consolationis, nisi idem in vias revocetur iustitiae. Levemus idcirco simul oculos et manus ad Eum, qui *sapientiae dux est et emendator sapientium*, Ipsumque multa prece rogemus, ut dato illi corde docili et animo magno, quo vocem audiat Patris amantissimi et moerentissimi, laeta ab ipso Ecclesiae, laeta Ordini vestro, laeta Sanctae huic Sedi, laeta Humilitati Nostrae properentur. Nos certe faustum ac felicem illum ducemus diem, quo filium hunc in se reversum paterno sinu complecti Nobis contingat, cuius exemplo magna in spe sumus, fore ut resipiscant ceteri, qui eo auctore in errorem induci potuerunt, adeo ut una apud omnes sit pro publicae et sacrae rei incolumitate consensio doctrinarum, una consiliorum ratio, una actionum studiorumque concordia. Quod tantum bonum ut supplicibus votis Nobiscum a Domino exoretis, abs vestra pastorali solitudine requirimus et expectamus. In id autem operis divinum praesidium adprecantes, auspice ipsius Apostolicam Benedictionem Vobis, Gregibusque Vestris peramanter impertimur.

Datum Romae apud S. Petrum VII. kal. Julias anno MDCCCXXXIV. Pontificatus Nostri Anno IV.

Gregorius PP. XVI.

<sup>1)</sup> Huc ref. prop. 16, 21.

<sup>2)</sup> Huc ref. §. II. Syllabi.

## Damnatio et prohibitio

Operum Georgii Hermes in tribus Tomis Germanica lingua editorum, sub titulis latine redditus: I. *Introductio in Theologiam Christiano-Catholicam . . . Pars Prima . . . Monasterii* 1819. II. *Introductio in Theologiam Christiano-Catholicam . . . Pars altera . . . Monasterii* 1829. III. *Dogmatica Christiano-Catholica . . . Pars Prima . . . Monasterii* 1834.

### Gregorius PP. XVI.

Ad perpetuam rei memoriam.

Dum acerbissimas ingemiscimus Catholicae Religionis calamitates et iacturas, ex teterrimo, diuturnoque bello, quo nefarii homines, apertique Ecclesiae hostes, coacto undique agmine, totis viribus, totisque artibus, tum armis, tum calumniis, tum contumeliis et maledictis, tum seditiosis denique, sacrilegisque libellis, eam, si fieri posset, prorsus exanimare ac destruere adnituntur: dumque immanem eorum illacrymantes execramur barbariem, qui propterea in Regularium Claustra, Religiososque Viros diabolica furentes insania, ad eos penitus rapinis, incendiis, caedibusque perdendos, Divina omnia et humana violare non desinunt; ad augendas, quibus diu noctuque ob id premimur angustias, illud etiam calamitosissimum, ac summopere deplorandum accedit, quod inter eos, qui pro Religione editis operibus certant, nonnulli simulate se intrudere audeant, qui similiter pro eadem videri volunt et ostentant se dimicare, ut retenta religionis specie, veritate autem despecta, facilius possint per *philosophiam*, seu per vanas eorum philosophicas commentationes, et *inanem fallaciam*, incautos seducere, atque pervertere, hinc et populos decipere, fidentiusque inimicis palam saevientibus adiutrices porrigere manus<sup>1)</sup>.

Quapropter ut Nobis impiac, et insidiosae quorundam horum Scriptorum molitiones innotuerunt, non distulimus per Nostras Encyclicas, aliasque Apostolicas Litteras, callida eorum et prava denunciare consilia, erroresque damnare, simul et exitiales patefacere fraudes, quibus divinam Ecclesiae constitutionem et ecclesiasticam disciplinam, immo et totum ipsum publicum ordinem funditus evertere vaferrime contendunt. Et quidem tristissimo facto comprobatum est, eos, deposito tandem simulationis velo, perduellionis vexillum contra quancumque a Deo constitutam potestatem alte iam extulisse.

Verum non haec sola subest gravissima lugendi causa. Praeter enim eos, qui, omnium Catholicorum scandalo, se perduellibus devoverunt, ad amaritudinum Nostrarum cumulum, in theologicum etiam stadium prodire videmus, qui novitatis cupidine et aestu *semper discentes et nunquam ad scientiam veritatis pervenientes*, magistri existunt erroris, quia veritatis discipuli non fuerunt. Peregrinis quippe, improbandisque doctrinis sacra ipsi inficiunt studia, et publicum etiam, si quod tenent in Scholis et Academiis, docendi magisterium profanare non dubitant, ipsumque, quod tueri se iactant, sacratissimum adulterare dignoscuntur fidei depositum. Atque inter huiusmodi erroris magistros, ex constanti, et fere communi per Germaniam fama adnumeratur Georgius Hermes, utpote qui audacter a regio, quem universa Traditio et Ss. Patres in exponendis ac vindicandis fidei veritatibus strare, tramite deflectens, quin et superbe contemnens et damnans, tenebrosam ad errorem omnigenum viam molitur in Dubio positivo tamquam basi omnis theologiae inquisitionis, et in principio, quod statuit, rationem principum normam, ac unicum medium esse, quo homo assequi possit supernaturalium veritatum cognitionem<sup>2)</sup>. Quae cum ex plurium Germaniae Theologorum, sacrorumque Ecclesiae Pastorum denunciationibus, reclamationibus et expostulationibus ad Nostras pervenerunt aures, ne credito Nobis Apostolatus officio, ac sacrosancti fidei depositi custodiendi mueri deessemus,

<sup>1)</sup> *Huc ref. §. II. Syllabi.*

<sup>2)</sup> *Huc ref. prop. 4, 8.*

statim curavimus, ut Hermesii opera ad Sanctam Sedem mitterentur examinanda; quod et factum est. Sunt autem sequentia (Germanice edita):

I. Einleitung in die Christkatholische Theologie, von Georg Hermes, Professor der Dogmatischen Theologie an der Universität zu Münster. Erster Theil. Philosophische Einleitung. Münster in der Coppenrath'schen Buch- und Kunsthandlung. 1819. — II. Einleitung in die Christkatholische Theologie, von Georg Hermes, Doctor der Theologie und Philosophie, Professor der Theologie an der Rheinischen Friedrich-Wilhelms-Universität Bonn, und Domkapitular der Metropolitankirche zu Köln. Zweiter Theil. Positive Einleitung. Erste Abtheilung. Münster in der Coppenrath'schen Buch- und Kunsthandlung. 1829. — III. Christkatholische Dogmatik, von Georg Hermes, Doctor der Theologie und Philosophie, Professor der Theologie an der Rheinischen Friedrich-Wilhelms-Universität Bonn, und Domkapitular der Metropolitankirche zu Köln, nach dessen Tode herausgegeben von Dr. J. H. Achterfeldt, ordentl. Professor der Theologie an der Universität und Inspector des Katholisch-Theologischen Convictoriums zu Bonn. Erster Theil. Münster, in der Coppenrath'schen Buch- und Kunsthandlung. 1834.

Videlicet Latine:

I. Introductio in Theologiam Christiano-Catholicam, auctore Georgio Hermes, Theologiae Dogmaticae in Academia Monasteriensi Professore. Pars Prima, introductionem philosophicam continens. Monasterii, ex Biblio- atque Iconopolio Coppenrath. 1819. — II. Introductio in Theologiam Christiano-Catholicam, auctore Georgio Hermes, Theologiae et Philosophiae Doctore, in Rhenana Friderico-Wilhelmiana Academia Bonnensi Theologiae Professore, et Capitulari Cathedrali Ecclesiae Metropolitanae Coloniensis. Pars altera, introductionem positivam continens. Monasterii, ex Biblio- atque Iconopolio Coppenrath. 1829. — III. Dogmatica Christiano-Catholica, auctore Georgio Hermes, Theologiae et Philosophiae Doctore, in Rhenana Friderico-Wilhelmiana Academia Bonnensi Theologiae Professore, et Capitulari Cathedrali Ecclesiae Metropolitanae Coloniensis, post eius mortem edita a Dr. J. H. Achterfeldt, in Academia Theologiae Professore Ordin., ac Catholici Convictorii Theologici Bonnensis Inspectore. Pars Prima<sup>1)</sup>. Monasterii, ex Biblio- atque Iconopolio Coppenrath. 1834.

Hos igitur libros tradi iussimus Theologis Germanicae linguae peritissimis omni ex parte diligentissime perscrutandos, qui praecipua ex eisdem

<sup>1)</sup> His adde Decretum S. Congregationis Indicis d. d. 7. Jan. 1836: „Apostolicis litteris datis die 26. Septembris anno superiori a sanctissimo D. N. Gregorio divina providentia PP. XVI. praeter primam et secundam partem *Introductionis in Theologiam Christiano-Catholicam* a Georgio Hermes conscriptae, aliud ipsius Hermesii opus, cui titulus „*Dogmatica Christiano-Catholica*“ damnatum fuit. Universum hoc opus *Dogmaticae Christiano-Catholicae*, quod ad eam usque diem per Doctorem J. H. Achterfeldt post Hermesii obitum pervulgatum fuerat, examinandum diligentissime, adscitis etiam Theologis Germanicae linguae peritissimis, ap- prime curaverat eadem Sanctitas sua, antequam in Congregatione Eminentissimorum S. R. E. Cardinalium in tota Republica Christiana Generalium Inquisitorum coram Se habita damnandum illud decerneret, prout memoratis Apostolicis litteris Ecclesiae universae denunciatum est. Cum vero in exscribendo titulo illius operis *Dogmaticae Christiano-Catholicae* una cum Prima parte recensitae non fuerint Secunda et Tertia, eodem titulo, iisdem typis, et eodem anno editae, licet et ipsae in examen deductae fuissent, uti facto constat ex doctrinarum in iisdem traditarum mentione, quae in Apostolicis litteris facta perlegitur: ideoque idem Sanctissimus Dominus noster ad dubium quodlibet praecedendum de damnatione integri operis eo tempore editi, atque ea, qua par est, indicii maturitate rite expensi, mandavit, hoc decreto speciatim declarari, edici, et denunciari, memoratis Apostolicis litteris diei 26. Septembris anno 1835 damnatum ac reprobatum fuisse, atque in Indicem librorum prohibitorum esse referendum integrum opus, cuius titulus Germanice: *Christkatholische Dogmatik von Georg Hermes etc. (ut supra)*. Item iisdem titulo, typis, et anno: *Zweiter Theil*. Item iisdem titulo, typis, et anno: *Dritter Theil. Erste Abtheilung*. — Latine autem: *Dogmatica Christiano-Catholica, auctore Georgio Hermes etc. (ut supra)*. Item iisdem titulo, typis, et anno: *Pars secunda*. Item iisdem titulo, typis, et anno: *Pars tertia, Sectio prima*. — Hoc porro de-

notanda loca exciperent, longo etiam, si opus fuisset, orationis tractu, prout sensuum, verborumque contextus exigere videretur, eaque in latinum versa accuratis notarent animadversionibus: quae omnia sedulo, et consideratissime praestiterunt, atque cum iam vulgata fama inveniuntur omnino concordēs. Praeterea eadem excerpta loca una cum censoriis memoratorum Theologorum notationibus tradita sunt aliis etiam S. Theologiae magistris ad Catholicam trutinam iterum revocanda; et omnes unanimi consensione convenerunt, illis in locis contineri doctrinas absonas a Catholicarum veritatum principiis, plura reperiri perperam disputata, plura ex ambiguo dicta, plura flexiloequa et obscura ad implicandam et vitiandam Catholicorum Dogmatum intelligentiam arte et apte concinnata, et ut plurimum ex Aatholicorum commentis, erroribusque congesta. Tandem rem totam ex integro discutiendam et examinandam deferri volumus ad Venerabiles Fratres Nostros S. R. E. Cardinales in tota Republica Christiana Inquisitores Generales. Hi autem omni studio, prout rei gravitas postulabat, cuncta et singula expendentes, post maturam discussionem in Congregatione coram Nobis habita, diiudicarunt, evanescere auctorem in cogitationibus suis, pluraque in dictis operibus contexere absurda, et a doctrina Catholicae Ecclesiae aliena; praesertim vero circa naturam fidei, et credendorum regulam: circa Sacram Scripturam, Traditionem, Revelationem, et Ecclesiae Magisterium: circa motiva credibilitatis: circa argumenta, quae existentia Dei adstrui, confirmarique consuevit: circa ipsius Dei essentiam, sanctitatem, iustitiam, libertatem, eiusque finem in operibus, quae a Theologis vocantur *ad extra*: nec non circa gratiae necessitatem, eiusdem ac donorum distributionem, retributionem praemiorum, et poenarum infictionem: circa protoparentum statum, peccatum originale, ac hominis lapsi vires; eosdemque libros, tamquam continentes doctrinas, et propositiones respective falsas, temerarias, captiosas, in scepticismum et indifferentismum inducentes, erroneas, scandalosas, in Catholicas Scholas iniurias, fidei divinae eversivas, haeresim sapientes, ac alias ab Ecclesia damnatas, prohibendos et damnandos esse censuerunt.

Nos itaque, auditis praefatorum Cardinalium suffragiis, et omnibus plene perpensis, de eorum consilio, ac etiam Motu proprio, et ex certa scientia, ac matura deliberatione Nostris, deque Apostolicae potestatis plenitudine, praedictos libros ubicumque, et quocumque idiomate, seu quavis editione, aut versione hucusque impressos, aut in posterum, quod absit, imprimendos, tenore praesentium damnamus, et reprobamus, ac in Indicem librorum prohibitorum referri mandamus; hortantes, et obtestantes in Domino Venerabiles Fratres Patriarchas, Archiepiscopos, et Episcopos, aliosque Locorum Ordinarios, ut memores districti, ac *durissimi iudicii*, quod eis a Pastorum Principe fiet de instructione, regimine, et custodia Gregis ipsis commissi, nedum memoratos libros a scholis repellere, verum etiam proprias oves ab huiusmodi venenatis pascuis omni cura et solitudine avertere satagant.

Ut autem eadem praesentes Litterae omnibus facilius innotescant, nec quisquam illarum ignorantiam allegare possit, volumus, et decernimus, illas ad valvas Basilicae Principis Apostolorum, ac Cancellariae Apostolicae, nec non Curiae Generalis in Monte Citatorio, ac in Acie Campi Florae de Urbe per aliquem ex Cursoribus Nostris, ut moris est, publicari, illarumque exempla ibidem affixa relinqui.

Datum Romae apud S. Mariam Maiorem sub Annulo Piscatoris die XXVI. Septembris Anno MDCCCXXXV. Pontificatus Nostri Anno V.

E. Card. de Gregorio.

Die, Mense, et Anno, quibus supra, supradicta Damnatio et Prohibitio affixa et publicata fuit ad valvas Basilicae Principis Apostolorum, et Cancellariae Apostolicae, nec non Curiae Generalis in Monte Citatorio, et in Acie Campi Florae, ac in aliis locis solitis et consuetis Urbis per me Aloisium Pitocchi Apostolicum Cursorem.

Joseph Cherubini Magister Cursorum.

cretum idem Sanctissimus Dominus noster in Acta Sacrae Congregationis Indicis referri, et typis edi, ac ut moris est promulgari iussit. Romae die 7. Januarii 1836. — J. Card. Justinianus Praefectus. — Fr. Thomas Antoninus Degola Ord. Praed. Sacr. Congr. Indicis Secretarius."



## Litterae

Venerabili Fratri Joanni Archiepiscopo Coloniensi die XXV. Julii  
MDCCCXLVII.

### Pius PP. IX.

Venerabilis Frater, Salutem et Apostolicam Benedictionem.

Summa quidem animi Nostri admiratione nuper accepimus, Venerabilis Frater, nonnullos in istis regionibus Hermesianae doctrinae sectatores eo impudentiae devenisse, ut Nostra Encyclica Epistola, die 9. Novembris superiori anno ad omnes Venerabiles Fratres Episcopos data <sup>1)</sup>, indigne abutentes, atque illius verba ad humanam rationem divinamque revelationem pertinentia temere invertentes <sup>2)</sup>, ac praepostero et absurdo sensu interpretantes, audeant asserere Hermesii doctrinam a Nobis confirmari et coli, et minime erubescant monstrosum hoc eorum commentum in vulgus prodere et scriptis quoque mandare, quo facilius improvidos atque imperitos in fraudem inducere possint. Quamobrem de fidelium salute vel maxime solliciti, atque Hermesianorum fallacias, conatus reprimere optantes, nulla interposita mora has ad Te Litteras damus, quibus, Venerabilis Frater, non solum singula quaeque acta a rec. mem. Gregorio XVI. Praedecessore Nostro contra Hermesii libros provide sapienterque habita, ac praesertim illius Apostolicas Litteras die 26. Septembris 1835 sub annulo Piscatoris datas, quarum initium «Dum acerbissimas,» et declaratorium Decretum eius iussu die 7. Januarii 1836 a Congregatione Indicis editum, omni ex parte confirmamus, verum etiam eiusdem Hermesii opera in illis enunciata, ubicumque et quovis idiomate, seu qualibet editione, versione denuo Auctoritate Nostra Apostolica reprobamus atque damnamus. Tuum autem erit, hanc Nostram Epistolam evulgare, quo omnes eorumdem Hermesianorum fraudem cognoscant ac devitent.

Atque hic, Venerabilis Frater, pro Supremi Nostri Apostolatus officio spectatam Tuam religionem et pastorem vigilantiam etiam atque etiam in Domino excitamus, ut maxima cura, industria, contentione nunquam intermittas diligentissime prospicere, ut severiorum praesertim disciplinarum Professores sanam et incorruptam doctrinam, nedum ab Hermesii fallaciis, verum etiam ab omni prorsus cuiusque pravae opinionis et sententiae periculo alienam edoceant, atque intentissimo studio hodiernos potissimum errores refellant, quos e falsae philosophiae principiis deductos in theologicam quoque scientiam tradendam alicubi induci summopere timemus. Caeterum clementissimum luminum et misericordiarum Patrem assiduis, fervidisque precibus in humilitate cordis Nostri obsecrare non intermittimus, ut eos, qui ignorant et errant, coelesti sua gratia illustrare, inflammare, atque ad aemulationem recipiendae salutis revocare dignetur.

Jam vero pro certo habentes Te, Venerabilis Frater, Nostrae sollicitudini quam cumulatissime esse responsurum, hac occasione perlibenter utimur, ut praecipuam, qua Te prosequimur, benevolentiam iterum testemur et confirmemus. Cuius quoque pignus esse volumus Apostolicam Benedictionem, quam ex imo corde profectam, et cum omnis verae prosperitatis voto coniunctam Tibi ipsi, Venerabilis Frater, et omnibus, quibus praece, Clericis Laicisque Fidelibus peramanter impertimur.

Datum Romae apud S. Mariam Maiorem, die 25. Julii anno 1847.  
Pontificatus Nostri anno secundo.

<sup>1)</sup> *Supra*, pag 19, 20.

<sup>2)</sup> *Huc ref.* §. II. *Syllabi*.

Sanctissimo Domino Nostro

**Pio IX. Pontifici Maximo**

Sacrorum Antistites sacris solemnibus sanctorum Novensilium Martyrum XXVI  
Japoniae et Michaelis de Sanctis Romae adstantes die Festo Pentecostes  
anni MDCCCLXII.

**Beatissime Pater.**

Ex quo Apostoli Jesu Christi sacro Pentecostes die Petro Ecclesiae Capiti in oratione adhaerentes, Spiritum Sanctum acceperunt, et divino eius impulsu acti, cunctarum fere nationum viris in Urbe sancta congregatis, unicuique sua lingua potentiam Dei mirabilem annuntiarunt, numquam, ut credimus, ad hanc usque diem tot eorundem haeredes, iisdem recurrentibus solemnibus, venerandum Petri Successorem orantem circumsteterunt, decernentem audierunt, regentem roborarunt. Quomodo vero Apostolis media inter nascentis Ecclesiae pericula nil incundius accidere potuit, quam divino Spiritu recens afflato assistere primo Christi in terris Vicario; ita nec nobis praesentes inter Ecclesiae sanctae angustias antiquius sanctiusve aliud esse potuit, quam quidquid inest venerationis pietatisque erga Sanctitatem Tuam pectoribus nostris, ad pedes Beatitudinis Tuae deponere, simul et unanimiter declarare, quanta prosequamur admiratione praeclaras, quibus Supremus Pontifex noster eminet virtutes, quantoque animo iis quae Petrus alter docuit, vel quae tam firmiter stata rataque esse voluit, adhaereamus.

Corde nostra novus inflamat ardor, vividior fidei lux mentem illuminat, sanctior animam corripit amor. Linguas nostras flammis illius sacri ignis vibrantes sentimus, quae Mariae, cui assidebant Apostoli, mitissimum cor ardentiori pro hominum salute desiderio incendebant, ipsos vero Apostolos ad magnalia Dei praedicanda impellebant.

Plurimas igitur agentes Beatitudini Tuae gratias, quod nos ad Pontificium solum difficillimis hisce temporibus accurrere, Te afflictum solari, nostrosque Tibi, cleri item ac populi nostrae curae commissorum animi sensus aperire permiseris, Tibi uno ore unaque mente acclamamus, omnia fausta, cuncta bona adprecantes. Vive diu, Sancte Pater, valeque ad Catholicam regendam Ecclesiam. Perge, ut facis, eam Tuo robore tueri, Tua prudentia dirigere, Tuis exornare virtutibus. Praei nobis, ut bonus Pastor, exemplo, oves et agnos coelestis pabulo pascere, aquis sapientiae coelestis reficere. Nam Tu sanae doctrinae nobis Magister, Tu unitatis centrum, Tu populis lumen indeficiens a divina Sapientia praeparatum. Tu Petra es, et ipsius Ecclesiae fundamentum, contra quod inferorum portae numquam praevalerunt<sup>1)</sup>. Te loquente, Petrum audimus; Te decernente, Christo obtemperamus. Te miramur inter tantas molestias, totque procellas fronte serena et imperturbato animo sacri muneris partibus fungentem, invictum et erectum.

Dum tamen iustissima in his gloriandi nobis suppetunt argumenta, non possumus quin simul oculos ad tristia convertamus. Undequaque enim menti nostrae se sistunt immania eorum facinora, qui pulcherrimam Italiae terram, cuius Tu, Beatissime Pater, columen es et decus, misere vastarunt, ipsumque Tuum ac Sanctae Sedis principatum, ex quo praeclara quaeque in civilem societatem veluti ex suo fonte dimanarunt, labefactare, ac funditus evertere conituntur. Nam neque perennia saeculorum iura, neque diuturna regiminis pacifica possessio, neque tandem foedera totius Europae auctoritate sancita et confirmata impedire potuerunt, quominus omnia sus deque verterentur, spretis legibus omnibus, quibus hactenus suffulta stabant imperia.

Sed ut ad nostra propius accedamus, Te, Beatissime Pater, iis provinciis, quarum ope et dignitati Sanctae Sedis, et totius Ecclesiae administrationi acquissime providebatur, nefario usurpatorum hominum scelere, qui non habent nisi *relaxamen malitiae libertatem*, spoliatum cernimus. Quorum iniquae violentiae cum Sanctitas Tua invictissimo animo obstiterit, plurimas ei gratias, Catholicorum orantium nomine, censemur rependendas<sup>2)</sup>.

<sup>1)</sup> *Huc ref. prop. 34.*<sup>2)</sup> *Huc ref. prop. 75.*

Civilem enim Sanctae Sedis principatum ceu quiddam necessarium ac providente Deo manifeste institutum agnoscimus; nec declarare dubitamus, in praesenti rerum humanarum statu ipsum hunc principatum civilem pro bono ac libero Ecclesiae animarumve regimine omnino requiri<sup>1)</sup>. Oportebat sane totius Ecclesiae Caput Romanum Pontificem nulli Principi esse subiectum, imo nullius hospitem; sed in proprio dominio ac regno sedentem suimet iuris esse, et in nobili, tranquilla, et alma libertate Catholicam Fidem tueri, ac propugnare, totamve regere ac gubernare Christianam Rempublicam<sup>2)</sup>.

Quis autem inficiari possit in hoc rerum humanarum, opinionum, institutionumque conflictu necessarium esse ut servetur extrema in Europa medius, tres inter veteris mundi continentes, quidam veluti sacer locus, et Sedes augustissima, unde populis principibusque vicissim oriatur vox quaedam magna potensque, vox nempe iustitiae et veritatis, nulli favens praeter ceteris, nullius obsequens arbitrio, quam nec terrendo compescere, nec ullis artibus quisquam possit circumvenire?

Qui porro vel hac vice fieri potuisset, ut Ecclesiae Antistites securi huc ex toto Orbe accurrerent, cum Sanctitate Tua de rebus gravissimis acturi, si ex tot et tam diversis regionibus gentibusque confluentes principem aliquem invenissent his oris dominantem, qui vel principes ipsorum in suspitione haberet, vel illis, suspectus ipse, adversaretur? Sua sunt etenim et christiano, et civi officia: haud quidem repugnantia inter se, sed diversa: tamen: quae adimpleri ab Episcopis quomodo possent, nisi perstaret Romae civilis principatus, qualis est Pontificum, iuris alieni omnino immunis, et centrum quodammodo universalis concordiae, nihil ambitionis humanae spirans, nihil pro terrena dominatione moliens?

Ad liberum ergo Pontificem Regem venimus liberi, Ecclesiae rebus utpote Pastores, et patriae utpote cives bene et aequae consulentes, neque Pastorum, neque civium officia posthabentes.

Quae cum ita sint, quisnam principatum illum tam veterem, tanta auctoritate, et tanta necessitatis vi conditum, audeat impugnare? Cui, si vel ius illud humanum, in quo posita est principum securitas populorumque libertas, attendatur, quanam alia potestas possit comparari? Quae tam venerabilis et sancta? Quae sive pristinis sive recentioribus saeculis monarchia vel respublica iuribus tam augustis, tam antiquis, tam inviolabilibus possit gloriari? Quae omnia si semel et in hac Sancta Sede despecta atque proculcata fuerint, quisnam vel princeps de regno, vel respublica de territorio possint esse securi? Ergo, Sanctissime Pater, pro religione quidem, sed et pro iustitia, iuribusque, quae sunt inter gentes rerum humanarum fundamenta, contendis atque decertas.

Sed de hac tam gravi causa vix nos decet amplius verba proferre, qui Te de ipsa non tam disserentem quam docentem saepe saepius audivimus. Vox etenim Tua, quasi tuba sacerdotalis, toti orbi clangens proclamavit, quod «singulari prorsus divinae Providentiae consilio factum sit, ut Romanus Pontifex, quem Christus totius Ecclesiae suae Caput Centrumque constituit, civilem assequeretur principatum<sup>3)</sup>»; ab omnibus igitur nobis esse pro certissimo tenendum, non fortuito hoc regimen temporale Sanctae Sedi accessisse, sed ex speciali divina dispositione illi esse tributum, longave annorum serie, unanimi omnium regnorum et imperiorum consensu, ac paene miraculo corroboratum et conservatum.

Alto pariter et solemniori eloquio declarasti, «Te civilem Romanae Ecclesiae principatum eiusque temporales possessiones ac iura, quae ad universum Catholicum orbem pertinent, integra et inviolata constanter tueri et servare velle; immo Sanctae Sedis Principatus Beatique Petri patrimonii tutelam ad omnes Catholicos pertinere; Teque paratum esse animam potius ponere quam hanc Dei, Ecclesiae ac iustitiae causam ullo modo deserere<sup>4)</sup>». Quibus praeclaris verbis nos acclamantes ac plaudentes respondemus, nos

<sup>1)</sup> *Huc ref. prop. 76.*

<sup>2)</sup> *Huc ref. nota ad §. IX. Syll.*

<sup>3)</sup> *Litterae Apostol. 26. Martii 1860 (pag. 114); Allocutio 20. Junii 1859 p. 108); Encycl. 19. Jan. 1860 (p. 112); Allocutio 17. Dec. 1860 (p. 125).*

<sup>4)</sup> *Epist. Encycl. 19. Jan. 1860 (p. 112).*

Tecum et ad carcerem et ad mortem ire paratos esse, aequè humiliter rogamus, ut in hac constantia, ac firmissimo proposito maneat immobilis, Angelis et hominibus invicti animi et summae virtutis spectaculum factus. Id etiam a Te postulat Christi Ecclesia, pro cuius feliciore regimine Romanis Pontificibus civilis principatus providentissime fuit attributus, quaeque adeo sensit eiusdem tutelam ad ipsam pertinere, ut, Sede olim Apostolica vacante, gravissimis in angustiis, temporales Romanae Ecclesiae possessiones omnes Constantiensis Concilii Patres, uti ex publicis patet documentis, in unum administrarent; id postulant Christi fideles per omnes terrarum orbis regiones dispersi, qui libere ad Te venire, libereque conscientiae suae consulere gestiunt: id denique ipsa civilis deposcit societas, quae ex Tui regiminis subversione sua ipsa nutare sentit fundamenta.

Sed quid plura? Tu tandem aliquando scelestos homines et bonorum ecclesiasticorum direptores iusto iudicio damnans, omnia quae patnaverant, «irrita et nulla» proclamasti<sup>1)</sup>; actus omnes ab iis intentatos «illegitimos omnino et sacrilegos» esse decrevisti<sup>2)</sup>; ipsosque talium facinorum reos poenis et censuris ecclesiasticis obnoxios iure ac merito declarasti<sup>3)</sup>.

Hos tam graves Tui oris sermones, tamve praeclara gesta nostrum est reverenter excipere, iisque plenum assensum renovare. Sicuti enim corpus capiti, cui iungitur membrorum compagine unaque vita, in omnibus condoleat, ita nos Tecum consentire necesse est. Tibi in omni Tua hac acerbissima afflictione sic coniungimur, ut quae Tibi pati contingat, eadem et nos, amoris consensu, patiamur. Deum interea supplices invocamus, ut tam iniquae rerum perturbationi finem ponat, Ecclesiamque Filii sui sponsam, tam misere expoliatam ac oppressam, pristino decori ac libertati restituat.

Sed mirum nobis non est, tam acriter et infense Sedis Apostolicae iura impeti et impugnari. Jam enim a pluribus annis eo devenit nonnullorum hominum insania, ut non amplius singulas Ecclesiae doctrinas reiicere, vel in dubium revocare conentur; sed totam penitus veritatem christianam, christianamque rempublicam funditus evertere sibi proponant. Hinc impiissima tentamina vanae scientiae, falsaeque eruditionis contra Sacrarum Litterarum doctrinas, ipsarumque inspirationem<sup>4)</sup>; hinc malesana sollicitudo, iuventutem Ecclesiae matris tutelae subtractam quibusvis saeculi erroribus, vel seclusa saepius omni religiosa institutione, imbuendi<sup>5)</sup>; hinc novae eaeque perniciosissimae de sociali, politico aequae ac religioso rerum ordine theoriae, quae impune quaquaversus sparguntur<sup>6)</sup>; hinc multis familiare, in his praesertim oris, Ecclesiae auctoritatem spernere, iura sibi vindicare, praecepta proculecare, ministros vilipendere, cultum deridere, ipsos de Religionis errores, imo ecclesiasticos quoque viros in perditionis viam misere abeuntes laudare ac in honore habere<sup>7)</sup>. Venerabiles Antistites ac Dei Sacerdotes exauctorantur, exulare coguntur, aut in carceres detruduntur: quinimo ante tribunal civilia, pro constantia in sacro ministerio obeundo, contumeliose pertrahuntur. Gemunt Christi sponsae suis expulsae tectis, inedia fere consumptae, vel cito consumendae; viri religiosi ad saeculum inviti remeare coguntur; sacro Ecclesiae patrimonio violentae manus iniiciuntur<sup>8)</sup>; pessimorum librorum, ephemeridum et imaginum colluvie, fidei, moribus, veritati, ipsi verecundiae continuum asperrimumque bellum inferitur<sup>9)</sup>.

Sed qui talia moliantur, optime norunt in Sancta Sede, velut in arce inexpugnabili, robur ac vires omnis veritatis ac iustitiae inesse, quibus retundantur hostium impetus: ibi esse speculam, ex qua vigiles Summi Custodis oculi paratas insidias a longe conspiciunt, suis annuntiandas commilitonibus. Hinc odium implacabile, hinc insanabilis livor, hinc continuum scelestissimorum hominum studium, ut Sanctam Romanam Ecclesiam eiusque Sedem deprimant, ac si fieri unquam posset, prorsus exscindant.

<sup>1)</sup> Allocutio 26. Sept. 1859 (pag. 110).

<sup>2)</sup> Allocutio 20. Junii 1859 (pag. 108).

<sup>3)</sup> Litterae Apostolicae 26. Martii 1860 (pag. 114).

<sup>4)</sup> *Huc ref.* §. I. *Syllabi*

<sup>5)</sup> *Huc ref. prop.* 45—48.

<sup>6)</sup> *Huc ref.* §. IV., VI., VII. *Syllabi*.

<sup>7)</sup> *Huc ref.* §. V., VI. *Syllabi*.

<sup>8)</sup> *Huc ref. prop.* 26, 53.

<sup>9)</sup> *Huc ref. prop.* 79.

Quis, Beatissime Pater, talia conspiciens, vel etiam recensita audiens sibi temperet a lacrymis? Justo igitur dolore correpti oculos ac manus ad coelos levamus, Divinum illum Spiritum toto mentis affectu implorantes, ut qui hac die olim nascentem Ecclesiam sub Petri regimine sanctificavit et roboravit, eam nunc, Te Pastore, Te Duce, tutetur, ampliet, ac glorificet. Testis sit votorum quae nuncupamus, Maria per Te Immaculatae titulo hoc ipso in loco solemni ter aucta; testes hi sacri cineres quos veneramur Sanctorum Romanae Ecclesiae Patronorum Petri et Pauli; testes venerandae exuviae tot Pontificum, Martyrum ac Confessorum, quae hanc ipsam, quam premimus terram, sanctam reddunt; testes tandem praecipue nobis adstant Sancti isti, qui Coelitem ordini hac ipsa die supremo Tuo iudicio adscripti, hodie Ecclesiae tutelam novo titulo sunt suscepturi, primasque Omnipotenti Deo preces pro Tua quoque incolumitate suis de altaribus oblaturi.

Astantibus igitur istis omnibus, nos Episcopi, ne illud impietas vel ignorare simulet, vel audeat denegare, errores quos Tu damnasti, damnamus; doctrinas novas et peregrinas, quae in damnum Ecclesiae Jesu Christi passim propalantur, detestamur et reiciimus; sacrilegia, rapinas, immunitatis ecclesiasticae violationes, aliaque nefanda in Ecclesiam, Petrique Sedem commissa reprobamus et condemnamus.

Hanc vero protestationem, quam publicis Ecclesiae tabulis adscribi petimus, Fratrum etiam nostrorum qui absunt nomine, tuto proferimus; sive eorum qui, tot inter angustias, vi detenti domi hodie silent ac plorant, sive qui gravibus negotiis aut adversa valetudine impediti, nobiscum hodie adesse nequiverunt. Jungimus insuper nobis fidelem nostrum Clerum ac populum, qui eodem ac nos in Te amore, eadem pia reverentia animati, suum in Te studium, qua precibus sine intermissione fusis, qua opibus in obule S. Petri mira, ut plurimum, largitate oblati luculentissime comprobarunt, probe scientes sacrificiis suis id quoque curari, ut dum necessitatibus Supremi Pastoris consulitur, simul et eiusdem libertati servandae prospiciatur.

Utinam ad communem hanc totius Orbis christiani, imo omnis socialis ordinis causam in tuto locandam universi populi conspirarent!

Utinam intelligerent, erudirenturque Reges et saeculi potestates, causam Pontificis omnium principum regnorumque esse causam, et quo tendant nefarii adversariorum eius conatus, ac tandem *novissima providerent!*

Utinam resipiscerent infelices illi aliquot ecclesiastici et religiosi viri, qui vocationis suae immemores debitam Ecclesiae Praesulibus obedientiam denegantes, atque ipsum quoque Ecclesiae magisterium temere usurpantes, in viam perditionis abierunt!

Hoc a Domino, Tecum flentes, Beatissime Pater, enixe atque ex corde exoramus, dum ad Tuos sacros pedes provoluti, a Te robor coeleste expectamus, quod Apostolica ac paterna benedictio Tua valet impertire. Sit haec copiosa et ex intimis penetralibus Cordis Tui largiter effluens, ut non tantum nos, sed absentes quoque dilectissimos Fratres, itemque Fideles nobis commissos irriget ac perfundat. Sit talis quae nostros et totius Orbis dolores leniat et demulceat, infirmitatem sublevet, operam ac laborem foecundet, feliciora demum Ecclesiae Sanctae Dei tempora acceleret.

Romae hac die VIII. mensis Junii anno Domini MDCCCLXII.

Subscribebant 265 Patres Cardinales (ex his tamen ii dumtaxat, qui etiam Locorum Ordinarii erant), Patriarchae, Primates, Archiepiscopi et Episcopi, quotquot Romae convenerant, tam latini, quam graeci, orientaliumque rituum.

## Sanctissimi Patris Responsum ad hanc Episcoporum Protestationem.

Sensus quos hactenus Nobis exposuistis, Venerabiles Fratres et Dilecti Filii, summam Nobis attulerunt laetitiam; sunt enim amoris vestri pignus erga Sanctam hanc Sedem, multoque etiam magis testimonium praeclarissimum illius vinculi caritatis, quo Ecclesiae Catholicae Pastores non solum inter se, verum etiam cum hac Veritatis Cathedra arctissime coniunguntur; ex quo manifesto apparet, Deum auctorem pacis et caritatis nobiscum stare. Et si Deus pro nobis, quis contra nos? Ipsi ergo Deo laus, honor et gloria; Vobis vero pax, salus et gaudium: pax cordibus vestris; salus Christi fidelibus curae vestrae commissis; gaudium vero Vobis et illis, ut una cum Sanctis exsultetis cantantes canticum novum in domo Domini, in saecula saeculorum.

## Epistola Encyclica.

Venerabilibus Fratribus Gregorio Archiepiscopo Monacensi et Frisingensi, Michaeli Archiepiscopo Bambergensi, et Episcopis eorum suffraganeis.

### Pius PP. IX.

Venerabiles Fratres, Salutem et Apostolicam Benedictionem.

Maximae quidem consolationi Nobis fuerunt inter gravissimas, quibus affligimur, curas et angustias, Vestrae gratiosissimae literae, quas XIII. Calendis huius mensis ad Nos dedistis, Venerabiles Fratres, in congressu a Vobis Bambergae habito, ut, collatis inter Vos consiliis, ea statueritis, quae hisce praesertim asperrimis temporibus ad catholicae Ecclesiae causam, doctrinam, iura tuenda, et ad istorum fidelium salutem procurandam quotidie magis conducere possint. In eisdem enim literis undique enitet egregia et explorata Vestra erga Nos et hanc Petri Cathedram fides, amor et observantia, ac mirum sane studium, quo incensi estis ad omnia peragenda, ut fideles Vestrae potissimum vigilantiae commissi summa ac debita reverentia et obedientia Nos, et eandem Petri Cathedram prosequantur, quae Catholicae unitatis est centrum, omniumque Ecclesiarum non modo caput, sed mater, et magistra, quaeque erroris tenebras undique dispellit, et omnium fluctuantium tutissimus est portus.

Itaque hac eximia Vestra episcopali virtute et sollicitudine vehementer gaudemus, Vobisque maiorem in modum gratulamur, Venerabiles Fratres, quod Vestro facto, Vestrisque pastoralibus ad istos fideles cuiusque Vestrum curae concreditis datis literis haud omiseritis debitis, meritisque laudibus efferre arctissimam illam, et admirabilem omnium totius Catholici orbis Sacrorum Antistitem coniunctionem, quae luctuosissimis hisce temporibus cum Christi hic in terris Vicario, et hac Apostolica Sede singulari Dei beneficio tantopere viget, ac tot splendidissimis factis magis in dies refulget. Ac vel maxime laetamur de conventu, quem Bambergae habuistis, in quo Vos omnes, Venerabiles Fratres, concordissimis animis pro gravissimi Episcopalis Vestri Ministerii officio ea suscepistis consilia, quae hisce potissimum temporibus magis opportuna esse existimastis ad Ecclesiae causam tutandam, eiusque rationes curandas, atque ad nefarios inimicorum hominum reprimendos conatus, qui unanimi constantique Episcoporum studio, ac vigilantia sunt profligandi.

Et sane, si unquam alias, hac praecipue nostra tristissima aetate Episcoporum est, veluti apprime intelligitis, contra sanctissimae nostrae religionis hostes strenuissime pugnare. Quocirca sacrorum Antistites divino auxilio freti debent intentissimo studio Episcopalem suam attollere vocem, et omnibus praedicare evangelium, ac sapientibus et insipientibus aeternas divinae fidei nostrae veritates, et augustae religionis dogmata, doctrinam, praeceptiones nuntiare, tradere, explicare et inculcare. Ac pari contentione

iidem sacrorum Antistites tenentur exponere et ostendere tum summis Principibus tum Guberniis funestissima, et numquam satis deploranda mala, et damna, quae in populos et in ipsos Principes redundant ex hodierno religionis contemptu et incredulitatis spiritu, qui sub fallaci socialis progressus specie e tenebris emissus cum maximo Christianae, civilisque reipublicae detrimento ubique magis in dies invalescit, ac dominatur, et hominum mentes animosque miserandum in modum pervertit et corrumpit.

Atque iccirco gratissimum Nobis fuit agnoscere, Vos, Venerabiles Fratres, isti Carissimo in Christo Filio Nostro Bavariae Regi Illustri vestras pro sanctissimae nostrae religionis, eiusque iurium defensione misisse literas, et ea spe nitimur fore ut idem Serenissimus Princeps pro animi sui pietate, iustitia, aequitate, iustissimis Vestris desideriis, postulationibusque perlibenter obsecundare studeat.

Neque vero ignoratis, Venerabiles Fratres, esse praeterea aliud, quod sacri Pastores omnibus studiis, et contentionibus agere debent. Siquidem oportet, ipsos summa constantia et fortitudine defendere catholicae Ecclesiae libertatem, quam ei suo sanguine peperit Unigenitus Dei Filius ipsius Ecclesiae Sponsus, ac viriliter propugnare omnia veneranda ipsius Ecclesiae iura ei divinitus tributa. Opus quoque est, ut Episcopi nunquam cessent qua voce, qua scriptis ad omnium memoriam revocare, Ecclesiam ipsam semper fuisse et esse salutari sua doctrina et vi, ac sapientissimis suis legibus et institutis, non solum virtutum omnium matrem et magistram, omniumque vitiatorum expultricem, verum etiam verae omnium gentium humanitatis, honestatis, civilitatis, libertatis, progressus, prosperitatis, tranquillitatisque conditricem ac moderatricem, et ipsam solam posse firmiter constabilire et servare publicum humanae societatis ordinem, qui impietate et rebellione hisce diebus ubique tam vehementer perturbatur<sup>1)</sup>.

Debitas autem, meritasque laudes Vobis tribuimus, Venerabiles Fratres, quod vestris literis ad istud Gubernium scriptis de popularium scholarum bono et regimine maxime solliciti catholicae Ecclesiae hac super re doctrinam, auctoritatem et iura omni rationum genere seite ac strenue propugnastis eo sensu, quo Nos in Nostra Epistola ad Venerabilem Fratrem Hermannum Archiepiscopum Friburgensem in Brisgovia die 14. Julii huius anni missa<sup>2)</sup> coacti fuimus eiusdem Ecclesiae iura in tanti momenti negotio sarta tecta tueri, et vindicare contra Ecclesiae hostium conatus et molitiones, qui in Magno Badensi Ducatu eo iam pervenerunt, ut leges proponerentur, quae christianam scholarum indolem plane destruant ac delent<sup>3)</sup>.

Etsi vero in pretio habeamus causas, quibus, Venerabiles Fratres, Ecclesiae iura quoad populares tantum scholas nunc propugnanda curastis, tamen haud possumus, quin hac occasione egregiam vestram Episcopalem sollicitudinem etiam atque etiam excitemus, ut sedulam strenuamque operam detis, quo eadem Ecclesiae iura recognoscantur quoque, ac serventur circa superiores literarum, severiorumque disciplinarum scholas. Etenim pro vestra sapientia optime nostis, ex eisdem scholis ab Ecclesiae doctrina, auctoritate, et vigilantia amotis<sup>4)</sup> graviora oriri damna et mala, quandoquidem erroribus, falsisque doctrinis ii praesertim honestioris classis homines inficiuntur, qui ad publica gubernii munera obeunda destinantur, quique ad communem civilis societatis spiritum formandum tantopere valere solent.

Atque hic, Venerabiles Fratres, a Vobis exposcimus, ut prae oculis habere velitis quae Nos isti Venerabili Fratri Gregorio Archiepiscopo Monacensi et Frisingensi per Nostram Epistolam die 21. Decembris anno superiore significavimus de philosophicis ac theologicis disciplinis tradendis<sup>5)</sup>, ac Vos impensissime hortamur, ut vestras omnes curas, cogitationesque in accuratam Cleri institutionem, educationemque quotidie magis promovendam indesinenter conferatis, nihilque intentatum relinquatis, ut vester Clerus plenam illam, solidamque habeat institutionem, quae ex puris, intaminatisque fontibus hausta, et communi catholicae Ecclesiae docendi ratione innixa

<sup>1)</sup> *Huc ref. prop.* 40.

<sup>3)</sup> " " 47.

<sup>5)</sup> *Supra, pag.* 150.

<sup>2)</sup> *Supra, pag.* 154.

<sup>4)</sup> *Huc ref. prop.* 45.

illa omnia removeat pericula, quibus nova hodierna docendi systemata super scientiae libertatem, vel potius licentiam fundata, ac tantopere iactata, sunt necessario obnoxia <sup>1)</sup>).

Quamobrem vel maxime optamus, Venerabiles Fratres, ut memoria repetere, et exsequi velitis ea omnia, quae iam alias vel omnibus, vel singulis vestri Episcopalis Ordinis significavimus, vehementerque commendavimus, quoad Clericorum Seminaria ex providentissimis Concilii Tridentini praescriptis erigenda et moderanda.

Persuasissimum autem Nobis est, Vos, Venerabiles Fratres, pro spectata vestra religione, et episcopali zelo naviter esse defensuros alia Ecclesiae iura, quae nondum in Bavaria plene sunt recognita, et pro quibus Bavariae sacrorum Antistites in Frisingensi praecipue conventu suas protestationes emittere haud omiserunt. Ac propterea summo opere probamus consilium a Vobis susceptum habendi quotannis inter Vos congressus. Id vero nullo modo impedire debet, quominus, Venerabiles Fratres, omnia conemini, ut quam primum, veluti Nostri in votis est, Provinciales Synodos ex Sacrorum Canonum praescripto concelebrare possitis, quemadmodum alii in Germania Sacrorum Antistites in suis ecclesiasticis provinciis cum summo animi Nostri gaudio, et suorum fidelium utilitate egerunt. Nihil certe Nobis gratius erit, quam in hac re omnem Vobis opem, auxiliumque ferre.

Denique pro certo habeatis velimus, peculiarem esse, qua Vos prosequimur, benevolentiam. Cuius quoque certissimum pignus accipite Apostolicam Benedictionem, quam ex intimo corde profectam Vobis ipsis, Venerabiles Fratres, cunctisque Clericis, Laicisque fidelibus cuiusque vestrum curae commissis peramanter impertimus.

Datum ex Arce Gandulphi die 18. Augusti Anno 1864. Pontificatus Nostri Anno Decimo nono.

Pius PP. IX.

## Epistola Encyclica.

Venerabilibus Fratribus Gregorio Archiepiscopo Monacensi et Frisingensi, Michaeli Archiepiscopo Bambergensi, et Episcopis eorum Suffraganeis in Bavaria.

Pius PP. IX.

Venerabiles Fratres, Salutem et Apostolicam Benedictionem.

Summa quidem acgritudine affecti fuimus, ubi primum novimus, Venerabiles Fratres, istud regium Bavaricum Ministerium non solum vim adhibuisse ad claudendas theologicas scholas a Venerabili Fratre Nicolao Episcopo Spirensi in proprio Clericorum Seminario iure institutas, verum etiam eodem tempore denegasse Bavariae Sacrorum Antistitibus ius erigendi ac sub eorum iurisdictione habendi proprias scholas, et etiam illas, in quibus theologiae disciplinae traduntur <sup>2)</sup>. Verum huiusmodi animi Nostri moerorem summo opere lenierunt Vestrae Litterae mense Decembri superioris anni ad Nos datae. Ex eisdem enim maxima certe laetitia cognovimus, Vos, Venerabiles Fratres, concordissimis animis istum Bavariae Regem adiisse <sup>3)</sup>, eique omni rationum pondere ac debita observantia exposuisse unanimum Vestram consensionem in iis, quae idem Spirensis Antistes egit ad tuendum ius vel in ipsa Conventione inter hanc Apostolicam Sedem et Bavariae Regem Illustrum iam inde ab anno 1817 inita sancitum quoad Cleri institutionem educationemque, et appellasse etiam Acta a Bavaricis Sacrorum Antistitibus tum mense Octobri anni 1850 tum mense Maio anni 1853 habita. Atque eisdem Vestris Litteris efflagitastis, ut penes Bavaricum Gubernium instare velimus, quo commemorata Conventio perfectae executioni mandetur, ac plane recognoscatur et servetur proprium innatumque Ecclesiae et Episco-

<sup>1)</sup> *Huc ref. §. II. Syllabi.*

<sup>2)</sup> *Huc ref. prop. 33, 45, 46.*

<sup>3)</sup> Mense Decembri 1864.



porum ius, ex cuius vi Clericorum Seminaria liberae eorumdem Episcoporum auctoritati ac iurisdictioni subiecta esse omnino debent. Postulastis quoque, ut Vobis significare vellemus, quae agendi ratio a Vobis sit habenda, ut, quantum in Vobis est, tueri possitis sacra illa iura, sine quibus minime valetis exercere episcopalem Vestram missionem et Ecclesiae leges secundum divinum mandatum.

Equidem haud possumus, quin maximas meritasque laudes Vobis tribuamus, Venerabiles Fratres, ac simul ex animo vehementer gratulemur, quod in tanti momenti negotio Ecclesiae iura tutari ac Nos consulere gloriati estis. Nos itaque post accuratum huius gravissimae sane rei examen haud omisimus apud istud Regium Gubernium expostulare, ut certum propriumque Ecclesiae et Episcoporum ius integrum inviolatumque servetur, ac plane excludatur arbitraria interpretatio ab eodem Gubernio attributa Articulo quinto <sup>1)</sup> commemoratae Conventionis, ut eiusdem Articuli dispositiones coangustentur, et intelligantur de illis dumtaxat Seminariis, quae clericalia appellantur, quaeque statuta sunt ad ecclesiasticos viros unius tantum anni spatio excolendos aliquibus disciplinis pro sacro ministerio actu obeundo, postquam ipsi theologicarum rerum studia absolverint in superioribus scholis, quae in publicis Regni Institutis existunt.

Et sane negari non potest, quin magisterium lacdatur et auctoritas a Christo Domino Ecclesiae eiusque Episcopis tributa, eandem Ecclesiam et Sacrorum Antistites pleno et omnino libero iure pollere educandi instituendique Clerum ad canonicarum sanctionum normam, per quem et salutaris Evangelii doctrina est servanda et propaganda, et sacrum ministerium ad animarum salutem exercendum. Atque huiusmodi ius Episcoporum obligationibus respondens ita ad ipsos natura pertinet, eorumque officiis inhaeret, ut nullo modo derivari possit a qualibet civilis auctoritatis concessione, vel a quacumque Conventione cum Ecclesia inita ab eadem civili auctoritate. Etsi enim huiusmodi Conventiones possint interdum esse necessariae et opportunae ad eiusdem iuris exercitium pro rerum temporumque adiunctis tuendum ac facilius reddendum, tamen nequeunt unquam ius idem ita tollere aut circumscribere, ut Episcopi illius exercitio priventur in iis, quae ad eius naturam pertinent, quaeque Episcopis ab universalibus Ecclesiae legibus et communi canonico iure iniunguntur. Et quidem haec Apostolica Sedes in Conventione cum Bavariae Rege ineunda non poterat non tueri huiusmodi nativum Episcoporum officii proprium ius quoad Cleri institutionem. Atque eadem Sedes cum in illa Conventione tractanda semper senserit ac declaraverit, Clericorum in Bavaria Seminaria ad Concilii Tridentini normam <sup>1)</sup> omnino esse erigenda et constituenda, tum nullo modo admittere unquam potest quinti eiusdem Conventionis Articuli interpretationem, qua Bavariae Episcopi vel privarentur proprii officii iure, quod ad episcopale ministerium natura pertinet et alienari non potest, atque vigens ante quamlibet Conventionem plane liberum est; vel eiusdem iuris exercitium ita circumscriberetur, ut iidem Episcopi impedirentur, quominus proprias in suis Seminariis habere possent scholas, etiam de sacris theologicis disciplinis.

Itaque, Venerabiles Fratres, haec Apostolica Sedes dum apud istud Regium Gubernium debitas fecit expostulationes, haud praetermisit eidem

<sup>1)</sup> Cuius verba sunt: „Sua singulis dioecibus Seminaria Episcopalia conserventur, et dotatione congrua in bonis fundisque stabilibus provideantur; in iis autem dioecibus, in quibus desunt, sine mora cum eadem pariter dotatione in bonis fundisque stabilibus fundentur. — In Seminariis autem admittuntur atque ad normam sacri Concilii Tridentini efformantur adolescentes, quos Archiepiscopi et Episcopi pro necessitate vel utilitate dioecesium in iis recipiendos iudicaverint. Horum Seminariorum ordinatio, doctrina, gubernatio et administratio Archiepiscoporum et Episcoporum auctoritati pleno libereque iure subiectae erant iuxta formas canonicas. — Rectores quoque et professores Seminariorum ab Archiepiscopis et Episcopis nominabuntur, et quotiescunque necessarium aut utile ab ipsis iudicabitur, removebuntur. — Cum Episcopis incumbat fidei ac morum doctrinae invigilare, in huius officii exercitio etiam circa scholas publicas nullo modo impediuntur.“

<sup>2)</sup> *Huc ref. prop.* 21.

<sup>3)</sup> Sess. XXIII. cap. 18. de Reform

Gubernio clare aperteque declarare, Venerabilem Fratrem Spirensium Episcopum plenum habuisse ius in ipsa Conventione statutum, erigendi in suo Seminario theologicis scholas et ab ipso Gubernio postulandi, ut nullo prorsus modo eiusdem iuris exercitium praepediretur. Nec eidem Episcopo haec Sancta Sedes permittere poterat, ut contentus esse vellet theologicis scholis, quas Gubernium in Spirensis Civitatis Lyceo erigere proposuerat. Etenim eadem Sedes haud potest recognoscere, per hanc scholarum erectionem a Gubernio impleri omnes obligationes, quibus se in Conventione obstrinxit, aut eiusmodi scholas, quae ab eodem Gubernio diriguntur ac pendunt, posse in illarum scholarum locum suffici, quae ex Ecclesiae legibus ac propria Cleri institutionis educationisque natura et indole debent cum Seminariis esse coniunctae, et una cum illis Episcoporum vigilantiae, auctoritati et iurisdictioni subiectae.

Vos autem haud ignoratis, Venerabiles Fratres, hanc Apostolicam Sedem, quemadmodum felicitis recordationis Pius VII. Praedecessor Noster clare declaravit Principibus, in quorum territoriis fuit constituta Ecclesiastica Superiorior Rheni Provincia, nunquam probasse nec approbare posse veluti consentanea Concilii Tridentini praescriptis illa sic dicta Clericalia Seminaria, quae in Germania usu erant, quaeque in eadem Germania viguerunt in rerum temporumque adiunctis plane diversis ab illis, in quibus Ecclesiae ac singulae Dioeceses nunc versantur. Quocirca haec Sancta Sedes nunquam destitit instare, ut vera ac perfecta Seminaria ad Concilii Tridentini normam erigerentur, ac tum Nostri Decessores tum Nos ipsi nunquam omisimus Bavariae Episcopos vehementer hortari, ut curas omnes cogitationesque conferrent, quo propriae Dioeceses iis frui possent bonis, quae sapientissimi Tridentinae Synodi Patres prae oculis habuere praescribentes, ut Clericorum Seminaria constituerentur, ad modum et formam ab ipsis tam provide, tamque sapienter praescriptam.

Ex hisce omnibus, quae Vobis significamus, Venerabiles Fratres, vel facile intelligitis, quae norma, quaeque agendi ratio a Vobis habenda sit, ut plane liberum tutemini exercitium iuris, quod ex Vestri episcopalis officii vi et ex communi Ecclesiae iure ad Vos pertinet, et quod in ipsa Conventione fuit sancitum. Dum vero nihil dubitamus, quin Vos, Venerabiles Fratres, pro eximia Vestra sapientia et episcopali sollicitudine cum hisce sententiis ac principiis expositis unanimes convenire et ea una cum hac Apostolica Sede strenue propugnare velitis, maiore, quo possumus, studio Vos etiam atque etiam denuo hortamur et excitamus, ut opportuna omnia suscipiatis consilia tum ad obtinendum quod Bavariae Antistites per commentarium mensis Octobris anno 1850 petendum<sup>1)</sup> existimarunt, tum ad proprias in Vestris Seminariis scholas erigendas. Etenim apprime nostis, quantis damnis quantisque periculis obnoxii sint, qui ecclesiasticae militiae nomen dare cupientes studiorum curriculum agunt in Institutis, quae plus minusque ab Episcoporum vigilantia et auctoritate eximuntur<sup>2)</sup>. Atque etiam optime agnoscitis, quam vehementer Ecclesiae intersit, hisce praesertim luctuosissimis temporibus, ut Cleri institutio cum pia ac vera ecclesiastica eiusdem Cleri educatione intime coniungatur. Namque omnino oportet, et Clerum sacrarum praecipue disciplinarum scientia ex intaminatis catholicae doctrinae fontibus hausta accuratissime imbui, et uno eodemque tempore ad pietatem et omnes virtutes, quae ecclesiasticos viros plane decent, sedulo formari, quo propriis Episcopis in vinca Domini excolenda auxiliariam utilemque operam navare, et christiano populo virtutum omnium exempla praebere, ac in animarum salutem procurandam incumbere, et nefarios adversariorum errores refellere, conatusque reprimere valeant.

Interim vero ad amovendas difficultates, quae possent obsistere tum exercitio episcopalis Vestri iuris, de quo loquuti sumus, tum plenae executioni quinti Conventionis Articuli, scitote, Nos haud omisisse, Regium istud excitare Gubernium, ut iuxta XVII. eiusdem Conventionis Articulum<sup>3)</sup> velit

<sup>1)</sup> A Rege et Gubernio.

<sup>2)</sup> Cf. *prop.* 45—48.

<sup>3)</sup> In quo haec statuuntur: „Cetera quae ad res et personas ecclesiasticas spectant, quorum nulla in his articulis expressa facta est mentio, diriguntur omnia et administrabuntur iuxta doctrinam Ecclesiae, eiusque vigentem et approbatam disci-

Nobiscum conferre consilia et res amice componere. Nobis autem curae erit. Vos de omnibus certiores facere. Ne desinatis mutuam inter Vos animorum et consiliorum concordiam quotidie magis fovere, ac secundum ea, quae hisce Litteris Vobis manifestavimus, Vestram omnem operam intentissimo studio indesinenter impendere in tanti momenti negotio, ut catholica Ecclesia maiora in Bavaria incrementa suscipiat, ac magis in dies prospere feliciterque vigeat et efflorescat.

Demum caelestium omnium munerum auspiciem ac praecipuae Nostrae in Vos benevolentiae pignus Apostolicam Benedictionem intimo cordis affectu Vobis ipsis, Venerabiles Fratres, cunctisque Clericis Laicisque fidelibus vigilantiae Vestrae commissis peramanter impertimus.

Datum Romae apud Sanctum Petrum die 23. Martii anno 1865. Pontificatus Nostri Anno Decimono.

Pius PP. IX.

## Ex Allocutione

habita in consistorio secreto die XXVII. martii anni MDCCCLXV.  
quae incipit „Omnium Ecclesiarum cura<sup>1)</sup>“.

### Venerabiles Fratres.

... . Quamquam acerbissimum Nobis attulerint moerorem tristissimae sane res, quae in Mexicano Imperio recens evererunt praeter omnem opinionem, expectationemque Nostram, et filialis observantiae significationes Nobis a Carissimo in Christo Filio Nostro Maximiliano Mexici Imperatore variis temporibus exhibitas, tamen de eisdem rebus in praesentia sermonem habere minime existimamus. Ea enim spe sustentamur fore, ut idem Imperator proprii officii, bonique memor, ac serio considerans, catholicam religionem, eiusque salutarem doctrinam Imperiorum felicitati, stabilitatique, et temporariae quoque populorum prosperitati, ac tranquillitati maxime conducere<sup>2)</sup>, velit a via misere inita pedem referre, et iustissimis Nostris desideriis, ac postulationibus obsequi, et illius catholicae nationis votis, ac reclamationibus satisfacere, et in suo Imperio gravissimas Ecclesiae reparare ruinas, eiusque veneranda iura, libertatem, Sacrosque Antistites, Ministros, et Instituta tueri, ac singularem cum Episcopis praesertim concordiam servare, quemadmodum religio, ac iustitia omnino postulat, et catholicum Principem plane decet.

At nullo modo temperare Nobis possumus, quin hac etiam occasione in amplissimo vestro consensu meritas summasque laudes tribuamus Venerabilibus Fratribus catholici orbis Sacrorum Antistitibus, qui in tanta contra divinam nostram religionem coniuratione, tantaque multorum hominum depravatione, luculentissimam Nobis solatii, gaudii, et consolationis causam quotidie magis suppeditant inter gravissimas, quibus affligimur, acerbitates. Siquidem iidem Venerabiles Fratres Nobis, et huic Petri Cathedrae omnium Ecclesiarum matri et magistrae miro sane amore et obsequio ex animo obstricti, nullisque deterri periculis, aerumnis, et omni humano respectu posthabito, planeque neglectis iniustis decretis a civili auctoritate contra Ecclesias editis, catholicam veritatem, et unitatem, ac supremam Nostram, et Ecclesiae, atque huius Apostolicae Sedis potestatem, auctoritatem, libertatemque, et iura qua voce, qua scriptis animo invicto tutari, ac vindicare

plinam. Si vero in posterum supervenerit difficultas, Sanctitas Sua et Regia Maiestas secum conferre et rem amice componere sibi reservant.“

<sup>1)</sup> Pontifex primo novum Graeco-Melchitis Patriarcham praeficit, antecessoris, quem ob insignia merita laudat, abdicatione post iteratas eius postulationes accepta; deinde Maximiliani II. Bavariae Regis, anno 1864 vita functi, laudes dicit, solemnesque pro eodem exequias in Pontificio Sacello celebrandas enunciat; tum vero ad ea, quae supra, verba facienda progreditur.

<sup>2)</sup> *Huc ref. prop.* 40.

summopere gloriantur, ac simul recentissimis etiam suis Litteris tum ad Nos, tum ad fideles eorum curae commissos datis laetantur palam publiceque ea omnia reiicere ac damnare, quae a Nobis damnantur, neque omittunt sacerdotali robore obsistere nefariis inimicorum hominum consiliis, conatibusque, ac fideles sibi traditos sana doctrina imbuere, et ad salutis semitas perducere. Quo iustissimarum laudum praeconio in primis dignissimi sunt Venerabiles Fratres Italiae Sacrorum Antistites. Etenim ipsi, quamvis gravioribus adversantium iniuriis, et insectationibus obnoxii, omnibusque modis exagitati, tamen ministerium suum strenue implentes nunquam destiterunt, nec desinunt singulari animorum consensione episcopalem attollere vocem, ac vehementer reclamare, et protestari contra singulas reprobandas, iniustissimasque leges a Subalpino Gubernio adversus Ecclesiam, eiusque sacra Instituta, Ministros, ac iura latas, et adversus innumeros fere ac prorsus sacrilegos ausus ab eodem Gubernio admissos. Atque iidem Italiae Episcopi admirabili sane virtute et constantia pro Christo, eiusque Ecclesia fortiter dimicantes, ac de proprii gregis salute solliciti exilium etiam, et carcerem, et aspera quaeque tolerare non pavent, illustria Apostolorum vestigia sectantes, qui ibant gaudentes a conspectu concilii, quoniam digni habiti sunt pro nomine Jesu contumeliam pati <sup>1)</sup>. Quapropter dum gravissimos eorumdem Venerabilium Fratrum angores ex corde dolemus, eorumque passiones Nostras proprias arbitramur, Nostrasque lacrymas cum eorum lacrymis commiscemus, humillimas amantissimo misericordiarum Patri, ac Deo totius consolationis agimus gratias, quod videamus singulari divinae suae gratiae auxilio catholicos Episcopos Nobis, et huic Sanctae Sedi addictissimos, et fidei spiritu vehementer vigere, et pro Ecclesiae suae sanctae defensione viriliter pugnare.

Vos interim, Venerabiles Fratres, in tanta temporum asperitate, in tanto animarum discrimine, pergite pro egregia vestra religione ferventissimas una Nobiscum Deo sine intermissione adhibere preces, ut hanc Apostolicam Sedem tot iniuriis divexatam, Ecclesiam tot vulneribus laceram, et christianam, civilemque rempublicam tot calamitatibus affictam, omnipotenti sua virtute adjuvet et consoletur, utque divinae suae gratiae, et misericordiae divitias super omnes propitius effundens, efficiat, ut omnes populi, gentes, nationes Ipsum, et quem misit, Unigenitum Filium Suum Dominum Nostrum Jesum Christum agnoscant, diligant, vercantur, collaudent, et omnia mandata Eius diligenter servantes eam instant viam, quae ducit ad vitam.

---

<sup>1)</sup> Act. Apostol. V. 41.

## INDICES SYNOPTICI.

---

### Errores in Epistola Encyclica „*Quanta cura*“

d. d. 8. Dec. 1864 proscripti,  
ad paragraphos Syllabi redacti.

---

#### Ad §. V. Errores de Ecclesia eiusque iuribus.

- I. Ecclesiastica potestas non est iure divino distincta et independens a potestate civili; neque eiusmodi distinctio et independentia servari potest, quin ab Ecclesia invadantur et usurpentur essentialia iura potestatis civilis.  
*Cf. prop. 19, 20, 39, 41, 42 Syllabi.* *pag. 4.*
- II. Ecclesiae leges non obligant in conscientia, nisi cum promulgantur a civili potestate.  
*Cf. prop. 20, 28, 39, 41, 42 Syllabi.* *ibid.*
- III. Acta et decreta Romanorum Pontificum ad Religionem et Ecclesiam spectantia indigent sanctione et approbatione, vel minimum assensu potestatis civilis.  
*Cf. prop. eadem et 44 Syllabi.* *ibid.*
- IV. Constitutiones Apostolicae, quibus damnantur clandestinae societates, sive in eis exigatur, sive non exigatur iuramentum de secreto servando, earumque asseclae et fautores anathemate mulctantur, nullam habent vim in illis orbis regionibus, ubi eiusmodi aggregationes tolerantur a civili gubernio.  
*Cf. prop. 20, 24 et §. IV. Syllabi.* *ibid.*
- V. Illis Apostolicae Sedis iudiciis et decretis, quorum obiectum ad bonum generale Ecclesiae, eiusdem iura ac disciplinam spectare declaratur, dummodo fidei morumque dogmata non attingat, potest assensus et obedientia detrectari absque peccato, et absque ulla catholicae professionis iactura.  
*Cf. prop. 22, 11, 12 Syllabi.* *ibid.*
- VI. Ecclesia nihil debet decernere, quod obstringere possit fidelium conscientiam in ordine ad usum rerum temporalium.  
*Cf. prop. 24 Syllabi.* *ibid.*
- VII. Ecclesiae ius non competit, violatores legum suarum poenis temporalibus coercendi.  
*Cf. prop. 24 Syllabi.* *ibid.*
- VIII. Excommunicatio a Concilio Tridentino et Romanis Pontificibus lata in eos, qui iura, possessionesque Ecclesiae invadunt et usurpant, nititur confusione ordinis spiritualis, ordinisque civilis ac politici, ad mundanum dumtaxat bonum consequendum.  
*Cf. prop. 24, 26, 27 et §. IX. Syllabi.* *ibid.*
- IX. Religiosae familiae nullam habent legitimam existendi rationem.  
*Cf. prop. 53, 19, 30, 40 Syllabi.* *pag. 3.*

**Ad §. VI. Errores de societate civili tum in se, tum in suis ad Ecclesiam relationibus spectata.**

- X. Societas domestica seu familia totam suae existentiae rationem a iure dumtaxat civili mutuatur; proindeque ex lege tantum civili dimanant ac pendent iura omnia parentum in filios, cumprimis vero ius institutionis, educationisque curandae.

*Cf. prop. 39, 45, 47, 48 Syllabi.*

*pag. 3.*

- XI. Auferenda est civibus et Ecclesiae facultas, qua eleemosynas christianae caritatis causa palam erogare valeant; quum haec facultas optimae publicae oeconomiae principiis obsistat.

*Cf. prop. 39, 40, 53 Syllabi.*

*ibid.*

- XII. De medio tollenda est lex, qua certis aliquibus diebus opera servilia propter Dei cultum prohibentur, quum eiusmodi lex pariter optimae publicae oeconomiae principiis obsistat.

*Cf. prop. 39, 40, 42, 55, 56, 19, 20 Syllabi.*

*ibid.*

- XIII. Clerus, utpote vero, utilique scientiae et civilitatis progressui inimicus, ab omni iuventutis instituendae, educandaeque cura et officio est amovendus.

*Cf. prop. 45, 47, 48 et §. X. Syllabi.*

*pag. 4.*

- XIV. Conforme est sacrae theologiae, iurisque publici principiis, bonorum proprietatem, quae ab ecclesiis, a familiis religiosis, aliisque locis piis possidentur, civili gubernio asserere et vindicare.

*Cf. prop. 53, 26, 27 Syllabi.*

*ibid.*

**Ad §. VII. Errores de Ethica naturali et christiana.**

- XV. Voluntas populi, publica, quam dicunt, opinione vel alia ratione manifestata, constituit supremam legem, ab omni divino humanoque iure solutam.

*Cf. prop. 56, 57, 59, 60 Syllabi.*

*pag. 3.*

- XVI. In ordine politico facta consummata, eo ipso quod consummata sunt, vim iuris habent.

*Cf. prop. 59, 61, 58 Syllabi.*

*ibid.*

**Ad §. X. Errores qui ad Liberalismum hodiernum referuntur.**

- XVII. Optima societatis publicae ratio, civilisque progressus omnino requirunt, ut humana societas constituatur et gubernetur nullo habito ad religionem respectu, ac si ea non existeret, vel saltem nullo facto veram inter falsasque religiones discrimine.

*Cf. prop. 77, 78, 15, 40, 55 Syllabi.*

*pag. 2.*

- XVIII. Optima est conditio societatis, in qua imperio non agnoscitur officium coercendi sanctis poenis violatores catholicae religionis, nisi quatenus pax publica postulet.

*Cf. prop. 77, 79, 55 Syllabi.*

*ibid.*

- XIX. Libertas conscientiae et cultuum est proprium cuiuscumque hominis ius, quod lege proclamari et asseri debet in omni recte constituta societate.

*Cf. prop. 77, 78, 79, 15, 16, 40, 55 Syllabi.*

*ibid.*

- XX. Ius civibus inest ad omnimodam libertatem, nulla vel ecclesiastica vel civili auctoritate coarctandam, quo suos conceptus quoscumque, sive voce, sive typis, sive alia ratione palam publiceque manifestare ac declarare valeant.

*Cf. prop. 79, 10, 11, 12, 57, 63, 64 Syllabi.*

*ibid.*

# Index et Summarium Actorum

iuxta paginarum seriem disposita.

## Epistola Encyclica *Quanta cura.*

pag.

Ad omnes catholicos Antistites, 8. Dec. 1864 . . . . . 1

Romanorum Pontificum officium pascendi agnos et oves, dammandique funestos errores, perniciososque pravorum hominum conatus. Novissimorum errorum indoles. Viginti eiusmodi errores damnantur. Pestiferorum librorum contagium. Scelerata Christi divinitatem negantium procacitas. Episcopi admonentur, ut fideles ab erroribus defendant, salutaresque veritates edoceant. Communium precum necessitas; indulgentia plenaria in forma Jubilaei conceditur.

Epistola Em. Cardinalis Jacobi Antonelli, a negotiis publicis Sanctitatis Suae, ad catholicos Antistites . . . . . 8

Syllabus praecipuorum errorum transmittitur; eiusdem conficiendi ratio.

Syllabus complectens praecipuos nostrae aetatis errores, qui notantur in Allocutionibus consistorialibus, in Encyclicis, aliisque Apostolicis Litteris Ss. D. N. Pii Papae IX. . . . . 9

§. I. Pantheismus, Naturalismus et Rationalismus absolutus . . . . . 9	§. VI. Errores de societate civili tum in se, tum in suis ad Ecclesiam relationibus spectata . . . . . 12, II
§. II. Rationalismus moderatus . . . . . 10	§. VII. Errores de Ethica naturali et christiana . . . . . 14, II
§. III. Indifferentismus, Latitudinarismus . . . . . 10	§. VIII. Errores de matrimonio christiano . . . . . 15
§. IV. Socialismus, Communismus, Societates clandestinae, Societates biblicae, Societates clerico-liberales . . . . . 11	§. IX. Errores de civili Romani Pontificis principatu . . . . . 16
§. V. Errores de Ecclesia eiusque iuribus . . . . . 11, I	§. X. Errores qui ad Liberalismum hodiernum referuntur . . . . . 16, II

## Acta Ss. D. N. Pii PP. IX.

ex quibus excerptus est Syllabus.

Epist. Encyclica *Qui pluribus.* ad omnes Patriarchas, Primates, Archiepiscopos et Episcopos, 9. Nov. 1846 . . . . . 19

Pius IX. se Summi Pontificatus possessionem suscepisse nunciat. Religionis hostes describit. Concordia inter fidem et rationem; Ecclesiae et Pontificis Romani auctoritas stabilitur; rationalismus, clandestinae sectae, societates biblicae, indifferentismus, communismus, conatus contra clericorum caelibatum, effrenata libertas damnantur. Officia episcoporum, parochorum, sacerdotum, animarum praesertim curam exercentium; recta cleri institutio in Seminariis, exercitia spiritualia sacerdotum commendantur. Salutaria monita praebentur.

Allocutio *Quisque vestrum.* 4. Oct. 1847 . . . . . 26

Patriarchatus Hierosolymitanus latini ritus restituitur. Reprobantur, qui Pontificis nomine abutentes debitam erga principes subiectionem denegare audent.

Allocutio <i>Ubi primum</i> . 17. Dec. 1847 . . . . .	pag. 28
---	---------

Gravissima Ecclesiae damna in Hispania; plures episcopi constituuntur. — Calamitatum catholicae religionis in Russia et Polonia sublevandarum spes affulget. — Reprobatur Scriptum a quodam viro ecclesiastica dignitate insignito elucubratum. quo Apost. Sedis iura coarctare intenditur. — Damnatur indifferentismus religiosus; extra Ecclesiam nulla salus. — Maxima catholicae rei detrimenta in Helvetia. — Sacrarum externarum Missionum eventus. — Subsidia Hibernorum genti praestita.

Allocutio <i>Quibus quantisque</i> . habita Caietae 20. April. 1849 . . . . .	31
---	----

Turbae in Pontificia Ditione et in universa Italia excitatae describuntur. Exponitur series eventuum, qui Pontificem Roma discedere coegerunt. Civilis principatus pro Sedis Apostolicae libertate necessarius adstruitur. Sacrilegia, scelera et pestiferae doctrinae seditiosorum hominum damnantur. Catholicarum nationum auxilia postulatur. Calumniae adversus Pontificem reiiciuntur; clandestinae sectae denuo damnantur. Monita ad episcopos et principes.

\* In Nota ex Allocutione h. d. 29. April. 1848 pravorum libellorum perniciēs ob oculos ponitur. pag. 34.

Epist. Encyclica <i>Nostis et Nobiscum</i> . ad Archiepiscopos et Episcopos Italiae 8. Dec. 1849 . . . . .	42
--	----

Bellum contra catholicam Religionem in Italia. Quanta Religioni catholicae Italia debeat. Perversi conatus traducendi Italiae populos ad Protestantium placita; Socialismi et Communismi insidiae. Sedula populorum instructio, Sacramentorum usus, spiritalia exercitia, sacrae Missiones, zelus adversus scandala et pravae libros, intima cum Apost. Sede connexio commendantur. Obedientia legitima auctoritati exhibenda. Falsa doctrinae de hominum libertate et aequalitate damnantur. Episcoporum officia quoad clericorum instructionem et educationem in Seminariis, quoad religiosas familias, quoad scholas publicas et privatas. Quae principes debeant Ecclesiae. Insigne Religionis catholicae praeconium.

Allocutio <i>Si semper antea</i> . 20. Maii 1850 . . . . .	51
--	----

Pontifex Romam redux catholicis principibus et populis de Apost. Sede bene meritis gratias agit. Afflictus Religionis catholicae et rei publicae status. Episcoporum officia. — Ecclesiae libertas ab Austriae Imperatore restituta. — Ecclesia in Subalpino Regno graviter affligitur. — Ecclesiae pericula in Belgio. — Invitantur populi dissidentes, ut ad sinum s. matris Ecclesiae redeant.

Allocutio <i>In consistoriali</i> . 1. Nov. 1850 . . . . .	55
--	----

Gesta statutaque contra Ecclesiae ius in Sardinia; Conventio a. 1841 inita et immunitas ecclesiastica infracta; plures Episcopi et Religiosi viri violati, eiecti et in exilium pulsi; scholae omnes ab Episcoporum auctoritate subtractae; laicae Potestati summum quoddam et absolutum ius vindicatum. Promptus Pontificis animus ad aequam tractationem ineundam; Gubernii in iniuriis inferendis pertinacia.

Damnatio et prohibitio Operis in sex tomis hispanico idiomate editi sub titulo (latine reddito): „Defensio auctoritatis Guberniorum et Episcoporum contra praetentiones Curiae Romanae, auctore Franc. Vigil. Lima 1848.“ — Litt. Apostol. <i>Multiplices inter</i> . 10. Junii 1851 . . . . .	59
--	----

Gravissimi errores contra Ecclesiam, eiusque potestatem et immunitatem, Romanorum Pontificum auctoritatem, matrimonii sanctitatem et caelibatus legem damnantur. Auctor civilem potestatem in Ecclesia dominari contendit.

Damnatio et prohibitio Operis cui titulus: „Juris ecclesiastici institutiones J. N. Nuytz;“ itemque „In Jus eccles. universum tra-



ctationes“ auctoris eiusdem. — Litt. Apostol *Ad Apostolicas*.  
22. Aug. 1851 . . . . . pag. 61

Auctor Ecclesiam in servitutum civilis imperii redigit; innumeros prope errores Ecclesiae infestos docet.

Allocutio *Quibus luctuosissimis*. 5. Sept. 1851 . . . . . 64

Ecclesiae in Hispania calamitates. Tractationes habitae, Conventio innita; praecipua eiusdem capita. — Similis Conventio cum Magno Duce Hetruriae; praecipui articuli commemorantur. — Tractationes de Conventione cum alio Gubernio „in longinqua regione“ (in America meridionali) ineunda.

Lettera a S. M. il Rè Vittorio Emanuele 9. Sept. 1852. Cum versione latina . . . . . 67

Ecclesiae doctrina de matrimonio; reiicitur matrimonium civile. De exilio Archiepiscopi Taurinensis. De querelis contra Clerum, seditionis accusatum. Effrenata loquendi et scribendi licentia coercenda.

Allocutio *Acerbissimum*. 27. Sept. 1852 . . . . . 73

Gravissima damna Ecclesiae in Neo-Granatensi Republica illata recensentur. Nefandae doctrinae, quibus Ecclesiae persecutores utuntur. Matrimonii Sacramentum defenditur.

\* In Nota ex Litt. Apost. *Deus humanae salutis* d. 3. Nov. 1855, quibus Conventio cum Austriae Imperatore confirmatur, ratio inter Imperium et Sacerdotium brevissima quadam sententia circumscribitur. pag. 76.

Allocutio *Singulari quadam*. 9. Dec. 1854, adstantibus etiam Patriarchis, Primatibus, Archiepiscopis, Episcopis Immaculae B. M. V. Conceptionis definiendae causa Romae congregatis . . . . . 78

Diri errores hoc tempore grassantes. Increduli et clandestinae sectae. Res sacrae a civili potestate usurpatae, novissime iterum in Sardinia. Rationalismus refellitur et damnatur; item indifferentismus religiosus. Quid sentiendum sit de acatholicorum salute, docetur. Cleri et religiosarum mulierum in nuperrimae luis calamitate caritas. Quam perniciosa sit sacrorum ministrorum negligentia. Seminariorum opportunitas et necessitas; clericalis instructionis ratio. Concordia episcoporum inter se et cum Apostolica Sede.

Allocutio *Probe memineritis*. 22. Jan. 1855 . . . . . 82

Damna iterum Ecclesiae illata in Subalpino Regno; ecclesiastica bona civili potestati vindicata; religiosae familiae spoliatae aut gubernii arbitrio subiectae.

Allocutio *Cum saepe*. 26. Julii 1855 . . . . . 84

Afflicta in Subalpino Regno Religionis res denuo lamentatur Pontifex; excommunicationem maiorem, aliasque ecclesiasticas censuras incurrisse declarat iniquarum legum (de quibus in superiori Allocutione sermo) auctores et cooperantes.

Allocutio *Nemo vestrum*. 26. Julii 1855 . . . . . 85

Conventio cum Apost. Sede ab Hispaniae Gubernio violata; Conventionis summa capita denuo indicantur; quomodo infracta. Reclamationes irritae. Leges et decreta Ecclesiae inimica damnantur. — Luctuosissimus status Religionis in Helvetia.

\* Allocutio *Quod pro Apostolica*. 3. Nov. 1855 . . . . . 87

Conventio cum Austriae Imperatore sancita; praecipui eiusdem articuli enarrantur; consentanea Ecclesiae doctrina exponitur.

\* In Nota ex Allocutione *Cum primum*, h. d. 25. Sept. 1857 a Pontifice post 4 mensum iter Urbem reverso, impiorum desiderium perire ostenditur, qui asserunt, „Catholicae Religionis tempus abiisse.“ pag. 88.

Epist. Encyclica <i>Singulari quidem</i> . ad Cardinales, Archiepiscopos et Episcopos universae Ditionis Austriacae, 17. Martii 1856	pag. 92
---	------------

De exequutione Conventionis cum Austriae Imperatore initae. Quo Episcopi adlaborare debeant, ut funestissima christianae rei damna sanent. Indifferentismi et rationalismi systemata profligantur. Provinciales Synodi celebrandae; quae in iisdem statuenda. Spiritualia clericorum exercitia. Adolescentes clerici in Seminariis educantur; institutionis ratio. Christiana iuventutis utriusque sexus educatio; sedula populi instructio; sacrae Missiones commendantur. Visitatio dioecesium et Synodi dioecesanarum; sacerdotum congressus instituendi. Parochorum officia. Relationes de dioecesium statu ad S. Concilii Congreg. mittendae. — Peculiari modo Orientalium rituum Antistites alloquitur Pontifex.

Allocutio <i>Nunquam fore</i> . 15. Dec. 1856	99
---	----

Prostratas Ecclesiae res in Mexicana republica deplorat Pontifex; gubernii laicalis iniqua contra Ecclesiam gesta enumerat; indifferentismi pestem propagatam damnat. Sacrilega decreta reprobantur. Quidam viri ecclesiastici, iniquis consiliis cooperantes, gravissime monentur. — Quae in meridionali America contra Ecclesiam attentata sint, enunciat. — Tristissima Ecclesiae conditio in Helvetia, in Ticinensi praesertim pago.

\* In Nota ex Epistolis Encyclicis *Exsultavit*. d. 21. Nov. 1851, et *Apostolicae Nostrae*. d. 1. Aug. 1854 (qua utraque preces publicae et indulgentiae in forma Jubilaei indifferetismi et incredulitatis pestes, pravorum librorum colluvies, aliaeque huius temporis mala arguuntur. pag. 101.

* Epistola <i>Novum eximiae</i> . ad Episcopum Wratislaviensem, 30. Martii 1857	104
---	-----

Antonii Günther errores summatim perstringuntur. Güntheri obedientia; canonicus J. B. Baltzer pariter se obediare declarat.

Epistola <i>Eximiam tuam</i> . ad Archiepiscopum Coloniensem de Güntherianismi damnatione, 15. Junii 1857	105
---	-----

Decretum S. Congregationis Indicis, quo Güntheri libri prohibentur, exponitur et effugium intercluditur. Praecipui errores recensentur. Episcoporum officium hac in re.

* Epistola Encyclica <i>Qui nuper</i> . ad omnes catholicos Antistites, 18. Junii 1859	107
--	-----

Seditiones in Italia et in Pontificia Ditione excitatae reprobantur. Civilem S. Sedis principatum necessarium esse edicitur. Ad publicas preces hortatur Pontifex.

* Allocutio <i>Ad gravissimum</i> . 20. Junii 1859	108
--	-----

Bellum inter catholicas nationes exortum deploratur; rebelliones in Pontificia Ditione provocatae describuntur, damnantur. Doctrina de civili S. Sedis principatu exponitur, asseritur. Rebellium actus irriti declarantur, illos illorumque cooperatores in excommunicationem maiorem incidisse enunciat.

* Allocutio <i>Maximo animi</i> . 26. Sept. 1859	110
--	-----

Rebellio in Pontificiis Provinciis latius propagata deploratur. Seductorum artes et mendacia; Subalpini Gubernii perfidia in occupandis illis provinciis; iugens religionis et morum perniciēs. Civilem S. Sedis principatum denuo asserit Pontifex, perturbatorum actus reprobatur, irritos esse decernit, illosque cum cooperantibus excommunicationi obnoxios declarat.

* Epist. Encyclica <i>Nullis certe</i> . ad omnes catholicos Antistites, 19. Jan. 1860	112
--	-----

Laudantur Antistites propter preces publicas indictas et ob doctrinam de civili S. Sedis principatu, nec non iustitiae religionisque causam propugnatam. Innumerae catholicorum litterae ad Pontificem, catholici sensus testes.

Gallorum Imperatoris epistola quaedam ad Pontif. vulgata, qua suadet, ut Pontifex rebellium provinciarum possessioni renunciaret. Responsum Pontificis; eiusdemque constantia in civili Rom. Ecclesiae principatu tuendo.

Litterae Apostolicae *Cum catholica*. quibus maioris excommunicationis poena infligitur invasoribus et usurpatoribus aliquot provinciarum Pontificiae ditionis, 26. Martii 1860 . . . 114

Doctrina de civili S. Sedis principatu, eiusdemque indoles declaratur. Quo impiae aggressiones contra eundem tendant. Subalpini Gubernii fraudes et atrocita facinora. Irritae Pontifices reclamaciones. Solemniter pronuntiatur, rebellionis et usurpationis auctores omnesque eorum cooperatores maiori excommunicationi obnoxios esse, eademque excommunicatio poenaeque cum ea coniunctae infliguntur.

Epistola *Dolore haud mediocri*. ad Episcopum Wratislaviensem, 30. April. 1860 . . . 118

Libellus canonici J. B. Baltzer, quo de hominis natura disseritur, Güntherianam renovans doctrinam, reprobatur, eoque catholicam doctrinam laedi declaratur.

\* Allocutio *Omnibus notum*. 13. Iulii 1860 . . . 119

Nova et gravissima vulnera Ecclesiae in Italia inflicta. Scholae pestiferae, scripta, imagines, doctrinae perniciosissimae. Persecutiones violentae contra Antistites et clericos, in Sicilia praesertim et in usurpatis Pontificiae Ditionis provinciis. Impia facinora damnantur.

Allocutio *Noves et ante*. 26. Sept. 1860 . . . 122

Novae usurpationes quarumdam provinciarum Pontificiae Ditionis a Subalpino Gubernio perpetratae; eiusdem Gubernii perfidiae. Pontificius exercitus laudatur; pugna penes oppidum Castelfidardo; honorificentissima mentio eorum, qui in hac pugna occubuerunt. Impudentissima Subalpini Gubernii hypocrisis. Nefaria eius facinora damnantur. Pericula ipsi Urbi imminetia. Promissiones ab uno ex potentissimis Europae principibus factae, effectu carentes. Principium de non-interventu proclamatum; improbat. Europae principes excitantur, Pontificis cum ipsorum causa coniuncta ostenditur. Omnia iura publica proculcata, comunismo aditus patefactus.

Allocutio *Multis gravibusque*. 17. Dec. 1860 . . . 125

Inimicum studium contra Conventiones cum Apost. Sede. Eiusmodi Conventio a Badensi Gubernio abrogata; perversa doctrina de relatione Ecclesiam inter et civilem potestatem, Ecclesiae libertas asseritur. — Damnatur libellus Parisiis editus et commendatus, quo nationalium ecclesiarum schisma docetur. Ecclesiae unitas vindicatur. — Continuae insidiae et persecutiones contra Ecclesiam in Italia describuntur, damnantur. Ecclesiae et Sedis Apostolicae praeconium. — Martyria in Orientis Ecclesia; fidelium constantia laudatur. — Caedes christianorum in Syria; catholicarum gentium liberalitas.

Allocutio *Jamdudum cernimus*. 18. Martii 1861 . . . 129

Ostenditur Pontificem non posse se reconciliare et componere cum moderno „progressu“, „liberalismo“ ac recenti „civilitate.“ Quo eiusmodi liberalismus spectet. — Mira catholicarum gentium erga Apost. Sedem affectio, precumque consensio. Apostrophe ad Christum Dominum, ut Vicarii Sui causam iudicet.

Allocutio *Meminit unusquisque*. 30. Sept. 1861 . . . 133

Quantis modis Ecclesia in Neapolitano Regno a Subalpino Gubernio divexetur; excidiis et vastationibus omnia complentur. — Impia decreta et acta contra Ecclesiam in Mexicana et in Neogranatensi Republica. — Laudatur Antistitum, Cleri, populorum, Romani praesertim populi pietas erga Pontificem. Spontaneae fidelium largitiones ad S. Sedis angustias sublevandas praedicantur.

- Allocutio *Maxima quidem*. adstantibus etiam Patriarchis, Primatibus, Archiepiscopis, Episcopis, solemnibus Ss. Martyrum in Japoniae et Michaelis de Sanctis canonizationis causa Romae congregatis, d. 9. Junii 1862 . . . . . pag. 135
- Teterrimum bellum contra Ecclesiam conflatum describitur. Praecipui errores, quibus nefarii homines his temporibus divina et humana cuncta permiscunt, breviter exponuntur, damnantur. Hypocrisis hominum Religionem in Italia funestantium ostenditur. Ecclesiae pericula in Lusitania. Catholici orbis consensio in doctrina de civili S. Sedis principatu. Monita ad Antistites: commendatur zelus in arcendis erroribus, in cleri institutione, in scholis ab impietate praeservandis. Eximia Antistitum et fidelium laus; amantissimus et gratissimus Pontificis animus propalatur.
- Epistola *Gravissimas inter*. ad Archiepiscopum Monacensem et Frisingensem, 11. Dec. 1862 . . . . . 139
- Libri quidam Jacobi Frohschammer prohibentur. Duo praecipua errorum capita: nimia rationis seu philosophiae iactantia, et nimia eiusdem libertas. Verae philosophiae vires, supernaturalium veritatum excellentia, iusta philosophiae libertas exponuntur.
- Epistola Encyclica *Quanto conficiamur*. ad Italiae Antistites, 10. Aug. 1863 . . . . . 143
- Infinitae recensentur calamitates, quibus Ecclesia in Italia atteritur; indicantur tamen laeti etiam eventus in universo catholico orbe, inter quos martyrii gloria in Ecclesia per Orientem. — Perniciosi quidam errores perstringuntur: indifferentismus religiosus, et insatiabilis dominandi ac acquirendi cupiditas. — Societates clerico-liberales damnantur. — Antistitum zelus excitatur contra multiplices insidias, quibus Religio impetitur. Merita eorum, cleri et fidelium laus.
- Epistola Encyclica *Incredibili*. ad Antistites Neogranatenses, 17. Sept. 1863 . . . . . 147
- Dura persecutio a Gubernio Ecclesiae illata; infandae leges, decreta et facta enumerantur, exprobrantur, damnantur. Clerici quidam Gubernio faventes aut obsequentes gravissime admonentur. Merita Antistitum, cleri et fidelium laus.
- Epistola *Tuas libenter*. ad Archiepiscopum Monacensem et Frisingensem, 21. Dec. 1863 . . . . . 150
- Doctorum virorum catholicorum Conventus Monachii habitus. Pontificis hac de re sollicitudines; earum causae exponuntur; solatium ex acceptis litteris. Enucleatius ostenditur, qui sit habitus rationis ad fidem, qua obligatione adstringantur catholici magistri et scriptores erga Ecclesiam et Apost. Sedem, sive quum agatur de subiectione fidei divinae actu praestanda, sive de subiectione ex conscientia exhibenda. Episcoporum auctoritas quoad eiusmodi Conventus servanda.
- Epistola *Quum non sine*. ad Archiepiscopum Friburgensem in Brisgovia, 14. Julii 1864 . . . . . 154
- Impii eorum conatus, qui Religionem et Ecclesiam e scholis pellere satagunt; funestissima damna exinde orta, quod Religio et Ecclesia a severioribus disciplinis tradendis et a scholis superioribus exclusae fuerint; quatenus graviora imminuant, si eadem e popularibus scholis eiiciantur. Ecclesiae munus in educanda et erudienda iuventute. Quae circa popularium scholarum „reformationem“ a Badensi Gubernio tentata sunt, christianae educationi perneciem afferunt. Antistitis, cleri et populi constantia laudatur et confirmatur.

- \* Epist. Encycl. *Ubi Urbaniano.* ad Antistites in Poloniae Regno et Russico Imperio, 30. Julii 1864 . . . . . pag. 156

Miserria Poloniae conditio; Gubernii Russici in catholica Religione vexanda et extirpanda ferocia. Infensissimi eiusdem actus enarrantur. Schisma a Gubernio violenter propagatum. Rebellium motus reprobantur, sed principibus etiam inculcatur, quae Deo et Ecclesiae debeant. Antistites confortantur.

- Epistola *Singularis Nobisque.* ad Episcopum Montisregalensem, 29. Sept. 1864 . . . . . 159

Damnatur duae a Subalpino Gubernio propositae leges, una adversus Religiosas Familias, altera de clericis militiae adscribendis. Conventus synodalis ab Episcopo habitus laudatur et commendatur.

## Appendix.

- Epistola Encycl. *Mirari.* Gregorii XVI. ad omnes catholicos Antistites, 15. Aug. 1832 . . . . . 161

Cur Pontifex has primas Litteras dare tamdiu distulerit. Multiplices Ecclesiae calamitates. Societates clandestinae. Ecclesiae unitas; Romanae Eccl. auctoritas. Novatorum studia, turbae contra cleric. coelibatum et matrimonii sanctitatem. Indifferentismus religiosus, libertas conscientiae et artis librariae. Obedientia principibus debita. Ecclesia a Regno non separanda. Consociationes „liberales.“ Episcoporum officia. Rationi non nimium tribuendum. Exhortatio ad Principes.

\* In Notis verba exhibentur Leonis XII. ex Ep. Encycl. *Ubi primum.* d. 3. Maii 1824 contra tolerantissimum seu indifferentissimum; nec non verba Pii VIII. ex Ep. Encycl. *Traditi humilitati.* d. 24. Maii 1829 contra eundem indifferentissimum, societates secretas et violatores sanctitatis matrimonii. pag. 162—166.

- Epistola Encycl. *Singulari Nos.* Gregorii XVI. ad omnes catholicos Antistites, 25. Junii 1834 . . . . . 169

Quo fructu prior Ep. Encycl. excepta sit. Liber „Paroles d'un Croyant“ damnatur. Episcoporum officium. Rationalismi fallacia.

- Litt. Apostol. *Dum acerbissimas.* Gregorii XVI. 26. Sept. 1835. Damnatio et prohibitio Operum Georgii Hermes . . . . . 172

Ecclesiae calamitates. Inanis philosophiae commenta; temere in theologiam invecta; damnantur. Episcoporum officium.

\* In Nota refertur Decretum S. Congregationis Indicis d. d. 7. Jan. 1836, quo universum opus (tribus partibus constans) Dogmaticae Christiano-Catholicae ab Hermessio conscriptae reprobatur esse declaratur. pag. 173.

- Epistola *Summa quidem.* Pii IX. ad Archiepiscopum Coloniensem, 25. Julii 1847 . . . . . 175

Aliqui Hermessii assecrae abutuntur Epist. Encycl. d. 9. Nov. 1846; Hermessii doctrina denuo damnatur; a scholis catholicis strenue arcenda.

- Protestatio *Ex quo Apostoli.* Episcoporum, Solemnis Sanctorum Novensilium Martyrum XXVI Japoniae et Michaelis de Sanctis Romae adstantium, die festo Pentecostes (8. Junii) 1862 . . . . . 176

Petri et Apost. Sedis gloria. Ecclesiae calamitates, in Italia praesertim. Apostolicae Sedis libertas et idcirco temporalis Principatus necessitas asseritur; Pontifici illum vindicanti solemniter acclamatur. Inimicorum S. Sedis consilia. Errores a Pontifice damnatos pariter damnant episcopi.

- Responsum Sanctissimi Patris ad hanc episcoporum protestationem 180

Epistola Encycl. <i>Maximae quidem</i> . Pii IX. ad Archiepiscopos et Episcopos Bavariae, 18. Aug. 1864 . . . . .	pag 180
---	------------

Catholicae unitatis necessitas. Evangelica doctrina, Ecclesiae libertas defendenda. Catholicae Religionis encomium. Episcoporum officia quoad scholas populares et superiores, quoad Cleri institutionem in scholis et seminariis. Synodi provinciales commendantur.

Epistola Encyclica <i>Summa quidem aegritudine</i> . Pii IX. ad Archiepiscopos et Episcopos Bavariae, 23. Martii 1865 . . . . .	182
---	-----

Contra Gubernii asserta et gesta innatum episcoporum ius vindicatur erigendi clericorum Seminaria et scholas in iisdem, praesertim theologicas, ad normam Concilii Tridentini. Idem ius etiam Conventione cum Apost. Sede iamdudum sancitum fuit. Quid episcopis agendum sit.

Ex Allocutione <i>Omnium ecclesiarum cura</i> . Pii IX. 27. Martii 1865	185
---	-----

Ecclesiae detrimenta in Mexicano Imperio. Eximia episcoporum, Italiae praesertim, laus, quod in Epistola Encyclica d. d. 8. Dec. 1864 publicanda et vindicanda, omni humano respectu posthabito, singularem constantiam ostenderint. Iniustis Subalpini Gubernii actis et decretis episcopi unanimes obsistunt. Continuae preces commendantur.

---

# Index chronologicus Actorum.

			pag.
1846.	9. Nov.	Epistola Encycl. <i>Qui pluribus</i>	19
1847.	4. Oct.	Allocutio <i>Quisque vestrum</i>	26
1847.	17. Dec.	Allocutio <i>Ubi primum</i>	28
1849.	20. April.	Allocutio <i>Quibus quantisque</i>	31
1849.	8. Dec.	Epist. Encycl. <i>Nostis et nobiscum</i>	42
1850.	20. Mai.	Allocutio <i>Si semper antea</i>	51
1850.	1. Nov.	Allocutio <i>In consistoriali</i>	55
1851.	10. Jun.	Litt. Apost. <i>Multiplikes inter</i>	59
1851.	22. Aug.	Litt. Apost. <i>Ad apostolicæ</i>	61
1851.	5. Sept.	Allocutio <i>Quibus luctuosissimis</i>	64
1852.	9. Sept.	Litt. ad Reg. Sard. <i>La lettera che</i>	67
1852.	27. Sept.	Allocutio <i>Acerbissimum Vobiscum</i>	78
1854.	9. Dec.	Allocutio <i>Singulari quadam</i>	78
1855.	22. Jan.	Allocutio <i>Probe memineritis</i>	82
1855.	26. Jul.	Allocutio <i>Cum sæpe in hoc</i>	84
1855.	26. Jul.	Allocutio <i>Nemo vestrum ignorat</i>	85
1855.	3. Nov.	Allocutio <i>Quod pro apostolica</i>	87
1856.	17. Mart.	Epist. Encycl. <i>Singulari quidem</i>	92
1856.	15. Dec.	Allocutio <i>Numquam fore</i>	99
1857.	30. Mart.	Epist. ad Ep. Wratisl. <i>Novum eximiae</i>	104
1857.	15. Jun.	Ep. ad Archiep. Colon. <i>Eximiam tuam</i>	105
1859.	18. Jun.	Epist. Encycl. <i>Qui nuper per Italiam</i>	107
1859.	20. Jun.	Allocutio <i>Ad gravissimum</i>	108
1859.	26. Sept.	Allocutio <i>Maximo animi</i>	110
1860.	19. Jan.	Epist. Encycl. <i>Nullis certe verbis</i>	112
1860.	26. Mart.	Litt. Apost. <i>Cum catholica ecclesia</i>	114
1860.	30. April.	Epist. ad Ep. Wratisl. <i>Dolore haud mediocri</i>	118
1860.	13. Jul.	Allocutio <i>Omnibus notum</i>	119
1860.	28. Sept.	Allocutio <i>Novos et ante</i>	122
1860.	17. Dec.	Allocutio <i>Multis gravibusque</i>	125
1861.	18. Mart.	Allocutio <i>Jamdudum cernimus</i>	129
1861.	30. Sept.	Allocutio <i>Meminit unusquisque</i>	133
1862.	9. Jun.	Allocutio <i>Maxima quidem</i>	135
1862.	11. Dec.	Ep. ad Archiep. Mon. Fris. <i>Gravissimas inter</i>	139
1863.	10. Aug.	Epist. Encycl. <i>Quanto conficiamur</i>	143
1863.	17. Sept.	Epist. Encycl. <i>Incredibili afflicti sumus</i>	147
1863.	21. Dec.	Ep. ad Archiep. Mon. Fris. <i>Tuas libenter</i>	150
1864.	14. Jul.	Ep. ad Archiep. Friburg. <i>Quum non sine</i>	154
1864.	30. Jul.	Epist. Encycl. <i>Ubi Urbaniano</i>	156
1864.	29. Sept.	Epist. ad Ep. Montisregal. <i>Singularis Nobisque</i>	159
1864.	8. Dec.	Epist. Encycl. <i>Quanta cura</i> 1. cum Epistola Cardinalis J. Antonelli 8. et Syllabo 9.	

## Appendix.

1832.	15. Aug.	Epist. Encycl. Gregorii XVI. <i>Mirari vos</i>	161
1834.	25. Jun.	Ep. Encycl. Gregorii XVI. <i>Singulari Nos</i>	169
1835.	26. Sept.	Litt. Apost. Gregorii XVI. <i>Dum acerbissimas</i>	172
1847.	25. Jul.	Epist. Pii IX. ad Archiep. Colon. <i>Summa quidem animi</i>	175
1862.	8. Jun.	Solemnis Episcoporum Romae adstantium Protestatio coram Ss. D. Pio IX. P. M. <i>Ex quo Apostoli</i>	176
		Responsum Sanctissimi Patris ad hanc protestationem	180
1864.	18. Aug.	Ep. Encycl. Pii IX. <i>Maximæ quidem</i>	180
1865.	23. Mart.	Ep. Encycl. Pii IX. <i>Summa quidem aegritudine</i>	182
1865.	27. Mart.	Allocutio Pii IX. <i>Omnium ecclesiarum cura</i>	185

## Index alphabeticus Actorum.

<i>Acerbissimum.</i>	Allocutio 27. Sept. 1852	pag. 73
<i>Ad apostolicae.</i>	Litt. Apost. 22. Aug. 1851	61
<i>Ad gravissimum.</i>	Allocutio 20. Jun. 1859	108
<i>Cum catholica.</i>	Litt. Apost. 26. Mart. 1860	114
<i>Cum saepe in hoc.</i>	Allocutio 26. Jul. 1855	84
<i>Dolore haud mediocri.</i>	Epist. ad Ep. Wratisl. 30. April. 1860	118
<i>Eximiam tuam.</i>	Ep. ad Archiep. Colon. 15. Jun. 1857	105
<i>Gravissimas inter.</i>	Ep. ad Archiep. Mon. Fris. 11. Dec. 1862	139
<i>Iamdudum cerninus.</i>	Allocutio 18. Mart. 1861	129
<i>In consistoriali.</i>	Allocutio 1. Nov. 1850	55
<i>Incredibili afflictamur.</i>	Epist. Encycl. 17. Sept. 1863	147
<i>La lettera che.</i>	Epist. ad Reg. Sardin. 9. Sept. 1852	67
<i>Maxima quidem.</i>	Allocutio 9. Jun. 1862	135
<i>Maximo animi.</i>	Allocutio 26. Sept. 1859	110
<i>Meminit unusquisque.</i>	Allocutio 30. Sept. 1861	133
<i>Multiplices inter.</i>	Litt. Apostol. 22. Aug. 1851	59
<i>Multis gravibusque.</i>	Allocutio 17. Dec. 1860	125
<i>Nemo vestrum ignorat.</i>	Allocutio 26. Jul. 1855	85
<i>Nostis et nobiscum.</i>	Epist. Encycl. 8. Dec. 1849	42
<i>Novos et ante.</i>	Allocutio 28. Sept. 1860	122
<i>Novum eximiae.</i>	Epist. ad Ep. Wratisl. 30. Mart. 1857	104
<i>Nullis certe verbis.</i>	Epist. Encycl. 19. Jan. 1860	112
<i>Numquam fore.</i>	Allocutio 15. Dec. 1856	99
<i>Omnibus notum.</i>	Allocutio 13. Jul. 1860	119
<i>Probe memineritis.</i>	Allocutio 22. Jan. 1855	82
<i>Quanta cura.</i>	Epist. Encycl. 8. Dec. 1864	1
<i>Quanto conficiamur.</i>	Epist. Encycl. 10. Aug. 1863	143
<i>Quibus luctuosissimis.</i>	Allocutio 5. Sept. 1851	64
<i>Quibus quantisque.</i>	Allocutio 20. April. 1849	31
<i>Qui nuper per Italiam.</i>	Epist. Encycl. 18. Jun. 1859	107
<i>Qui pluribus.</i>	Epist. Encycl. 9. Nov. 1846	19
<i>Quisque vestrum.</i>	Allocutio 4. Oct. 1847	26
<i>Quod pro apostolica.</i>	Allocutio 3. Nov. 1855	87
<i>Quum non sine.</i>	Ep. ad Archiep. Friburg. 14. Jul. 1864	154
<i>Singulari quadam.</i>	Allocutio 9. Dec. 1854	78
<i>Singulari quidem.</i>	Epist. Encycl. 17. Mart. 1856	92
<i>Singularis Nobisque.</i>	Epist. ad Ep. Montisreg. 29. Sept. 1864	159
<i>Si semper antea.</i>	Allocutio 20. Mai 1850	51
<i>Tuas libenter.</i>	Ep. ad Archiep. Mon. Fris. 21. Dec. 1863	150
<i>Ubi primum.</i>	Allocutio 17. Dec. 1847	28
<i>Ubi Urbaniano.</i>	Epist. Encycl. 30. Jul. 1864	156

## Appendix.

<i>Dum acerbissimas.</i>	Litt. Apost. Gregorii XVI. 26. Sept. 1835	172
<i>Ex quo Apostoli.</i>	Protestatio sollemnis episcoporum Romae adstantium coram Pio IX. 8. Jun. 1862	176
<i>Maximae quidem.</i>	Ep. Encycl. Pii IX. 18. Aug. 1864	180
<i>Mirari vos.</i>	Ep. Encycl. Gregorii XVI. 15. Aug. 1832	161
<i>Omnium ecclesiarum cura.</i>	Allocutio Pii IX. 27. Mart. 1865	185
<i>Singulari Nos.</i>	Ep. Encycl. Gregorii XVI. 25. Jun. 1834	169
<i>Summa quidem aegritudine.</i>	Ep. Encycl. Pii IX. 23. Mart. 1865	182
<i>Summa quidem animi.</i>	Ep. Pii IX. ad Archiep. Colon. 25. Jul. 1847	175



## Index Actorum

ex quibus in Notis nonnulla decerpuntur.

### Series chronologica.

			pag.
1824.	3. Mai.	Ep. Encycl. <i>Ubi primum</i> . Art. de tollerantismo et indifferentismo religioso . . . . .	165
1829.	24. Mai.	Ep. Encycl. <i>Traditi humilitati</i> . Art. Societates secretae . . . . .	162
		Art. De Matrimonii sanctitate . . . . .	164
		Art. De indifferentismo religioso . . . . .	166
1848.	29. April.	Allocutio. Art. de libellis perversis . . . . .	34
1851.	21. Nov.	Ep. Encycl. <i>Exsultavit</i> . Art. de indifferentismo . . . . .	101
1854.	1. Aug.	Ep. Encycl. <i>Apostolicae Nostrae</i> . Art. de indifferentismo . . . . .	101
1855.	3. Nov.	Litt. Apost. <i>Deus humanae salutis</i> . Art. de utriusque potestatis concordia . . . . .	76
1857.	25. Sept.	Allocutio. <i>Cum primum</i> . Art. de cath. Ecclesiae perennitate . . . . .	88

### Series alphabetica.

<i>Apostolicae Nostrae</i> .	Ep. Encycl. 1. Aug. 1854 . . . . .	101
<i>Cum primum</i> .	Allocutio 25. Sept. 1857 . . . . .	88
<i>Deus humanae salutis</i> .	Litt. Apostol. 3. Nov. 1855 . . . . .	76
<i>Exsultavit</i> .	Ep. Encycl. 21. Nov. 1851 . . . . .	101
<i>Traditi humilitati</i> .	Ep. Encycl. 24. Mai. 1829 . . . . .	162, 164, 166
<i>Ubi primum</i> .	Ep. Encycl. 3. Mai. 1824 . . . . .	165

## Index Auctorum,

quorum scripta prohibentur.

Auctor non nominatus, adversus Sedis Apost. iura scribens . . . . .	29
Baltzer Jo. Bapt., errores Güntheri sectatur . . . . .	104, 118
Cayla, nationalium ecclesiarum schisma asserit . . . . .	126
Frohschanmer Jac., errores de habitu rationem inter et fidem . . . . .	139, 151, 181
Günther Ant., errores in philosophico-theolog. systemate . . . . .	104, 105, 118, 151
Hermes Georg., errores in philosophico-theologico systemate . . . . .	172, 175
Lamenais Franc., liber „Paroles d'un croyant“, errores politico-religiosi . . . . .	169
Nuytz Jo. Nep., perversae doctrinae de ecclesia et civili potestate . . . . .	61
Rénan et Socii Christum Dominum impie blasphemantes . . . . .	5
Vigil Franc., perversae doctrinae de ecclesia et civili potestate . . . . .	59

## Index Regnorum seu Terrarum

de quibus in Actis sermo fit, ut Ecclesiae conditio in iisdem exponatur.

---

- Americae meridionalis Respublicae*, de Conventione tractatur 67, Eccl. misere vexatur 102.
- Asiae Orientalis Regna*, martyria 128, 144.
- Austria*, Conventio cum Ap. Sede, Eccl. libertas 54, 76, 87; episcoporum congressus 92.
- Baden*, Conventio abrogata 126; Eccl. e popularibus scholis eiecta 154.
- Bavaria*, plura Ecclesiae iura neglecta 181; Episcopis Theologiae in Seminariis docendae libertas negatur 182.
- Belgium*, Eccl. pericula 54.
- Cochinchina*, martyria 128, 144.
- Corea*, martyria 128.
- Helvetia*, cath. rei detrimenta 30, 87, 103.
- Hetruria*, Conventio inita 66; vide Italia.
- Hibernia*, catholicorum subsidia 29.
- Hierosolymitanus Patriarchatus* lat. ritus restituitur 26.
- Hispania*, Ecclesiae damna 28, Conventio inita 64, violata 85.
- Italia universa*, seditiones et sacrilegia 31, 42, 51; acerbissimum adversus Eccl. bellum 107, 119, 127, 129, 133, 137, 143, 159, 176, 186; quantum debeat Apost. Sedi 42.
- Lusitania*, Eccl. pericula 138.
- Mexicana Respublica*, quae contra Eccl. attentata sint 99, 134; Ecclesiae detrimento in Mexicano Imperio 185.
- Neapolitanum Regnum*, Eccl. calamitates 121, 127, 133; vide Italia.
- Neogranatensis Respublica*, Eccl. nefario modo vexata 73, 134, 147.
- Orientalis Asiae Regna*, vide Asia.
- Palaestina*, Patriarchatus Hierosolymit. lat. rit. restit. 26.
- Polonia*, spes melioris conditionis 29; dirissima persecutio contra Eccl. 156.
- Pontificia Ditio*, seditiones et sacrilegia 31, 42, 51, 107, 108, 161; usurpatio a Subalpino Gubernio attentata 110, 112; Excommunicatio contra rebelles et usurpatores 114; nova facinora et usurpationes 120, 122, 127, 129, 176, 186.
- Russia*, spes melioris conditionis 29, dirissima persecutio contra Eccl. 156.
- Sardiniae Regnum*, Eccl. gravissime afflicta 54, 55, 71, 79, 82, 84; vide Italia.
- Sicilia* vide Neapolitanum Regnum.
- Sinarum Imperium*, martyria 128.
- Subalpinum Regnum*, vide Sardiniae Regnum, Italia, Pontificia Ditio, Neapolit. Regnum.
- Syria*, christianorum caedes 128.
- Ticinensis Pagus* in Helvetia. Ecclesia vexatur 103.
- Touchinense Regnum*, martyria 128, 144.
-

## Index rerum praecipuarum, quae in his Apostolicae Sedis Actis aperto sermone tractantur.

---

**Nota.** Non indicantur hic errores et doctrinae vel facta cum eisdem connexa, aut veritates illis oppositae, quippe quae omnia in Syllabo (pag. 9—16, et I, II) ordine satis obvio disposita reperiuntur, et etiam in Indicibus Auctorum et Regnorum breviter attinguntur. Sunt tamen praeter ea alia quoque observatu digna, quae in sequentibus indicata invenies.

- Apostolicae Sedis munus, auctoritas, necessitas unitatis cum eadem 1, 21, 29, 42, 46, 59, 61, 78, 81, 126, 130, 153, 163, 176 seqq. 180.
- Caritas Cleri, religiosarumque mulierum in suis calamitate 81.
- — catholicorum erga Hibernos 29, Syros 128.
- Castelfidardense praelium 123.
- Catholicorum largitiones Pontifici oblatae 41, 131, 134, 139, 147, 179.
- — — litterae obsequii testes ad Pontificem 112.
- Cleri institutio, Seminariorum necessitas 24, 48, 81, 96, 139, 168, 172, 175, 181, 182 sqq. vide Caritas, Sacerdotes, Congressus.
- Concilia Provincialis commendantur 95, 182.
- Congressus episcoporum laudantur 92, 180, 182.
- — — iuges clericorum ad scientiam et pietatem fovendam 97.
- Conventus doctorum virorum Monachii a. 1863 habitus 150, 181.
- — prosynodales laudantur 159.
- Ecclesiae catholicae insignia praeconia 47, 50, 128, 129, 144, 181.
- Educatio vide Scholae.
- Episcoporum officia 5, 23, 40, 44, 53, 81, 92, 95, 98, 138, 146, 163, 168, 174, 175, 180 sq., 183 sq.; vide Congressus.
- Exercitia spiritualia clericorum 25, 96.
- — — laicorum 45.
- Exercitus Pontificius, eo abutuntur rebelles 36, novus exercitus laudatur 122, pugna cum invasoribus 123.
- Gallorum Imperatoris Epistola ad Pontificem, quo suadet, ut Pontifex rebellium provinciarum possessioni renuntiet 113; irritae promissiones 124.
- Instituta, vide Scholae.
- Jubilaeum h. c. indulgentia in forma iubilaei pro anno 1865 conceditur 6.
- Largitiones, vide Catholicorum larg.
- Mariae V. Beatissimae, Immaculata Conceptio definitur 78, 82, 101.
- Missionum externarum pro fide propaganda felices eventus 30.
- — pro excitanda fidelium religione 45, 97.
- Ordines religiosi, eorum utilitas et recta institutio 3, 48, 65, 90.
- Orientalium Ritus, Ap. Sedis curae 98.
- Parochorum officia 24, 44, 49, 81, 98, 146.
- Pius IX., iter per Italiam 88; Roma fugit 31 sq. 51; Urbem redit 51 sq.
- Preces publicae indicuntur 6, 107, 112.
- Principum catholicorum officia 26, 38, 41, 49, 125, 158, 169, 179, 181; auxilia R. Pontifici praestita 38, 51 sq.; detrectata 124.
- Romani Pontifices, vide Apost. Sedes.
- Sacerdotum, animarum praesertim curam exercentium, officia 24, 81, 95, 97.
- Scholae, et educationis Instituta, Ecclesiae auctoritas servanda 49, 97, 120, 139, 154, 181; quoad scholas praesertim populares 155, 181.
- Seminaria, vide Cleri institutio.
- Synodus Dioecesanæ commendantur 97; vide Conventus prosynodales.
- Visitatio canonica Dioecesium 97.
-

# Index paginarum, ubi errores in Syllabo descripti notantur et refelluntur.

Numeri latini propositionum in Syllabo descriptarum seriem, arabici vero paginas indicant.

- §. I. Pantheismus, Naturalismus, et Rationalismus absolutus. — 178.
- |                            |                                |
|----------------------------|--------------------------------|
| I. 137.                    | V. 20, 94, 136, 153, 155, 163. |
| II. 137.                   | VI. 20, 136, 137, 155, 163.    |
| III. 137, 154.             | VII. 20, 136.                  |
| IV. 20, 94, 137, 154, 172. |                                |
- §. II. Rationalismus moderatus. — 171, 172, 175, 182.
- |                                       |                               |
|---------------------------------------|-------------------------------|
| VIII. 79, 105, 106, 154, 169, 172.    | XII. 142, 151, 167.           |
| IX. 79, 105, 106, 140, 141, 152, 169. | XIII. 81, 105, 106, 151, 153. |
| X. 142, 152.                          | XIV. 151, 154.                |
| XI. 142, 167.                         | Nota. 104, 105, 118.          |
- §. III. Indifferentismus, Latitudinarismus. — 30, 151.
- |  |                                  |
|--|----------------------------------|
| XV. 59, 137, 166.                        | XVII. 44, 80, 94, 129, 144, 165. |
| XVI. 22, 30, 44, 93, 129, 146, 165, 171. | XVIII. 43.                       |
- §. IV. Socialismus, Communismus, Societates clandestinae, Societates biblicae, Societates clerico-liberales. 22, 34, 40, 43, 45, 46, 65, 78, 146, 162, 168, 178.
- §. V. Errores de Ecclesia eiusque iuribus. — 178
- |                                       |                                |
|---------------------------------------|--------------------------------|
| XIX. 79, 126, 136.                    | XXIX. 103.                     |
| XX. 89, 134, 148, 163.                | XXX. 58, 59, 90.               |
| XXI. 44, 59, 80, 146, 171, 183.       | XXXI. 74, 90, 100.             |
| XXII. 152.                            | XXXII. 58, 159.                |
| XXIII. 60.                            | XXXIII. 49, 89, 151, 182.      |
| XXIV. 61, 89.                         | XXXIV. 62, 126, 163, 164, 176. |
| XXV. 61.                              | XXXV. 62.                      |
| XXVI. 65, 74, 91, 100, 103, 148, 178. | XXXVI. 62, 163.                |
| XXVII. 35, 115, 136.                  | XXXVII. 126, 131, 163          |
| XXVIII. 89, 101, 102, 148.            | XXXVIII. 61.                   |
- §. VI. Errores de societate civili tum in se, tum in suis ad Ecclesiam relationibus spectata. — 178.
- |   |  |
|---|--|
| XXXIX. 137.   | XLVII. 49, 57, 89, 120, 127, 146, 154, 162, 178, 181, 184.       |
| XL. 20, 37, 38, 42, 88, 128, 129, 137, 146, 155, 158, 163, 181, 185 | XLVIII. 120, 155, 162, 178, 184.                                 |
| XLI. 61, 89, 148.   | IL. 66, 89, 136, 148, 157.                                       |
| XLII. 60, 62.   | L. 77, 90, 102.  |
| XLIII. 56, 58, 126.   | LI. 59, 73, 86, 90, 157.   |
| XLIV. 49, 56, 89, 136, 148.   | LII. 91, 103.  |
| XLV. 49, 57, 65, 89, 120, 155, 162, 178, 181, 182, 184.             | LIII. 74, 76, 83, 84, 86, 91, 100, 120, 127, 133, 148, 159, 178. |
| XLVI. 49, 75, 81, 89, 103, 162, 178, 182, 184.                      | LIV. 60.   |
|   | LV. 76, 168.   |
- §. VII. Errores de ethica naturali et christiana. — 131, 137, 178.
- |                           |  |
|---------------------------|--|
| LVI. 136.                 | LXI. 131.  |
| LVII. 136, 142, 154.      | LXII. 124.                                       |
| LVIII. 133, 137, 145, 154 | LXIII. 23, 28, 46, 115, 125, 127, 158, 167, 170. |
| LIX. 137.                 | LXIV. 39.  |
| LX. 137.                  |  |

## §. VIII. Errores de matrimonio christiano. — 164.

LXV. 62, 68, 77.

LXVI. 62, 68, 77.

LXVII. 62, 77.

LXVIII. 59, 62, 103.

LXIX. 62.

LXX. 62.

LXXI. 62.

LXXII. 62.

LXXIII. 68, 77.

LXXIV. 62, 77, 89.

Nota. 22, 59, 164.

## §. IX. Errores de civili Romani Pontificis principatu.

LXXV. 62, 176.

LXXVI. 36, 37, 126, 130, 177.

Nota. 35, 37, 52, 107, 109, 111, 112, 115,

121, 125, 130, 138, 177.

## §. X. Errores qui ad Liberalismum hodiernum referuntur. — 121.

LXXVII. 86, 166.

LXXVIII. 74, 148, 166.

LXXIX. 23, 34, 39, 45, 65, 66, 75, 89, 101,

110, 120, 127, 133, 146, 148, 157,

166, 170, 178.

LXXX. 35, 36, 38, 124, 128, 129, 134,

138, 164.

## CONSPECTUS LIBRI

---

Epistola Encyclica *Quanta cura.* d. 8. Dec. 1864 ad omnes catholicos Antistites, cum epist. Cardinalis J. Antonelli et Syllabo praecipuorum aetatis nostrae errorum. Pag. 1—18, coll. I, II, III.

Acta Ss. D. N. Pii IX. ex quibus excerptus est Syllabus. Pag. 19—160, coll. III—IX.

Appendix documentorum. Pag. 161—186, coll. IX, X.

Indices Synoptici. Pag. I—XVII.

Errores in Epist. Encycl. *Quanta cura.* d. d. 8. Dec. 1864 proscripti, ad paragraphos Syllabi redacti. Pag. I, II.

Index et Summarium Actorum, etiam Appendicis. Pag. III—X.

Index chronologicus Actorum. Pag. XI.

Index alphabeticus Actorum. Pag. XII.

Index Actorum, ex quibus in Notis nonnulla decerpuntur. Pag. XIII.

Index Auctorum, quorum scripta prohibentur. Pag. XIII.

Index Regnorum seu Terrarum, de quibus in Actis sermo sit, ut Ecclesiae conditio in iisdem exponatur. Pag. XIV.

Index Rerum praecipuarum, quae in his Apostolicae Sedis Actis aperto sermone tractantur. Pag. XV.

Index paginarum, ubi errores in Syllabo descripti notantur et refelluntur. Pag. XVI, XVII.

---

Imprimatur.

Ratisbonae die 13. Maii 1865.

I. Mich. Reger,

Vicarius in Spiritualibus Generalis.

12562

01.  
tutun  
arcella  
25-28

# Preces ante et post Missam dicendae pro opportunitate Sacerdotis. Cum Approbatione Ordinarii.

Roth- und Schwarzdruck in 4°. 18 kr. — 5 ngr.  
 Dasselbe colorirt 1 fl. 12 kr. — 21 ngr.  
 Diese „Preces“, sowie das „Officium Hebdomadae Sanctae“ sind aus dem Quaribrevier extra abgedruckt.

Rouge et noir in 4°. 80 cent.  
 Le même, colorié net 3 Frs.  
*Ces Oraisons ainsi que l'Office de la Semaine Sainte in 4° sont extraits du Breviaire in 4°.*

**Ascensione mentis in Deum** (de) per scilicet rerum creaturarum; auct. Card. Bellarmino. 18°. 30 kr. — 10 ngr. — 1,60

**Biblia Sacra, Novum Testamentum Vulgatae editionis** juxta exemplar Vaticanum. Cum approb. Ord. 8°. 30 kr. — 10 ngr. — 1,60

**Bibliographia dogmatica** compendii dogmaticae usui pernecessaria; collecta et edita a F. W. Goldwitzer. 8°. 36 kr. 12 ngr. — 1,80

**Commentarius literalis in Genesin;** auct. Fr. de Paula Schrank. P. Ord. S. Benedicti. Th. et Ph. Dr. 8°. 2 fl. — 1 Thlr. 10 ngr. — 8,00

**Compendium dogmatum christiano-catholicorum systematicum;** edidit F. W. Goldwitzer. 8°. 1 fl. 12 kr. — 21 ngr. net. 3,00

**Confessarius pro aetate juvenili;** auct. G. M. Wittmann, Episcop. 12°. 15 kr. 5 ngr. — 0,75

— Le même. Troisième édition en latin et en allemand, avec le portrait de l'auteur. Révisée et enrichie d'annotations. 12°. 30 kr. — 10 ngr. — 1,50

**Divini amoris scintillulae, seu preculae** admodum piaae, quibus anima fidelis in vitae sanctitate et Dei amore plurimum crescere confirmarique potuit etc. Ex operibus piissimi Ludovici Blossii, Lactensis abbatis. 18°. 45 kr. — 15 ngr. — 1,80

**Examen ad usum cleri in gratiam praecipue** sacerdotum sacra exercitia obeuntium. Concinnavit J. Deharbe. S. J. Editio altera, paulo auctior. 12°. 24 kr. 7½ ngr. — 1,40

**Gemitu columbae** (de), sive de bono Lacrymarum; auct. card. Bellarmino, 18°. 48 kr. — 15 ngr. — 2,00

**Hymnus S. Casimiri** ad beatam Mariam semper virginem deiparam multiplici lingua nunc primo impressus et quidem latina archetypi versionibus italica, hispanica, gallica, polonica, hungarica, graeca et germanica. Cum horologio mariano quatuordecim linguis impressa, additis melodis pro hymno et horolog. mar. curante Doct. D. Mettenleiter. 8°. 24 kr. — 7½ ngr. — 1,25

**Idea Biblica Ecclesiae Dei;** delineavit Fr. Oberthur. Dr. Th. 6 vol. 8°. 3 fl. — 2 Thlr. — 10,00  
 Chaque vol. séparément 1 fl. — 20 ngr. 2,00

**Imago Virtutum** Rob. Card. Bellarmini. S. J., a Marcello Cervino ejus Nepote adornata et Gregorio XV. Pont. Opt. Max. 18°. 15 kr. — 5 ngr. — 0,75

**Imitatione Christi** (de) libri quatuor, multiplici lingua nunc primo impressi et quidem latina archetypi interpretationibus italica, hispanica, gallica, germanica, anglica, graeca. Cum notis et variis lectionibus curante J. B. Weigl, canon. et officiali. Cum icone chalybi incisa. 8°. 4 fl. — 2 Thlr. 20 ngr. — 10,00  
 Le même. Papier vélin. 5 fl. — 3 Thlr. 10 ngr. — 14,00

**Makrizii, Taki-eddini, historia Coptorum Christianorum in Aegypto.** Arabice edita et in linguam latinam translata ab Dr. Henr. Jos. Wetzer. 8°. 3 fl. — 2 Thlr. — 8,00

**Meditationes, Soliloquia et Manuale** Div. Aur. Augustini, episcop. Collatione manu scriptorum exemplarium emendata et annotatis passim sacrae scripturae allegationibus aucta. Cum vita et effigie S. auctoris. 18°. 48 kr. — 15 ngr. — 1,40

**Meditationes de praecipuis fidei mysteriis** ab usum Clericorum accomodate, et accurata materiae distributione per modum concionis ad praedicandum Dei verbum perutiles; auct. J. Mich. Kroust, S. J. 5 vol. Vitam auctoris adumbravit et praefatus est J. Bapt. Weigl. 12°. 5 fl. — 3 Thlr. 10 ngr. — 10,80

**Psalmorum liber;** auct. de Barth, J. N. Reg. Bav. consiliario eccles. et decanus. Approuvé par Mgr. l'Evêque de Ratisbonne. 8°. 18 kr. — 6 ngr. — 1,00

**Testamentum novum, graeco et latine.** Textum graecum recognovit et vulgatum latinum Clementis VIII jussu editum addidit Fr. H. Reithmayr, SS. Theol. doct. et prof. 8°. 2 fl. 6 kr. — 1 Thlr. 10 ngr. — 6,00

**Theologia naturalis, seu liber creaturarum** Raimundi de Sabunde, ad optimarum editionum fidem denno recognitus. 12°. 3 fl. 2 Thlr. — 8,00

**Theologicae institutiones** D. Mariani Cl. Tobmayer; in compendium redactae ab a. Salomon. theol. doct. Editio II. 2 vol. 8°. 2 fl. 42 kr. — 1 Thlr. 18 ngr. — 8,00

**Thesaurus precum ac Meditationum** atque variorum Instructionum Exercitationumque Spiritualium. Ex probatis auctoribus collectus. Opera P. P. Societatis Jesu. In usum omnis conditionis hominum. Novam et auctiorem editionem. 2 vol. 18°. 1 fl. 12 kr. — 21 ngr. — 3,60

**Vita Div. Aur. Augustini, Episc. hippoensis, auct. incerto.** Ex antiquo codice edidit M. Sintzel. Cum effigie S. Augustini. 18°. 12 kr. — 4 ngr. — 0,75